

Namo tassa bhagavato arahato sammāsambuddhassa

Aṅuttaranikāye

Aṭṭhakanipāta-aṭṭhakathā

1. Paṭhamapaṇṇāsakaṃ

1. Mettāvaggo

1. Mettāsuttavaṇṇanā

1. Aṭṭhakanipātassa paṭhame **āsevitāyāti** ādarena sevitāya. **Bhāvitāyāti** vaḍḍhitāya. **Bahulikatāyāti** punappunaṃ katāya. **Yānikatāyāti** yuttayānasadisakatāya. **Vatthukatāyāti** patiṭṭhānaṭṭhena vatthu viya katāya. **Anuṭṭhitāyāti** paccupaṭṭhitāya. **Paricitāyāti** samantato citāya upacitāya. **Susamāraddhāyāti** suṭṭhu samāraddhāya sukatāya. **Ānisamsāti** guṇā. **Sukhaṃ supatīti**ādīsu yaṃ vattabbaṃ, taṃ ekādasakanipāte vakkhāma.

Appamāṇanti pharaṇavasena appamāṇaṃ. **Tanū saṃyojanā honti, passato upadhikkhayanti** mettāpadaṭṭhānāya vipassanāya anukkamena upadhikkhayasaṅkhātāṃ arahattaṃ pattassa dasa saṃyojanā pahīyantīti attho. Atha vā **tanū saṃyojanā hontīti** paṭighaṇceva paṭighasampayuttasaṃyojanā ca tanukā honti. **Passato upadhikkhayanti** tesamēva kilesūpadhīnaṃ khayasaṅkhātāṃ mettaṃ adhigamavasena passantassa. **Kusalī tena hotīti** tena mettāyanena kusalo hoti. **Sattasaṇḍanti** sattasaṅkhātēna saṇḍena samannāgataṃ, sattabharitanti attho. **Vijetvāti** adaṇḍena asatthēna dhammeneva vijinitvā. **Rājisayoti** isisadisā dhammikarājāno. **Yajamānāti** dānāni dadamānā. **Anupariyagāti** vicariṃsu.

Assamedhantiādīsu porāṇakarājākāle kira sassamedhaṃ, purisamedhaṃ, sammāpāsamaṃ, vācāpeyyanti cattāri saṅgahavatthūni ahesuṃ, yehi rājāno lokamaṃ saṅgaṇhiṃsu. Tattha nipphanasassato dasamabhāgaggahaṇaṃ **sassamedhaṃ** nāma, sassasampādane medhāvitāti attho. Mahāyodhānaṃ chamāsikaṃ bhattavetanānuppādānaṃ **purisamedhaṃ** nāma, purisasaṅgaṇhane medhāvitāti attho. Daliddamanussānaṃ hatthato lekhaṃ gahetvā tīṇi vassāni vinā vaḍḍhiyā sahasadvisahassamattadhanānuppādānaṃ **sammāpāsamaṃ** nāma. Tañhi sammā manusse pāseti hadaye bandhitvā viya ṭhapeti, tasmā sammāpāsanti vuccati. “Tāta, mātulā” tiādinā nayena pana saṅhavācābhaṇaṇaṃ **vācāpeyyamaṃ** nāma, piyavācāti attho. Evaṃ catūhi saṅgahavatthūhi saṅgahitaṃ raṭṭhaṃ iddhaṇceva hoti, phītaṇca, bahuannaṇānaṃ, khemaṃ, nirabbudaṃ. Manussā mudā modamānā ure putte naccētā apārutagharā viharanti. Imaṃ gharadvāresu aggaḷānaṃ abhāvato **niraggaḷanti** vuccati. Ayaṃ porāṇikaṃ paveni.

Aparabhāge pana okkākarājākāle brāhmaṇā imāni cattāri saṅgahavatthūni imaṇca raṭṭhasampattiṃ parivattetvā uddhaṃmūlakaṃ katvā **assamedhaṃ purisamedhanti**ādike pañca yaññe nāma akaṃsu. Tesu assamettha medhanti vadhentīti **assamedho**. Dvīhi pariyaññehi yajitabbassa ekavīsatiyūpassa ekasmiṃ pacchimadviseyeva sattanavutipaṇcapasusatagghātabhiṃsanassa ṭhapetvā bhūmiṇca purise ca avasesasabbavibhavadakkhiṇassa yaññassetamaṃ adhivacanaṃ. Purisamettha medhantīti **purisamedho**. Catūhi pariyaññehi yajitabbassa saddhiṃ bhūmiyā assamedhe vuttavibhavadakkhiṇassa yaññassetamaṃ adhivacanaṃ. Sammettha pāsantīti **sammāpāso**. Divase divase yugacchiggaḷe pavesanaḍḍakasaṅkhātāṃ sammaṃ khipitvā tassa patitokāse vedim katvā saṃhārimēhi yūpādīhi sarassatūnadiyā nimuggokāsato pabhuti paṭilomaṃ gacchantena yajitabbassa satrayāgassetamaṃ

adhivacanam. Vājamettha pivantīti **vājapeyyo**. Ekena pariyaññena sattarasahi pasūhi yajitabbassa beluvayūpassa sattarasakadakkhiṇassa yaññassetam adhvivacanam. Natthi ettha aggaḷāti **niraggaḷo**. Navahi pariyaññehi yajitabbassa saddhiṃ bhūmiyā ca purisehi ca assamedhe vuttavibhavadakkhiṇassa sabbamedhpariyāyanāmassa assamedhavikappassetam adhvivacanam.

Kalampi te nānubhavanti soḷasinti te sabbepi mahāyāgā ekassa mettācittassa vipākamahantatāya soḷasiṃ kalaṃ na agghanti, soḷasamaṃ bhāgaṃ na pāpuṇantīti attho. **Na jinātīti** na attanā parassa jāniṃ karoti. **Na jāpayeti** na parena parassa jāniṃ kāreti. **Mettamsoti** mettāyamānacittakoṭṭhāso hutvā. **Sabbabhūtānanti** sabbasattesu. **Veram tassa na kenacīti** tassa kenaci saddhiṃ akusalaveram vā puggalaveram vā natthi.

2. Paññāsuttavaṇṇanā

2. Dutīye **ādibrahmacariyikāyāti** maggabrahmacariyassa ādibhūtāya. **Paññāyāti** vipassanāya. **Garuṭṭhāniyanti** gāravuppattipaccayabhūtam garubhāvanīyam. **Tibbanti** bahalaṃ. **Paripucchatīti** atthapālīanusandhipubbāparam pucchatī. **Paripañhatīti** pañhaṃ karoti, idañcidañca paṭipucchissāmīti vitakketi. **Dvayenāti** duvidhena. **Anānākathikoti** anānattakathiko hoti. **Atiracchānakathikoti** nānāvidhaṃ tiracchānakathaṃ na katheti. **Ariyam vā tuṇhībhāvanti** ariyatutuṇhībhāvo nāma catutthajjhānam, sesakammaṭṭhānamanasikāropi vaṭṭati. **Jānam jānātīti** jānitabbakaṃ jānāti. **Passam passatīti** passitabbakaṃ passati. **Piyattāyāti** piyabhāvattāya. **Garuttāyāti** garubhāvattāya. **Bhāvanāyāti** bhāvanattāya guṇasambhāvanāya vā. **Sāmaññāyāti** samaṇadhammatthāya. **Ekībhāvāyāti** nirantarabhāvattāya.

3-4. Appiyasuttadvayaṇṇanā

3-4. Tatiye **appiyapasamsīti** appiyajanassa pasamsako vaṇṇabhāṇī. **Piyagarahīti** piyajanassa nindako garahako. Catutthe **anavaññattikāmoti** “aho vata maṃ aññena avajāneyyu”nti anavajānanakāmo. **Akālaññūti** kathākālaṃ na jānāti, akāle katheti. **Asucīti** asucīhi kāyakammādīhi samannāgato.

5. Paṭhamalokadhammasuttavaṇṇanā

5. Pañcame lokassa dhammāti **lokadhammā**. Etehi muttā nāma natthi, buddhānampi honti. Tenevāha – **lokaṃ anuparivattantīti** anubandhanti nappajahanti, lokato na nivattantīti attho. **Loko ca aṭṭha lokadhamme anuparivattatīti** ayañca loko ete anubandhati na pajahati, tehi dhammehi na nivattatīti attho.

Lābho alābhoti lābhe āgate alābho āgatoyevāti veditabbo. **Ayasādīsipi** eseva nayo. **Avekkhati vipariṇāmadhammeti** “vipariṇāmadhammā ime”ti evaṃ avekkhati. **Vidhūpitāti** vidhamitā viddhamāsītā. **Padañca ñatvāti** nibbānapadaṃ jānitvā. **Sammappajānāti bhavassa pāragūti** bhavassa pāram gato nipphattim matthakaṃ patto, nibbānapadaṃ ñatvāva taṃ pāram gatabhāvaṃ sammappajānātīti. Imasmiṃ sutte vaṭṭavivaṭṭam kathitam.

6. Dutiyalokadhammasuttavaṇṇanā

6. Chaṭṭhe **ko visesoti** kiṃ visesakāraṇam. **Ko adhippayāsoti** ko adhikappayogo. **Pariyādāyāti** gahetvā pariniṭṭhapetvā. Idhāpi vaṭṭavivaṭṭameva kathitam.

7. Devadattavipattisuttavaṇṇanā

7. Sattame **acirapakkanteti** saṅghaṃ bhinditvā na cirapakkante. **Ārabbhāti** āgamma paṭicca sandhāya. **Attavipattinti** attano vipattiṃ vipannākāraṃ. Sesapadesupi eseva nayo. **Abhibhuyyāti** abhibhavitvā madditvā.

8. Uttaravipattisuttavaṇṇanā

8. Aṭṭhame **vaṭajālikāyanti** evaṃnāmake vihāre. So kira vaṭavane niviṭṭhattā vaṭajālikāti saṅkhaṃ gato. **Pāturahosīti** imamatthaṃ devaraṅṅo āroccasāmiti gantvā pākaṭo ahoṣi. **Ādibrahmacariyakoti** sikkhattayaṣaṅgahassa sakalasāsanabrahmacariyassa ādibhūto.

9. Nandasuttavaṇṇanā

9. Navame **kulaputtoti** jātikulaputto. **Balavāti** thāmasampanno. **Pāsādikoti** rūpasampattiyā pasādajanako. **Tibbarāgoti** bahalarāgo. **Kimaññatrāti**ādisu ayamatto – kiṃ aññena kāraṇena kathitena, ayaṃ nando indriyesu guttadvāro bhojane mattaññū jāgariyamanuyutto satisampajāññena samannāgato, yehi nando sakkoti paripuṇṇaṃ parisuddhaṃ brahmacariyaṃ carituṃ. Sace imehi kāraṇehi samannāgato nābhavissa, na sakuṇeyyāti. **Itiha tatthāti** evaṃ tattha. Imasmiṃ sutte vaṭṭameva kathitaṃ.

10. Kāraṇavasuttavaṇṇanā

10. Dasame **aññenāññaṃ paṭicaratīti** aññena kāraṇena vacanena vā aññaṃ kāraṇaṃ vacanaṃ vā paṭicchādeti. **Bahiddhā kathaṃ apanāmetīti** bāhirato aññaṃ āgantukakathaṃ otāreti. **Apaneyyesoti** apaneyyo nīharitabbo esa. **Samaṇadūsīti** samaṇadūsako. **Samaṇapalāpoti** vīhīsu vīhipalāpo viya nissāratāya samaṇesu samaṇapalāpo. **Samaṇakāraṇḍavoti** samaṇakacavaro. **Bahiddhā nāsentīti** bahi nīharanti. **Yavakaraṇeti** yavakhette. **Phuṇamānassāti** uccē ṭhāne ṭhatvā mahāvāte opuniyamānassa. **Apasammajjantīti** sāraddhaññānaṃ ekato dubbaladhaññānaṃ ekato karaṇatthaṃ punappunaṃ apasammajjanti, apasammajjanisaṅkhātena vātaggāhinā suppena vā vatthena vā nīharanti. **Daddaranti** daddarasaddaṃ.

Samvāsāyanti samvāsena ayaṃ. **Vijānāthāti** jāneyyātha. **Santavācoti** saṅhavāco. **Janavattīti** janamajjhe. **Raho karoti karaṇaṃ** karaṇaṃ vuccati pāpakammaṃ, taṃ raho paṭicchanno hutvā karoti. **Saṃsappī ca musāvādīti** saṃsappitvā musāvādī, musā bhaṅanto saṃsappati phandaṭīti attho. Imasmiṃ sutte vaṭṭameva kathetvā gāthāsu vaṭṭavivaṭṭaṃ kathitanti.

Mettāvaggo paṭhamo.

2. Mahāvaggo

1. Verañjasuttavaṇṇanā

11. Dutiyassa paṭhame **abhivādetīti** evamādīni **na samaṇo gotamoti** ettha vuttanakārena yojetvā evamettha attho veditabbo “na vandati nāsanā vuṭṭhāti, nāpi ‘idha bhonto nisīdantū’ ti evaṃ āsanena vā nimantetī’ ti. Ettha hi vā-saddo vibhāvane nāma atthe “rūpaṃ niccaṃ vā aniccaṃ vā” tiādisu viya. Evaṃ vatvā aṭṭa attano abhivādanādīni akarontaṃ bhagavantaṃ disvā āha – **tayidaṃ, bho gotama, tathevāti**. Yaṃ taṃ mayā suttaṃ, taṃ tatheva, taṃ savanañca me dassanañca saṃsandati sameti, atthato ekībhāvaṃ gacchati. Na hi bhavaṃ gotamo...pe... āsanena vā nimantetīti. Evaṃ attanā suttaṃ dīṭṭhena nigamētvā nindanto āha – **tayidaṃ, bho gotama, na sampannaevāti** taṃ abhivādanādīnaṃ akaraṇaṃ ayuttamevāti.

Athassa bhagavā attukkaṃsanaparavambhanadosaṃ anupagamma karuṇāsītalena hadayena taṃ aññānaṃ vidhamitvā yuttabhāvaṃ dassetukāmo **nāhaṃ taṃ brāhmaṇā**tiādīmāha. Tatrāyaṃ saṅkhepattho – ahaṃ, brāhmaṇa, appaṭihatena sabbaññutaññāṇacakkhunā olokontopi taṃ puggalaṃ etasmiṃ sadevakādibhede loke na passāmi, yamaṃ abhivādeyyaṃ vā paccuṭṭheyyaṃ vā āsanena vā nimanteyyaṃ. Anacchariyaṃ vā etaṃ, svāhaṃ ajja sabbaññutaṃ patto evarūpaṃ nipaccākārārahaṃ puggalaṃ na passāmi. Apica kho yadāpāhaṃ sampatijātova uttarena mukho sattapadavītiḥarena gantvā sakalaṃ dasasahasilokadhātuṃ olokesiṃ, tadāpi etasmiṃ sadevakādibhede loke taṃ puggalaṃ na passāmi, yamaṃ evarūpaṃ nipaccākāraṃ kareyyaṃ. Atha kho maṃ soḷasakappasahassāyuko khīṇāsavamahābrahmāpi añjaliṃ paggahetvā “tvam loke mahāpuriso, tvam sadevakassa lokassa aggo ca jeṭṭho ca seṭṭho ca, natthi tayā uttaritaro”ti sañjātasomanasso patimānesi. Tadāpi cāhaṃ attanā uttaritaraṃ apassanto āsabiṃ vācaṃ nicchāresiṃ – “aggohamasmi lokassa, jeṭṭhohamasmi lokassa, seṭṭhohamasmi lokassā”ti. Evaṃ sampatijātassāpi mayhaṃ abhivādanādiraho puggalo natthi, svāhaṃ idāni sabbaññutaṃ patto kaṃ abhivādeyyaṃ. Tasmā tvam, brāhmaṇa, mā tathāgatā evarūpaṃ paramanipaccākāraṃ patthayi. Yañhi, brāhmaṇa, tathāgato abhivādeyya vā...pe... āsanena vā nimanteyya, muddhāpi tassa puggalassa rattipariyosāne paripākasītilabandhanaṃ vaṇṭā muttatālapahalaṃ viya gīvato chijjitvā sahasāva bhūmiyaṃ nipateyya.

Evaṃ vuttepi brāhmaṇo duppaññatāya tathāgatassa lokajeṭṭhabhāvaṃ asallakkhento kevalaṃ taṃ vacanaṃ asahamāno āha – **arasarūpo bhavaṃ gotamoti**. Ayaṃ kirassa adhippāyo – yaṃ loke abhivādanapaccuṭṭhānaañjalikammaṃsāmīcikammaṃ “sāmaggirasō”ti vuccati, taṃ bhoto gotamassa natthi. Tasmā arasarūpo bhavaṃ gotamo, arasajātiko arasasabhāvoti. Athassa bhagavā cittamudubhāvajanatthaṃ ujuvipaccanīkabhāvaṃ pariharanto aññathā tassa vacanassa atthaṃ attani sandassento **atthi khvesa, brāhmaṇa, pariyāyoti**ādīmāha.

Tattha **atthi khvesā**ti atthi kho esa. **Pariyāyoti** kāraṇaṃ. Idaṃ vuttaṃ hoti – atthi kho, brāhmaṇa, etaṃ kāraṇaṃ, yena kāraṇena maṃ “arasarūpo bhavaṃ gotamo”ti vadamāno puggalo sammā vadeyya, avitathavādīti saṅkhaṃ gaccheyya. Katamo pana soti? Ye te, brāhmaṇa, rūparasā...pe... phoṭṭhabbarasā, te tathāgatassa pahīnāti. Kiṃ vuttaṃ hoti? Ye te jātivāsena vā upapattivasena vā seṭṭhasammatānampi puthujjanānaṃ rūpārammaṇādīni assādentānaṃ abhinandantānaṃ rajjantānaṃ uppajjanti kāmāsukhassādasāṅkhātā rūparasā, saddarasā, gandharasā, rasarasā, phoṭṭhabbarasā, ye imaṃ lokaṃ gīvāya bandhitvā viya āviñchanti, vatthārammaṇādisāmaggiyañca uppannattā sāmaggirasāti vuccanti. Te sabbepi tathāgatassa pahīnā. “Mayhaṃ pahīnā”ti vattabbepi mamākārena attānaṃ anukkipanto dhammaṃ deseti, desanāvīlāso vā esa tathāgatassa.

Tattha **pahīnāti** cittasantānato vigatā, pajahitā vā. Etasmiṃ panatthe karaṇe sāmivacanaṃ daṭṭhabbaṃ. Ariyamaggasatthena ucchinnaṃ taṇhāvijjāmayāṃ mūlaṃ etesanti **ucchinnamūla**. Tālavatthu viya nesam vatthu katanti **tālāvatthukatā**. Yathā hi tālarukkhaṃ samūlaṃ uddharitvā tassa vatthumatte tasmīṃ padese kate na puna tassa tālassa uppatti paññāyati, evaṃ ariyamaggasatthena samūle rūpādirase uddharitvā tesam pubbe uppannapubbabhāvena vatthumatte cittasantāne kate sabbepi te tālāvatthukatāti vuccanti. Avirūhidhammattā vā matthakacchinnatālo viya katāti tālāvatthukatā. Yasmā pana evaṃ tālāvatthukatā anabhāvaṃkatā honti, yathā nesam pacchābhāvo na hoti, tathā katā honti. Tasmā āha – **anabhāvaṃkatāti**. **Āyatiṃ anuppādadharmā**ti anāgate anuppajjanakasabhāvā.

No ca kho yaṃ tvam sandhāya vadesīti yañca kho tvam sandhāya vadesi, so pariyāyo na hoti. Nanu ca evaṃ vutte yo brāhmaṇena vutto sāmaggirasō, tassa attani vijjāmānatā anuññatā hotīti? Na hoti. Yo hi naṃ sāmaggirasam kātuṃ bhabbo hutvā na karoti, so tadabhāvena arasarūpoti vattabbataṃ arahati. Bhagavā pana abhabbova etaṃ kātuṃ, tenassa kāraṇe abhabbatam pakāsento āha – “no ca kho yaṃ tvam sandhāya vadesi”ti. Yaṃ pariyāyaṃ sandhāya tvam maṃ “arasarūpo”ti vadesi, so amhesu neva vattabboti.

Evaṃ brāhmaṇo attanā adhippetam arasarūpataṃ āropetaṃ asakkonto athāparaṃ **nibbhogo**

bhavantiādīmāha. Sabbapariyāyesu cettha vuttanayeneva yojanākkamaṃ viditvā sandhāyabhāsitamatthaṃ evaṃ veditabbaṃ – brāhmaṇo tadeva vayovuddhānaṃ abhivādanādikammaṃ loke “sāmaggiaparibhogo”ti maññamāno tadabhāvena ca bhagavantam “nibbhogo”tiādīmāha. Bhagavā ca yvāyaṃ rūpādīsu sattānaṃ chandarāgaparibhogo, tadabhāvaṃ attani sampassamāno aparaṃ pariyāyamanujāni.

Puna brāhmaṇo yaṃ loke vayovuddhānaṃ abhivādanādikulasamudācārakammaṃ lokiyā karonti, tassa akiriyaṃ sampassamāno bhagavantam **akiriyavādoti** āha. Bhagavā pana yasmā kāyaduccarītādīnaṃ akiriyaṃ vadati, tasmā taṃ akiriyavāditaṃ attani sampassamāno aparaṃ pariyāyamanujāni. Tattha ṭhapetvā kāyaduccarītādīni avasesā akusalā dhammā **anekavihitā pāpakā akusalā dhammā**ti veditabbā.

Puna brāhmaṇo tadeva abhivādanādikammaṃ bhagavati apassanto “imaṃ āgama ayaṃ lokatanti lokapavenī ucchijjati”ti maññamāno bhagavantam **ucchedavādoti** āha. Bhagavā pana yasmā pañcakāmaguṇikarāgassa ceva akusalacittadvayasampayuttassa ca dosassa anāgāmmimaggena ucchedaṃ vadati, sabbākusalasambhavassa pana mohassa arahattamaggena ucchedaṃ vadati, ṭhapetvā te tayo avasesānaṃ pāpakānaṃ akusalānaṃ dhammānaṃ yathānurūpaṃ catūhi maggehi ucchedaṃ vadati, tasmā taṃ ucchedavādaṃ attani sampassamāno aparaṃ pariyāyamanujāni.

Puna brāhmaṇo “jigucchati maññe samaṇo gotamo idaṃ vayovuddhānaṃ abhivādanādikulasamudācārakammaṃ, tena taṃ na karoti”ti maññamāno bhagavantam **jegucchīti** āha. Bhagavā pana yasmā jigucchati kāyaduccarītādīhi, yāni kāyavacīmanoduccarītāni ceva yāva ca akusalānaṃ lāmakadhammānaṃ samāpatti samāpajjanā samaṅgibhāvo, taṃ sabbampi gūthaṃ viya maṇḍanakajātiko puriso jigucchati hiriyati, tasmā taṃ jegucchitaṃ attani sampassamāno aparaṃ pariyāyamanujāni. Tattha **kāyaduccaritenā**tiādi karaṇavacanaṃ upayogatthe daṭṭhabbaṃ.

Puna brāhmaṇo tadeva abhivādanādikammaṃ bhagavati apassanto “ayaṃ idaṃ lokajettḥhakammaṃ vineti vināseti, atha vā yasmā etaṃ sāmīcikkammaṃ na karoti, tasmā ayaṃ vinetabbo niggaṇhitabbo”ti maññamāno bhagavantam **venayikoti** āha. Tatrāyaṃ padattho – vinayātī vinayo, vināsetīti vuttaṃ hoti. Vinayo eva **venayiko**. Vinayaṃ vā arahatīti **venayiko**, niggahaṃ arahatīti vuttaṃ hoti. Bhagavā pana yasmā rāgādīnaṃ vinayāya vūpasamāya dhammaṃ desetī, tasmā venayiko hoti. Ayameva cettha padattho – vinayāya dhammaṃ desetīti venayiko. Vicitrā hi taddhitavutti. Svāyaṃ taṃ venayikabhāvaṃ attani sampassamāno aparaṃ pariyāyamanujāni.

Puna brāhmaṇo yasmā abhivādanādīni sāmīcikkammāni karontā vayovuddhe tosentī hāsentī, akarontā pana tāpentī vihesentī domanassaṃ nesaṃ uppādentī, bhagavā ca tāni na karoti, tasmā “ayaṃ vayovuddhe tapatī”ti maññamāno sappurisācāravirahitattā vā “kapaṇapuriso aya”nti maññamāno bhagavantam **tapassīti** āha. Tatrāyaṃ padattho – tapatīti tapo, roseti vihesetīti attho. Sāmīcikkammākaraṇassetam adhivacanaṃ. Tapo assa atthīti **tapassī**. Dutiye atthavikappe byañjanāni avicāretvā loke kapaṇapuriso tapassīti vuccati. Bhagavā pana ye akusalā dhammā lokaṃ tapanato tapanīyāni vuccanti, tesam pahīnattā yasmā tapassīti saṅkhaṃ gato. Tasmā taṃ tapassitaṃ attani sampassamāno aparaṃ pariyāyamanujāni. Tatrāyaṃ vacanattho – tapantīti tapā, akusaladhammānametaṃ adhivacanaṃ. Te tape assi nirassi pahāsi viddhamsīti tapassī.

Puna brāhmaṇo taṃ abhivādanādikammaṃ devalokagabbhasampattiyā devalokapaṭṭisandhipaṭilābhāya saṃvattatīti maññamāno bhagavati cassa abhāvaṃ disvā bhagavantam **apagabbhoti** āha. Kodhavasena vā bhagavato mātukucchismiṃ paṭisandhiggahaṇe dosaṃ dassentopi evamāha. Tatrāyaṃ vacanattho – gabbhato apagatoti **apagabbho**, abhabbo devalokūpapattim pāpuṇitunti adhippāyo. Hīno vā gabbho assatīti apagabbho. Devalokagabbhaparibāhirattā āyatim hīnagabbhapaṭilābhahāgīti. Hīno vāssa mātukucchismiṃ gabbhavāso ahoṣīti adhippāyo. Bhagavato pana yasmā āyatim gabbhaseyyā apagatā, tasmā so taṃ apagabbhataṃ attani sampassamāno aparaṃ

pariyāyamanujāni. Tatra ca **yassa kho, brāhmaṇa, āyatim gabbhaseyyā punabbhavābhinibbatti pahīnāti** etesaṃ padānaṃ evamattho daṭṭhabbo – “brāhmaṇa, yassa puggalassa anāgate gabbhaseyyā punabbhave ca abhinibbatti anuttarena maggena vihatakarāṇatā pahīnā. Gabbhaseyyāgahaṇena cettha jalābujayoni gahitā, punabbhavābhinibbattiggahaṇena itarā tisso”pi.

Apica gabbhassa seyyā **gabbhaseyyā**. Punabbhavo eva abhinibbatti **punabbhavābhinibbattīti** evamettha attho daṭṭhabbo. Yathā ca viññāṇaṭṭhiṭīti vuttepi na viññāṇato aññā ṭhīti atthi, evamidhāpi na gabbhato aññā seyyā veditabbā. Abhinibbatti ca nāma yasmā punabbhavabhūtāpi apunabbhavabhūtāpi atthi, idha ca punabbhavabhūtā adhippetā, tasmā vuttaṃ – “punabbhavo eva abhinibbatti punabbhavābhinibbattī”ti.

Evam āgatakālato paṭṭhāya arasarūpatādīhi aṭṭhahi akkosavatthūhi akkosantampi brāhmaṇaṃ bhagavā dhammissaro dhammarājā dhammasāmī tathāgato anukampāya sītaleneva cakkhunā brāhmaṇaṃ olekento yaṃ dhammadhātum paṭivijjhivā desanāvīlāsappattā nāma hoti, tassā dhammadhātuyā suppaṭividdhattā vigatavalāhake nabhe puṇṇacando viya ca saradakāle sūriyo viya ca brāhmaṇassa hadayandhakāraṃ vidhamento tāniyeva akkosavatthūni tena tena pariyāyena aññāthā dassetvā punapi attano karuṇāvippahāraṃ aṭṭhahi lokadhammehi akampiyabhāvena paṭiladdhatādiguṇalakkhaṇaṃ pathavisamacittataṃ akuppadhammatañca pakāsento “ayaṃ brāhmaṇo kevalaṃ palitasirakhaṇḍadantavalittacatādīhi attano vuddhabhāvaṃ sallakkheti, no ca kho jānāti attānaṃ jātiyā anugataṃ jarāya anusaṭṭhaṃ byādhino adhibhūtaṃ maraṇena abbhātaṃ ajja maritvā puna sveva uttānaseyyadāraḥkabhāvagamanīyaṃ. Mahantena kho pana ussāhena mama santikaṃ āgato, tadassa āgamaṃ sātthakaṃ hotū”ti cintetvā imasmim loke attano appaṭisamaṃ purejātabhāvaṃ dassento **seyyathāpi, brāhmaṇāti**adinā nayena brāhmaṇassa dhammadesanaṃ vaḍḍhesi.

Tattha **seyyathāpi**tiadinā heṭṭhā vutanayeneva attho veditabbo. Ayaṃ pana viseso – heṭṭhā vuttanayeneva hi te kukkuṭapotakā pakkhe vidhunantā taṃkhaṇānurūpaṃ viravantā nikkhamanti. Evam nikkhamantānañca tesam yo paṭhamataraṃ nikkhamati, so jeṭṭhoti vuccati. Tasmā bhagavā tāya upamāya attano jeṭṭhabhāvaṃ sādhetukāmo brāhmaṇaṃ pucchati – **yo nu kho tesam kukkuṭacchāpotakānaṃ...pe... kinti svāssa vacanīyoti**. Tattha **kukkuṭacchāpakānanti** kukkuṭapotakānaṃ. **Kinti svāssa vacanīyoti** so kinti vacanīyo assa, kiṃ vattabbo bhavēyya jeṭṭho vā kaniṭṭho vāti.

“**Jeṭṭho**”tissa, **bho gotama, vacanīyoti**, bho gotama, so jeṭṭho iti assa vacanīyo. Kasmāti ce? **So hi nesam jeṭṭhoti**, yasmā so nesam vuddhataroti attho. Athassa bhagavā opammaṃ sampaṭipādentō **evameva khoti** āha, yathā so kukkuṭapotako, evam ahampi. **Avijjāgatāya pajāyāti** avijjā vuccati aññānaṃ, tattha gatāya. **Pajāyāti** sattadhivacanametam, avijjākosassa anto pavitṭhesu sattesūpi vuttaṃ hoti. **Aṇḍabhūtāyāti** aṇḍe bhūtāya pajātāya sañjātāya. Yathā hi aṇḍe nibbattā ekacce sattā aṇḍabhūtāti vuccanti, evamayaṃ sabbāpi pajā avijjaṇḍakose nibbattattā aṇḍabhūtāti vuccati. **Pariyonaddhāyāti** tena avijjaṇḍakosena samantato onaddhāya baddhāya veṭhitāya. **Avijjaṇḍakosaṃ padāletvāti** taṃ avijjāmayam aṇḍakosaṃ bhinditvā. **Ekova loketi** sakalepi lokasannivāse ahameva eko adutiyo. **Anuttaraṃ sammāsambodhiṃ abhisambuddhoti** uttararahitaṃ sabbasetṭhaṃ sammā sāmañca bodhiṃ, atha vā pasatthaṃ sundarañca bodhiṃ. Arahattamaggañāṇassetam nāmaṃ, sabbaññūtaññāṇassāpi nāmameva. Ubhayampi vaṭṭati. Aññesaṃ arahattamaggo anuttarā bodhi hoti, na hotīti? Na hoti. Kasmā? Asabbaguṇadāyakattā. Tesañhi kassaci arahattamaggo arahattaphalameva deti, kassaci tisso vijjā, kassaci cha abhiññā, kassaci catasso paṭisambhidā, kassaci sāvakaṇāpāramiññaṃ. Paccekabuddhānampi paccekabodhiññaṃameva deti, buddhānaṃ pana sabbaguṇasampattiṃ deti abhiseko viya rañño sabbalokissarabhāvaṃ. Tasmā aññassa kassaci anuttarā bodhi na hotīti. **Abhisambuddhoti** abbaññāsīm paṭivijjhīm, pattomhi adhigatomhīti vuttaṃ hoti.

Idāni yadetaṃ bhagavatā “evameva kho”tiadinā nayena vuttaṃ opammaṃsampaṭipādanam, taṃ evam atthena saṃsanditvā veditabbaṃ – yathā hi tassā kukkuṭiyā attano aṇḍesu

adhisayanāditividhakiriyākaraṇaṃ, evaṃ bodhipallaṅke nisinnassa bodhisattabhūtaṃ bhagavato attano santāne aniccaṃ, dukkhaṃ, anattāti tividhānupassanākaraṇaṃ. Kukkuṭiyā tividhakiriyāsampādanena aṇḍānaṃ apūtibhāvo viya bodhisattabhūtaṃ bhagavato tividhānupassanāsampādanena vipassanāñāṇassa aparihāni. Kukkuṭiyā tividhakiriyākaraṇena aṇḍānaṃ allasinehapariyādānaṃ viya bodhisattabhūtaṃ bhagavato tividhānupassanāsampādanena bhavattayānugatanikantisinehapariyādānaṃ. Kukkuṭiyā tividhakiriyākaraṇena aṇḍakapālānaṃ tanubhāvo viya bodhisattabhūtaṃ bhagavato tividhānupassanāsampādanena avijjaṇḍakosassa tanubhāvo, kukkuṭiyā tividhakiriyākaraṇena kukkuṭapotakassa pādanakhatuṇḍakānaṃ thaddhakharabhāvo viya bodhisattabhūtaṃ bhagavato tividhānupassanāsampādanena vipassanāñāṇassa tikkhakharavippasannasūrabhāvo. Kukkuṭiyā tividhakiriyākaraṇena kukkuṭapotakassa pariṇāmakālo viya bodhisattabhūtaṃ bhagavato tividhānupassanāsampādanena vipassanāñāṇassa pariṇāmakālo vaḍḍhikālo gabbhaggahaṇakālo. Kukkuṭiyā tividhakiriyākaraṇena kukkuṭapotakassa pādanakhasikhāya vā mukhatuṇḍakena vā aṇḍakosāṃ padāletvā pakkhe papphotetvā sotthinā abhinibbidhākālo viya bhagavato tividhānupassanāsampādanena vipassanāñāṇagabbhaṃ gaṇhāpetvā anupubbādhiगतena arahattamaggena avijjaṇḍakosāṃ padāletvā abhiññāpakkhe papphotetvā sotthinā sakalabuddhagūṇasacchikatakālo veditabbo.

Ahañhi, brāhmaṇa, jeṭṭho seṭṭho lokassāti, brāhmaṇa, yathā tesāṃ kukkuṭapotakānaṃ paṭhamataraṃ aṇḍakosāṃ padāletvā abhinibbato kukkuṭapotako jeṭṭho hoti, evaṃ avijjāgatāya pajāya taṃ avijjaṇḍakosāṃ padāletvā paṭhamataraṃ ariyāya jātiyā jātattā ahañhi jeṭṭho vuddhatamoti saṅkhaṃ gato, sabbaṅṇehi pana appaṭisamattā seṭṭhoti.

Evaṃ bhagavā attano anuttaraṃ jeṭṭhaseṭṭhabhāvaṃ brāhmaṇassa pakāsetvā idāni yāya paṭipadāya taṃ adhigato, taṃ paṭipadaṃ pubbhāgato pabhuti dassetuṃ **āraddhaṃ kho pana me, brāhmaṇāti**ādīmāha. Tattha **āraddhaṃ kho pana me, brāhmaṇa, vīriyaṃ ahoṣīti,** brāhmaṇa, na mayā ayaṃ anuttaro jeṭṭhaseṭṭhabhāvo kusītena muṭṭhassatinā sāraddhakāyena vikkhittacitena adhigato, apica kho tadadhigamāya āraddhaṃ kho pana me vīriyaṃ ahoṣi. Bodhimaṇḍe nisinnena mayā catusammappadhānabhedāṃ vīriyaṃ āraddhaṃ ahoṣi, paggaḥitaṃ asithilappavattitaṃ. Āraddhattāyeva ca me taṃ **asallinaṃ** ahoṣi. Na kevalaṅca vīriyameva, satipi me ārammaṇābhimukhabhāvena **upaṭṭhitā** ahoṣi, upaṭṭhitattāyeva ca **asammuṭṭhā.** **Passaddho kāyo asāraddhoti** kāyacittappassaddhivasena kāyopi me passaddho ahoṣi. Tattha yasmā nāmakāye passaddhe rūpakāyopi passaddhoyeva hoti, tasmā “nāmakāyo rūpakāyo”ti avisesetvāva “passaddho kāyo”ti vuttaṃ. **Asāraddhoti** so ca kho passaddhattāyeva asāraddho, vigatadarathoti vuttaṃ hoti. **Samāhitaṃ cittaṃ ekagganti** cittampi me sammā āhitaṃ suṭṭhu ṭhapitaṃ appitaṃ viya ahoṣi, samāhitattā eva ca ekaggaṃ acalaṃ nipphandananti. Ettāvata jhānassa pubbhāgapaṭipadā kathitā hoti.

Idāni imāya paṭipadāya adhigataṃ paṭhamajjhānaṃ ādim katvā vijjāttayapariyosānaṃ visesaṃ dassento **so kho ahanti**ādīmāha. Tattha yaṃ yāva vinicchayanayena vattabbaṃ siyā, taṃ visuddhimagge (visuddhi. 1.69) vuttameva.

Ayaṃ kho me, brāhmaṇātiādīsu pana **vijjāti** viditakaraṇaṭṭhena vijjā. Kiṃ viditaṃ karoti? Pubbenivāsaṃ. **Avijjāti** tasseva pubbenivāsassa aviditakaraṇaṭṭhena tappaṭicchādakamoho. **Tamoti** sveva moho tappaṭicchādakaṭṭhena tamo nāma. **Ālokoti** sā eva vijjā obhāsakaraṇaṭṭhena ālokoti. Ettha ca vijjā adhigatāti attho, sesaṃ pasamsāvacaṇaṃ. Yojanā panettha – ayaṃ kho me vijjā adhigatā, tassa me adhigatavijjassa avijjā vihatā, vinaṭṭhāti attho. Kasmā? Yasmā vijjā uppannā. Esa nayo itarasmimpi padadvaye. **Yathā tanti** ettha **tanti** nipātamattaṃ. Satiyā avippavāsena appamattassa vīriyātāpena ātāpino kāye ca jīvite ca anapekkhātāya pahitattassa pesitattassāti attho. Idaṃ vuttaṃ hoti – yathā appamattassa ātāpino pahitattassa viharato avijjā vihaññeyya, vijjā uppajjeyya tamo vihaññeyya, āloko uppajjeyya, evameva mama avijjā vihatā, vijjā uppannā, tamo vihato, āloko uppanno. Etassa me padhānānuयोगassa anurūpameva phalaṃ laddhanti.

Ayaṃ kho me, brāhmaṇa, paṭhamā abhinibbhidā ahoṣi kukkuṭacchāpakasseva aṇḍakosamhāti ayaṃ kho mama, brāhmaṇa, pubbenivāsānussatiñānamukhatuṇḍakena pubbe nivutthakkhandhappaṭicchādakaṃ avijjaṇḍakosaṃ padāletvā paṭhamā abhinibbhidā paṭhamā nikkhanti paṭhamā ariyajāti ahoṣi kukkuṭacchāpakasseva mukhatuṇḍakena vā ṃ pādanakhasikhāya vā aṇḍakosaṃ padāletvā tamhā aṇḍakosamhā abhinibbhidā nikkhanti kukkuṭanikāye paccājātīti. Ayaṃ tāva pubbenivāsakathāyaṃ nayo.

Cutupapātakathāya pana **vijjāti** dibbacakkhuññānavijjā. **Avijjāti** cutupapātappaṭicchādikā avijjā. Yathā pana pubbenivāsakathāyaṃ “pubbenivāsānussatiñānamukhatuṇḍakena pubbe nivutthakkhandhappaṭicchādakaṃ avijjaṇḍakosaṃ padāletvā”ti vuttaṃ, evamidha “cutupapātañānamukhatuṇḍakena cutupapātappaṭicchādakaṃ avijjaṇḍakosaṃ padāletvā”ti vattabbaṃ.

Yaṃ panetaṃ paccavekkhaṇāñānapariggahitaṃ āsavānaṃ khayañāñadhigamaṃ brāhmaṇassa dassento **ayaṃ kho me, brāhmaṇa, tatiyā vijjāti**ādimāha, tattha **vijjāti** arahattamaggavijjā. **Avijjāti** catusaccappaṭicchādikā avijjā. **Ayaṃ kho me, brāhmaṇa, tatiyā abhinibbhidā ahoṣīti** ettha ayaṃ kho mama, brāhmaṇa, āsavānaṃ khayañānamukhatuṇḍakena catusaccappaṭicchādakaṃ avijjaṇḍakosaṃ padāletvā tatiyā abhinibbhidā tatiyā nikkhanti tatiyā ariyajāti ahoṣi kukkuṭacchāpakasseva mukhatuṇḍakena vā pādanakhasikhāya vā aṇḍakosaṃ padāletvā tamhā aṇḍakosamhā abhinibbhidā nikkhanti kukkuṭanikāye paccājātīti.

Ettāvatā kiṃ dassesīti? So hi, brāhmaṇa, kukkuṭacchāpakā aṇḍakosaṃ padāletvā tato nikkhamanto sakimeva jāyati, ahaṃ pana pubbenivutthakkhandhappaṭicchādakaṃ avijjaṇḍakosaṃ bhinditvā paṭhamaṃ tāva pubbenivāsānussatiñānavijjāya jāto. Tato sattānaṃ cutipaṭisandhippaṭicchādakaṃ avijjaṇḍakosaṃ padāletvā dutiyaṃ dibbacakkhuññānavijjāya jāto, puna catusaccappaṭicchādakaṃ avijjaṇḍakosaṃ padāletvā tatiyaṃ āsavānaṃ khayañānavijjāya jāto. Evaṃ tīhi vijjāhi tikkhattuṃ jātomhi. Sā ca me jāti ariyā suparisuddhāti idaṃ dasseti. Evaṃ dassento ca pubbenivāsāñāna aṭṭamañānaṃ, dibbacakkhunā paccuppannānāgataṃsañānaṃ, āsavakkhayaena sakalalokiyalokuttaraguṇanti evaṃ tīhi vijjāhi sabbepi sabbaññuguṇe pakāsetvā attano ariyāya jātiyā jeṭṭhaseṭṭhabhāvaṃ brāhmaṇassa dassesi.

Evaṃ vutte verañjo brāhmaṇoti evaṃ bhagavatā lokānukampakena brāhmaṇaṃ anukampamānena niguhitabbepi attano ariyāya jātiyā jeṭṭhaseṭṭhabhāve vijjāttayapakāsikāya dhammadesanāya vutte pītivipphāraparipuṇṇagattacitto verañjo brāhmaṇo taṃ bhagavato ariyāya jātiyā jeṭṭhaseṭṭhabhāvaṃ veditvā “īdisaṃ nāmāhaṃ sabbalokajeṭṭhaṃ sabbaguṇasamannāgataṃ sabbaññuṃ ‘aññesaṃ abhivādanādikammaṃ na karotī’ti avacaṃ, dhiratthu vata, bho, aññāna’”nti attānaṃ garahitvā “ayaṃ dāni loke ariyāya jātiyā purejātaṭṭhena jeṭṭho, sabbaguṇehi appaṭisamaṭṭhena seṭṭho”ti niṭṭhaṃ gantvā bhagavantaṃ etadavoca – **jeṭṭho bhavaṃ gotamo seṭṭho bhavaṃ gotamoti**. Evañca pana vatvā puna taṃ bhagavato dhammadesanaṃ abbhanumodamāno **abhikkantaṃ bho gotamāti**ādimāha. Taṃ vuttatthamevāti.

2. Sīhasuttavaṇṇanā

12. Dutīye abhiññātāti ñātā paññātā pākāṭā. **Santhāgāreti** mahājanassa vissamanatthāya kate agāre. Sā kira santhāgārasālā nagaramajjhe ahoṣi, catūsū thānesu ṭhitānaṃ paññāyati, catūhi disāhi āgatamanussā paṭhamaṃ tattha vissamitvā pacchā attano attano phāsukaṭṭhānaṃ gacchanti. Rājakulānaṃ rajjakiccasantharantthāya kataṃ agārantipi vadantiyeva. Tattha hi nisīditvā licchavirājāno rajjakiccaṃ santharanti karonti vicārenti. **Sannisinnāti** tesamā nisīdanatthaññeva paññattesu mahārahavarapaccattharaṇesu samussitasetacchattesu āsanesu sannisinnā. **Anekapariyāyena buddhassa vaṇṇaṃ bhāsantīti** rājakule kiccañceva lokatthacariyañca vicāretvā anekehi kāraṇehi buddhassa vaṇṇaṃ bhāsanti kathenti dīpentī. Paṇḍitā hi te rājāno saddhā pasannā sotāpannāpi sakadāgāminopi anāgāminopi ariyasāvaka, te sabbepi lokiyajaṭaṃ chinditvā buddhādīnaṃ tiṇṇaṃ

ratanānaṃ vaṇṇaṃ bhāsanti. Tattha tividho buddhavaṇṇo nāma cariyavaṇṇo, sarīravaṇṇo, guṇavaṇṇoti. Tatthime rājāno cariyāya vaṇṇaṃ ārabhiṃsu – “dukkaraṃ vata kataṃ sammāsambuddhena kappasatasahassādhikāni cattāri asaṅkheyyāni dasa pāramiyo, dasa upapāramiyo, dasa paramatthapāramiyoti samattiṃsa pāramiyo pūrentena, ñātathacariyaṃ, lokatthacariyaṃ, buddhacariyaṃ matthakaṃ pāpetvā pañca mahāpariccāge pariccajantenā” ti aḍḍhacchakkehi jātakasatehi buddhavaṇṇaṃ kathentā tusitabhavanaṃ pāpetvā ṭhappayimṃsu.

Dhammassa vaṇṇaṃ bhāsantā pana “tena bhagavatā dhammo desito, nikāyato pañca nikāyā, piṭakato tīṇi piṭakāni, aṅgato nava aṅgāni, khandhato caturāsītiddhammakhandhasahassāni” ti koṭṭhāsavasena dhammaguṇaṃ kathayimṃsu.

Saṅghassa vaṇṇaṃ bhāsantā satthu dhammadesanaṃ sutvā “paṭiladdhasaddhā kulaputtā bhogakkhandhañceva ñātiparivaṭṭaṇṇa pahāya setacchattaṃ oparajjaṃ senāpatiseṭṭhibhaṇḍāgārikatṭhānantarādīni agaṇetvā nikkhamma satthu varasāsane pabbajanti. Setacchattaṃ pahāya pabbajitānaṃ bhaddiyarājamaḥākappinapukkusātiādīnaṃ rājapabbajitānaṃyeva buddhakāle asītisahassāni ahesuṃ. Anekakoṭṭisattaṃ dhanāṃ pahāya pabbajitānaṃ pana yasakulaputtasoṇasetṭhiputtaraṭṭhapālakulaputtādīnaṃ paricchedo natthi. Evarūpā ca evarūpā ca kulaputtā satthu sāsane pabbajanti” ti pabbajjāsankhepavasena saṅghaguṇe kathayimṃsu.

Sīho senāpatīti evaṃnāmako senāya adhipati. Vesāliyañhi satta sahassāni satta satāni satta ca rājāno. Te sabbe pi sannipatitvā sabbesaṃ manāṃ gahetvā “raṭṭhaṃ vicāretuṃ samatthaṃ ekaṃ vicinathā” ti vicinantā sīhaṃ rājakumāraṃ disvā “ayaṃ sakkhissatī” ti sannitṭhānaṃ katvā tassa rattamaṇivaṇṇaṃ kambalapariyonaddhaṃ senāpaticchattaṃ adāṃsu. Taṃ sandhāya vuttaṃ – “sīho senāpatī” ti. **Niḡaṇṭhasāvakoṭi** niḡaṇṭhassa nāṭaputtassa paccayadāyako upaṭṭhāko. Jambudīpatalasmiñhi tayo janā niḡaṇṭhānaṃ aggupaṭṭhākā – nālandāyaṃ, upāli gahapati, kapilapure vappo sakko, vesāliyaṃ ayaṃ sīho senāpatīti. **Nisinno hotīti** sesarājūnaṃ parisāya antarantare āsanāni paññāpayimṃsu, sīhassa pana majjhe ṭhāneti tasmim paññatte mahārahe rājāsane nisinno hoti. **Nissamsayanti** nibbicikchaṃ addhā ekamsena, na hete yassa vā tassa vā appesakkhassa evaṃ anekasatehi kāraṇehi vaṇṇaṃ bhāsanti.

Yena niḡaṇṭho nāṭaputto tenupasaṅkamīti niḡaṇṭho kira nāṭaputto “sacāyaṃ sīho kassacideva samaṇassa gotamassa vaṇṇaṃ kathentassa sutvā samaṇaṃ gotamaṃ dassanāya upasaṅkamissatī, mayhaṃ parihāni bhavissatī” ti cintetvā paṭhamataraṃyeva sīhaṃ senāpatiṃ etadavoca – “senāpati imasmiṃ loke ‘ahaṃ buddho ahaṃ buddho’ ti bahū vicaranti. Sace tvaṃ kassaci dassanāya upasaṅkamitukāmo ahosi, maṃ puccheyyāsi. Ahaṃ te yuttatṭhānaṃ pesessāmi, ayuttatṭhānato nivāressāmi” ti. So taṃ kathaṃ anussaritvā “sace maṃ pesessati, gamissāmi. No ce, na gamissāmi” ti cintetvā yena niḡaṇṭho nāṭaputto, tenupasaṅkami.

Athassa vacanaṃ sutvā niḡaṇṭho mahāpabbatena viya balavasokena otthaṭo “yattha dānissāhaṃ gamanaṃ na icchāmi, tattheva gantukāmo jāto, hatohasmaṃ” ti anattamano hutvā “paṭibāhanupāyamassa karissāmi” ti cintetvā **kiṃ pana tvantiādīmāha**. Evaṃ vadanto vicarantaṃ goṇaṃ daṇḍena paharanto viya jalamānaṃ padīpaṃ nibbāpento viya bhattabharitaṃ pattaṃ nikkujjanto viya ca sīhassa uppannapītiṃ vināsesi. **Gamiyābhisaṅkhāroṭi** hatthiyānādīnaṃ yojāpanagandhamālādiggahaṇavasena pavatto payogo. **So paṭippassambhīti** so vūpasanto.

Dutiyampi khoti dutiyavārampi. Imasmiñca vāre buddhassa vaṇṇaṃ bhāsantā tusitabhavanato paṭṭhāya yāva mahābodhipallaṅkā dasabalassa heṭṭhā pādālehi upari kesaggehi paricchinditvā dvattiṃsamahāpurisalakkhaṇaasītianubyañjanabyāmapabbhānaṃ vasena sarīravaṇṇaṃ kathayimṃsu. Dhammassa vaṇṇaṃ bhāsantā “ekapade pi ekabyañjanepi avakhalitaṃ nāma natthi” ti sukathitavaseneva dhammaguṇaṃ kathayimṃsu. Saṅghassa vaṇṇaṃ bhāsantā “evarūpaṃ yasaṃsivibhavaṃ pahāya satthu sāsane pabbajitā na kosajjapakatikā honti, terasasu pana dhutaṅgaguṇesu paripūrakārino hutvā sattasu

anupassanāsu kammaṃ karonti, aṭṭhatimsārammaṇavibhattiyo vaḷañjenti”ti paṭipadāvasena saṅghaguṇe kathayimsu.

Tatīyavāre pana buddhassa vaṇṇaṃ bhāsamānā “itipi so bhagavā”ti suttantapariyāyeneva buddhaguṇe kathayimsu, “svākkhāto bhagavatā dhammo”tiādīnā suttantapariyāyeneva dhammaguṇe, “suppaṭipanno bhagavato sāvakaśaṅgho”tiādīnā suttantapariyāyeneva saṅhaguṇe ca kathayimsu. Tato sīho cintesi – “imesañca licchavirājakumārānaṃ tatiyadivasato paṭṭhāya buddhadhammasaṅhaguṇe kathentānaṃ mukhaṃ nappahoti, addhā anomaguṇena samannāgatā so bhagavā, imaṃ dāni uppannaṃ pītiṃ avijahitvāva ahaṃ ajja sammāsambuddhaṃ passissāmi”ti. Athassa “kiṃ hi me karissanti nigaṇṭhā”ti vitakko udapādi. Tattha **kiṃ hi me karissanti**ti kiṃ nāma mayhaṃ nigaṇṭhā karissanti. **Apalokitā vā anapalokitā vāti** āpucchitā vā anāpucchitā vā. Na hi me te āpucchitā yānavāhanasampattiṃ, na ca issariyavisesaṃ dassanti, nāpi anāpucchitā harissanti, aphalaṃ etesaṃ āpucchanti adhippāyo.

Vesāliyā niyyāsīti yathā hi gimhakāle deve vuṭṭhe udakaṃ sandamānaṃ nadiṃ otarivā thokameva gantvā tiṭṭhati nappavattati, evaṃ sīhassa paṭhamadivase “dasabalaṃ passissāmi”ti uppannāya pītiyā nigaṇṭhena paṭibāhitakālo. Yathāpi dutiyadivase deve vuṭṭhe udakaṃ sandamānaṃ nadiṃ otarivā thokaṃ gantvā vālikāpuñjaṃ paharivā appavattaṃ hoti, evaṃ sīhassa dutiyadivase “dasabalaṃ passissāmi”ti uppannāya pītiyā nigaṇṭhena paṭibāhitakālo. Yathā tatiyadivase deve vuṭṭhe udakaṃ sandamānaṃ nadiṃ otarivā purāṇapaṇṇasukkhadaṇḍakaṭṭhakacavarādīni parikaḍḍhantaṃ vālikāpuñjaṃ bhinditvā samuddaninnaṃ hoti, evaṃ sīho tatiyadivase tiṇṇaṃ vatthūnaṃ guṇakathaṃ sutvā uppanne pītipāmojjje “aphalā nigaṇṭhā nipphalā nigaṇṭhā, kiṃ me ime karissanti, gamissāmahaṃ satthusantika”nti manaṃ abhinīharitvā vesāliyā niyyāsi. Niyyanto ca “cīrassāhaṃ dasabalassa santikaṃ gantukāmo jāto, na kho pana me yuttaṃ aññātakavesena gantu”nti “yekeci dasabalassa santikaṃ gantukāmā, sabbe nikkhamantū”ti ghosanaṃ kāretvā pañcarathasatāni yojāpetvā uttamarathe ṭhito tehi ceva pañcahi rathasatehi mahatiyā ca parisāya parivuto gandhapupphacuṇṇavāsādīni gāhāpetvā niyyāsi. **Divā divassāti** divasassa ca divā, majjhanhike atikkantamatte.

Yena bhagavā tenupasaṅkamīti ārāmaṃ pavisanto dūratova asīti-anubyañjana-byāmapabbhādvattiṃsa-mahāpurisalakkhaṇāni chabbaṇṇaḥṇanabuddharasmiyo ca disvā “evarūpaṃ nāma purisaṃ evaṃ āsanne vasantaṃ ettakaṃ kālaṃ nāddasaṃ, vañcīto vatamhi, alābhā vata me”ti cintetvā mahānidhiṃ disvā daliddapuriso viya sañjātapītipāmojjjo yena bhagavā tenupasaṅkami. **Dhammassa cānudhammaṃ byākarontīti** bhotā gotamena vuttakāraṇassa anukāraṇaṃ kathenti. Kāraṇavacano hettha dhammasaddo “hetumhi nānaṃ dhammapaṭisambhīdā”tiādīsu (vibha. 720) viya. Kāraṇanti cettha tathāpavattassa saddassa attho adhippeto tassa pavattihetubhāvato. Atthappayutto hi saddappayogo. Anukāraṇanti eso eva parehi tathā vuccamāno. **Sahadhammiko vādānuvādoti**. Parehi vuttakāraṇehi sakāraṇo hutvā tumhākaṃ vādo vā tato paraṃ tassa anuvādo vā koci appamattakopi viññūhi garahitabbaṃ ṭhānaṃ kāraṇaṃ na āgacchati. Idaṃ vuttaṃ hoti – kiṃ sabbākārenapi tava vāde gārayhaṃ kāraṇaṃ natthīti. **Anabbhakkhātukāmāti** na abhūtena vattukāmā. **Atthi sīhapariyāyotiādīnaṃ** attho verañjakaṇḍe āgatanayeneva veditabbo. **Paramena assāsenāti** catumaggacatuphalasaṅkhātena uttamaṃ. **Assāsāya dhammaṃ desemīti** assāsanatthāya santhambhanatthāya dhammaṃ desemi. Iti bhagavā aṭṭhahaṅgehi sīhassa senāpatissa dhammaṃ desesi.

Anuviccakāraṇti anuvīditvā cintetvā tulayitvā kattabbaṃ karohīti vuttaṃ hoti. **Sādhu hotīti** sundaro hoti. Tumhādisasmiñhi maṃ disvā maṃ saraṇaṃ gacchante nigaṇṭhaṃ disvā nigaṇṭhaṃ saraṇaṃ gacchante “kiṃ ayaṃ sīho diṭṭhadiṭṭhameva saraṇaṃ gacchati”ti garahā uppajjati, tasmā anuviccakāro tumhādisānaṃ sādhuṃ dasseti. **Paṭākāṃ parihareyyunti** te kira evarūpaṃ sāvakaṃ labhitvā “asuko nāma rājā vā rājamahāmatto vā seṭṭhi vā amhākaṃ saraṇaṃ gato sāvako jāto”ti paṭākāṃ ukkhipitvā nagare ghosentā āhiṇḍanti. Kasmā? Evaṃ no mahantabhāvo āvibhavissatīti ca. Sace panassa “kimahaṃ etesaṃ saraṇaṃ gato”ti vippaṭisāro uppajjeyya, tampi so “etesaṃ me saraṇagatabhāvaṃ bahū jānanti, dukkhaṃ idāni paṭinivattitu”nti vinodetvā na paṭikkamissatīti ca.

Tenāha – “paṭākam parihareyyu”nti. **Opānabhūta**nti paṭiyattaudapāno viya ṭhitaṃ. **Kulanti** tava nivesanaṃ. **Dātabbam maññeyyā**sīti pubbe dasapi vīsatiṃ paṭṭhiṃ jane āgate disvā natthīti avatvā desi, idāni maṃ saraṇaṃ gatakāraṇamatteneva mā imesaṃ deyyadhammaṃ upacchindi. Sampattānañhi dātabbamevāti ovadī. **Sutaṃ metaṃ, bhanteti** kuto sutanti? Nigaṇṭhānaṃ santikā. Te kira kulagharesu evaṃ pakāseṃti “mayam yassa kassaci sampattassa dātabbanti vadāma, samaṇo pana gotamo ‘mayhameva dānaṃ dātabbam nāññesaṃ, mayhameva sāvakaṇaṃ dānaṃ dātabbam, nāññesaṃ sāvakaṇaṃ, mayhameva dinnam dānaṃ mahapphalaṃ, nāññesaṃ, mayhameva sāvakaṇaṃ dinnam mahapphalaṃ, nāññesa’nti evaṃ vadati”ti. Taṃ sandhāya ayaṃ “sutaṃ meta”nti āha.

Anupubbim kathanti dānānantaraṃ sīlaṃ, sīlānantaraṃ saggam, saggānantaraṃ magganti evaṃ anupaṭipāṭikathaṃ. Tattha **dānakathanti** idaṃ dānaṃ nāma sukhānaṃ nidānaṃ, sampattīnaṃ mūlaṃ, bhogaṇaṃ paṭiṭṭhā, visamagatassa tāṇaṃ leṇaṃ gati parāyaṇaṃ, idhalokaparalokesu dānasadisō avassayo paṭiṭṭhā ārammaṇaṃ tāṇaṃ leṇaṃ gati parāyaṇaṃ natthi. Idañhi avassayaṭṭhena ratanamayasīhāsanasadisam, paṭiṭṭhānaṭṭhena mahāpathavīsadisam, ārammaṇaṭṭhena ālambanarajjusadisam. Idañhi dukkhanittharaṇaṭṭhena nāvā, samassāsanaṭṭhena saṅgāmasūro, bhayaparitṭhānaṭṭhena susaṅkhatanagaraṃ, maccheramalādīhi anupalittaṭṭhena padumaṃ, tesam nidhanaṭṭhena aggi, durāsadaṭṭhena āsiviso, asantāsanaṭṭhena sīho, balavantatṭhena hatthī, abhimaṅgalasammataṭṭhena setavasabho, khemantabhūmisampāpanaṭṭhena valāhako assarājā. Dānaṃ nāmetaṃ mayā gatamaggo, mayheso vaṃso, mayā dasa pāramiyo pūrentena velāmahāyañño, mahāgovindamahāyañño, mahāsudassanamahāyañño, vessantaramahāyaññoti, anekamahāyaññā pavattitā, sasabhūtena jalitaaggikkhandhe attānaṃ niyyādentena sampattayācakānaṃ cittaṃ gahitaṃ. Dānañhi loka sakkasampattiṃ deti mārasampattiṃ brahmasampattiṃ, cakkavattisampattiṃ, sāvakaṇapāramiṇānaṃ, paccekabodhiñānaṃ, abhisambodhiñānaṃ detīti evamādidānaguṇappaṭisaṃyuttaṃ kathaṃ.

Yasmā pana dānaṃ dento sīlaṃ samādātum sakkoti, tasmā tadanantaraṃ sīlakathaṃ kathesi. **Sīlakathanti** sīlaṃ nāmetaṃ avassayo paṭiṭṭhā ārammaṇaṃ tāṇaṃ leṇaṃ gati parāyaṇaṃ. Sīlaṃ nāmetaṃ mama vaṃso, ahaṃ saṅkhapālanāgarājakāle bhūridattanāgarājakāle campeyyanāgarājakāle sīlavarājakāle mātuposakahatthirājakāle chaddantahatthirājakāleti anantesu attabhāvesu sīlaṃ paṭipūresiṃ. Idhalokaparalokasampattīnañhi sīlasadisō avassayo paṭiṭṭhā ārammaṇaṃ tāṇaṃ leṇaṃ gati parāyaṇaṃ natthi, sīlālaṅkārasadisō alaṅkāro natthi, sīlapupphasadisam pupphaṃ natthi, sīlagandhasadisō gandho natthi. Sīlālaṅkārena hi alaṅkataṃ sīlagandhānulittaṃ sadevakopi loko olokento tittiṃ na gacchatīti evamādisīlaguṇappaṭisaṃyuttaṃ kathaṃ.

“Idaṃ pana sīlaṃ nissāya ayaṃ saggo labbhati”ti dassetuṃ sīlānantaraṃ saggakathaṃ kathesi. **Saggakathanti** “ayaṃ saggo nāma iṭṭho kanto manāpo, nīccametta kīlā, nīccaṃ sampattiyo labbhanti, cātumahārājikā devā navutivassasatasahassāni dibbasukhaṃ dibbasampattiṃ anubhavanti, tāvatimsā tisso ca vassakoṭiyo saṭṭhi ca vassasatasahassāni”ti evamādisaggaguṇappaṭisaṃyuttaṃ kathaṃ. Saggasampattiṃ kathayantānañhi buddhānaṃ mukhaṃ nappahoti. Vuttampi cetam – “anekapariyāyena khvāhaṃ, bhikkhave, saggakathaṃ katheyya”ntiādi (ma. ni. 3.255).

Evaṃ saggakathāya palobhetvā pana hatthim alaṅkaritvā tassa soṇḍaṃ chindanto viya “ayampi saggo anicco addhuvo, na ettha chandarāgo kattabbo”ti dassanattaṃ “appassādā kāmā bahudukkhā bahupāyāsā, ādīnavo ettha bhiyyo”tiādinā (ma. ni. 1.235-236; 2.42) nayena **kāmānaṃ ādīnavaṃ okāraṃ saṃkilesaṃ** kathesi. Tattha **ādīnavoti** doso. **Okāro**ti avakāro lāmakabhāvo. **Saṃkilesoti** tehi sattānaṃ saṃsāre saṃkilissaṃ. Yathāha – “saṃkilissanti vata, bho, sattā”ti (ma. ni. 2.351).

Evaṃ kāmādinavena tajjetvā **nekkhamme ānisaṃsaṃ pakāsesi**. **Kallacittanti** arogacittaṃ. **Sāmuksaṃsikā**ti sāmaṃ ukksaṃsikā attanāyeva uddharitvā gahitā, sayambhuñāṇena diṭṭhā asādhāraṇā aññesanti attho. Kā pana sāti? Ariyasaccadesanā. Tenevāha – **dukkhaṃ samudayaṃ nirodhaṃ magganti**. **Virajaṃ vītamalanti** rāgarajādīnaṃ abhāvā virajaṃ, rāgamalādīnaṃ vīgatattā vītamalaṃ.

Dhammacakkhanti idha sotāpattimaggo adhippeto. Tassa uppattiākāradassanattam **yaṃkiñci samudayadhammaṃ sabbaṃ taṃ nirodhadhammanti** āha. Tañhi nirodham ārammaṇaṃ katvā kiccavasena evaṃ sabbasaṅkhatam paṭivijjhantaṃ uppajjati. Diṭṭho ariyasaccadhammo etenāti **diṭṭhadhammo**. Esa nayo sesesupi. Tiṇṇā vicikicchā anenāti **tiṇṇavicikiccho**. Vigatā kathamkathā assāti **vigatakathamkatho**. Visārajjam pattoti **vesārajjappatto**. Kattha? Satthusāsane. Nāssa paro paccayo, na param saddhāya ettha vattatīti **aparappaccayo**.

Pavattamaṃsanti pakatiyā pavattam kappiyamaṃsam mūlam gahetvā antarāpaṇe pariyesāhīti adhippāyo. **Sambahulā nigaṇṭhāti** pañcasatamattā nigaṇṭhā. **Thūlam pasunti** thūlam mahāsarīram gokaṇṇamahimsasūkarasaṅkhātam pasuṃ. **Uddissakatanti** attānam uddisitvā katam, māritanti attho. **Paṭiccamanti** svāyam taṃ maṃsam paṭicca taṃ paṇavadhakammaṃ phusati. Tañhi akusalam upaḍḍham dāyakassa, upaḍḍham paṭiggāhākassa hotīti nesam laddhi. Aparo nayo – **paṭiccamanti** attānam paṭiccatam. Atha vā **paṭiccamanti** nimittakammasetam adhivacanaṃ, taṃ paṭiccamam ettha atthīti maṃsampi paṭiccamanti vuttam. **Upakaṇṇaketi** kaṇṇamūle. **Alanti** paṭikkhepavacanaṃ, kiṃ imināti attho. **Na ca paneteti** ete āyasmanto dīgharattam avaṇṇakāmā hutvā avaṇṇam bhāsantāpi abbhācikkhantā na jiridanti, abbhakkhānassa antam na gacchantīti attho. Atha vā lajjanathe idam **jiridantīti** padaṃ daṭṭhabbam, na lajjantīti attho.

3. Assājānīyasuttavaṇṇanā

13. Tatiye **aṅgehīti** guṇaṅgehi. **Tassam disāyam jāto hotīti** tassam sindhunadītīradisāyam jāto hoti. Aññepi bhadrā assājānīyā tattheva jāyanti. **Allam vā sukkaṃ vāti** allatiṇam vā sukhatiṇam vā. **Nāññe asse ubbejetāti** aññe asse na ubbejeti na paharati na ḍamsati na kalahaṃ karoti. **Sāṭheyyānīti** saṭhabhāvo. **Kūṭheyyānīti** kūṭabhāvo. **Jimheyyānīti** jimhabhāvo. **Vaṅkeyyānīti** vaṅkabhāvā. Iccassa catūhipi padehi asikkhitabhāvova kathito. **Vāhīti** vahanasabhāvo dinnovādaṭṭikaro. **Yāva jīvitamaraṇapariyādānāti** yāva jīvitassa maraṇena pariyosānā. **Sakkaccaṃ paribhuñjati** amatam viya paccavekkhitvā paribhuñjati. **Purisathāmenāti**ādīsu ñāṇathāmādayo kathitā. **Sanṭhānanti** osakkaṃ paṭippassaddhi.

4. Assakhaḷuṅkasuttavaṇṇanā

14. Catutthe “**pehī**”ti vuttoti “**gacchā**”ti vutto. **Piṭṭhito ratham pavattetīti** khandhaṭṭhikena yugam uppīlitvā pacchimabhāgena ratham pavaṭṭento osakkaṭi. **Pacchā laṅghati, kubbaraṃ hanatīti** dve pacchimapāde ukkhipitvā tehi paharivā rathakubbaraṃ bhindati. **Tidaṇḍam bhañjati** rathassa purato tayo daṇḍakā honti, te bhañjati. **Rathīsāya satthim ussajjitvāti** sīsam nāmetvā yugam bhūmiyam pātetvā satthinā rathīsam paharivā. **Ajjhomaddatīti** dvīhi purimapādehi īsam maddanto tiṭṭhati. **Ubbaṭumam ratham karotīti** thalam vā kaṇḍakaṭṭhānam vā ratham āropeti. **Anādiyitvāti** amanasikatvā agaṇitvā. **Mukhādhānanti** mukhaṭṭhapanatthāya dinnam ayasaṅkhalikaṃ. **Khīlaṭṭhāyīti** cattāro pāde thambhe viya niccalaṃ ṭhapetvā khīlaṭṭhānasadisena ṭhānena tiṭṭhati. Imasmim sutte vaṭṭameva kathitam.

5. Malasuttavaṇṇanā

15. Pañcame **asajjhāyamaḷāti** uggahitamantānam asajjhāyakaraṇam malaṃ nāma hoti. **Anuṭṭhānamalā gharāti** utṭhānavīriyābhāvo gharānam malaṃ nāma. **Vaṇṇassāti** sarīravaṇṇassa. **Rakkhatoti** yaṃkiñci attano santakaṃ rakkhantassa. **Avijjā paramam malanti** tato sesākusaladhammamalato aṭṭhasu ṭhānesu aññāṇabhūtā vaṭṭamūlasaṅkhātā bahalandhakāraavijjā paramam malaṃ. Tato hi malataram nāma natthi. Imasmimpi sutte vaṭṭameva kathitam.

6. Dūteyyasuttavaṇṇanā

16. Chaṭṭhe **dūteyyanti** dūtakammaṃ. **Gantumarahatīti** taṃ dūteyyasaṅkhātaṃ sāsanaṃ dhāretvā haritum arahati. **Sotāti** yo taṃ assa sāsanaṃ deti, tassa sotā. **Sāvetāti** taṃ uggaṇhitvā “idaṃ nāma tumhehi vutta”nti paṭisāvetā. **Uggahetāti** suggahitaṃ katvā uggahetā. **Dhāretāti** sudhāritaṃ katvā dhāretā. **Viññāti** atthānatthassa atthaṃ jānitā. **Viññāpetāti** paraṃ vijānāpetā. **Sahitā** **sahitassāti** idaṃ sahitaṃ, idaṃ asahitanti evaṃ sahitāsahitassa kusalo, upagatānupagatesu cheko sāsanaṃ ārocento sahitaṃ sallakkhetvā āroceti. **Na byathatīti** vedhati na chambhati. **Asandiddhanti** nissandehaṃ vigatasamṣayaṃ. **Pucchitoti** pañhatthāya pucchito.

7-8. Bandhanasuttadvayaṇṇanā

17-18. Sattame **ruṇṇenāti** ruditena. **Ākappenāti** nivāsanapārūpanādinā vidhānena. **Vanabhaṅgenāti** vanato bhañjitvā āhaṭena pupphaphalādīpaṇṇākarena. Aṭṭhamepi eseva nayo.

9. Pahārādasuttavaṇṇanā

19. Navame **pahārādoti** evaṃnāmako. **Asurindoti** asurajēṭṭhako. Asuresu hi vepacitti rāhu pahārādoti ime tayo jēṭṭhakā. **Yena bhagavā tenupasaṅkamīti** dasabalassa abhisambuddhadivasato paṭṭhāya “ajja gamissāmi sve gamissāmi”ti ekādasa vassāni atikkamitvā dvādasame vasse satthu verañjāyaṃ vasanakāle “sammāsambuddhassa santikaṃ gamissāmi”ti cittaṃ uppādetvā “mama ‘ajja sve’ti dvādasā vassāni jātāni, handāhaṃ idāneva gacchāmi”ti taṅkhaṇaṃyeva asuragaṇaparivuto asurabhavanā nikkhamitvā divā divassa yena bhagavā tenupasaṅkamī, **ekamantaṃ aṭṭhāsīti** so kira “tathāgataṃ pañhaṃ pucchitvā eva dhammaṃ suñissāmi”ti āgato, tathāgataṃ pana diṭṭhakālato paṭṭhāya buddhagāravena pucchitum asakkonto api satthāraṃ vanditvā ekamantaṃ aṭṭhāsī. Tato satthā cintesi – “ayaṃ pahārādo mayi akathente paṭhamataraṃ kathetum na sakkhissati, ciṇṇavasiṭṭhāneyeva naṃ kathāsamuṭṭhāpanatthaṃ ekaṃ pañhaṃ pucchissāmi”ti.

Atha naṃ pucchanto **api pana pahārādāti**ādīmāha. Tattha **abhiramantīti** ratiṃ vindanti, anukkaṇṭhamānā vasantīti attho. So “pariciṇṇaṭṭhāneyeva maṃ bhagavā pucchati”ti attamano hutvā **abhiramanti**, **bhanteti** āha. **Anupubbaninnoti**ādīni sabbāni anupaṭipāṭiyā ninnabhāvassa vevacanāni. **Na āyatakeneva papātoti** na chinnataṭamahāsobbho viya āditova papāto. So hi tīrato paṭṭhāya ekaṅguladvāṅgulavidatthiratanayaṭṭhiusabhaaḍḍhagāvutagāvutaḍḍhayojanādivasena gambhīro hutvā gacchanto sinerupādāmūle caturāsītiyojanasahassagambhīro hutvā ṭhitoti dasseti.

Ṭhitadhammoti ṭhitasabhāvo. **Kuṇapenāti** yena kenaci hatthiassādīnaṃ kaḷevarena. **Thalaṃ ussāretīti** hatthena gahetvā viya vīcipahāreneva thalaṃ khipati.

Gaṅgāyamunāti idha ṭhatvā imāsaṃ nadīnaṃ uppattikathaṃ kathetum vaṭṭati. Ayaṃ tāva jambudīpo dasasahassayojanaparimāṇo, tattha catusahassayojanaparimāṇo padeso udakena ajjhotthaṭo mahāsamuddoti saṅkhaṃ gato, tisahassayojanappamāṇe manussā vasanti, tisahassayojanappamāṇe himavā patiṭṭhito ubbedhena pañcayojanasatiko caturāsītikūṭasahassapaṭimaṇḍito samantato sandamānapañcasatanadīvicitto, yattha āyānavitthārena ca gambhīrato ca paṇṇāsapaṇṇāsayojanā diyaḍḍhayojanasataparimaṇḍalā anotattadaho kaṇṇamuṇḍadaho rathakāradaho chaddantadaho kuṇāladaho mandākinidaho sīhappapātadahoti satta mahāsarā patiṭṭhahanti.

Tesu **anotatto** sudassanakūṭaṃ cittakūṭaṃ kālakūṭaṃ gandhamādanakūṭaṃ kelāsakūṭanti imehi pañcahi pabbatehi parikkhitto. Tattha sudassanakūṭaṃ sovaṇṇamayāṃ dviyojanasatubbedhaṃ antovaṅkaṃ kākamukhasaṅṭhānaṃ tameva saraṃ paṭicchādetvā tiṭṭhati, cittakūṭaṃ sabbaratanamayāṃ, kālakūṭaṃ añjanamayāṃ, gandhamādanakūṭaṃ sānumamayāṃ abbhantare muggavaṇṇaṃ, mūlagandho sārāgandho pheggugandho tacagandho papaṭikāgandho rasagandho pattagandho pupphagandho phalagandho gandhagandhoti imehi dasahi gandhehi ussannaṃ, nānappakāraosadhasaṅchannaṃ kālāpakkauposathadivase ādittamiva āṅgāraṃ jalantaṃ tiṭṭhati, kelāsakūṭaṃ rajatamayāṃ. Sabbāni

sudassanena samānubbedhasañṭhānāni tameva saraṃ paṭicchādetvā ṭhitāni. Tāni sabbāni devānubhāvena nāgānubhāvena ca vassanti, nadiyo cetesu sandanti. Taṃ sabbampi udakaṃ anotattameva pavisati. Candimasūriyā dakkhiṇena vā uttarena vā gacchantā pabbatantarena tattha obhāsaṃ karonti, ujum gacchantā na karonti. Tenevassa anotatto tisaṅkhā udapādi.

Tattha manoharasilātalāni nimmacchakacchapāni phalikasadisanimmalodakāni nhānatitthāni supaṭiyattāni honti, yesu buddhā khīṇāsavā ca paccekabuddhā ca iddhimantā ca isayo nhāyanti, devayakkhādayo udakakīlaṃ kīlanti.

Tassa catūsu passesu sīhamukhaṃ, hatthimukhaṃ, assamukhaṃ, usabhamukhanti cattāri mukhāni honti, yehi catasso nadiyo sandanti. Sīhamukhena nikkhantanadīre sīhā bahutarā honti, hatthimukhādīhi hatthiassausabhā. Puratthimadisato nikkhantanadī anotattam tikkhattum padakkhiṇaṃ katvā itarā tisso nadiyo anupagamma pācīnahimavanteneva amanussapathaṃ gantvā mahāsamuddaṃ pavisati. Pacchimadisato ca uttaradisato ca nikkhantanadiyopi tatheva padakkhiṇaṃ katvā pacchimahimavanteneva uttarahimavanteneva ca amanussapathaṃ gantvā mahāsamuddaṃ pavisanti. Dakkhiṇamukhato nikkhantanadī pana taṃ tikkhattum padakkhiṇaṃ katvā uttarena ujukaṃ pāsānapitṭheneva saṭṭhi yojanāni gantvā pabbataṃ paharivā uṭṭhāya parikkhepena tigāvutappamāṇā udakadhārā hutvā ākāseṇa saṭṭhi yojanāni gantvā tiyaggaḷe nāma pāsāṇe patitā, pāsāṇo udakadhārāvegena bhinno. Tattha paññāsajojanappamāṇā tiyaggaḷā nāma mahāpokkharāṇi jātā, pokkharāṇiyā kūlaṃ bhinditvā pāsāṇaṃ pavisitvā saṭṭhi yojanāni gatā. Tato ghanapathaviṃ bhinditvā ummaṅgena saṭṭhi yojanāni gantvā giñjhaṃ nāma tiracchānapabbataṃ paharivā hatthatale pañcaṅgulisadisā pañca dhārā hutvā pavattati. Sā tikkhattum anotattam padakkhiṇaṃ katvā gataṭṭhāne **āvattagaṅgā**ti vuccati. Ujukaṃ pāsānapitṭhena saṭṭhi yojanāni gataṭṭhāne **kaṇhagaṅgā**, ākāseṇa saṭṭhi yojanāni gataṭṭhāne **ākāsagaṅgā**, tiyaggaḷapāsāṇe paññāsajojanokāse ṭhitā **tiyaggaḷapokkharāṇi**, kūlaṃ bhinditvā pāsāṇaṃ pavisitvā saṭṭhi yojanāni gataṭṭhāne **bahalagaṅgā**ti, umaṅgena saṭṭhi yojanāni gataṭṭhāne **umaṅgagaṅgā**ti vuccati. Viñjhaṃ nāma tiracchānapabbataṃ paharivā pañca dhārā hutvā pavattanaṭṭhāne pana gaṅgā, yamunā, aciravatī, sarabhū, mahīti pañca saṅkhaṃ gatā. Evametā pañca mahānadiyo himavantato pavattantīti veditabbā.

Savantiyoti yā kāci savamānā gacchantī mahānadiyo vā kunnadiyo vā. **Appentīti** allīyanti osaranti. **Dhārāti** vuṭṭhidhārā. **Pūrattanti** puṇṇabhāvo. Mahāsamuddassa hi ayaṃ dhammatā – “imasmiṃ kāle devo mando jāto, jālakkipādīni ādāya macchakacchape gaṇhissāmā”ti vā “imasmiṃ kāle mahantā vuṭṭhi, labhissāma nu kho piṭṭhipasāraṇaṭṭhāna”nti vā vattum na sakkā. Paṭhamakappikakālato paṭṭhāya hi yaṃ sinerumekhalam āhacca udakaṃ ṭhitam, tato ekaṅgulamattampi udakaṃ neva heṭṭhā osīdati, na uddham uttarati. **Ekarasoti** asambhinnaraso.

Muttāti khuddakamahantavaṭṭadīghādibhedā anekavidhā. **Maṇīti** rattanīlādibhedo anekavidho. **Veḷuriyoti** vaṃsavaṇṇasirīsapupphavaṇṇādibhedo anekavidho. **Saṅkhoti** dakkhiṇāvaṭṭatambakucchikadhamasāṅkhādibhedo anekavidho. **Silāti** setakālamuggavaṇṇādibhedo anekavidhā. **Pavāḷanti** khuddakamahantarattaghanarattādibhedam anekavidham. **Masāragallanti** kabaramaṇi. **Nāgāti** ūmipiṭṭhavāsīnopi vimānaṭṭhakā nāgāpi.

Aṭṭha pahārādāti satthā aṭṭhapi dhamme vattum sakkoti, soḷasapi bāttiṃsapi catusaṭṭhipi sahasampi, pahārādēna pana aṭṭha kathitā, ahampi teheva sarikkhake katvā kathessāmīti cintetvā evamāha. **Anupubbasikkhā**tiādīsu anupubbasikkhāya tisso sikkhā gahitā, anupubbakiriyāya terasa dhutaṅgāni, anupubbapaṭipadāya satta anupassanā aṭṭhārāsa mahāvīpassanā aṭṭhatīsa ārammaṇavibhattiyo sattatīsa bodhapakkhiyadhammā. **Na āyatakeneva aññapaṭivedhoti** maṇḍūkassa uppatitvā gamanaṃ viya āditova sīlapūraṇādīṃ akatvā arahattappaṭivedho nāma natthi, paṭipāṭiyā pana sīlasamādhīpaññāyo pūretvāva sakkā arahattam pattunti attho.

Ārakāvāti dūreyeva. **Na tena nibbānadhātuyā ūnattam vā pūrattam vāti** asaṅkhyeyyepi kappe

buddhesu anuppannesu ekasattopi parinibbātum na sakkoti, tadāpi “tucchā nibbānadhātū”ti na sakkā vattum. Buddhakāle ca pana eekasmiṃ samāgame asaṅkhyeyyāpi sattā amatam ārādhenti, tadāpi na sakkā vattum – “pūrā nibbānadhātū”ti.

10. Uposathasuttavaṇṇanā

20. Dasame **nisinno hotīti** uposathakaraṇatthāya upāsikāya ratanapāsāde nisinno. Nisajja pana bhikkhūnaṃ cittāni olokeno ekaṃ dussīlapuggalaṃ disvā “sacāhaṃ imasmiṃ puggale nisinneyeva pātimokkhaṃ uddisissāmi, sattadhā tassa muddhā phalissatī”ti tassa anukampāya tuṅhīyeva ahoṣi. **Abhikkantāti** atikkantā parikkhīṇā. **Uddhaste aruṇeti** uggate aruṇasīse. **Nandimukhiyāti** tuṅghamukhiyā. **Aparisuddhā, ānanda, parisāti** “asukapuggalo aparisuddho”ti avatvā “aparisuddhā, ānanda, parisā”ti āha. Sesam sabbattha uttānamevāti.

Mahāvaggo dutiyo.

3. Gahapativaggo

1. Paṭhamauggasuttavaṇṇanā

21. Tatiyassa paṭhame **paññatte āsane nisīdīti** tassa kira ghare pañcannaṃ bhikkhusatānaṃ pañca āsanatāni niccaṃ paññattāneva honti, tesu aññatarasmiṃ āsane nisīdi. **Taṃ suṇāhīti** te suṇāhi, taṃ vā aṭṭhavidhaṃ acchariyadhammaṃ suṇāhi. **Cittaṃ pasīdīti** “buddho nu kho na buddho nu kho”ti vitakkamattampi na uppajji, ayameva buddhoti cittuppādo pasanno anāvilo ahoṣi. **Sakāni vā nātikulānīti** attano yāpanamattaṃ dhaṇaṃ gahetvā nātigharāni gacchatu. **Kassa vo dammīti** katarapurisassa tumhe dadāmi, ārocetha me attano adhippāyaṃ. **Appaṭivibhattāti** “ettakaṃ dassāmi ettakaṃ na dassāmi, idaṃ dassāmi idaṃ na dassāmi”ti cittaṃ uppādentena hi paṭivibhattā nāma hoti, mayhaṃ pana na evaṃ. Atha kho saṅghikā viya gaṇasantakā viya ca sīlavantehi saddhiṃ sādharmaṇeyeva. **Sakkaccaṃyeva payirupāsāmīti** sahatthā upaṭṭhahāmi, cittikārena upasaṅkamāmi.

Anacchariyaṃ kho pana maṃ, bhanteti, bhante, yaṃ maṃ devatā upasaṅkamitvā evaṃ ārocenti, idaṃ na acchariyaṃ. Yaṃ panāhaṃ tatonidānaṃ cittassa uṇṇatiṃ nābhijānāmi, taṃ eva acchariyanti vadati. **Sādhu sādhu, bhikkhūti** ettha kiṅcāpi bhikkhuṃ āmanteti, upāsakasseva pana veyyākaraṇasampahaṃsane esa sādhu kārōti veditabbo.

2. Dutiauggasuttavaṇṇanā

22. Dutie **nāgavaneti** tassa kira seṭṭhino nāgavanaṃ nāma uyyānaṃ, so tattha purebhattaṃ gandhamālādīni gāhāpetvā uyyānakīlikāṃ kīlītukāmo gantvā paricāriyamāno bhagavantaṃ addasa. Saha dassanenevassa purimanayeneva cittaṃ pasīdi, surāpānena ca uppannamando taṅkhaṇaṃyeva pahīyi. Taṃ sandhāyevamāha. **Oṇoesinti** udakaṃ hatthe pātetvā adāsīṃ. **Asukoti** amuko. **Samacittova demīti** “imassa thokaṃ, imassa bahuka”nti evaṃ cittaṇānattaṃ na karomi, deyyadhammaṃ pana ekasadiṣaṃ karomīti dasseti. **Ārocentīti** ākāse ṭhatvā ārocenti. **Natthi taṃ samyojananti** iminā upāsako attano anāgāmiphalaṃ byākaroti.

3. Paṭhamahatthakasuttavaṇṇanā

23. Tatiye **hatthako ālavakoti** bhagavatā ālavakayakkhassa hatthato hatthehi sampaṭicchitattā hatthakoti laddhanāmo rājakumāro. **Sīlavāti** pañcasīladasasīlena sīlavā. **Cāgavāti** cāgasampanno. **Kaccittha, bhanteti**, bhante, kacci ettha bhagavato byākaraṇatthāne. **Appicchoti** adhigamappicchataṃyeva appiccho.

4. Dutiyahatthakasuttavaṇṇanā

24. Catutthe **pañcamattehi upāsakasatehīti** sotāpannasakadāgāmīnaṃyeva ariyasāvakaupāsakānaṃ pañcahi satehi parivuto bhuttapātarāso gandhamālavilepenacuṇṇāni gahetvā yena bhagavā tenupasaṅkami. **Saṅgahavattḥūnīti** saṅgaṇhanakāraṇāni. **Tehāhanti** tehi ahaṃ. **Taṃ dānena saṅgaṇhāmīti** naṅgalabalibaddabhattabijādīni ceva gandhamālamūlādīni ca datvā saṅgaṇhāmi. **Peyyavajjenāti** amma, tāta, bhātara, bhaginītiādikena kaṇṇasukhena mudukena piyavacanena saṅgaṇhāmi. **Atthacariyāyāti** “imassa dānena vā piyavacanena vā kiccaṃ natthi, atthacariyāya saṅgaṇhitabbayuttako aya”nti ñatvā uppannakiccanittharaṇasaṅkhātāya atthacariyāya saṅgaṇhāmi. **Samānattatāyāti** “imassa dānādīhi kiccaṃ natthi, samānattatāya saṅgaṇhitabbo aya”nti ekato khādanapivananisajjādīhi attanā samānaṃ katvā saṅgaṇhāmi. **Daliddassa kho no tathā sotabbaṃ maññanti** daliddassa kiñci dātuṃ vā kātuṃ vā asakkontassa, yathā daliddassa no tathā sotabbaṃ maññanti, mama pana sotabbaṃ maññanti, dinnovāde tiṭṭhanti, na me anusāsaṇiṃ atikkamitabbaṃ maññanti. **Yoni kho tyāyanti** upāyo kho te ayaṃ. Imesu pana dvīsipi suttesu satthārā sīlacāgapañña missakā kathitāti veditabbā.

5-6. Mahānāmasuttādivaṇṇanā

25-26. Pañcame **atthūpaparikkhita hotīti** atthānatthaṃ kāraṇākāraṇaṃ upaparikkhitā hoti. Chaṭṭhe saddhāsīlacāgā missakā kathitā.

7. Paṭhamabalasuttavaṇṇanā

27. Sattame **ujjhattibalāti** ujjhānabalā. Bālānañhi “yaṃ asuko idañcidañca āha, maṃ so āha, na añña”nti evaṃ ujjhānameva balaṃ. **Nijjhattibalāti** “na idaṃ evaṃ, evaṃ nāmeta”nti atthānatthanijjhāpanaṃyeva balaṃ. **Paṭisaṅkhānabalāti** paccavekkhaṇabalā. **Khantibalāti** adhivāsanabalā.

8. Dutiyabalasuttavaṇṇanā

28. Aṭṭhame **balānīti** ñāṇabalāni. **Āsavānaṃ khayam paṭijānātīti** arahattaṃ paṭijānāti. **Aniccatoti** hutvā abhāvākārena. **Yathābhūtanti** yathāsabhāvato. **Sammappaññāyāti** sahavipassanāya maggapaññāya. **Āṅgārakāsūpamāti** santāpanaṭṭhena āṅgārakāsuyā upamitā ime kāmāti. **Vivekaninnanti** phalasaṃpattivasena nibbānaninnaṃ. **Vivekaṭṭhanti** kilesehi vajjitaṃ dūrībhūtaṃ vā. **Nekkhammābhīratanti** pabbajjābhīrataṃ. **Byantibhūtanti** vigatantabhūtaṃ ekadesenāpi anallīnaṃ viṣaṃyuttaṃ viṣaṃsaṭṭhaṃ. **Āsavaṭṭhāniyehīti** sampayogavasena āsavānaṃ kāraṇabhūtehi, kilesadhammehīti attho. Atha vā **byantibhūtanti** vigatavāyanti attho. Kuto? **Sabbaso āsavaṭṭhāniyehi dhammehi**, sabbehi tebhūmakadhammehīti attho. Imasmiṃ sutte ariyamaggo lokiyalokuttaro kathito.

9. Akkhaṇasuttavaṇṇanā

29. Navame khaṇe kiccāni karotīti **khaṇakicco**, okāsaṃ labhitvāva kiccāni karotīti attho. **Dhammoti** catusaccadhammo. **Opasamikoti** kilesūpasamāvaho. **Parinibbāyikoti** kilesaparinibbānakaro. Catumaggañāṇasaṅkhātāṃ sambodhiṃ gacchati sampāpuṇātīti **sambodhagāmī**. **Dīghāyukam devanikāyanti** idaṃ asaṅgaṃ devanikāyaṃ sandhāya vuttaṃ. **Aviññātāresūti** ativiya aviññāsu.

Suppavediteti sukathite. **Antarāyikāti** antarāyakarā. **Khaṇo ve mā upaccagāti** ayaṃ laddho khaṇo mā atikkami. **Idha ceva naṃ virādhetīti** sace koci pamattacārī idha imaṃ khaṇaṃ labhitvāpi saddhammassa niyāmataṃ ariyamaggaṃ virādheti na sampādeti. **Atītatthoti** hāpitattho. **Cirattaṃ**

anutapissatī cirarattaṃ socissati. Yathā hi “asukaṭṭhāne bhaṇḍaṃ samuppanna”nti sutvā eko vāñijo na gaccheyya, aññe gantvā gaṇheyyuṃ, tesam taṃ aṭṭhaguṇampi dasaguṇampi bhaveyya. Atha itaro “mama attho atikkanto”ti anutapeyya, evaṃ yo idha khaṇaṃ labhitvā appaṭipajjanto saddhammassa niyāmataṃ virādheti, so ayaṃ vāñijova atītattho ciraṃ anutapissati socissati. Kiñca bhiiyo **avijjānivutoti** tathā. **Paccavidunti** paṭivijjhimsu. **Samvarāti** silasaṃvarā. **Māradheyyaparānugeti** māradheyyasaṅkhātaṃ saṃsāraṃ anugate. **Pāraṅgatāti** nibbānaṃ gatā. **Ye pattā āsavakkhayanti** ye arahattaṃ pattā. Evamidha gāthāsu vaṭṭavivaṭṭaṃ kathitaṃ.

10. Anuruddhamahāvītakkasuttavaṇṇanā

30. Dasame **cetīsūti** cetināmakānaṃ rājūnaṃ nivāsaṭṭhānattā evaṃladdhavohāre raṭṭhe.

Pācīnavamsadāyēti dasabalassa vasanaṭṭhānato pācīnadisāya ṭhite vaṃsadāye nīlobhāsehi veḷūhi sañchanne araññe. **Evaṃ cetaso parivitakko udapādīti** thero kira pabbajitvā paṭhamaantovassamhiyeva samāpattilābhī hutvā saḥassalokadhātudassanasamatthaṃ dibbacakkhuññaṃ uppādesi. So sārīputtattherassa santikaṃ gantvā evamāha – “idhāhaṃ, āvuso sārīputta, dibbena cakkhunā visuddhena atikkantaṃanusakena saḥassalokaṃ olokemi. Āraddhaṃ kho pana me vīriyaṃ asallīnaṃ, upaṭṭhitā sati asamuṭṭhā, passaddho kāyo asāraddho, samāhitaṃ cittaṃ ekaggaṃ. Atha ca pana me anupādāya āsavehi cittaṃ na vimuccatī”ti. Atha naṃ thero āha – “yaṃ kho te, āvuso anuruddha, evaṃ hoti ‘ahaṃ dibbena cakkhunā...pe... olokemi’ti, idaṃ te mānasmīṃ. Yampi te, āvuso, anuruddha evaṃ hoti ‘āraddhaṃ kho pana me vīriyaṃ...pe... ekagga’nti, idaṃ te uddhaccasmīṃ. Yampi te, āvuso anuruddha, evaṃ hoti ‘atha ca pana me anupādāya āsavehi cittaṃ na vimuccatī’ti, idaṃ te kukkucasmīṃ. Sādhu vatāyasmā anuruddho ime tayo dhamme pahāya ime tayo dhamme amanasikarivā amatāya dhātuyā cittaṃ upasaṃharatū”ti evamassa thero kammaṭṭhānaṃ kathesi. So kammaṭṭhānaṃ gahetvā satthāraṃ āpucchitvā cetiraṭṭhaṃ gantvā samaṇadhammaṃ karonto aṭṭhamāsaṃ caṅkamaṇa vītināmesi. So padhānaveganimmathitattā kilantakāyo ekassa veḷugumbassa heṭṭhā nisīdi. Athassāyaṃ evaṃ cetaso parivitakko udapādī, esa mahāpurisavitakko uppajjīti attho.

Appicchassāti ettha paccayappiccho, adhigamappiccho, pariyattiappiccho, dhutaṅgappicchoti cattāro appicchā. Tattha paccayappiccho bahuṃ dente appaṃ gaṇhāti, appaṃ dente appataraṃ gaṇhāti, na anavasesaggāhī hoti. Adhigamappiccho majjhantikatthero viya attano adhigamaṃ aññesaṃ jānituṃ na deti. Pariyattiappiccho tepiṭakopi samāno na bahussutabhāvaṃ jānāpetukāmo hoti saketatissatthero viya. Dhutaṅgappiccho dhutaṅgapariharaṇabhāvaṃ aññesaṃ jānituṃ na deti dvebhātikattheresu jeṭṭhatthero viya. Vatthu visuddhimagge kathitaṃ. **Ayaṃ dhammoti** evaṃ santaguṇaniguhanena ca paṭiggahaṇe mattaññūtāya ca appicchassa puggalassa ayaṃ navalokuttaradhammo sampajjati, no mahicchassa. Evaṃ sabbattha yojetabbaṃ.

Santuṭṭhassāti catūsu paccayesu tīhi santosehi santuṭṭhassa. **Pavivittassāti** kāyacittaupadhivivekehi vivittassa. Tattha kāyaviveko nāma gaṇasaṅgaṇikaṃ vinodetvā ārambhavatthavasena ekībhāvo. Ekībhāvamatteneva kammaṃ na nipphajjati kasiṇaparikkammaṃ katvā aṭṭha samāpattiyo nibbatteti, ayaṃ cittaviveko nāma. Samāpattimatteneva kammaṃ na nipphajjati jhānaṃ pādakaṃ katvā saṅkhāre sammasitvā saha paṭisambhidāhi arahattaṃ pāpuṇāti, ayaṃ sabbākārato upadhiviveko nāma. Tenāha bhagavā – “kāyaviveko ca vivekaṭṭhakāyānaṃ nekkhammābhiraṭānaṃ, cittaviveko ca parisuddhacittānaṃ paramavodānappattānaṃ, upadhiviveko ca nirupadhīnaṃ puggalānaṃ visaṅkhāragatāna”nti (mahāni. 7, 49).

Saṅgaṇikārāmassāti gaṇasaṅgaṇikāya ceva kilesasaṅgaṇikāya ca ratassa. **Āraddhavīriyassāti** kāyikacetāsikavīriyavasena āraddhavīriyassa. **Upaṭṭhitassatissāti** catusatipattihānavasena upaṭṭhitassatissa. **Samāhitassāti** ekagacittassa. **Paññavatoti** kammassakatapaññāya paññavato.

Sādhu sādhuti therassa vitakkaṃ sampahaṃsento evamāha. **Imaṃ aṭṭhamanti** satta nidhī laddhapurisassa aṭṭhamam dento viya, satta maṇiratanāni, satta hatthiratanāni, satta assaratanāni

laddhapurisassa aṭṭhamam dento viya satta mahāpurisavitakke vitakketvā tṭhassa aṭṭhamam ācikkhanto evamāha. **Nippapañcārāmassāti** tañhāmānadiṭṭhipapañcarahitattā nippapañcasāṅkhāte nibbānapade abhiratassa. Itaram tasseva vevacanaṃ. **Papañcārāmassāti** yathāvuttesu papañcesu abhiratassa. Itaram tasseva vevacanaṃ.

Yatoti yadā. Tatoti tadā. Nānārattānanti nilapītalohitodātavaññehi nānārajanehi rattānaṃ. **Pamsukūlanti** tevīsatiyā khettesu tṭhitapaṃsukūlacīvaraṃ. **Khāyissatīti** yathā tassa pubbaṅhasamayādīsu yasmim samaye yaṃ icchatī, tasmim samaye taṃ pārupantassa so dussakaraṇḍako manāpo hutvā khāyati, evaṃ tuyhampi cīvarasantosamahāriyavaṃsena tuṭṭhassa viharato paṃsukūlacīvaraṃ khāyissati upaṭṭhahissati. **Ratīyāti** ratiatthāya. **Aparitassāyāti** tañhādiṭṭhiparitassanāhi aparitassanattāya. **Phāsuviḥārāyāti** sukhaviḥārattāya. **Okkamanāya nibbānassāti** amatam nibbānaṃ otaraṇattāya.

Piṇḍiyālopabhojananti gāmanigamarājadhānīsu jaṅghābalaṃ nissāya gharapaṭipāṭiyā carantena laddhapiṇḍiyālopabhojanaṃ. **Khāyissatīti** tassa gahapatino nānaggarasabhojanaṃ viya upaṭṭhahissati. **Santuṭṭhassa viharatoti** piṇḍapātasantosamahāriyavaṃsena santuṭṭhassa viharato. **Rukkhamūlasenāsanam khāyissatīti** tassa gahapatino tebhūmakapāsāde gandhakusumavāsasugandham kūṭāgāraṃ viya rukkhamūlaṃ upaṭṭhahissati. **Santuṭṭhassāti** senāsanasantosamahāriyavaṃsena santuṭṭhassa. **Tiṇasantḥārakoti** tiṇehi vā paññehi vā bhūmiyaṃ vā phalakapāsānatalāni vā aññatarasmim santhatasanthato. **Pūtimuttanti** yaṃkiñci muttam. Taṅkhaṇe gahitampi pūtimuttameva vuccati duggandhattā. **Santuṭṭhassa viharatoti** gilānapaccayabhesajjaparikkhārasantosena santuṭṭhassa viharato.

Iti bhagavā catūsu tṭhānesu arahattam pakkhipanto kammaṭṭhānaṃ kathetvā “katarasenāsane nu kho vasantassa kammaṭṭhānaṃ sappāyaṃ bhavissatī”ti āvajjento “tasmiññeva vasantassā”ti ñatvā **tena hi tvam, anuruddhātī**ādīmāha. **Pavivittassa viharatoti** tīhi vivekehi vivittassa viharantassa. **Uyyojanikapaṭisaṃyuttanti** uyyojanikeheva vacanehi paṭisaṃyuttam, tesam upaṭṭhānagamanakaṃyevāti attho. **Papañcanirodheti** nibbānapade. **Pakkhandatīti** ārammaṇakaraṇavasena pakkhandati. **Pasīdatīti**ādīsipi ārammaṇavaseneva pasīdanasantiṭṭhanamuccanā veditabbā. Iti bhagavā cetiraṭṭhe pācīnavamsadāye āyasmato anuruddhassa kathite aṭṭha mahāpurisavitakke puna bhesakaḷāvanamahāvihāre nisīditvā bhikkhusaṅghassa vitthārena kathesi.

Manomayenāti manena nibbattitakāyopi manomayoti vuccati manena gatakāyopi, idha manena gatakāyaṃ sandhāyevamāha. **Yathā me ahu saṅkappoti** yathā mayhaṃ vitakko ahoṣi, tato uttari aṭṭhamam mahāpurisavitakkaṃ dassento tato uttariṃ desayī. Sesam sabbattha uttānamevāti.

Gahapativaggo tatiyo.

4. Dānavaggo

1. Paṭhamadānasuttavañṇanā

31. Catutthassa paṭhame **āsajja dānaṃ detīti** patvā dānaṃ deti. Āgataṃ disvā taṃ muhuttamyeva nisīdāpetvā sakkāraṃ katvā dānaṃ deti, dassāmīti na kilameti. **Bhayāti** “ayaṃ adāyako akārako”ti garahabhayā, apāyabhayā vā. **Adāsi meti** mayhaṃ pubbe esa idaṃ nāma adāsīti deti. **Dassati meti** anāgate idaṃ nāma dassatīti deti. **Sāhu dānanti** dānaṃ nāma sādhu sundaraṃ buddhādīhi paṇḍītehi pasatthanti deti. **Cittālaṅkāracittaparikkhārattham dānaṃ detīti** samathavipassanācittassa alaṅkāratthañceva parikkhāratthañca deti. Dānañhi cittaṃ muduṃ karoti. Yena laddho, so “laddham me”ti muducitto hoti. Yena dinnam, sopi “dinnam mayā”ti muducitto hoti. Iti ubhinnaṃ cittaṃ muduṃ karoti. Teneva “adantadamana”nti vuccati. Yathāha –

“Adantadamaṇaṃ dānaṃ, adānaṃ dantadūsakaṃ;
Dānena piyavācāya, unnamanti namanti cā”ti.

Imesu pana aṭṭhasu dānesu cittālaṅkāradānameva uttamanti.

2. Dutiyadānasuttavaṇṇanā

32. Dutīye **saddhāti** yāya saddhāya dānaṃ deti, sā saddhā. **Hiriyanti** yāya hiriyā dānaṃ deti, sāva adhippetā. **Kusalaṅca dānanti** anavajjaṅca dānaṃ. **Diviyanti** divaṅgamaṃ.

3. Dānavatthusuttavaṇṇanā

33. Tatiye **dānavatthūnīti** dānakāraṇāni. **Chandā dānaṃ detīti** pemena dānaṃ deti. **Dosāti** dosena kuddho hutvā yaṃ atthi, taṃ vegena gaṇhitvā deti. **Mohāti** mohena mūḷho deti. **Bhayāti** garahabhayena vā apāyabhayena vā, tassa tasseva vā pana bhayena deti. **Kulavaṃsanti** kulapaveṇiṃ.

4. Khettasuttavaṇṇanā

34. Catutthe **na mahapphalaṃ hotīti** dhaññaphalena mahapphalaṃ na hoti. **Na mahassādanti** yampissa phalaṃ hoti, tassa assādo na mahā hoti mandassādaṃ na madhuraṃ. **Na phātiseyyanti** seyyāpissa na hoti vuḍḍhi, tassa mahantaṃ vīhithambhasannivesaṃ na hotīti attho. **Unnāmaninnāmīti** thalaninnavasena visamatalaṃ. Tattha thale udakaṃ na saṅṭhāti, ninne atibahu tiṭṭhati. **Pāsāṇasakkharikanti** pattharivā ṭhitapiṭṭhipāsāṇehi ca khuddakapāsāṇehi ca sakkharāhi ca samannāgataṃ. **Ūsaranti** ubbhinnaloṇaṃ. **Na ca gambhīrasanti** thaddhabhūmitāya gambhīrānugataṃ, naṅgalamaggaṃ katvā kasitūṃ na sakkā hoti, uttānanaṅgalamaggameva hoti. **Na āyasampannanti** na udakāgamanasampannaṃ. **Na apāyasampannanti** pacchābhāge udakaniggamanamaggasampannaṃ na hoti. **Na mātīkāsampannanti** na khuddakamahantīhi udakamātīkāhi sampannaṃ hoti. **Na mariyādasampannanti** na kedāramariyādāhi sampannaṃ. **Na mahapphalanti**ādīni sabbāni vipākaphalavaseneva vedītabbāni.

Sampanneti paripuṇṇe sampattiyutte. **Pavuttā bījasampadāti** sampannaṃ bījaṃ ropitaṃ. **Deve sampādayantamhīti** deve sammā vassante. **Anītisampadā hotīti** kīṭakimiādīpāṇakaītiyā abhāvo ekā sampadā hoti. **Virūḷhīti** vaḍḍhi dutiyā sampadā hoti. **Vepullanti** vipulabhāvo tatiyā sampadā hoti. **Phalanti** paripuṇṇaphalaṃ catutthī sampadā hoti. **Sampannasīlesūti** paripuṇṇasīlesu. **Bhojanasampadāti** sampannaṃ vividhabhojanaṃ. **Sampadānanti** tividhaṃ kusalasampadaṃ. **Upanetīti** sā bhojanasampadā upanayati. Kasmā? **Sampannañhissa taṃ kataṃ**, yasmāssa taṃ katakammaṃ sampannaṃ paripuṇṇanti attho. **Sampannatthūdhāti** sampanno atthu idha. **Vijjācaraṇasampannoti** tīhi vijjāhi ca pañcadasahi caraṇadhammehi ca samannāgato. **Laddhāti** evarūpo puggalo cittassa sampadaṃ avekallapariṇṇabhāvaṃ labhitvā. **Karoti kmmasampadanti** paripuṇṇakammaṃ karoti. **Labhati catthasampadanti** atthaṅca paripuṇṇaṃ labhati. **Diṭṭhisampadanti** vipassanādiṭṭhiṃ. **Maggasampadanti** sotāpattimaggaṃ. **Yāti sampannamānasoti** paripuṇṇacitto hutvā arahattaṃ yāti. **Sā hoti sabbasampadāti** sā sabbadukkhehi vimutti sabbasampadā nāma hotīti.

5. Dānūpapattisuttavaṇṇanā

35. Pañcame **dānūpapattiyoti** dānapaccayā upapattiyō. **Dahatīti** ṭhapeti. **Adhiṭṭhātīti** tasseva vevacanaṃ. **Bhāvetīti** vaḍḍheti. **Hīne vimuttanti** hīnesu pañcasu kāmagaṇesu vimuttaṃ. **Uttari abhāvitanti** tato uttarimaggaphalathāya abhāvitaṃ. **Tatrūpapattiyā saṃvattatīti** yaṃ ṭhānaṃ patthetvā kusalaṃ kataṃ, tattha nibbattanathāya saṃvattatī. **Vītarāgassāti** maggena vā samucchinnarāgassa samāpattiyā vā vikkhambhitarāgassa. Dānamatteneva hi brahmaloke nibbattitūṃ na

sakkā, dānaṃ pana samādhivipassanācittassa alaṅkāraparivāraṃ hoti. Tato dānena muducitto brahmavihāre bhāvetvā brahmaloke nibbattati. Tena vuttaṃ – “vītarāgassa no sarāgassā”ti.

6. Puññakiriyavattusuttavaṇṇanā

36. Chaṭṭhe puññakiriyāni ca tāni tesam tesam ānisaṃsānaṃ vattūni cāti **puññakiriyavattūni**. Dānādīnañhi lakkhaṇe cittaṃ ṭhapetvā “evarūpaṃ nāma amhehi dānaṃ dātappaṃ, sīlaṃ rakkhitappaṃ, bhāvanā bhāvetabbā”ti sattā puññāni karonti. Dānameva **dānamayaṃ**, dānacetanāsu vā purimacetanāto nipphannā sanniṭṭhāpakacetanā **dānamayaṃ** sīlādīhi sīlamayādīni viya. Sesadvayesupi eseva nayo. **Parittaṃ kataṃ hotīti** thokaṃ mandaṃ kataṃ hoti. **Nābhisambhotīti** na nipphajjati. **Akataṃ hotīti** bhāvanāyayogoyeva anāraddho hotīti attho. **Manussadobhagyaṃ** manussesu sampattirahitaṃ pañcavidhaṃ nīcakulaṃ. **Upapajjati** paṭisandhivasena upagacchati, tattha nibbattati attho. **Mattaso katanti** pamāṇena kataṃ, thokaṃ na bahu. **Manussasobhagyaṃ** manussesu subhagabhāvaṃ tividhakulasampattiṃ. **Adhimattanti** adhikappamāṇaṃ balavaṃ vā. **Adhigaṇhanti** abhibhavitvā gaṇhanti, visiṭṭhatarā jetṭhakā hontīti attho.

7. Sappurisdānasuttavaṇṇanā

37. Sattame **sucinti** parisuddhaṃ vaṇṇasampannaṃ deti. **Paṇīti** rasūpapannaṃ. **Kālenāti** yuttapattakālena. **Kappiyanti** yaṃ kappiyaṃ, taṃ deti. **Viceyya detīti** “imassa dinnam mahapphalaṃ bhaviṣṣati, imassa na mahapphala”nti evaṃ paṭiggāhakapariyesanavasena dānaṃ vā paṇidhāyavasena dānaṃ vā vicinitvā deti.

8. Sappurisasuttavaṇṇanā

38. Aṭṭhame **atthāyāti** atthatthāya. **Hitāya sukhāyāti** hitatthāya sukhatthāya. **Pubbapetānanti** paralokagatānaṃ ñātīnaṃ. Imasmiṃ sutte anuppanne buddhe cakkavattirājāno bodhisattā paccakabuddhā labbhanti, buddhakāle buddhā ceva buddhasāvaka ca. Yathāvuttānañhi etesaṃ atthāya hitāya sukhāya saṃvattanti. **Bahunnaṃ vata atthāya, sappañño gharamāvasanti** sappañño ghare vasanto bahūnaṃ vata atthāya hoti. **Pubbeti** paṭhameva. **Pubbekatanussaranti** mātāpitūnaṃ pubbakāraguṇe anussaranto. **Sahadhammenāti** sakāraṇena paccayapūjanena pūjeti. **Apace brahmacārayoti** brahmacārino apacayati, nīcavuttitaṃ nesaṃ āpajjati. **Pesaloti** piyasīlo.

9. Abhisandasuttavaṇṇanā

39. Navame **dānānīti** cetanādānāni. **Aggaññānīti**ādīnaṃ attho heṭṭhā vuttoyeva.

10. Duccaritavipākasuttavaṇṇanā

40. Dasame **pāṇātipātoti** pāṇātipātacetanā. **Sabbalahusoti** sabbalahuko. **Appāyukasamvattanikoti** tena parittakena kammavipākena appāyuko hoti, dinnamattāya vā paṭisandhiyā vilīyati mātukucchito nikkhantamatte vā. Evarūpo hi na aññassa kassaci nissando, pāṇātipātasseeva gatamaggo esoti. **Bhogabyasanasamvattanikoti** yathā kākaṇikāmatampi hatthe na tiṭṭhati, evaṃ bhogabyasanaṃ saṃvatteti. **Sapattaverasamvattaniko hotīti** saha sapattehi veraṃ saṃvatteti. Tassa hi sapattā ca bahukā hontī. Yo ca naṃ passati, tasmim verameva uppādeti na nibbāyati. Evarūpo hi parassa rakkhitagopitabhaṇḍe aparādhassa nissando.

Abhūtabbhakkhānasamvattaniko hotīti abhūtena abbhakkhānaṃ saṃvatteti, yena kenaci kataṃ tasseva upari patati. **Mittehi bhedanasamvattanikoti** mittehi bhedaṃ saṃvatteti. Yaṃ yaṃ mittam karoti, so so bhijjatiyeva. **Amanāpasaddasamvattanikoti** amanāpasaddaṃ saṃvatteti. Yā sā vācā

kaṇṭakā kakkasā kaṭukā abhisajjanī mammacchedikā, gatagataṭṭhāne tameva suṇāti, manāpasaddasavanam nāma na labhati. Evarūpo pharusavācāya gatamaggo nāma. **Anādeyyavācāsaṃvattaniko** aggahetabbavacanataṃ saṃvatteti, “tvaṃ kasmā kathesi, ko hi tava vacanam gahessatī”ti vattabbataṃ āpajjati. Ayaṃ saṃhappalāpassa gatamaggo. **Ummattakasaṃvattaniko hotīti** ummattakabhāvaṃ saṃvatteti. Tena hi manusso ummatto vā khittacitto vā eḷamūgo vā hoti. Ayaṃ surāpānassa nissando. Imasmiṃ sutte vaṭṭameva kathitanti.

Dānavaggo catuttho.

5. Uposathavaggo

4. Vāseṭṭhasuttavaṇṇanā

44. Pañcamassa catutthe **ime cepi, vāseṭṭha, mahāsālā**ti purato ṭhite dve sālārukkhe dassento parikkappopamaṃ āha. Idaṃ vuttaṃ hoti – ime tāva mahāsālā acetanā. Sace etepi sacetanā hutvā aṭṭhaṅgasamannāgataṃ uposathaṃ upavaseyyuṃ, etesampi so uposathavāso dīgharattaṃ hitāya sukhāya assa. Bhūte pana vattabbameva natthīti.

6. Anuruddhasuttavaṇṇanā

46. Chaṭṭhe **yenāyasmā anuruddho**ti tā kira devatā attano sampattiṃ oloketvā “kiṃ nu kho nissāya ayaṃ sampatti amhehi laddhā”ti āvajjamānā theram disvā “mayam amhākaṃ ayyassa pubbe cakkavattirajjam karontassa pādapariārikā hutvā tena dinnovāde ṭhatvā imam sampattiṃ labhimha, gacchāma theram ānetvā imam sampattiṃ anubhavissāmā”ti divā yenāyasmā anuruddho tenupasaṅkamimsu. **Tisu ṭhānesūti** tisū kāraṇesu. **Ṭhānaso paṭilabhāmāti** khaṇeneva labhāma. **Saranti** vacanasaddam vā gītasaddam vā ābharaṇasaddam vā. **Pītā assūti**ādīni nīlā tāva jātā, pītā bhavituṃ na sakkhissantītiādīnā nayena cintevā vitakketi. Tāpi “idāni ayyo amhākaṃ pītabhāvaṃ icchati, idāni lohitabhāva”nti tādisāva ahesuṃ.

Accharam vādesīti pāṇitalam vādesi. **Pañcaṅgikassāti** ātataṃ, vitataṃ, ātatavitataṃ, ghanam, susiranti imehi pañcahi aṅgehi samannāgatassa. Tattha ātataṃ nāma cammapariyonaddhesu bheriādīsū ekatalatūriyam, vitataṃ nāma ubhayatalam, ātatavitataṃ nāma sabbaso pariyonaddham, susiram vaṃsādi, ghanam sammādi. **Suvinitassāti** ākaḍḍhanasithilakaraṇādīhi samucchitassa. **Suppaṭipatālitassāti** pamāṇe ṭhitabhāvajānanattham suṭṭhu paṭipatālitassa. **Kusalehi susamannāhatassāti** ye vādetuṃ kusalā chekā, tehi vāditassa. **Vaggūti** cheko sundaro. **Rajanīyoti** rañjetuṃ samattho. **Kamanīyoti** kāmetabbayutto. **Khamanīyoti** vā pāṭho, divasampi suyamāno khamateva, na nibbindatīti attho. **Madanīyoti** mānamadapurisamadajanano. **Indriyāni okkhipīti** “asārappaṃ imā devatā karontī”ti indriyāni heṭṭhā khiṇi, na akkhīni ummīletvā olokesi. **Na khvayyo anuruddho sādiyatīti** “mayam naccāma gāyāma, ayyo pana anuruddho na kho sādiyati, akkhīni ummīletvā na oloketi, kiṃ mayam naccitvā vā gāyitvā vā karissāmā”ti tattheva antaradhāyimsu. **Yena bhagavā tenupasaṅkamīti** tāsam devatānam ānubhāvaṃ disvā “katihī nu kho dhammehi samannāgato mātugāmo manāpakāyike devaloke nibbattatī”ti imamattham pucchituṃ upasaṅkami.

9-10. Idhalokikasuttadvayaṇṇanā

49-50. Navame **ayam’sa loko āraddho hotīti** ayamassa loko idhaloke karaṇamattāya āraddhattā paripuṇṇattā āraddho hoti paripuṇṇo. **Soḷasākārasampannāti** sutte vuttehi aṭṭhahi, gāthāsu aṭṭhahīti soḷasahi ākārehi samannāgatā, yāni vā aṭṭhaṅgāni parampi tesu samādapetīti evampi soḷasākārasampannāti eke. Saddhāsīlapaññā panettha missikā kathitā. Dasamaṃ bhikkhusaṅghassa kathitaṃ. Sabbasuttesu pana yaṃ na vuttaṃ, taṃ heṭṭhā āgatanayattā uttānatthamevāti.

Uposathavaggo pañcama.

Paṭhamapaṇṇāsakaṃ niṭṭhitam.

2. Dutiyapaṇṇāsakaṃ

(6) 1. Gotamīvaggo

1. Gotamīsuttavaṇṇanā

51. Chatṭhassa paṭhame **sakkesu viharatīti** paṭhamagamanena gantvā viharati. **Mahāpajāpatīti** puttapajāya ceva dhītupajāya ca mahantattā evaṃladdhanāmā. **Yena bhagavā tenupasaṅkamīti** bhagavā kapilapuraṃ gantvā paṭhamameva nandaṃ pabbājesi, sattame divase rāhulakumāraṃ. **Cumbaṭakakalahe** (dī. ni. aṭṭha. 2.331; sam. ni. aṭṭha. 1.1.37) pana ubhayanagaravāsikesu yuddhatthāya nikkhantesu satthā gantvā te rājāno saññāpetvā **attadaṇḍasuttaṃ** (su. ni. 941 ādayo; mahāni. 170 ādayo) kathesi. Rājāno pasīditvā aḍḍhatiyasate aḍḍhatiyasate kumāre adamsu, tāni pañca kumārasatāni satthu santike pabbajimsu, atha nesam pajāpatiyō sāsanaṃ pesetvā anabhiratiṃ uppādayimsu. Satthā tesam anabhiratiyā uppannabhāvaṃ ñatvā te pañcasate daharabhikkhū kuṇāladahaṃ netvā attano kuṇālakāle nisinnapubbe pāsānatale nisīditvā **kuṇālajātakakathāya** (jā. 2.21.kuṇālajātaka) tesam anabhiratiṃ vinodetvā sabbepi te sotāpattiphale patiṭṭhāpesi, puna mahāvanaṃ ānetvā arahattaphaleti. Tesam cittaḷānanattham punapi pajāpatiyō sāsanaṃ pahiṇimsu. Te “abhabbā mayam gharāvāsassā”ti paṭisāsanaṃ pahiṇimsu. Tā “na dāni amhākaṃ gharaṃ gantum yuttam, mahāpajāpatiyā santikaṃ gantvā pabbajjam anujānāpetvā pabbajissāmā”ti pañcasatāpi mahāpajāpatiṃ upasaṅkamitvā “ayye, amhākaṃ pabbajjam anujānāpethā”ti āhamsu. Mahāpajāpatī tā itthiyo gahetvā yena bhagavā tenupasaṅkami. Setacchattassa heṭṭhā rañño parinibbutakāle upasaṅkamītipi vadantiyeva.

Alam gotami, mā te ruccīti kasmā paṭikkhipi, nanu sabbesampi buddhānaṃ catasso parisā hontīti? Kāmaṃ hontī, kilametvā pana anekavāraṃ yācite anuññātaṃ pabbajjam “dukkhena laddhā”ti sammā paripālessantīti garuṃ katvā anuññātukāmo paṭikkhipi. **Pakkāmīti** puna kapilapurameva pāvisi. **Yathābhirantaṃ viharitvāti** bodhaneyyasattānaṃ upanissayaṃ olokento yathājjhāsayane viharitvā. **Cārikaṃ pakkāmīti** mahājanasaṅgahaṃ karonto uttamāya buddhasiriyā anopamena buddhaviḷāsena aturitaḷārikaṃ pakkāmi.

Sambahulāhi sākiyānīhi saddhinti antonivesanamhiyeva dasabalam uddissa pabbajjāvesam gahetvā pañcasatā sākiyāniyo pabbajjāvesamyeva gāhāpetvā sabbāhipi tāhi sambahulāhi sākiyānīhi saddhiṃ. **Cārikaṃ pakkāmīti** gamanaṃ abhinīhari. Gamanābhiniharaṇakāle pana tā sukhumālā rājītthiyo padasā gantum na sakkhissantīti sākiyakoliyarājāno sovaṇṇasivikāyo upaṭṭhāpayimsu. Tā pana “yāne āruyha gacchantīti satthari agāravo kato hotī”ti ekapaṇṇāsajōjanikaṃ padasāva paṭipajjimsu. Rājānopi purato ca pacchato ca ārakkham saṃvidahāpetvā taṇḍulasappitelādīnaṃ sakaṭāni pūrāpetvā “gataṭṭhāne gataṭṭhāne āhāraṃ paṭiyādetthā”ti purise pesayimsu. **Sūnehi pādehīti** tāsāni sukhumālattā pādesu eko phoṭo utṭheti, eko bhijjati. Ubho pādā katakaṭṭhisamparikiṇṇā viya hutvā uddhumātā jātā. Tena vuttam – “sūnehi pādehī”ti. **Bahidvārakoṭṭhaketi** dvārakoṭṭhakato bahi. Kasmā panevaṃ ṭhitāti? Evaṃ kirassā ahosi – “ahaṃ tathāgatena ananuññātā sayameva pabbajjāvesam aggahesiṃ, evaṃ gahitabhāvo ca pana me sakalajambudīpe pākāṭo jāto. Sace satthā pabbajjam anujānāti, iccetam kusalam. Sace pana nānujānissati, mahatī garahā bhavissati”ti vihāraṃ pavisitum asakkontī rodamānāva aṭṭhāsi.

Kim nu tvaṃ gotamīti kim nu rājakulānaṃ vipatti uppānā, kena tvaṃ kāraṇena evaṃ vivaṇṇabhāvaṃ pattā, sūnehi pādehi...pe... ṭhitāti. **Aññenapi pariyaṇenāti** aññenapi kāraṇena. **Bahukārā, bhanteti**ādīnā tassā guṇam kathetvā puna pabbajjam yācanto evamāha. Satthāpi “itthiyo

nāma parittapaññā, ekayācitamattena pabbajjāya anuññātāya na mama sāsanaṃ garuṃ katvā gaṇhissanti’ ti tikkhattuṃ paṭikkhipitvā idāni garuṃ katvā gāhāpetukāmatāya **sace, ānanda, mahāpajāpati gotamī aṭṭha garudhamme paṭiggaṇhāti, sāva’ssā hotu upasampadāti**ādīmāha. Tattha **sāvassāti** sā eva assā pabbajjāpi upasampadāpi hotu.

Tadahūpasampannassāti taṃdivasaṃ upasampannassa. **Abhivādanaṃ paccuṭṭhānaṃ añjalikammaṃ sāmīcikammaṃ kattabbanti** omānātimāne akatvā pañcapaṭiṭṭhitena abhivādanaṃ, āsanā paccuṭṭhāya paccuggamanavasena paccuṭṭhānaṃ, dasanakhe samodhānetvā añjalikammaṃ, āsanapaññāpanabījanādikaṃ anucchavikakammasaṅkhātāṃ sāmīcikammañca katabbāṃ. **Abhikkhuke āvāseti** yattha vasantiyā anantarāyena ovādatthāya upasaṅkamaṇaṭṭhāne ovādadāyako ācariyo natthi, ayaṃ abhikkhuko āvāso nāma. Evarūpe āvāse vassaṃ na upagantabbāṃ. **Anvaḍḍhamāsanti** anuposathikaṃ. **Ovādūpasāṅkamananti** ovādatthāya upasaṅkamaṇaṃ. **Diṭṭhenāti** cakkhunā diṭṭhena. **Sutenāti** sotena sutena. **Parisaṅkayāti** diṭṭhasutavasena parisaṅkitena. **Garudhammanti** garukaṃ saṅghādisesāpattiṃ. **Pakkhamānattanti** anūnāni pannarasa divasāni mānattaṃ. **Chasu dhammesūti** vikālabhojanacchatṭhesu sikkhāpadesu. **Sikkhitasikkhāyāti** ekasikkhampi akhaṇḍaṃ katvā pūritasikkhāya. **Akkositabbo paribhāsittabboti** dasannaṃ akkosavatthūnaṃ aññatarena akkosavatthunā na akkosittabbo, bhayūpadaṃsanāya yāya kāyaci paribhāsāya na paribhāsittabbo.

Ovaṭṭo bhikkhunīnaṃ bhikkhūsu vacanapathoti ovādānusāsanaḍḍhammakathāsāṅkhāto vacanapatho bhikkhunīnaṃ bhikkhūsu ovarito piḥito, na bhikkhunīyā koci bhikkhu ovadittabbo anusāsittabbo vā “bhante, porānakattherā idaṃ cīvaravattaṃ pūrayiṃsū” ti evaṃ pana paveṇivasena kathetuṃ vaṭṭati. **Anovaṭṭo bhikkhūnaṃ bhikkhūsu vacanapathoti** bhikkhūnaṃ pana bhikkhūsu vacanapatho anivārito, yathāruci ovaditūṃ anusāsitūṃ dhammakathaṃ kathetunti ayamettha saṅkhepo, vitthārato panesā garudhammakathā samantapāsādikāya vinayasaṃvaṇṇanāya (pāci. aṭṭha. 148) vuttanayeneva vedittabbā.

Ime pana aṭṭha garudhamme satthu santike uggahetvā therena attano ārociyamāne sutvāva mahāpajāpatiyā tāva mahantaṃ domanassaṃ khaṇena paṭippassambhi, anottadadahato ābhatena sītudakassa ghaṭasatena matthake parisittā viya vigatapariḷhāḥ attamanā hutvā garudhammapaṭiggahaṇena uppannapītipāmojjaṃ āvikarontī **seyyathāpi, bhanteti**ādikaṃ udānaṃ udānesi.

Kumbhatthenakehīti kumbhe dīpaṃ jāletvā tena ālokena paraghare bhaṇḍaṃ vicinitvā thenakacorehi. **Setaṭṭhikā nāma rogajātīti** eko pāṇako nālamajjhagataṃ kaṇḍaṃ vijjhati, yena viddhā kaṇḍā nikkhantampi sālīsīsaṃ khīraṃ gahetuṃ na sakkoti. **Mañjittikā nāma rogajātīti** ucchūnaṃ antorattabhāvo.

Mahato taḷākassa paṭikacceva āḷinti iminā pana etamatthaṃ dasseti – yathā mahato taḷākassa pāḷiyā abaddhāyapi kiñci udakaṃ tiṭṭhateva, paṭhamameva baddhāya pana yaṃ abaddhapaccayā na tiṭṭheyya, tampi tiṭṭheyya, evameva ye ime anuppanne vatthusmiṃ paṭikacceva anatikkaṃamaṇaṭṭhāya garudhammā paññattā, tesu apaññattesu mātugāmassa pabbajitattā pañca vassasatāni saddhammo tiṭṭheyya. Paṭikacceva paññattattā pana aparānīpi pañca vassasatāni ṭhassatīti evaṃ paṭhamam vuttavassasahassameva ṭhassati. **Vassasahassanti** cetaṃ paṭisambhidāpabhedappattakhīṇāsavānaṃ vaseneva vuttaṃ, tato pana uttaripi sukkhavipassakakhīṇāsavavasena vassasahassaṃ, anāgānivāsena vassasahassaṃ, sakadāgānivāsena vassasahassaṃ, sotāpannavasena vassasahassanti evaṃ pañcavassasahassāni paṭivedhasaddhammo ṭhassati. Pariyattidhammopi tāniyeva. Na hi pariyattiyā asati paṭivedho atthi, nāpi pariyattiyā sati paṭivedho na hoti. Liṅgaṃ pana pariyattiyā antarahitāyapi ciraṃ pavattissatīti.

2. Ovādasuttavaṇṇanā

52. Dutīye **bahussutoti** idha sakalassapi buddhavacanassa vasena bahussutabhāvo veditabbo. **Garudhammanti** kāyasamsaggam. Ayamettha sankhepo. Bhikkhunovādakavinicchayo pana samantapāsādikāya (pāci. aṭṭha. 144 ādayo) vuttanayeneva veditabbo.

3. Saṃkhittasuttavaṇṇanā

53. Tatiye **sarāgāyāti** sarāgatthāya. **Virāgāyāti** virajjanatthāya. **Samyogāyāti** vaṭṭe saṃyogatthāya. **Visaṃyogāyāti** vaṭṭe visaṃyogabhāvatthāya. **Ācayāyāti** vaṭṭassa vaḍḍhanatthāya. **No apacayāyāti** na vaṭṭavidhamsanatthāya. **Dubbharatāyāti** dupposanatthāya. **No subharatāyāti** na sukhaposanatthāya. Imasmiṃ sutte paṭhamavārena vaṭṭam kathitam, dutiyavārena vivaṭṭam kathitam. Iminā ca pana ovādena gotamī arahattam pattāti.

4. Dīghajāṇusuttavaṇṇanā

54. Catutthe **byagghapajjāti** idamassa paveṇi nāma vasena ālapanam. Tassa hi pubbapurisā byagghapathe jātāti tasmim kule manussā byagghapajjāti vuccanti. **Issatthenāti** issāsakammena. **Tatrupāyāyāti** “imasmiṃ kāle idam nāma kātum vaṭṭatī”ti jānane upāyabhūtāya. **Vuddhasīlinoti** vaḍḍhitasīlā vuddhasamācārā. **Āyanti** āgamanam. **Nāccogāḷhanti** nātimahantam. **Nātihīnanti** nātikasiram. **Pariyādāyāti** gahetvā khepetvā. Tattha yassa vayato diguṇo āyo, tassa vayo āyam pariyādātum na sakkoti.

“Catudhā vibhaje bhoge, paṇḍito gharamāvasam;
Ekena bhoge bhuñjeyya, dvīhi kammaṃ payojaye;
Catutthañca nidhāpeyya, āpadāsu bhavissatī”ti. (dī. ni. 3.265) –

Evam paṭipajjato pana vayo āyam pariyādātum na sakkotiyeva.

Udumbarakhādīvāti yathā udumbarāni khādītukāmena pakke udumbararukkhe cālite ekappahāreneva bahūni phalāni patanti, so khādītabbayuttakāni khādītvā itarāni bahutarāni pahāya gacchati, evamevaṃ yo āyato vayam bahutaram katvā vipakiranto bhoge paribhuñjati, so “udumbarakhādikaṃvāyam kulaputto bhoge khādātī”ti vuccati. **Ajetthamarāṇanti** anāyakamarāṇam. **Samam jīvikam kappetī** sammā jīvikam kappeti. **Samajīvitāti** samajīvitāya jīvitā. **Apāyamukhānī** vināsassa ṭhānāni.

Uṭṭhātā kammadheyyesūti kammakaraṇaṭṭhānesu uṭṭhānavīriyasampanno. **Vidhānavāti** vidahanasampanno. **Sotthānam samparāyikanti** sotthibhūtam samparāyikam. **Saccanāmenāti** buddhattāyeva buddhoti evam avitathanāmena. **Cāgo puññaṃ pavaḍḍhatī** cāgo ca sesapuññañca pavaḍḍhati. Imasmiṃ sutte saddhādayo missakā kathitā. Pañcamaṃ uttānameva.

6. Bhayasuttavaṇṇanā

56. Chaṭṭhe **gabbhoti** gabbhavāso. **Diṭṭhadhammikāpīti** sandiṭṭhikā gabbhavāsasadisā punapi manussagabbhā. **Samparāyikāpīti** ṭhapetvā manussagabbhe sesagabbhā. **Ubhayaṃ ete kāmā pavuccantī** bhayañca dukkhañca, bhayañca rogo ca, bhayañca gaṇḍo ca, bhayañca sallañca, bhayañca saṅgo ca, bhayañca paṅko ca, bhayañca gabbho cāti evam ubhayaṃ ete kāmā pavuccanti. **Sātarūpenāti** kāmasukhena. **Palipathanti** vaṭṭapalipatham. **Atikkammāti** imasmiṃ ṭhāne vipassanam vaḍḍhetvā assa bhikkhuno arahattappattabhāvo gahito. Evarūpaṃ pajam jātijarūpetam tisu bhavesu phandamānam avekkhatīti sutte vaṭṭam kathetvā gāthāsu vivaṭṭam kathitanti. Sattamaṭṭhamāni uttānatthāneva.

9-10. Puggalasuttadvayaṇṇanā

59-60. Navame **ujubhūtoti** kāyavaṅkādinam abhāvena ujuko. **Paññāsīlasamāhitoti** paññāya ca sīlena ca samannāgato. **Yajamānānanti** dānam dadantānam. **Puññapekkhānanti** puññam oloketānam gavesantānam. **Opadhikanti** upadhivipākam, opadhibhūtam thānam appamānam. Dasame **samukkaṭṭhoti** ukkaṭṭho uttamo. **Sattānanti** sabbasattānam. Sesam sabbattha uttānamevāti.

Gotamīvaggo chaṭṭho.

(7) 2. Bhūmicālavaggo

1. Icchāsuttavaṇṇanā

61. Sattamassa paṭhame **pavivittassāti** kāyavivekena vivittassa. **Nirāyattavuttinoti** katthaci anāyattavuttino vipassanākamikkassa. **Lābhāyāti** catupaccayalābhāya. **Socī ca paridevī cāti** sokī ca paridevī ca. Socicca parideviccātipi pāṭho. **Cuto ca saddhammāti** taṃkhaṇaṃyeva vipassanāsaddhammā cuto. Imasmiṃ sutte vaṭṭavivaṭṭam kathitam.

2. Alaṃsuttavaṇṇanā

62. Dutiye **alaṃ attano alaṃ paresanti** attano ca paresaṅca hitapaṭipattiyam samattho pariyatto anucchaviko. **Khippanisantīti** khippam upadhāreti, khandhadhātuāyatanādīsū kathiyamānesu te dhamme khippam jānātīti attho. Imasmiṃ sutte samathavipassanā kathitā. Puggalajjhāsayena pana desanāvīlāsena cetam matthakato paṭṭhāya heṭṭhā otarantam kathitanti.

3. Saṃkhittasuttavaṇṇanā

63. Tatiye **evamevāti** nikkāraṇeneva. Yathā vā ayam yācati, evameva. **Moghapurisāti** mūḷhapurisā tucchapurisā. **Ajjhesantīti** yācanti. **Anubandhitabbanti** iriyāpathānugamanena anubandhitabbaṃ maṃ na vijahitabbaṃ maññanti. Ājānanattham apasādentō evamāha. Esa kira bhikkhu ovāde dinnepi pamādameva anuyuñjati, dhammam sutvā tattheva vasati, samaṇadhammam kātuṃ na icchati. Tasmā bhagavā evam apasādetvā puna yasmā so arahattassa upanissayasampanno, tasmā taṃ ovadanto **tasmātiha te bhikkhu evam sikkhitabbanti**tiādīmāha. Tattha **ajjhataṃ me cittaṃ thitaṃ bhavissati susaṅghitaṃ, na ca uppannā pāpakā akusalā dhammā cittaṃ pariyādāya thassantīti** iminā tāvassa ovādena niyakajjhattavasena cittekaggatāmatto mūlasamādhi vutto.

Tato “ettakeneva santuṭṭhiṃ anāpajjitvā evam so samādhi vaḍḍhetabbo”ti dassetuṃ **yato kho te bhikkhu ajjhataṃ cittaṃ thitaṃ hoti susaṅghitaṃ, na ca uppannā pāpakā akusalā dhammā cittaṃ pariyādāya tiṭṭhanti, tato te bhikkhu evam sikkhitabbaṃ “mettā me cetovimutti bhāvītā bhavissati...pe... susamāraddhā”**ti evamassa mettāvasena bhāvanam vaḍḍhetvā puna **yato kho te bhikkhu ayam samādhi evam bhāvito hoti bahulīkato, tato tvaṃ bhikkhu imaṃ samādhiṃ savitakkasavicārampi bhāveyyāsīti**ti vuttaṃ. Tassattho – yadā te bhikkhu ayam mūlasamādhi evam mettāvasena bhāvito hoti, tadā tvaṃ tāvatakenapi tuṭṭhiṃ anāpajjitvāva imaṃ mūlasamādhiṃ aññesupi ārammaṇesu catukkapañcakajjhānāni pāpayamāno “savitakkasavicārampi”tiādīnā nayena bhāveyyāsīti.

Evam vatvā ca pana avasesabrahmavihārapubbaṅgamampissa aññesu ārammaṇesu catukkapañcakajjhānabhāvanam kareyyāsīti dassento **yato kho te bhikkhu ayam samādhi evam bhāvito hoti subhāvito, tato te bhikkhu evam sikkhitabbaṃ “karuṇā me cetovimutti”**tiādīmāha. Evam mettāpubbaṅgamaṃ catukkapañcakajjhānabhāvanam dassetvā puna kāyānupassanādipubbaṅgamaṃ dassetuṃ **yato kho te bhikkhu ayam samādhi evam bhāvito hoti subhāvito, tato te bhikkhu evam sikkhitabbaṃ “kāye kāyānupassī”**tiādīm vatvā **yato kho te bhikkhu ayam samādhi evam bhāvito hoti subhāvito, tato tvaṃ bhikkhu yena yeneva**

gagghasītiādīmāha. Tattha **gagghasīti** gamissasi. **Phāsumyevāti** iminā arahattaṃ dasseti. Arahattappatto hi sabbiriyāpathesu phāsu viharati nāma.

4. Gayāsīsasuttavaṇṇanā

64. Catutthe **etadavocāti** attano padhānabhūmiyaṃ uppannaṃ vitakkaṃ bhikkhusaṅghassa ārocetum – “pubbāhaṃ, bhikkhave” tiādivacanaṃ avoca. **Obhāsanti** dibbacakkhuñāṇobhāsaṃ. **Ñāpadassananti** dibbacakkhubhūtaṃ ñānasaṅkhātaṃ dassanaṃ. **Sannivutthapubbanti** ekato vasitapubbaṃ. Imasmiṃ pana sutte dibbacakkhuñāṇaṃ, iddhividhañāṇaṃ, cetopariyañāṇaṃ, yathākammupagañāṇaṃ, anāgataṃsañāṇaṃ, paccuppannaṃsañāṇaṃ, atītaṃsañāṇaṃ, pubbenivāsañāṇanti imāni tāva aṭṭha ñāṇāni pāliyaṃyeva āgatāni, tehi pana saddhiṃ vipassanāñāṇāni cattāri maggañāṇāni, cattāri phalañāṇāni, cattāri paccavekkhaṇāñāṇāni, cattāri paṭisambhidāñāṇāni cha asādhāraṇāñāṇāni etāni ñāṇāni samodhānetvā kathentena evaṃ idaṃ suttaṃ kathitaṃ nāma hoti.

5. Abhibhāyatanasuttavaṇṇanā

65. Pañcame **abhibhāyatanāni** abhibhavanakāraṇāni. Kiṃ abhibhavanti? Paccanīkadhammepi ārammaṇāni. Tāni hi paṭipakkhabhāvena paccanīkadhamme abhibhavanti, puggalassa ñāṇuttariyatāya ārammaṇāni. **Ajjhattaṃ rūpasaññīti**ādisu pana ajjhatarūpe parikammavasena ajjhattaṃ rūpasaññī nāma hoti. Ajjhattañhi nīlaparikammaṃ karonto kese vā pitte vā akkhitārakāya vā karoti. Pītaparikammaṃ karonto mede vā chaviyā vā hatthatalapādātesu vā akkhīnaṃ pītaṭṭhāne vā karoti. Lohitaparikammaṃ karonto maṃse vā lohite vā jivhāya vā akkhīnaṃ rattaṭṭhāne vā karoti. Odātaparikammaṃ karonto aṭṭhimhi vā dante vā nakhe vā akkhīnaṃ setaṭṭhāne vā karoti. Taṃ pana sunīlakaṃ supītaṃ sulohitakaṃ suodātaṃ na hoti, avisuddhameva hoti.

Eko bahiddhā rūpāni passatīti yassevaṃ parikammaṃ ajjhattaṃ uppannaṃ hoti, nimittaṃ pana bahiddhā, so evaṃ ajjhattaṃ parikammassa bahiddhā ca appanāya vasena “ajjhattaṃ rūpasaññī eko bahiddhā rūpāni passatī” ti vuccati. **Parittānīti** avaḍḍhitāni. **Suvaṇṇadubbaṇṇāni**ti suvaṇṇāni vā hontu dubbaṇṇāni vā, parittavaseneva idaṃ abhibhāyatanaṃ vuttanti veditabbaṃ. **Tāni abhibhuyyāti** yathā nāma sampannaggahaṇiko kaṭacchumattaṃ bhattaṃ labhitvā “kiṃ ettha bhūñjitabbaṃ atthī” ti saṃkaḍḍhitvā ekakabaḷameva karoti, evameva ñāṇuttariko puggalo visadañāṇo “kimettha parittake ārammaṇe samāpajjitabbaṃ atthi, nāyaṃ mama bhāro” ti tāni rūpāni abhibhavitvā samāpajjati, saha nimittupādānevettha appanaṃ pāpetīti attho. **Jānāmi passāmīti** iminā panassa ābhogo kathito. So ca kho samāpattito vuṭṭhitassa, na antosamāpattiyāṃ. **Evaṃsaññī hotīti** ābhogasaññāyapi jhānasaññāyapi evaṃsaññī hoti. Abhibhavanasaññā hissa antosamāpattiyāṃ atthi, ābhogasaññā pana samāpattito vuṭṭhitasseva.

Appamāṇāniti vaḍḍhitappamāṇāni, mahantāni attho. **Abhibhuyyāti** ettha ca pana yathā mahagghaso puriso ekaṃ bhattavaḍḍhitakaṃ labhitvā “aññāpi hotu, aññāpi hotu, kiṃ esā mayhaṃ karissatī” ti na taṃ mahantato passatī, evameva ñāṇuttaro puggalo visadañāṇo “kiṃ ettha samāpajjitabbaṃ, nayidaṃ appamāṇaṃ, na mayhaṃ cittekaggatākaraṇe bhāro atthī” ti abhibhavitvā samāpajjati, saha nimittupādānevettha appanaṃ pāpetīti attho.

Ajjhattaṃ arūpasaññīti alābhitāya vā anattikatāya vā ajjhatarūpe parikammasaññāviraḥito.

Eko bahiddhā rūpāni passatīti yassa parikammampi nimittampi bahiddhā uppannaṃ, so evaṃ bahiddhā parikammassa ceva appanāya ca vasena “ajjhattaṃ arūpasaññī eko bahiddhā rūpāni passatī” ti vuccati. Sesamettha catutthābhibhāyatane ca vuttanayameva. Imesu pana catūsu parittaṃ vitakkacaritavasena āgataṃ, appamāṇaṃ mohacaritavasena, suvaṇṇaṃ dosacaritavasena, dubbaṇṇaṃ rāgacaritavasena. Etesañhi etāni sappāyāni. Sā ca nesaṃ sappāyatā visuddhimagge (visuddhi. 1.43) cariyāniddeṣe vuttā.

Pañcamaabhibhāyatanādīsu **nīlānīti** sabbasaṅgāhikavasena vuttaṃ. **Nīlavaṇṇānīti** vaṇṇavasena. **Nīlanidassanānīti** nidassanavasena. Apaññāyamānavivarāni asambhinnavaṇṇāni ekanīlāneva hutvā dissantīti vuttaṃ hoti. **Nīlanibhāsānīti** idaṃ pana obhāsavasena vuttaṃ, nīlobhāsāni nīlappabhāyuttānīti attho. Etena nesam suvisuddhatam dasseti. Visuddhavaṇṇavaseneva hi imāni abhibhāyatanāni vuttāni. “Nīlakasiṇam uggaṇhanto nīlasmim nimittam gaṇhāti pupphasmim vā vatthasmim vā vaṇṇadhātuyā vā”tiādikaṃ panettha kasiṇakaraṇaṇca parikammaṇca appanāvīdhānaṇca sabbaṃ visuddhimagge (visuddhi. 1.55) vitthārato vuttamevāti.

6. Vimokkhasuttavaṇṇanā

66. Vimokkhāti kenaṭṭhena vimokkhā? Adhimuccanaṭṭhena. Ko pañāyam adhimuccanaṭṭho nāma? Paccanīkadhammehi ca suṭṭhu muccanaṭṭho, ārammaṇe ca abhirativasena suṭṭhu muccanaṭṭho, pituaṅke vissaṭṭhaṅgapaccaṅgassa dārakassa sayanam viya aniggahitabhāvena nirāsaṅkatāya ārammaṇe pavattīti vuttaṃ hoti. Ayaṃ panattho pacchime vimokkhe natthi, purimesu vimokkhesu atthi.

Rūpī rūpāni passatīti ettha ajjhattaṃ kesādīsu nīlakasiṇādivasena uppāditaṃ rūpajjhānaṃ rūpaṃ, tadassatthīti rūpī. Bahiddhāpi nīlakasiṇādīni rūpāni jhānacakkhunā passatī. Iminā ajjhattabahiddhavatthukesu kasiṇesu uppāditaṃ jhānaṃ puggalassa cattāri rūpāvacarajjhānāni dassitāni. **Ajjhattam arūpasaññīti** ajjhattaṃ na rūpasaññī, attano kesādīsu anuppāditarūpāvacarajjhānoti attho. Iminā bahiddhā parikammaṃ katvā bahiddhāva uppāditaṃ jhānaṃ rūpāvacarajjhānāni dassitāni.

Subhanteva adhimutto hotīti iminā suvisuddhesu nīlādīsu vaṇṇakasiṇesu jhānāni dassitāni. Tattha kiñcāpi antoappanāya “subha”nti ābhogo natthi, yo pana suvisuddham subham kasiṇam ārammaṇam katvā viharati, so yasmā “subhanti adhimutto hotī”ti vattabbaṃ āpajjati, tasmā evaṃ desanā katā. Paṭisambhidāmagge pana –

“Katham subhanteva adhimutto hotīti vimokkho? Idha bhikkhu mettāsahagatena cetasā ekaṃ disaṃ ...pe... viharati. Mettāya bhāvitattā sattā appaṭikūlā honti. Karuṇāsahagatena...pe... muditāsahagatena ...pe... upekkhāsahagatena cetasā ekaṃ disaṃ...pe... viharati. Upekkhāya bhāvitattā sattā appaṭikūlā honti. Evaṃ subhanteva adhimutto hotīti vimokkho”ti (paṭi. ma. 1.212) vuttaṃ.

Sabbaso rūpasaññānantiādīsu yaṃ vattabbaṃ, taṃ visuddhimagge (visuddhi. 1.276-277) vuttameva. **Ayaṃ aṭṭhamo vimokkhoti** ayaṃ catunnaṃ khandhānaṃ sabbaso vissaṭṭhattā vimuttattā aṭṭhamo uttamo vimokkho nāma.

7-8. Anariyavohārasuttavaṇṇanā

67-68. Sattame **anariyavohārāti** na ariyakathā sadosakathā. Yāhi cetanāhi te vohāre voharanti, tāsam etaṃ nāmaṃ. Aṭṭhame vuttapaṭipakkhanayena attho veditabbo.

9. Parisāsuttavaṇṇanā

69. Navame **khattiyaparisāti** khattiyānaṃ parisānaṃ sannipāto samāgamo. Esa nayo sabbattha. **Anekasatam khattiyaparisanti** bimbisārasamāgama-ñāṭisamāgama-licchavisamāgamādisadisam, aññesu cakkavālesupi labbhateva. **Sallapitapubbanti** ālāpasallāpo katapubbo. **Sākacchāti** dhammasākacchāpi samāpajjitapubbā. **Yādisako tesam vaṇṇoti** te odātāpi honti kālāpi maṅguracchavīpi, satthā suvaṇṇavaṇṇo. Idaṃ pana saṅghānaṃ paṭicca kathitaṃ. Saṅghānampi ca kevalam tesam paññāyatiyeva. Na pana bhagavā milakkhasadiso hoti, nāpi āmuttamaṅikuṇḍalo, buddhaveseneva nisīdati. Tepi attano samānasaṅghānameva passanti. **Yādisako tesam saroti** te chinnassarāpi honti gaggassarāpi kākassarāpi, satthā brahmassarova. Idaṃ pana bhāsantaram sandhāya

kathitaṃ. Sacepi hi satthā rājāsane nisinno katheti, “ajja rājā madhurena kathetī”ti nesam hoti. Kathetvā pakkante pana bhagavati puna rājānaṃ āgataṃ disvā “ko nu kho aya”nti vīmaṃsā uppajjati. Tattha **ko nu kho ayanti** “imasmiṃ ṭhāne idāneva māgadhābhāsāya sīḥābhāsāya madhurena ākārena kathento ko nu kho ayaṃ antarahito, kiṃ devo udāhu manusso”ti evaṃ vīmaṃsantāpi na jānantīti attho. Kimatthaṃ panevaṃ ajānantānaṃ dhammaṃ desetīti? Vāsanatthāya. Evaṃ sutopi hi dhammo anāgate paccayo hotīti anāgataṃ paṭicca deseti. **Anekasataṃ brāhmaṇaparisaṅgānaṃ** soṇadaṇḍasamāgamādivasena ceva aññacakkavālavasena ca sambhavo veditabbo.

10. Bhūmicālasuttavaṇṇanā

70. Dasame **nisīdananti** idha cammakhaṇḍaṃ adhippetam. **Udenaṃ cetiyanti** udenayakkhassa vasanaṭṭhāne katavihāro vuccati. **Gotamakādīsipi** eseva nayo. **Bhāvitāti** vaḍḍhitā. **Bahulīkatāti** punappunaṃ katā. **Yānikatāti** yuttayānaṃ viya katā. **Vatthukatāti** patiṭṭhānaṭṭhena vatthu viya katā. **Anuṭṭhitāti** adhiṭṭhitā. **Paricitāti** samantato citā suvaḍḍhitā. **Susamāraddhāti** suṭṭhu samāraddhā.

Iti aniyamena kathetvā puna niyametvā dassento **tathāgatassa khotiādīmāha**. Ettha **kappanti** āyukappaṃ. Tasmīṃ tasmīṃ kāle yaṃ manussānaṃ āyuppamaṇaṃ, taṃ paripunaṃ karonto tiṭṭheyya. **Kappāvesaṃ vāti** “appaṃ vā bhīyyo”ti vuttavassasatato atirekaṃ vā. Mahāsīvatthero panāha – “buddhānaṃ aṭṭhāne gajjitaṃ nāma natthi, punappunaṃ samāpajjitvā maraṇantikavedanaṃ vikkhambhento bhaddakappameva tiṭṭheyya. Kasmā pana na ṭhitoti? Upādinnakasarīraṃ nāma khaṇḍiccādīhi abhibhuyyati, buddhā ca khaṇḍiccādībhāvaṃ appatvā pañcame āyukoṭṭhāse bahujanassa piyamaṇāpakāleyeva parinibbāyanti. Buddhānubuddhesu ca mahāsāvakesu parinibbutesu ekakeneva khāṇukena viya ṭhātabbaṃ hoti daharasāmaṇeraparivārena vā, tato ‘aho buddhānaṃ parisā’ti hīletabbataṃ āpajjeyya. Tasmā na ṭhito”ti. Evaṃ vuttepi yo pana vuccati “āyukappo”ti, idameva aṭṭhakathāya niyāmitaṃ.

Yathā taṃ mārena pariyaṭṭhitacittoti ettha tanti nipātamattaṃ, yathā mārena pariyaṭṭhitacitto ajjhotthatacitto aññopi koci puthujjano paṭivijjhituṃ na sakuṇeyya, evameva nāsakkhi paṭivijjhitunti attho. Māro hi yassa sabbena sabbam dvādasa vipallāsā appahīnā, tassa cittaṃ pariyaṭṭhāti. Therassa ca cattāro vipallāsā appahīnā, tenassa māro cittaṃ pariyaṭṭhāsī. So pana cittaṃ pariyaṭṭhānaṃ karonto kiṃ karotīti? Bheravaṃ rūpārammaṇaṃ vā dasseti, saddārammaṇaṃ vā sāveti. Tato sattā taṃ disvā vā sutvā vā satīṃ vissajjetvā vivaṭamukhā honti, tesam mukhena hatthaṃ pavesetvā hadayaṃ maddati, tato visaññāva hutvā tiṭṭhanti. Therassa panesa mukhe hatthaṃ pavesetuṃ kiṃ sakkhissati, bheravārammaṇaṃ pana dassesi. Taṃ disvā thero nimittobhāsaṃ nappaṭivijjhi. Bhagavā jānantoyeva kimatthaṃ yāva tatiyaṃ āmantesīti? Parato “tiṭṭhatu, bhante bhagavā”ti yācite “tuyhevetam dukkaṭam, tuyhevetam aparaddha”nti dosāropanena so katanukaraṇatthaṃ.

Māro pāpimāti ettha satte anathe niyojento māretīti **māro**. **Pāpimāti** tasseva vevacanaṃ. So hi pāpadhammasamannāgatattā “pāpimā”ti vuccati. Kaṇho, antako, namuci, pamattabandhūtipi tasseva nāmāni. **Bhāsītā kho panesāti** ayañhi bhagavato sambodhipattiyā aṭṭhame sattāhe bodhimaṇḍeyeva āgantvā “bhagavā yadattaṃ tumhehi pāramiyo pūritā, so vo attho anupatto, paṭividdham sabbaññutaññānaṃ, kiṃ te lokavicāraṇena”ti vatvā yathā ajja, evameva “parinibbātu dāni, bhante bhagavā”ti yāci. Bhagavā cassa “na tāvāha”ntiādīni vatvā paṭikkhipi. Taṃ sandhāya – “bhāsītā kho panesā, bhante”tiādīmāha.

Tattha **viyattāti** maggavasena byattā, tatheva **vinītā**, tathā **visāradā**. **Bahussutāti** tepiṭakavasena bahu sutam etesanti **bahussutā**. Tameva dhammaṃ dhārentīti **dhammadharā**. Atha vā pariyaṭṭibahussutā ceva paṭivedhabahussutā ca. Pariyaṭṭipaṭivedhadhammānaṃyeva dhāraṇato dhammadharāti evamettha attho daṭṭhabbo. **Dhammānudhammappaṭipannāti** ariyadhammassa anudhammabhūtaṃ vipassanādhammaṃ paṭipannā. **Sāmicippaṭipannāti** anucchavikapaṭipadaṃ paṭipannā. **Anudhammacārinoti** anudhammaṃ caraṇasīlā. **Sakaṃ ācariyakanti** attano ācariyavādaṃ.

Ācikkhissantītiādīni sabbāni aññaṃaññaṃvevacanāni. **Sahadhammenā**ti sahetukena sakāraṇena vacanena. **Sappāṭihāriyanti** yāva niyyānikam katvā dhammam desessanti.

Brahmacariyanti sikkhāttayasaṅgahitam sakalam sāsanabrahmacariyam. **Iddhanti** samiddham jhānassādasena. **Phīṭanti** vuddhipattam sabbapāliphullam viya abhiññāsampattivasena. **Vitthārikanti** vitthataṃ tasmim tasmim disābhāge paṭiṭṭhitavasena. **Bāhujaññanti** bahūhi nātam paṭividdham mahājanābhisamayavasena. **Puthubhūṭanti** sabbākārena puthulabhāvappattam. Kathaṃ? **Yāva devamanussehi suppakāsanti**, yattakā viññujātikā devā ceva manussā ca atthi, sabbehi suṭṭhu pakāsanti attho. **Apposukkoti** nirālayo. Tvañhi pāpima aṭṭhamasattāhato paṭṭhāya ‘‘parinibbātu dāni, bhante bhagavā, parinibbātu sugato’’ti viravanto āhiṇḍittha. Ajja dāni paṭṭhāya vigatussāho hohi, mā mayham parinibbānattham vāyāmaṃ karohīti vadati.

Sato sampajāno āyusaṅkhāram ossajjīti satim sūpaṭṭhitam katvā nāṇena paricchindivā āyusaṅkhāram vissajji pajahi. Tattha na bhagavā hatthena leḍḍum viya āyusaṅkhāram ossaji, temāsamattameva pana phalasaṃpattim samāpajjivā tato param na samāpajjissāmīti cittam uppādesi. Tam sandhāya vuttam ‘‘ossajjī’’ti. Ussajjīti pāṭho. **Mahābhūmicāloti** mahanto pathavīkampo. Tadā kira dasasahassī lokadhātu kampittha. **Bhimsanakoti** bhayajanako. **Devadundubhiyo ca phalimsūti** devabheriyo phalimsu, devo sukkhagajjitaṃ gajji, akālavijjulatā niccharimsu, khaṇikavassam vassīti vuttam hoti.

Udānaṃ udānesīti kasmā udānesi? Koci nāma vadeyya ‘‘bhagavā pacchato pacchato anubandhitvā ‘parinibbātu, bhante’’ti upadduto bhayena āyusaṅkhāram vissajjesī’’ti, tassokāso mā hotu, bhīṭassa hi udānaṃ nāma natthīti pīṭivegavissatṭham udānaṃ udānesi.

Tattha sabbesaṃ soṇasiṅgālādīnampi paccakkhabhāvato tulitaṃ paricchinnanti **tulaṃ**. Kiṃ tam? Kāmāvacarakammaṃ. Na tulaṃ, na vā tulaṃ sadisamassa aññaṃ lokiyam kammaṃ atthīti **atulaṃ**. Kiṃ tam? Mahaggatakammaṃ. Atha vā kāmāvacaram rūpāvacaram tulaṃ, arūpāvacaram atulaṃ. Appavipākaṃ vā tulaṃ, bahuvipākaṃ atulaṃ. **Sambhavanti** sambhavahetubhūtaṃ, rāsikārakam piṇḍakārakanti attho. **Bhavaṅkhāranti** punabbhavaṅkhāraṇakaṃ. **Avassajjī**ti vissajjesi. **Munī**ti buddhamuni. **Ajjhattarato**ti niyakajjhatterato. **Samāhitoti** upacārappanāsamādhivasena samāhito. **Abhīndi kavacamivā**ti kavacaṃ viya abhīndi. **Attasambhavanti** attani sañjātam kilesaṃ. Idaṃ vuttam hoti – savipākaṭṭhena sambhavaṃ, bhavābhisaṅkharaṇaṭṭhena bhavaṅkhāranti ca laddhanāmaṃ tulātulasaṅkhātaṃ lokiyakammaṃca ossajji, saṅgāmasīse mahāyodho kavacaṃ viya attasambhavaṃ kilesaṃca ajjhatterato hutvā samāhito hutvā abhīndīti.

Atha vā **tulanti** tulento tūrento. **Atulaṅca sambhavanti** nibbānaṅceva sambhavaṅca. **Bhavaṅkhāranti** bhavagāmikammaṃ. **Avassaji munī**ti ‘‘pañcakkhandhā aniccā, pañcannaṃ khandhānaṃ nirodho nibbānaṃ nicca’’ntiādīnā (paṭi. ma. 3.37-38) nayena tulayanto buddhamuni bhava ādīnaṃ, nibbāne ca ānisaṃsaṃ disvā tam khandhānaṃ mūlabhūtaṃ bhavaṅkhāram kammaṃ ‘‘kammakkhayāya saṃvattatī’’ti (ma. ni. 2.81; a. ni. 4.232-233) evaṃ vuttana kammakkhayakarena ariyamaggena avassaji. Kathaṃ? **Ajjhattarato samāhito, abhīndi kavacamivattasambhavaṃ**. So hi vipassanāvasena ajjhatterato, samathavasena samāhitoti evaṃ pubbabhāgato paṭṭhāya samathavipassanābalena kavacamiva attabhāvaṃ pariyonandhitvā ṭhitaṃ, attani sambhavattā ‘‘attasambhava’’nti laddhanāmaṃ sabbakilesajālam abhīndi. Kilesābhāvena ca kataṃ kammaṃ appaṭisaṅghikattā avassatṭham nāma hotīti evaṃ kilesappahānena kammaṃ pajahi. Pahīnakilesassa ca bhayaṃ nāma natthi, tasmā abhītova āyusaṅkhāram ossajji, abhītabhāvañāpanatthaṅca udānaṃ udānesīti veditabbo.

Yaṃ mahāvātāti yena samayena yasmim vā samaye mahāvātā. **Vāyantī**ti upakkhepakavātā nāma utṭhahanti, te vāyantā saṭṭhisahassādhikanavayojanasatasahassabahalaṃ udakasandhārakavātaṃ upacchindanti, tato ākāse udakaṃ bhassati, tasmim bhassante pathavī bhassati, puna vāto attano balena

antodhammakaraṇe viya udakaṃ ābandhivā gaṇhāti, tato udakaṃ uggacchati, tasmim uggacchante pathavī uggacchati. Evaṃ udakaṃ kampitaṃ pathaviṃ kampeti. Etañca kampanaṃ yāvajjakālāpi hotiyeva, bahubhāvena pana ogacchanuggacchanam na paññāyati.

Mahiddhikā mahānubhāvāti ijghanassa mahantatāya mahiddhikā, anubhavitabbassa mahantatāya mahānubhāvā. **Parittā**ti dubbalā. **Appamāṇā**ti balavā. **So imaṃ pathaviṃ kampetī** so iddhiṃ nibbattetvā saṃvejento mahāmoggallāno viya, vīmaṃsanto vā mahānāgattherassa bhāgineyyo saṅharakkhitasāmaṇero viya pathaviṃ kampeti. **Saṅkampetī**ti samantato kampeti. **Sampakampetī**ti tasseva vevacanaṃ. Iti imesu aṭṭhasu pathavikampesu paṭhamo dhātukopena, dutiyo iddhānubhāvena, tatiyacatutthā puññatejena, pañcama ñāṇatejena, chaṭṭho sādhu-kāradānavasena, sattamo kāruññasabhāvena, aṭṭhamo ārodanena. Mātukucchiṃ okkamante ca tato nikkhamante ca mahāsatte tassa puññatejena pathavī akampittha, abhisambodhiyaṃ ñāṇatejābhīhatā hutvā akampittha, dhammacakkappavattane sādhu-kārabhāvasaṅghitā sādhu-kāraṃ dadamānā akampittha, āyusaṅkhāraossajjane kāruññasabhāvasaṅghitā cittasaṅkhobhaṃ asahamānā akampittha, parinibbāne ārodanavegatunnā hutvā akampittha. Ayaṃ panattho pathavidevatāya vasena veditabbo. Mahābhūtapathaviyā panetaṃ natthi acetanattā. Sesam sabbattha uttānatthamevāti.

Bhūmicālavaggo sattamo.

(8) 3. Yamakavaggo

1-2. Saddhāsuttadvayaṇṇanā

71-72. Aṭṭhamassa paṭhame **no ca silavā**ti na sīlesu paripūrakārī. **Samantapāsādikoti** samantato pasādajanako. **Sabbākāraparipūro**ti sabbehi samaṇākārehi samaṇadhammakotṭhāsehi paripūro. Dutie **santā**ti paccanikasantatāya santā. **Vimokkhā**ti paccanīkadhammehi vimuttattā ca vimokkhā.

3-9. Maraṇassatisuttadvayādivaṇṇanā

73-79. Tatiye **bhāvetha noti** bhāvetha nu. **Sāsananti** anusitṭhi. **Āsavānaṃ khayāyāti** arahattaphalathāya. Catutthe **patihitāyāti** paṭipannāya. **So mama antarāyoti** so mama jīvitantarāyopi, puthujjanakālakiriyaṃ karontassa saggantarāyopi maggantarāyopi assa. **Satthakā vā me vātā**ti satthaṃ viya aṅgamaṅgāni kantantīti satthakā. Pañcamādīni vuttanayāneva. Navame **samsaggārāmatā**ti pañcavidhe samsagge āramatā.

10. Kusītārambhavatthusuttavaṇṇanā

80. Dasame **kusītavatthūnī**ti kusītassa alasassa vatthūni paṭiṭṭhā, kosajjakāraṇānīti attho. **Kammaṃ kattabbaṃ hotī**ti cīvaravicāraṇādikammaṃ kattabbaṃ hoti. **Na vīriyaṃ ārabhatī**ti duvidhampi vīriyaṃ nārabhati. **Appattassā**ti jhānavipassanāmaggaṃ phaladhammassa appattassa pattiyā. **Anadhigatassā**ti tasseva anadhigatassa adhigamathāya. **Asacchikatassā**ti tadeva asacchikatassa sacchikaraṇathāya. **Idaṃ paṭhamanti** idaṃ “handāhaṃ nipajjāmī”ti evaṃ osīdanaṃ paṭhamam kusītavatthu. Iminā nayena sabbattha attho veditabbo. **Māsācitakaṃ maññeti** ettha pana māsācitam nāma tintamāso. Yathā tintamāso garuko hoti, evaṃ garukoti adhippāyo. **Gilānā vuṭṭhito hotī**ti gilāno hutvā pacchā vuṭṭhito hoti. **Ārambhavatthūnī**ti vīriyakāraṇāni. Tesampi imināva nayena attho veditabbo. Sesam sabbattha uttānamevāti.

Yamakavaggo aṭṭhamo.

(9) 4. Sativaggo

1-2. Satisampajaññasuttavaṇṇanā

81-82. Navamassa paṭhamam heṭṭhā vuttanayameva. Dutiye **saddhoti** duvidhāya saddhāya samannāgato. **No cupasaṅkamitāti** na upaṭṭhahati. **No ca paripucchitāti** atthānattham kāraṇākāraṇam paripucchitā na hoti. **Samannāgatoti** sāmiatthe paccattam, samannāgatassāti vuttam hoti. **Ekantapaṭibhānā tathāgataṃ dhammadesanā hotīti** tathāgatassa ekantapaṭibhānā dhammadesanā hoti, ekanteneva paṭibhāti upaṭṭhātīti attho.

3. Mūlakasuttavaṇṇanā

83. Tatiye **sabbe dhammāti** pañcakkhandhā. **Chandamūlakāti** ajjhāsayaacchando kattukamyatācchando taṃ mūlam etesanti chandamūlakā. Manasikārato sambhavantīti **manasikārasambhavā**. Phassato samudenti rāsī bhavantīti **phassasamudayā**. Vedanāya samosarantīti **vedanāsamosaraṇā**. Samādhi etesaṃ pamukhoti **samādhippamukhā**. Jeṭṭhakatṭhena sati adhipati etesanti **satādhipateyyā**, satijeṭṭhakāti attho. Paññā uttarā etesanti **paññuttarā**. Vimutti eva sāro etesanti **vimuttisārā**. Ettha ca chandamūlakādayo cattāropi lokiyā kathitā, sesā lokiyalokuttaramissakāti.

4. Corasuttavaṇṇanā

84. Catutthe **mahācoroti** rajjantare dubbhituṃ samattho mahācoro. **Pariyāpajjatīti** pariyādānaṃ gacchati. **Na ciraṭṭhitiko hotīti** addhānaṃ pāleno ṭhātuṃ na sakkoti. **Appaharantassa paharatīti** attano averine appaharante guṇasampanne ca mahallake ca taruṇadārake ca appaharitabbayuttake paharati. **Anavasesaṃ ādiyātīti** nissesam gaṇhāti. Byattacorānañhi idaṃ vattam – parassa dvīsu sātakesu eko gahetabbo, ekasmiṃ sante dubbalaṃ datvā thiro gahetabbo. Puṭabhattataṇḍulādīsu ekaṃ koṭṭhāsaṃ datvā eko gahetabboti. **Accāsanne kammaṃ karotīti** gāmanigamarājadhānīnaṃ āsannaṭṭhāne corikakammaṃ karoti. **Na ca nidhānakusalo hotīti** yaṃ laddham, taṃ dakkhiṇeyye nidahituṃ cheko na hoti, paralokamaggaṃ na sodheti.

5. Samaṇasuttavaṇṇanā

85. Pañcame **yaṃ samaṇenāti** yaṃ guṇajātaṃ samaṇena pattabbaṃ. **Vusīmatāti** brahmacariyavāsaṃvutena. **Mutto mocemi bandhanāti** ahaṃ sabbabandhanehi mutto hutvā mahājanampi rāgādibandhanato mocemi. **Paramadantoti** aññena kenaci asikkhāpito acodito sayambhuññaṇena paṭivijjhivā paramadamathena dantattā paramadanto nāma. **Parinibbutoti** kilesaparinibbānena parinibbuto.

6. Yasasuttavaṇṇanā

86. Chaṭṭhe **mā ca mayā yasoti** yaso ca mayā saddhiṃ mā gañchi. **Akasiralābhīti** vipulalābhī. **Sīlapaññāṇanti** sīlañceva ñāṇaṇca. **Saṅgammāti** sannipatitvā. **Samāgammāti** samāgantvā. **Saṅgaṇikavihāranti** gaṇasaṅgaṇikavihāraṃ. **Na hi nūnameti** na hi nūna ime. **Tathā hi panameti** tathā hi pana ime. **Aṅgulipatodakehīti** aṅgulipatodayaṭṭhiṃ katvā vijjhanena. **Sañjagghanteti** mahāhasitaṃ hasante. **Saṃkiṭanteti** keḷiṃ karonte.

7. Pattanikujjanasuttavaṇṇanā

87. Sattame **nikkujjeyyāti** tena dinnassa deyyadhammassa appaṭiggahaṇattham pattanikkujjanakammavācāya nikkujjeyya, na adhomukhaṭṭhapanena. **Alābhāyāti** catunnaṃ paccayānaṃ

alābhatthāya. **Anatthāyā**ti upaddavāya avaḍḍhiyā. **Ukkujjeyyā**ti ukkujjanakammavācāya ukkujjeyya.

8. Appasādapavedaniyasuttavaṇṇanā

88. Aṭṭhame **appasādam pavedeyyunti** appasannabhāvaṃ jānāpeyyuṃ. Appasādam pavedentena pana kiṃ kātābbanti? Nisinnāsanato na uṭṭhātabbaṃ na vanditābbāṃ na paccuggamaṃ kātābbāṃ, na deyyadhammo dātabbo. **Agocareti** pañcavidhe agocare.

9. Paṭisāraṇīyasuttavaṇṇanā

89. Navame **dhammikañca ghipaṭissavanti** “imaṃ temāsaṃ idheva vasitabba”nti vutto “evaṃ hotū”tiādīnā nayena paṭissavaṃ. **Na saccāpetīti** vuttaṃ na saccāṃ karoti viṣaṃvādeti.

10. Sammāvattanasuttavaṇṇanā

90. Dasame **paccekāṭṭhāneti** adhipatiṭṭhāne jeṭṭhakaṭṭhāne. Tañhi jeṭṭhakaṃ katvā kiñci saṅghakammaṃ kātuṃ na labhati. **Na ca tena mūlena vuṭṭhāpetabboti** taṃ mūlaṃ katvā abbhānakammaṃ kātuṃ na labhati. Sesāṃ sabbattha uttānamevāti.

Sativaggo navamo.

(10) 5. Sāmaññavaggo

91. Ito paraṃ **atha kho bojjhā upāsikā**tiādīsū bojjhā upāsikā, sirimā upāsikā, padumā upāsikā, sutanā upāsikā, manujā upāsikā, uttarā upāsikā, muttā upāsikā, khemā upāsikā, rucī upāsikā, cundī rājakumārī, bimbī upāsikā, sumanā rājakumārī, mallikā devī, tissā upāsikā, tissāmātā upāsikā, soṇā upāsikā, soṇāya mātā upāsikā, kāṇā upāsikā, kāṇāmātā upāsikā, uttarā nandamātā, visākhā migāramātā, khujjuttarā upāsikā, sāmāvatī upāsikā, suppvāsā koliyadhītā, suppiyā upāsikā, nakulamātā gahapatānīti imāsaṃ ettakānaṃ aṭṭhaṅgasamannāgataṃ uposathakammameva kathitaṃ. Icchantena vitthāretvā kathetābbāṃ. Sesāṃ sabbattha uttānatthamevāti.

Manorathapūraṇīyā aṅguttaranikāya-aṭṭhakathāya

Aṭṭhakanipātassa saṃvaṇṇanā niṭṭhitā.

Namo tassa bhagavato arahato sammāsambuddhassa

Aṅguttaranikāye

Navakanipāta-aṭṭhakathā

1. Paṭhamapaṇṇāsakaṃ

1. Sambodhivaggo

1. Sambodhisuttavaṇṇanā

1. Navakanipātassa paṭhame **sambodhipakkhikānanti** catumaggasaṅkhātassa sambodhissa pakkhe bhavānaṃ, upakārakānanti attho. Pāliyaṃ āgate nava dhamme sandhāyevaṃ pucchati. **Kā upanisāti** ko upanissayapaccayo. Abhisallekhanatīti **abhisallekhhikā**. Samathavipassanācittassa vivaraṇe sappāyā upakārakāti **cetovivaraṇasappāyā**. Appicchataṃ ārabha pavattā kathā **appicchakathā**. Seseupi eseva nayo.

Asubhā bhāvetabbā rāgassa pahānāyāti ayamatto sālilāyakopamāya vibhāvetabbo – eko hi puriso asitaṃ gahetvā koṭito paṭṭhāya sālikkhette sāliyo lāyati. Athassa vatiṃ bhinditvā gāvo pavisiṃsu. So asitaṃ ṭhapetvā yaṭṭhiṃ ādāya teneva maggena gāvo nīharitvā vatiṃ pākatikaṃ katvā punapi asitaṃ ādāya sāliyo lāyi. Ettha sālikkhettaṃ viya buddhasāsanaṃ daṭṭhabbaṃ, sālilāyako viya yogāvacarō, asitaṃ viya paññā, lāyanakālo viya vipassanāya kammakaraṇakālo, yaṭṭhi viya asubhakammaṭṭhānaṃ, vati viya saṃvaro, vatiṃ bhinditvā gāvīnaṃ pavisaṇaṃ viya sahasā appaṭisaṅkhāya pamādaṃ ārabha rāgassa uppajjanaṃ, asitaṃ ṭhapetvā yaṭṭhiṃ ādāya pavitṭhamaggeneva gāvo nīharitvā vatiṃ paṭipākatikaṃ katvā puna koṭito paṭṭhāya sālilāyanaṃ viya asubhakammaṭṭhānena rāgaṃ vikkhambhetvā puna vipassanāya kammaṃ ārabhanakālo. Imamatthaṃ sandhāya vuttaṃ – “asubhā bhāvetabbā rāgassa pahānāyā”ti.

Tattha **rāgassāti** pañcakāmaguṇikarāgassa. **Mettāti** mettākammaṭṭhānaṃ. **Byāpādassa pahānāyāti** vuttanayeneva uppannaṃ kopassa pajahanatthāya. **Ānāpānassatīti** soḷasavatthukā ānāpānassati. **Vitakkupacchedāyāti** vuttanayeneva uppannānaṃ vitakkānaṃ upacchedanatthāya. **Asmimānasamugghātāyāti** asmīti uppajjanakassa mānassa samugghātattāya. **Anattasaññā saṅghātīti** aniccalakkhaṇe diṭṭhe anattalakkhaṇaṃ diṭṭhameva hoti. Etesu hi tīsu lakkhaṇesu ekasmiṃ diṭṭhe itaradvayaṃ diṭṭhameva hoti. Tena vuttaṃ – “aniccasaññino, bhikkhave, anattasaññā saṅghātī”ti. **Diṭṭheva dhamme nibbānanti** diṭṭheyeva dhamme apaccayaparinibbānaṃ paṇaṇaṃ pāpuṇātīti imasmiṃ sutte vaṭṭavivaṭṭaṃ kathitaṃ.

2. Nissayasuttavaṇṇanā

2. Dutīye **nissayasampannoti** paṭiṭṭhāsampanno. **Saddhanti** okappanasaddhaṃ. **Vīriyanti** kāyikacetasikavīriyaṃ. **Yamsāti** yaṃ assa. **Ariyāya paññāyāti** saḥavipassanāya maggapaññāya. **Saṅkhāyāti** jānitvā. **Ekam paṭisevatīti** sevītabbayuttakaṃ sevati. **Adhivāsetīti** adhivāsetabbayuttakaṃ adhivāseti. **Parivajjetīti** parivajjetabbayuttakaṃ parivajjeti. **Vinodetīti** nīharitabbayuttakaṃ nīharati. **Evam kho bhikkhūti** evaṃ kho bhikkhu uggahaparipucchāvasena ceva dhammavavattānavasena ca paṭisevitabbādīni suppaṭividdhāni suppacckhāni katvā paṭisevanto adhivāsento parivajjento vinodento ca bhikkhu nissayasampanno nāma hotīti.

3. Meghiyasuttavaṇṇanā

3. Tatiye **cālikāyanti** evaṃnāmake nagare. Taṃ kira calamaggaṃ nissāya katattā oloketānaṃ calamānaṃ viya upaṭṭhāti, tasmā cālikāti saṅkhaṃ gataṃ. **Cāliyapabbateti** sopi pabbato sabbasetattā kālapakkhuposathe oloketānaṃ calamāno viya upaṭṭhāti, tasmā cāliyapabbatotīti vutto. Tattha mahantaṃ viharāṃ kārayiṃsu. Iti bhagavā taṃ nagaraṃ nissāya cālikāpabbatamahāvihāre viharati. **Jantugāmanti** evaṃnāmakeṃ aparampi tasseva viharassa gocaragāmaṃ. Jantugāmantiṃ paṭhanti. **Padhānatthikassāti** padhānakammikassa. **Padhānāyāti** samaṇadhammakaraṇatthāya. **Āgamehi tāvāti** satthā therassa vacanaṃ sutvā upadhārento “na tāvassa ñānaṃ paripakka”nti ñatvā paṭibāhanto evamāha. **Ekakamhi tāvāti** idaṃ panassa “evamayaṃ gantvāpi kamme anipphajjamaṇe nirāsaṅko hutvā pemavasena puna āgacchissatī”ti cittaṃ maddavajjanatthaṃ āha. **Natthi kiñci uttari karaṇīyanti** catūsu saccesu catunnaṃ kiccānaṃ katattā aññaṃ uttari karaṇīyaṃ nāma natthi. **Katassa vā paṭicayoti** adhigatassa vā puna paṭicayopi natthi. Na hi bhāvitamaggo puna bhāvīyati, na pahānakilesānaṃ puna pahānaṃ atthi. **Padhānanti kho, meghiya, vadamānaṃ kinti vadeyyāmāti** “samaṇadhammaṃ karomī”ti taṃ vadamānaṃ mayaṃ aññaṃ kiṃ nāma vadeyyāma.

Divāvihāraṃ nisīdīti divāvihāratthāya nisīdi. Nisīdanto ca yasmiṃ maṅgalasilāpaṭṭe pubbe anupaṭipāṭiyā pañca jātisatāni rājā hutvā uyyānakīlikāṃ kīlanto tividhanātakaparivāro nisīdi, tasmīmyeva nisīdi. Athassa nisinnakālato paṭṭhāya samaṇabhāvo jahito viya ahoṣi, rājavesaṃ gahetvā nāṭakavaraparivuto setacchattassa heṭṭhā mahārahe pallaṅke nisinno viya jāto. Athassa taṃ sampattim assādayato kāmavitakko udapādi. So tasmīmyeva khaṇe mahāyodhehi gahite dve core ānetvā purato ṭhapite viya addasa. Tesu ekassa vadhaṃ āṇāpanavasena byāpādavitaṅkko uppajji, ekassa bandhanaṃ āṇāpanavasena vihiṃsāvitaṅkko. Evaṃ so latājālena rukkhō viya madhumakkhikāhi madhughātako viya akusalavitakkehi parikkhitto ahoṣi. Taṃ sandhāya – **atha kho āyasmato meghiyassāti**ādi vuttaṃ. **Anvāsattāti** anubaddhā samparivāritā. **Yena bhagavā tenupasaṅkamīti** evaṃ pāpavitakkehi samparikiṅṇo kammaṭṭhānaṃ sappāyaṃ kātuṃ asakkonto “idaṃ vata disvā dīghadassī bhagavā paṭisedhesī”ti sallakkhetvā “idaṃ kāraṇaṃ dasabalassa āroccasāmi”ti nisinnāsanato vuṭṭhāya yena bhagavā tenupasaṅkami.

4. Nandakasuttavaṇṇanā

4. Catutthe **upaṭṭhānasālāyanti** bhojanasālāyaṃ. **Yenupaṭṭhānasālāti** satthā nandakattherena madhurassarena āraddhāya dhammadesanāya saddaṃ sutvā, “ānanda, ko eso upaṭṭhānasālāya madhurassarena dhammaṃ desetī”ti pucchitvā “dhammakathikanandakattherassa ajja, bhante, vāro”ti sutvā “atimadhuraṃ katvā, ānanda, eso bhikkhu dhammaṃ katheti, mayampi gantvā suṇissāma”ti vatvā yenupaṭṭhānasālā tenupasaṅkami. **Bahidvārakoṭṭhake aṭṭhāsīti** chabbaṇṇarasmiyo cīvaragabbhe paṭicchādetvā aññātakavesena aṭṭhāsī. **Kathāpariyosānaṃ āgamayamānoti** “idamavocā”ti idaṃ kathāvasānaṃ udikkhamāno dhammakathaṃ suṇanto aṭṭhāsīyeva. Athāyasmā ānando nikkhante paṭhame yāme satthu saññaṃ adāsi – “paṭhamayāmo atikkanto, bhante, thokaṃ vissamathā”ti. Satthā tattheva aṭṭhāsī. Athāyasmā ānando majjhimayāmepe nikkhante, “bhante, tumhe pakatiyā khattiyasukhumālā, puna buddhasukhumālāti paramasukhumālā, majjhimayāmopi atikkanto, muhuttaṃ vissamathā”ti āha. Satthā tattheva aṭṭhāsī. Tattha ṭhitakassevassa aruṇaggaṃ paññāyittha. Aruṇuggamanañca therassa “idamavocā”ti pāpetvā kathāpariyosānañca dasabalassa chabbaṇṇasarīrasmiṃvissajjanañca ekappahārenea ahoṣi. **Aggaḷaṃ ākoṭesīti** agganakhena dvārakavāṭaṃ ākoṭesi.

Sārajjamānarūpoti harāyamāno ottappamāno. Domanassasārajjāṃ panassa natthi. **Ettakampi no nappaṭibhāseyyāti** paṭisambhidāpattassa appaṭibhānaṃ nāma natthi. Ettakampi na katheyyanti dasseti. **Sādhu sādhu**ti therassa dhammadesanaṃ sampahaṃsanto āha. Ayañhettha attho “sugahitā ca te dhammadesanā sukathitā cā”ti. **Kulaputtānanti** ācārakulaputtānañceva jātikulaputtānañca. **Ariyo ca tuṇhibhāvoti** dutiyajjhānasamāpattim sandhāyevamāha. **Adhipaññādharmavipassanāyāti** saṅkhārapariggahavipassanāññaṃ. **Catuppādakoti** assaṅgaṇaḍḍhādikko. **Idaṃ vatvāti** imaṃ catūhaṅgehi samannāgataṃ dhammaṃ kathayitvā. **Vihāraṃ pāvisīti** gandhakuṭim pavitṭho.

Kālena dhammassavaneti kāle kāle dhammassavanasmiṃ. **Dhammasākacchāyāti** pañhakathāya. **Gambhīraṃ atthapadanti** gambhīraṃ guḷhaṃ rahassaṃ atthaṃ. **Paññāyāti** saḥavipassanāya maggapaññāya. Sammasanapaṭivedhapaññāpi uggahaparipucchapaññāpi vaṭṭatiyeva. **Patto vā pajjati vāti** arahattaṃ patto vā pāpuṇissati vāti evaṃ guṇasambhāvanāya sambhāveti. **Appattamānasāti** appattaarahattā, arahattaṃ vā appattaṃ mānasaṃ etesantipi appattamānasā. **Diṭṭhadhammasukhavihāranti** ettha diṭṭhadhammasukhavihāro lokiyopi vaṭṭati lokuttaropi.

5. Balasuttavaṇṇanā

5. Pañcame avijjākosajjasāvajjaassaddhiyesu akampanato **paññābalādīni** daṭṭhabbāni. **Akusalasaṅkhātāti** akusalāti ñātā. Esa nayo sabbattha. **Nālamariyāti** ariyabhāvaṃ kātuṃ asamattā, ariyānaṃ vā ananucchavikā. **Vodiṭṭhāti** suṭṭhu diṭṭhā. **Vocaritāti** manodvāre samudācārapattā. **Atthikassāti** dhammadesanāya atthikassa. **Ājivikābhayanti** jīvitavuttibhayaṃ. **Asilokabhayanti**

garahābhayaṃ. **Parisāsārajjabhayanti** parisam patvā sārājjaṃ okkamanabhayaṃ. Imasmiṃ sutte vaṭṭavivaṭṭaṃ kathitaṃ.

6. Sevanāsuttavaṇṇanā

6. Chaṭṭhe **jīvitaparikkhārā**ti jīvitasambhārā. **Samudānetabbā**ti samāharitabbā. **Kasirena samudāgacchantī**ti dukkhena uppajjanti. **Rattibhāgaṃ vā divasabhāgaṃ vā**ti ettha rattibhāge ñatvā rattibhāgeyeva pakkamitabbam, rattim caṇḍavālādiparipante sati aruṇuggamaṇaṃ āgametabbam. Divasabhāge ñatvā divā pakkamitabbam, divā paripante sati sūriyatthaṅgamaṇaṃ āgametabbam. **Saṅkhāpī**ti sāmāññatthassa bhāvanāpāripūriāgamaṇaṃ jānitvā. **So puggaloti** padassa pana “nānubandhitabbo”ti iminā sambandho. **Anāpucchā**ti idha pana taṃ puggalaṃ anāpucchā pakkamitabbanti attho. **Api panujjamānenā**ti api nikkadḍhiyamānena. Evarūpo hi puggalo sacepi dārukālāpasataṃ vā udakaghaṭasataṃ vā vālikāghaṭasataṃ vā daṇḍaṃ āropeti, mā idha vasīti nikkadḍhāpeti vā, taṃ khamāpetvāpi yāvajīvaṃ so anubandhitabbova, na vijahitabbo.

7. Sutavāsuttavaṇṇanā

7. Sattame **pañca ṭhānāni ajjhācaritunti** pañca kāraṇāni atikkamituṃ. **Pāṇanti** antamaso kunthakipillikaṃ. **Adinnanti** antamaso tiṇasalākampi parasantakaṃ. **Theyyasaṅkhātanti** theyyacittena. **Sannidhikāraṃ kāme paribhuñjitunti** sannidhiṃ katvā ṭhapetvā vatthukāmakilesakāme paribhuñjituṃ abhabbo. Akappiyaṃ kāmaguṇaṃ sandhāyetaṃ vuttaṃ. **Buddhaṃ paccakkhātunti** “na buddho aya”nti evaṃ paṭikkhipituṃ. **Dhammādīsupi** eseva nayo. Evaṃ tāva aṭṭhakathāya āgataṃ. Pāliyaṃ pana imasmiṃ sutte agatigamaṇāni kathitāni.

8-10. Sajjhasuttādivaṇṇanā

8-10. Aṭṭhame buddhādīnaṃ paccakkhānaṃ kathitaṃ. Navame puthujjanena saddhiṃ gahitattā “āhuneyyā”ti vuttaṃ. Dasame **gotrabhūti** sotāpattimagassa anantarapaccayena sikhāpattabalavavipassanācittena samannāgato. Sesam sabbattha uttānatthamevāti.

Sambodhavaggo paṭhamo.

2. Sīhanādavaggo

1. Sīhanādasuttavaṇṇanā

11. Dutiyassa paṭhame **yena bhagavā tenupasaṅkamī**ti “sace sathā cārikaṃ pakkamitukāmo assa, imasmiṃ kāle pakkameyya. Handāhaṃ cārikaṃ gamaṇatthāya sathāraṃ āpucchāmī”ti cintevā bhikkhusaṅghaparivuto upasaṅkami. **Āyasmā maṃ, bhanteti** so kira bhikkhu theram mahatā bhikkhuparivārena gacchantaṃ disvā “ime bhikkhū tathāgataṃ pahāya sārīputtaṃ parivāretvā nikkhantā, gamaṇavicchedamassa karissāmī”ti aṭṭhāne kopam bandhitvā evamāha. Tattha **āsajjāti** ghattetvā. **Appaṭinissajjāti** akkhamāpetvā accayaṃ adesetvā. Kismiṃ pana so kāraṇe āghātaṃ bandhīti? Therassa kira dasabalaṃ vanditvā uṭṭhāya gacchato cīvarakaṇṇo tassa sarīraṃ phusi, vāto paharītipi vadanti. Ettakena āghātaṃ bandhitvā theram mahatā parivārena gacchantaṃ disvā usūyamāno “gamaṇavicchedamassa karissāmī”ti evamāha. **Ehi tvam bhikkhūti** sathā tassa bhikkhuno vacanaṃ sutvā “na taṃ bhikkhu sārīputto paharīti vutte, ‘bhante, tumhe attano aggasāvakasessa pakkham vahatha, na mayha’nti mayi manopadosam katvā apāye nibbatteyyā”ti ñatvā “sārīputtaṃ pakkosāpetvā imamatthaṃ pucchissāmī”ti ekaṃ bhikkhuṃ āmantetvā evamāha. **Avāpuraṇaṃ ādāyāti** kuñcikaṃ gahetvā. **Sīhanādanti** seṭṭhanādaṃ pamukhanādaṃ appaṭivattiyānādaṃ. Evaṃ dvīhi mahātherehi ārocito bhikkhusaṅgho rattitṭhānadivāṭṭhānāni pahāya sathu santikaṃ agamāsi. **Khīyanadhammanti**

kathādhammaṃ.

Gūthagatanti gūthameva. Sesesupi eseva nayo. **Pathavīsamenāti** akujjhanatthēna pathaviyā samānena. Na hi pathavī “mayi suciṃ nikkhipantī”ti somanassaṃ karoti, na “asuciṃ nikkhipantī”ti domanassaṃ. Mayhampi evarūpaṃ cittanti dasseti. **Vipulenāti** aparittena. **Mahaggatenāti** mahantabhāvaṃ gatena. **Appamāṇenāti** vadḍhitappamāṇena. **Averenāti** akusalaverapuggalaverarahitena. **Abyāpajjenāti** niddukkhena vigatadomanassena. **So idhāti** so anupaṭṭhitakāyānupassanāsatiṭṭhāno bhikkhu evaṃ kareyya, mādiso kathaṃ evarūpaṃ karissati, bhanteti paṭhamāṃ sīhanādaṃ nadi. Evaṃ sabbattha yojanā veditabbā.

Rajoharaṇanti rajasammajjanacolakaṃ, pādapuñchanti, tasseva nāmaṃ. **Kaḷopihatthoti** pacchihattho ukkhalihattho vā. **Nantakavāsīti** antacchinnapilotikavasano. **Sūratoti** sucisīlo soraccena samannāgato. **Sudantoti** suṭṭhu damathaṃ upagato. **Suvinītoti** suṭṭhu sikkhito. **Na kañci hiṃsatīti** visāṇādīsu gaṇhantampi piṭṭhiṃ parimajjantampi na kañci viheṭṭheti. **Usabhachinnavisāṇasamenāti** usabhassa chinnavisāṇassa cittasadisena.

Aṭṭiyeyyāti aṭṭo pīlito bhaveyya. **Harāyeyyāti** lajjeyya. **Jiguccheyyāti** jigucchaṃ āpajjeyya.

Medakathālikanti medakathālikā vuccati sūnakārahehi yūsanikkhamanattāya tattha tattha katachiddā thālikā. **Parihareyyāti** maṃsassa pūretvā ukkhipitvā gaccheyya. **Chiddāvachiddanti** parittamahantehi chiddehi samannāgataṃ. **Uggharantanti** uparimukhehi chiddehi nikkhamamānāyūsaṃ. **Paggharantanti** adhomukhehi nikkhamamānāyūsaṃ. Evamassa sakalasarīraṃ yūsamakkhitaṃ bhaveyya. **Chiddāvachiddanti** navahi vaṇamukhehi parittamahanta chiddaṃ. Evamettha aṭṭhamanavamehi dvīhi aṅgehi thero attano sarīre nicchandarāgataṃ kathesi.

Atha kho so bhikkhūti evaṃ therena navahi kāraṇehi sīhanāde nadite atha so bhikkhu. **Accayoti** aparādho. **Maṃ accagamāti** maṃ atikkamma abhibhavitvā pavatto. **Paṭiggaṇhatūti** khamatu. **Āyatim saṃvarāyāti** anāgate saṃvaraṇattāya, puna evarūpassa aparādhassa akaraṇattāya. **Tagghāti** ekaṃsena. **Yathādhammaṃ paṭikarosīti** yathā dhammo ṭhito, tatheva karosi, khamāpesīti vuttaṃ hoti. **Taṃ te mayaṃ paṭiggaṇhāmāti** taṃ tava aparādhaṃ mayaṃ khamāma. **Vuddhihesā bhikkhu ariyassa vinayeti** eṣā bhikkhu ariyassa vinaye buddhassa bhagavato sāsane vuḍḍhi nāma. Katamā? Accayaṃ accayato disvā yathādhammaṃ paṭikarivā āyatim saṃvarāpajjanā. Desanaṃ pana puggalādhiṭṭhānaṃ karonto **yo accayaṃ accayato disvā yathādhammaṃ paṭikaroti, āyatim saṃvaraṃ āpajjatīti** āha. **Phalatīti** sace hi thero na khomeyya, tassa bhikkhuno tattheva sattadhā muddhā phaleyya. Tasmā bhagavā evamāha. **Sace maṃ soti** sace maṃ ayaṃ bhikkhu khamāhīti evaṃ vadati. **Khamatu ca me soti** ayampi cāyasmā mayhaṃ khamatūti evaṃ thero tassa accayaṃ paṭiggaṇhitvā sayampi taṃ satthu sammukhe khamāpesīti.

2. Saupādisesasuttavaṇṇanā

12. Dutīye **saupādisesanti** saupādānasesaṃ. **Anupādisesanti** upādānasesarahitaṃ niggahaṇaṃ. **Mattaso kārīti** pamāṇakārī na paripūrakārī. **Na tāvāyaṃ, sārīputta, dhammapariyāyo paṭibhāsīti** appaṭibhānaṃ nāma bhagavato natthi, na tāvāhaṃ imaṃ dhammapariyāyaṃ kathesinti ayaṃ panettha attho. **Māyimaṃ dhammapariyāyaṃ sutvā pamādaṃ āharimsūti** “mayaṃ kira catūhi apāyehi muttā”ti upari arahattattāya vīriyaṃ akarontā mā pamādaṃ āpajjimsu. **Pañhādhippāyena bhāsītōti** tayā pucchitapañhassa sabhāvena kathītōti dasseti. Imesaṃ pana navannaṃ puggalānaṃ bhavesu chandarāgavinodanattaṃ etameva atthuppattim katvā – “seyyathāpi, bhikkhave, appamattakopi gūtho duggandho hoti, evameva kho khvāhaṃ, bhikkhave, appamattakampi bhavaṃ na vaṇṇemi antamaso accharāsaṅghātamattampī”ti imaṃ suttaṃ (a. ni. 1.321) abhāsi. Na kevalaṅca etesaṃyeva navannaṃ puggalānaṃ gati nibaddhā, yesaṃ pana kulānaṃ tīṇi saraṇāni pañca silāni ekaṃ salākabhattaṃ ekaṃ pakkhiyabhattaṃ ekaṃ vassāvāsikaṃ ekā pokkharāṇī eko āvāso, evarūpāni nibaddhapuñṇāni atthi.

Tesampi gati nibaddhā, sotāpannasadisāneva tāni kulāni.

3. Koṭṭhikasuttavaṇṇanā

13. Tatiye **diṭṭhadhammavedanīyanti** imasmiṃ yevattabhāve vipaccanakakammaṃ. **Samparāyavedanīyanti** dutiye attabhāve vipaccanakakammaṃ. **Sukhavedanīyanti** sukhavedanājanakakammaṃ. **Dukkhavedanīyanti** dukkhavedanājanakakammaṃ. **Paripakkavedanīyanti** laddhavipākavāraṃ. **Aparipakkavedanīyanti** aladdhavipākavāraṃ. **Bahurvedanīyanti** bahuvipākadāyakaṃ. **Appavedanīyanti** na bahuvipākadāyakaṃ. **Avedanīyanti** vipākavedanāya adāyakaṃ. Imasmiṃ sutte vaṭṭavivaṭṭaṃ kathitaṃ.

4. Samiddhisuttavaṇṇanā

14. Catutthe **samiddhī** attabhāvasamiddhatāya evaṃladdhanāmo therassa saddhivihārikathero. **Kimārammaṇāti** kiṃpaccayā. **Saṅkappavitakkāti** saṅkappabhūtā vitakkā. **Nāmarūpārammaṇāti** nāmarūpapaccayā. Iminā cattāro arūpakkhandhā bhūtopādāyarūpaṅca vitakkānaṃ paccayoti dasseti. **Kva nānattaṃ gacchantīti** kasmim̐ ṭhāne nānāsabhāvataṃ vemattaṃ gacchanti. **Dhātusūti** rūpadhātuādīsu. Aññoyeva hi rūpavitakko, aññe saddavitakkādayoti. **Phassasamudayāti** sampayuttaphassapaccayā. **Vedanāsamosaṇāti** tisso vedanā samosaṇā. Ettakena kusalākusalamiṣṣakā kathitā. **Samādhippamukhāti**ādayo pana apacayapakkhikāti veditabbā. Tattha pubbaṅgamaṭṭhena jeṭṭhakaṭṭhena vā samādhi pamukhaṃ etesanti **samādhippamukhā**. Jeṭṭhakaṭṭhena sati adhipateyyā etesanti **satādhipateyyā**. Maggapaññā uttarā etesanti **paññuttarā**. Phalavimuttiṃ patvā sārappattā hontīti **vimuttisārā**. Ārammaṇavasena amataṃ nibbānaṃ ogāhitvā tattha patiṭṭhitāti **amatogadhā**. **Tena ca mā maññīti** tena vissajjanena ‘‘ahaṃ aggasāvakena pucchite pañhe vissajjesi’’nti mā mānaṃ vā dappaṃ vā akāsi.

5-6. Gaṇḍasuttādivaṇṇanā

15-16. Pañcame tīṇi cattāri vassāni vassagaṇā, aneke vassagaṇā uppannā assāti **anekavassagaṇiko**. **Tassassūti** tassa bhavēyyuṃ. **Abhedanamukhānti** na kenaci bhinditvā katāni, kevalaṃ kammaṃsamuttāhāneva vaṇamukhāni. **Jegucchiyaṃyevāti** jigucchitabbameva paṭikūlameva. **Cātumahābhūtikassāti** catumahābhūtamayassa. **odanakummāsūpacayassāti** odanena ceva kummāsena ca upacitassa vaḍḍhitassa. **Aniccucchādanaparimaddanabhedanavidhamaṇsanadhammassāti** hutvā abhāvaṭṭhena aniccadhammassa, duggandhavighātathāya tanuvilepanena ucchādanadhammassa, aṅgapaccaṅgābhādhavinodanathāya khuddakasambāhanena parimaddanadhammassa, daharakāle vā ūrusu sayāpetvā gabbhavāsena dussaṅghitānaṃ tesam̐ tesam̐ aṅgapaccaṅgānaṃ saṅghānasampādanattaṃ añchanapīḷanādivasena parimaddanadhammassa, evaṃ pariharitassāpi ca bhedanavidhamaṇsanadhammassa, bhijjanavikiraṇasabhāvassevāti attho. Ettha ca aniccapadena ceva bhedanavidhamaṇsanapadehi cassa atthaṅgamo kathito, sesehi samudayo. **Nibbindathāti** ukkaṅghatha pajahatha imaṃ kāyanti dasseti. Evamimasmiṃ sutte balavavipassanā kathitā. Chaṭṭhaṃ vuttanayameva. Saññāsīsena panettha ñāṇameva kathitaṃ.

7-8. Kulasuttādivaṇṇanā

17-18. Sattame **na manāpena paccuṭṭhentīti** manavaḍḍhanena manaṃ allīyanākārena āsanā vuṭṭhāya paccuggamaṇaṃ na karontī. **Na manāpena abhivādentīti** na pañcapatiṭṭhitena vandanti. **Asakkaccaṃ dentīti** acittikārena denti. **No sakkaccanti** sahatthā na denti. **Na upanisīdanti dhammasavanāyāti** ‘‘dhammaṃ suñissāmā’’ti na samīpe nisīdanti. **Na sussūsantīti** ghaṭapitṭhe āsittaudakaṃ viya vivaṭṭetvā gacchati. Aṭṭhame veneyyajjhāsayasena mettābhāvanaṃ pakkhipitvā **navaṅgasamannāgoti** vuttaṃ.

9. Devatāsuttavaṇṇanā

19. Navame **vippaṭṭisāriniyoti** vippaṭṭisāritam maṅkubhāvaṃ āpajjimha. **Hīnaṃ kāyanti** uparidevalokaṃ upādāya heṭṭhimo hīnoti vuccati. **No ca kho yathāsatti yathābalaṃ saṃvibhajimhāti** attano sattiya ca balassa ca anurūpena sīlavantānaṃ saṃvibhāgaṃ katvā na bhuñjimhā.

10. Velāmasuttavaṇṇanā

20. Dasame **api nu te, gahapati, kule dānaṃ dīyatīti** nayidaṃ bhagavā bhikkhusaṅghassa dānaṃ sandhāya pucchati. Seṭṭhissa hi ghare bhikkhusaṅghassa niccaṃ paṇītaḍānaṃ dīyati, na taṃ satthā na jānāti. Lokiyamahājanassa pana diyyamānadānaṃ atthi, taṃ lūkhaṃ hoti, seṭṭhissa cittaṃ na pīṇeti. Taṃ pucchāmīti pucchati. **Kaṇājakanti** sakuṇḍakabhattaṃ, sakuṇḍakehipi kaṇikataṇḍuleheva pakkam. **Biḷaṅgadutiyaṃ** kañjiyadutiyaṃ. **Asakkaccaṃ detīti** asakkaritvā deti. **Acittikatvāti** acittikārena dakkhiṇeyya agāravena deti. **Asahatthā detīti** sahatthena adatvā parahatthena deti, āṇattimattameva karotīti attho. **Apavidhhaṃ detīti** na nirantaraṃ deti, saṃvaccharikaṃ soṇḍabali viya hoti. **Anāgamanadiṭṭhiko detīti** na kammañca phalañca saddahitvā deti.

Yattha yatthāti tīsu kulasampadāsu yasmaṃ yasmaṃ kule. **Na ulārāya bhattabhogāyāti** adīsū nānaggarasasugandhasālībhojane upanīte cittaṃ na namati, “harathetaṃ rogavaḍḍhana”nti vatvā yena vā tena vā ḍākena saddhiṃ sakuṇḍakabhattaṃ amataṃ viya sampiyāyamāno bhuñjati. Kāsikādīsū varavatthesu upanītesu “harathetāni nivāsentassa paṭicchādetumpi na sakkonti, gattesu na saṅghahantī”ti vatvā nālīkerasāṭakamūlatacasadisāni pana thūlavatthāni “imāni nivāsentō nivatthabhāvampi jānāti, paṭicchādetabbampi paṭicchādentī”ti sampiyāyamāno nivāseti. Hatthiyānaassayānarathayānasuvaṇṇasivikādīsū upanītesu “harathetāni calācalāni, na sakkā ettha nisīditu”nti vatvā jajjararathake upanīte “ayaṃ niccalo, ettha sukhaṃ nisīditu”nti taṃ sādīyati. **Na ulāresu pañcasu kāmaguṇesūti** alaṅkatapaṭiyattā rūpavatiyo itthiyo disvā “yakkhiniyo maññe, etā khāditukāmā, kiṃ etāhi”ti yathāphāsukeneva vītināmeti. **Na sussūsantīti** sotuṃ na icchanti, na saddahantīti attho. **Na sotam odahantīti** kathitassa savanattamaṃ na sotapasādaṃ odahanti. **Sakkaccanti** adīni vuttavipariyāyena veditabbāni.

Velāmoti jātigottarūpabhogasaddhāpaññādīhi mariyādavelaṃ atikkantehi ulārehi guṇehi samannāgatattā evaṃladdhanāmo. **So evarūpaṃ dānaṃ adāsi mahādānanti** ettha ayaṃ anupubbīkathā – so kira atīte bārāṇasiyaṃ purohitagehe paṭisandhiṃ gaṇhi, velāmakumārotissa nāmaṃ akaṃsu. So soḷasavassakāle bārāṇasirājakumārena saddhiṃ sippuggahaṇattamaṃ takkasilaṃ agamāsi. Te ubhopi disāpāmokkhassa ācariyassa santike sippaṃ paṭṭhapayimsu. Yathā ca te, evaṃ aññepi jambudīpe caturāsītisahasārājakumārā. Bodhisatto attanā gahitaṭṭhāne piṭṭhiācariyo hutvā caturāsīti rājakumārāsahassāni sikkhāpeti, sayampi soḷasavassehi gahetabbasippaṃ tīhi vassehi uggaṇhi. Ācariyo “velāmakumārassa sippaṃ paguṇa”nti ṇatvā, “tātā, velāmo mayā ṇatamaṃ sabbaṃ jānāti, tumhe sabbepi samaggā gantvā etassa santike sippaṃ uggaṇhathā”ti caturāsīti kumārāsahassāni bodhisattassa niyādesi.

Bodhisatto ācariyaṃ vanditvā caturāsīti kumārāsahassaparivāro nikkhamitvā ekaṃ āsannaṃ nagaram patvā nagarasāmikaṃ rājakumāraṃ uggaṇhāpetvā tassa sippe paguṇe jāte taṃ tattheva nivattesi. Etenupāyena caturāsīti nagarasahassāni gantvā caturāsītiyā rājakumārānaṃ sippaṃ paguṇaṃ kāretvā tasmīṃ tasmīṃ nagare taṃ taṃ nivattetvā bārāṇasirājakumāraṃ ādāya bārāṇasiṃ paccāgañchi. Manussā kumāraṃ pariyoṣitasippaṃ rajje abhisiñciṃsu, velāmassa purohitaṭṭhānaṃ adāsi. Tepi caturāsītisahasārājakumārā sakesu sakesu rajjesu abhisekaṃ patvā anusaṃvacchamaṃ bārāṇasirañño upaṭṭhānaṃ āgacchanti. Te rājānaṃ disvā velāmassa santikaṃ gantvā, “ācariya, amhe rajjesu patiṭṭhitā, vadeyyātha yenattho”ti vatvā gacchanti. Tesamaṃ gamanāgamanakāle sakaṭasandamānikagāvigoṇakukkuṭasūkarādayo gaṇhantānaṃ janapado ativiya uupadduto hoti, mahājano sannipatitvā rājāṅgaṇe kandati.

Rājā velāmaṃ pakkosivā, “ācariya, upadduto janapado, rājāno gamanāgamanakāle mahāviloṃpaṃ karonti, manussā sandhāretuṃ na sakkonti, janapadapīḷāya upasamaṃ ekaṃ upāyaṃ karothā”ti. Sādhū mahārāja, upāyaṃ karissāmi, tumhākaṃ yattakena janapadena attho, taṃ paricchindivā gaṇhathāti. Rājā tathā akāsi. Velāmo caturāsītiyā rājasahassānaṃ janapade vicāretvā cakkānābhiyaṃ are viya rañño janapadasmim̄ oropesi. Tato paṭṭhāya te rājāno āgacchantāpi gacchantāpi attano attano janapadeneva sañcaranti, amhākaṃ janapadoti vilopaṃ na karonti. Rājagāravena rañño janapadampi na piḷenti. Janapadā sannisinnā nissaddā niravā ahesuṃ. Sabbe rājāno haṭṭhatuṭṭhā “yena vo, ācariya, attho, taṃ amhākaṃ vadethā”ti pavārayimsu.

Velāmo sīsaṃnhāto attano antonivesane sattaratanaparipūrānaṃ gabbhānaṃ dvārāni vivarāpetvā yāva sattamā kulaparivaṭṭā ṭhapitaṃ dhanam̄ oloketvā āyavayaṃ upadhāretvā “mayā sakalajambudīpaṃ khobhenta dānaṃ dātuṃ vaṭṭati”ti rañño ārocetvā gaṅgātīre dvādasayojanikā uddhanapantiyo kāretvā tasmim̄ tasmim̄ ṭhāne sappimadhuphānitatelatilaṇḍulādīnaṃ ṭhapanatthāya mahākoṭṭhāgārāni paṭiṭṭhāpetvā “ekekasmim̄ ṭhāne ettakā ettakā janā saṃvidahatha, yaṃkiñci manussānaṃ laddhabbaṃ nāma atthi, tato ekasmim̄pi asati mayhaṃ āroceyyāthā”ti manusse saṃvidhāya “asukadivasato paṭṭhāya velāmabrāhmaṇassa dānaṃ bhujjantū”ti nagare bherim̄ carāpetvā “dānaggaṃ pariniṭṭhita”nti dānayuttehi ārocite saḥassaggaṇakam̄ vatthaṃ nivāsetvā pañcasataggaṇakam̄ ekamaṃ katvā sabbālaṅkārahūsito dānavīmaṃsanatthāya phalīkavaṇṇassa udakassa suvaṇṇabhiṅgāraṃ pūretvā “imasmim̄ loke sace imaṃ dānaṃ paṭiggahetuṃ yuttarūpā dakkhiṇeyyapuggalā atthi, idaṃ udakaṃ nikkhamitvā pathaviṃ gaṇhātu. Sace natthi, evameva tiṭṭhatū”ti saccakiriyaṃ katvā bhīṅgāraṃ adhomukhaṃ akāsi. Udakaṃ dhamakaraṇena gahitaṃ viya ahosi. Bodhisatto “suñño vata, bho, jambudīpo, ekapuggalopi dakkhiṇaṃ paṭiggahetuṃ yuttarūpo natthi”ti vipparisāraṃ akatvā “sace dāyakaṃ vasaṇāyaṃ dakkhiṇā visujjhissati, udakaṃ nikkhamitvā pathaviṃ gaṇhātu”ti cintesi. Phalīkavaṇṇasadiṣaṃ udakaṃ nikkhamitvā pathaviṃ gaṇhi. “Idāni dānaṃ dassāmi”ti dānaggaṃ patvā dānaṃ oloketvā yāguvelāya yāguṃ, khajjakavelāya khajjakam̄, bhojanavelāya bhojanaṃ dāpesi. Eteneva nīhārena divase divase dānaṃ dīyati.

Tasmim̄ kho pana dānagge “idaṃ nāma atthi, idaṃ nāma natthi”ti vattabbaṃ natthi. Idāni taṃ dānaṃ ettakamatteneva na niṭṭhaṃ gamissatīti rattasuvaṇṇaṃ nīharāpetvā suvaṇṇapātiyo kāretvā caturāsītisuvaṇṇapātisahassādīnaṃ atthāya caturāsītirājasahassānaṃ sāsaṇaṃ paḥiṇi. Rājāno “ciraṣsaṃ vata mayaṃ ācariyena anuggahitā”ti sabbaṃ sampādetvā pesesuṃ. Dāne diyyamāneyeva satta vassāni satta māsa atikkantā. Atha brāhmaṇo “hiraññaṃ bhājetvā dānaṃ dassāmi”ti mahante okāse dānaṃ sajjāpesi. Saggiāpetvā caturāsīti suvaṇṇapātisahassāni ādim̄ katvā koṭito paṭṭhāya adāsi.

Tattha **rūpiyapūrānīti** rajatataṭṭirajataphālarajataṃsakehi pūrāni. Pātiyo pana khuddikāti na sallakkhetabbā, ekakarīsappamaṇe bhūmibhāge catassoṃ pātiyo ṭhapaṃyimsu. Pātimakuḷaṃ navaratanam̄ hoti, mukhavaṭṭito paṭṭhāya aṭṭharatanam̄, pātimukhavaṭṭiyā chayutto ājaññaratho anupariyāyati, dadamāno pātiyā bāhirantena vaggavagge paṭiggāhake ṭhapetvā paṭhamam̄ pātiyā pakkhittaṃ datvā pacchā sandhisandhito viyojetvā pātinti evaṃ caturāsīti pātisahassāni adāsi. **Rūpiyapāti**ādisupi eseṃ nayo. Etthapi ca **suvaṇṇapūrānīti** suvaṇṇatattisuvaṇṇaphālasuvaṇṇamaṃsakehi pūrāni. **Hiraññapūrānīti** sattavidharatanapūrāni. **Sovaṇṇālaṅkāraṇīti** suvaṇṇālaṅkāraṇīti. **Kaṃsūpadhāraṇānīti** rajatamayakhīrapaṭicchakāni. Tāsaṃ pana dhenūnaṃ siṅgāni suvaṇṇakosakapariyonaddhāni ahesuṃ, gīvāya sumanadāmaṃ piḷandhiṃsu, catūsu pādesu nupūrāni, piṭṭhiyaṃ varadukūlaṃ pārutam̄, kaṇṭhe suvaṇṇaghaṇṭam̄ bandhiṃsu. **Vatthakoṭṭisahassānīti** lokavohārato vīsativatthayugāni ekā koṭi, idha pana dasa sātakāti vuttaṃ. **Khomasukhumānanti**ādimhi khomādīsu yaṃ yaṃ sukhumam̄, taṃ tadeva adāsi. Yāni panetāni itthidānaṃ usabhadānaṃ majjādānaṃ samajjādānanti adānasammatāni, tānipi esa “velāmassa dānamukhe idaṃ nāma natthi”ti vacanapathaṃ pacchindituṃ parivāratthāya adāsi. **Najjo maññe vissandantīti** nadiyo viya vissandanti.

Iminā satthā velāmassa dānaṃ kathetvā, “gahapati, etaṃ mahādānaṃ nāñño adāsi, ahaṃ adāsim̄. Evarūpaṃ pana dānaṃ dadantopi ahaṃ paṭiggahetuṃ yuttarūpaṃ puggalaṃ nālatthaṃ, tvaṃ mādisi

buddhe lokasmiṃ diṭṭhamāne dānaṃ dadamāno kasmā cintesī’ ti seṭṭhissa desanaṃ vaḍḍhento **siyā kho pana teti**ādīmāha. Nanu ca yāni tadā ahesuṃ rūpavedanāsaññāsankhāravīññānāni, tāni niruddhāni? Kasmā “ahaṃ tena samayena velāmo brāhmaṇo” ti āhāti? Paveṇiyā avicchinnatā. Tāni hi rūpādīni nirujjhamānāni imesaṃ paccaye datvā niruddhāni aparāparaṃ avicchinnaṃ paveṇiṃ gahetvā evamāha. **Na taṃ koci dakkhiṇaṃ sodhetī**ti koci samaṇo vā brāhmaṇo vā devo vā māro vā uṭṭhāya taṃ dakkhiṇaṃ sodhetīti vattabbo nāhosi. Tañhi dakkhiṇaṃ sodhento uttamakoṭiyā buddho, heṭṭhimakoṭiyā dhammasenāpatisāriputtattherasadiso sāvako sodheyya.

Diṭṭhisampannanti dassanasampannaṃ sotāpannaṃ. **Idaṃ tato mahapphalataranti** idaṃ sotāpannassa dinnadānaṃ lokiyamahājanassa sattamāsādhikāni satta saṃvaccharāni ettakaṃ hiraññasuvaṇṇaṃ pariccājantena dinnadānato mahapphalaṃ.

Yo ca satam diṭṭhisampannānanti ettha ekassa sakadāgāmiṃssa vasena ekuttarasataṃ sotāpanne katvā sotāpannagaṇanā veditabbā. Iminā upāyena sabbavāresu heṭṭhā heṭṭhā āgate anantarena satagaṇaṃ katvā puggalagaṇanā veditabbā.

Buddhappamukhanti ettha sammāsambuddhaṃ saṅghattheraṃ katvā nisinno saṅgho buddhappamukho saṅghoti veditabbo. **Cātuddisaṃ saṅghaṃ uddissāti** ettha cātuddisaṃ saṅghaṃ uddissa katavīhāro nāma yattha cetiyaṃ paṭiṭṭhitaṃ hoti, dhammassavanaṃ karīyati, catūhi disāhi anudisāhi ca bhikkhū āgantvā appaṭipucchitvāyeva pāde dhovivā kuñcikāya dvāraṃ vivarivā senāsaṃ paṭijaggivā vasitvā yathāphāsukaṃ gacchanti. So antamaso caturataniyā paṇṇasālāpi hotu, cātuddisaṃ saṅghaṃ uddissa katavīhārotveva vuccati.

Saraṇaṃ gaccheyyāti ettha maggenāgataṃ anivattanasaraṇaṃ adhippetam. Apare panāhu – attānaṃ niyyādetvā dinnatā saraṇāgamaṇaṃ tato mahapphalataranti vuttaṃ. **Sikkhāpadāni samādiyeyyāti** pañca sīlāni gaṇheyya. Sīlāni maggena āgataṃ anivattanasīlameva kathitaṃ. Apare panāhu – sabbasattānaṃ abhayadānaṃ dinnatā sīlaṃ tato mahapphalataranti vuttaṃ. **Gandhohanamattanti** gandhaūhanamattaṃ, dvīhaṅgulīhi gaṇḍapiṇḍaṃ gahetvā upasiṅghanamattaṃ. Apare pana “gaddohanamatta” nti pālīṃ vatvā gāvīyā ekavāraṃ thanaāñchanamattanti atthaṃ vadanti. **Mettacittanti** sabbasattānaṃ hitānupharaṇacittaṃ. Taṃ pana appanāvaseneva gahitaṃ. **Aniccasaññanti** maggassa anantarapaccayabhāvena sikkhāpattabalavavipassanaṃ.

Upamāto pana imāni dānādīni puññāni evaṃ veditabbāni – sacepi hi jambudīpaṃ bheritalasadiṣaṃ samatalaṃ katvā koṭito paṭṭhāya pallaṅke attharivā ariyapuggale nisīdāpeyya, tattha sotāpannānaṃ dasa pantiyo assu, sakadāgāmīnaṃ pañca, anāgāmīnaṃ aḍḍhateyyā, khīṇāsavānaṃ diyaḍḍhā, paccakabuddhānaṃ ekā panti bhaveyya, sammāsambuddho ekakova. Ettakassa janassa dinnadānato sammāsambuddhassa dinnameva mahapphalaṃ. Itaraṃ pana –

“Vihāradānaṃ paṇipāto, sikkhā mettāya bhāvanā;
Khayato sammasantassa, kalaṃ nāgghati soḷasiṃ”.

Teneva bhagavā parinibbānasamaye “dhammānudhammappaṭipatti anuttarā pūjā” ti āha. Sesam sabbattha uttānatthamevāti.

Sīhanādavaggo dutiyo.

3. Sattāvāsavaggo

1. Tiṭṭhānasuttavaṇṇanā

21. Tatiyassa paṭhame **uttarakurukāti** uttarakuruvāsino. **Adhiggaṇṇantīti** adhibhavanti, adhikā visitṭhā jeṭṭhakā honti. **Amamāti** nittañhā. Aṭṭhakathāyaṃ pana niddukkhāti vuttam. **Apariggahāti** “idaṃ mayha”nti pariggaharahitā. **Niyatāyukāti** tesañhi nibaddham āyu vassasahassameva, gatipi nibaddhā, tato cavitvā saggeyeva nibbattanti. **Satimantoti** devatānañhi ekantasukhitāya sati thirā na hoti, nerayikānaṃ ekantadukkhitāya. Imesaṃ pana vokiṇṇasukhadukkhattā sati thirā hoti. **Idha brahmacariyavāsoti** jambudīpe buddhapaccekabuddhānaṃ uppajjanato aṭṭhaṅgikamaggabrahmacariyavāsopi idheva hoti.

2. Assakhaḷuṅkasuttavaṇṇanā

22. Dutiye **javasampannoti** padajavena sampanno. **Na vaṇṇasampannoti** na sarīravaṇṇena sampanno. Purisakhaḷuṅkesu **javasampannoti** ñāṇajavena sampanno. **Na vaṇṇasampannoti** na guṇavaṇṇena sampanno. Sesam pālinayeneva veditabbaṃ. Yañhettha vattabbaṃ siyā, taṃ tikanipātavaṇṇanāyaṃ vuttameva.

3. Taṇhāmūlakasuttavaṇṇanā

23. Tatiye **taṇham paṭiccāti** dve taṇhā esanataṇhā esitataṇhā ca. Yāya taṇhāya ajapathasaṅkupathādāni paṭipajjitvā bhoge esati gavesati, ayaṃ esanataṇhā nāma. Yā tesu esitesu gavesitesu paṭiladdhesu taṇhā, ayaṃ esitataṇhā nāma. Idha pana esanataṇhā daṭṭhabbā. **Pariyesanāti** rūpādiārammaṇapariyesanā. Sā hi esanataṇhāya sati hoti. **Lābhoti** rūpādiārammaṇapaṭilābho. So hi pariyesanāya sati hoti.

Vinicchayo pana ñāṇataṇhādiṭṭhivittakkavasena catubbidho. Tattha “sukhavinicchayaṃ jaññā, sukhavinicchayaṃ ñatvā ajjhataṃ sukhamanuyuñjeyyā”ti (ma. ni. 3.323) ayaṃ ñāṇavinicchayo. “Vinicchayāti dve vinicchayā taṇhāvinicchayo ca diṭṭhivinicchayo cā”ti (mahāni. 102) evaṃ āgatāni aṭṭhasatataṇhāvicarītāni taṇhāvinicchayo. Dvāsaṭṭhi diṭṭhiyo diṭṭhivinicchayo. “Chando kho, devānaminda, vitakkanidāno”ti (dī. ni. 2.358) imasmiṃ pana sutte idha vinicchayoti vutto vitakkoyeva āgato. Lābham labhitvā hi iṭṭhāniṭṭham sundarāsundaram vitakkeneva vinicchanti “ettakaṃ me rūpārammaṇatthāya bhavissati, ettakaṃ saddhārammaṇatthāya, ettakaṃ mayham bhavissati, ettakaṃ parassa, ettakaṃ paribhuñjissāmi, ettakaṃ nidahissāmī”ti. Tena vuttam – **lābham paṭicca vinicchayoti**.

Chandarāgoti evaṃ akusalavitakkena vitakkite vatthusmiṃ dubbalarāgo ca balavarāgo ca uppajjati. Idañhi idha chandoti dubbalarāgassādhivacanam. **Ajjhosānanti** aham mamanti balavasanniṭṭhānam. **Pariggahoti** taṇhādiṭṭhivasena pariggahakaraṇam. **Macchhariyanti** parehi sādharāṇabhāvassa asahanatā. Tenevassa porāṇā evaṃ vacanattam vadanti – “idaṃ acchariyam mayhameva hotu, mā aññassa acchariyam hotūti pavattattā macchhariyanti vuccatī”ti. **Ārakkhoti** dvārapidahanamañjūsāgopanādivasena suṭṭhu rakkhanam. Adhikarotīti **adhikaraṇam**, kāraṇassetam nāmam. **Ārakkhādhikaraṇanti** bhāvanapuṃsakam, ārakkhāhetūti attho. **Daṇḍādānādisu** paranisedhanattam daṇḍassa ādānam **daṇḍādānam**. Ekato dhārādino satthassa ādānam **satthādānam**. **Kalahoti** kāyakalahopi vācākalahopi. Purimo **viggaho**, pacchimo **vivādo** (dī. ni. aṭṭha. 2.103). Tuvamtvanti agāravavasena **tuvamtvamvacanam**.

4. Sattāvāsasuttavaṇṇanā

24. Catutthe **sattāvāsāti** sattānam āvāsā, vasanaṭṭhānānīti attho. Tattha suddhāvāsāpi sattāvāsova, asabbakālikattā pana na gahitā. Suddhāvāsā hi buddhānaṃ khandhāvāraṭṭhānasadisā, asaṅkheyyakappe buddhesu anibbattesu taṃ ṭhānam suññam hoti. Iti asabbakālikattā na gahitā. Sesamettha viññāṇaṭṭhitīsu vuttanayeneva veditabbaṃ.

5. Paññāsuttavaṇṇanā

25. Pañcame **yatoti** yasmim̄ kāle. **Suparicitaṃ hotīti** suṭṭhu upacitaṃ suvaḍḍhitaṃ hoti. **Kallaṃ vacanāyāti** yuttaṃ vattuṃ. **Vītarāganti** vigatarāgaṃ. **Asarāgadhamanti** na sarajjanasabhāvaṃ. **Anāvattidhamanti** anāvattanasabhāvaṃ anibbattārahaṃ, appaṭṭisandhikabhāveneva nirujjhanasabhāvanti attho. Imasmim̄ sutte khīṇāsavova kathito.

6. Silāyūpasuttavaṇṇanā

26. Chaṭṭhe **candikāputtoti** mātu nāmasasena paññāto candikāputtatthero. **Cetasā cittaṃ hotīti** cittavārapariyāyena cittavārapariyāyo cito vaḍḍhito hoti. **Cetasā cittaṃ suparicitanti** cittavārapariyāyena cittavārapariyāyo uparūpari sucito suvaḍḍhito hoti. **Nevassa cittaṃ pariyādiyantīti** tāni ārammaṇāni tassa khīṇāsavassa cittuppādaṃ gahetvā khetvā ṭhātuṃ na sakkonti. **Amissīkatanti** tāni ārammaṇāni anallīnattā tehi amissīkataṃ. **Āneñjappattanti** aniñjanabhāvaṃ nipphandanabhāvaṃ pattaṃ.

Silāyūpoti silāthambho. **Soḷasakukkukoti** dīghato soḷasahattho. **Heṭṭhānemaṅgamāti** āvāṭassa heṭṭhāgatā. **Upari nemassāti** upari āvāṭassa. **Sunikhātattāti** ayamusalehi koṭṭetvā koṭṭetvā suṭṭhu nikhātattā. **Evameva khoti** ettha silāyūpo viya khīṇāsavo daṭṭhabbo, mahāvātā viya chasu dvāresu uppajjanakā kilesā, catūhi disāhi āgantvā vātānaṃ silāyūpaṃ cāletuṃ asamatthabhāvo viya chasu dvāresu uppajjanakakilesānaṃ khīṇāsavassa cittaṃ cāletuṃ asamatthabhāvo veditabbo. Imasmimpi sutte khīṇāsavova kathito.

7-8. Verasuttadvayavaṇṇanā

27-28. Sattame **bhayaṃ veraṃ pasavatīti** cittutrāsabhayaṅca puggalaveraṅca paṭilabhati. **Cetasikanti** cittanissitaṃ. **Dukkanti** kāyavattthukaṃ. **Domanassanti** paṭighasampayuttadukkhaṃ. Imasmim̄ sutte sotāpattimaggo kathito. Aṭṭhamam̄ bhikkhusaṅghassa kathitaṃ, imasmim̄ pana sotāpannova kathitoti vuttaṃ.

9. Āghātavattthusuttavaṇṇanā

29. Navame **āghātavattthūnīti** āghātakāraṇāni. **Āghātaṃ bandhatīti** kopaṃ bandhati uppādeti.

10-11. Āghātaṭṭhavinayasuttādivaṇṇanā

30-31. Dasame **āghātaṭṭhavinayāti** āghātassa ṭṭhavinayakāraṇāni. **Taṃ kutettha labbhāti** “taṃ anattacaraṇaṃ mā ahoṣī”ti etasmim̄ puggale kuto labbhā, kena kāraṇena sakkā laddhuṃ, “paro nāma parassa attano cittaṭṭhavinayā anattaṃ karotī”ti evaṃ cintetvā āghātaṃ ṭṭhavineti. Atha vā sacāhaṃ kopaṃ kareyyaṃ, taṃ kopakaraṇaṃ ettha puggale kuto labbhā, kena kāraṇena laddhabbanti attho. Kuto lābhātipi pāṭho. Sacāhaṃ ettha kopaṃ kareyyaṃ, tasmim̄ me kopakaraṇe kuto lābhā lābhā, nāma ke siyuntī attho. Imasmiṅca atthe **tanti** nipātamattameva hoti. Ekādasame **anupubbanirodhāti** anupaṭṭhavinayānirodhā. Sesam̄ sabbattha uttānatthamevāti.

Sattāvāsavaggo tatiyo.

4. Mahāvaggo

1-2. Anupubbavīhārasuttādivaṇṇanā

32-33. Catutthassa paṭhame **anupubbavīhārāti** anupaṭṭhavinayā samāpajjitabbavīhārā. Dutiye **yattha kāmā nirujjhantīti** yasmim̄ ṭhāne kāmā vūpasammanti. **Nirodhetvāti** appaṭṭivatte katvā. **Nicchātāti**

taṇhādittḥicchātānaṃ abhāvena nicchātā. **Nibbutāti** attaparitāpanakilesānaṃ abhāvena nibbutā. **Tiṇṇāti** kāmato tiṇṇā. **Pāraṃgatāti** kāme pāraṃ gatā. **Tadaṅgena** tena jhānaṅgena. **Ettha kāmā nirujjhantīti** ettha paṭhamajjhāne kāmā nirujjhanti. **Te cāti** ye paṭhamajjhānaṃ samāpajjanti, te kāme nirodhetvā nirodhetvā viharanti nāma. **Pañjalikoti** paggahitaañjaliko hutvā. **Payirupāseyyāti** upaṭṭhāpeyya. Iminā upāyena sabbattha attho veditabbo.

3. Nibbānasukhasuttavaṇṇanā

34. Tatiye **udāyīti** lāḷudāyitthero. **Etadeva khvetthāti** etadeva kho ettha. **Kāmasahagatāti** kāmanissitā. **Samudācarantīti** manodvāre sañcaranti. **Ābādhāyāti** ābādhanāya pīlanāya. **Pariyāyenāti** kāraṇena. Evaṃ sabbavāresu attho veditabbo. Imasmimṃ sutte avedayitasukhaṃ nāma kathitaṃ.

4. Gāvīupamāsuttavaṇṇanā

35. Catutthe **pabbateyyāti** pabbatacārīnī. **Na suppatiṭṭhitam patiṭṭhāpetvāti** yathā suppatiṭṭhitā hoti, evaṃ na patiṭṭhāpetvā. **Taṃ nimittanti** taṃ paṭhamajjhānasaṅkhātāṃ nimittaṃ. **Na svādhiṭṭhitam adhiṭṭhātīti** yathā suṭṭhu adhiṭṭhitam hoti, na evaṃ adhiṭṭhāti. **Anabhihiṃsamānoti** apothento aviheṭhento. **Mudu cittaṃ hoti kammaññanti** yathā vipassanācittaṃ lokuttaramaggakkhaṇe mudu kammakkhamam kammayoggaṃ hoti, evamassa abhiññāpādakaṃ catutthajjhānacittaṃ mudu hoti kammaññaṃ. **Appamāṇo samādhīti** catubrahmavihārasamādhipi maggaphalasaṃmādhipi appamāṇo samādhī nāma, idha pana “appamāṇaṃ appamāṇārammaṇa”nti iminā pariyāyena suppaṇṇasamādhī appamāṇasaṃmādhīti daṭṭhabbo. **So appamāṇena samādhinā subhāvitena**ti imasmimṃ ṭhāne ayaṃ bhikkhu vipassanaṃ vaḍḍhetvā arahattaṃ patto. Idāni khīṇāsavassa abhiññāpaṭipāṭim dassento **yassa yassa cātīdimāha**.

5. Jhānasuttavaṇṇanā

36. Pañcame **āsavānaṃ khayanti** arahattaṃ. **Yadeva tattha hoti rūpagatanti** tasmimṃ paṭhamajjhānakkhaṇe vatthuvāsena vā cittasamuṭṭhānikādivāsena vā yaṃ rūpaṃ nāma pavattati. **Vedanāgatādīni** sampayuttavedanādīnaṃ vasena veditabbāni. **Te dhammeti** te rūpādayo pañcakkhandhadhamme. **Aniccato**tiādīsu hutvā abhāvākārena **aniccato**, paṭipīlanākārena **dukkhato**, rujanākārena **rogato**, antodussanaṭṭhena **gaṇḍato**, anupaviṭṭhaṭṭhena anukantaṇṭṭhena ca **sallato**, dukkhaṭṭhena **aghatato**, ābādhaṇṭṭhena **ābādhato**, asakaṭṭhena **parato**, palujjanaṭṭhena **palokato**, assāmikaṭṭhena **suññato**, avasavattaṇṭṭhena **anattato**. **Samanupassatīti** balavavipassanāpaññāya passati.

Tehi dhammehīti tehi pañcakkhandhadhammehi. **Paṭivāpetīti** nibbānavāsena nivatteti. **Amatāya dhātuyāti** nibbānadhātuyā. **Cittaṃ upasaṃharatīti** ṇāṇena ānisaṃsaṃ disvā otāreti. **Santanti** paccanīkasantaṭṭāya santaṃ. **Pañṭanti** atappakaṃ. **So tattha ṭhito āsavānaṃ khayam pāpuṇātīti** so tasmimṃ paṭhamajjhāne ṭhito taṃ balavavipassanaṃ vaḍḍhetvā arahattaṃ pāpuṇāti. Aparo nayo – **so tehi dhammehīti** yasmā aniccatoṭiādīsu aniccato palokatoti dvīhi padehi aniccalakkhaṇaṃ kathitaṃ, dukkhatotiādīhi chahi dukkhalakkhaṇaṃ, parato, suññato, anattatoti tīhi anattalakkhaṇaṃ. Tasmā so tehi evaṃ tilakkhaṇaṃ āropetvā dīṭṭhehi antosamāpattiyam pañcakkhandhadhammehi. **Cittaṃ paṭivāpetīti** cittaṃ paṭisaṃharati moceti apaneti. **Upasaṃharatīti** vipassanācittaṃ tāva savanavasena thutivasena pariyattivasena paññattivasena ca santaṃ nibbānanti evaṃ asaṅkhatāya amatāya dhātuyā upasaṃharati. Maggacittaṃ nibbānaṃ ārammaṇakaraṇavaseneva “etaṃ santaṃ etaṃ paṇīta”nti na evaṃ vadati. Iminā pañcākārena taṃ paṭivijjhanto tattha cittaṃ upasaṃharatīti attho.

So tattha ṭhitoti tassā tilakkhaṇārammaṇāya vipassanāya ṭhito. **Āsavānaṃ khayam pāpuṇātīti** anukkamena cattāro magge bhāvetvā arahattaṃ pāpuṇāti. **Teneva dhammarāgenāti** samathavipassanādhamme chandarāgena. **Dhammanandiyāti** tasseva vevacanaṃ. Samathavipassanāsu

hi sabbaso chandarāgam pariyādātum sakkonto arahattam pāpuṇāti, asakkonto anāgāmī hoti.

Tiṇapurisarūpake vāti tiṇapotthakarūpe vā. Dūre kaṇḍe pātetīti **dūrepātī**. Avirādhitam vijjatīti **akkhaṇavedhī**. **Yadeva tattha hoti vedanāgatanti** idha rūpaṃ na gahitam. Kasmā? Samatikkantattā. Ayañhi heṭṭhā rūpāvacarajjhānaṃ samāpajjitvā rūpaṃ atikkamitvā arūpāvacarasamāpattim samāpannoti samathavasenāpi anena rūpaṃ samatikkantaṃ, heṭṭhā rūpaṃ sammasitvā taṃ atikkamma idāni arūpaṃ sammasatīti vipassanāvasenāpi anena rūpaṃ atikkantaṃ. Āruppe pana sabbasopi rūpaṃ natthīti taṃ sandhāyapi rūpaṃ na gahitam. Atha nevasaññānāsaññāyatanaṃ kasmā na gahitanti? Sukhumattā. Tasmiñhi cattāropi arūpakkhandhā sukhumā na sammasanūpagā. Tenevāha – “iti kho, bhikkhave, yāvatā saññāsamāpatti tāvatā aññāpaṭivedho”ti. Idaṃ vuttaṃ hoti – yāvatā sacittakasamāpatti nāma atthi, tāvatā oḷārike dhamme sammasato aññāpaṭivedho hoti, arahattam sampajjati. Nevasaññānāsaññāyatanaṃ pana sukhumattā saññāsamāpattīti na vuccati. **Jhāyiheteti** jhāyīhi jhānābhiratehi etāni. **Vuṭṭhahitvāti** tato samāpattito vuṭṭhāya. **Samakkhātabbānīti** sammā akkhātabbāni, “santāni paṇītāni”ti evaṃ kevalaṃ ācikkhitabbāni thometabbāni vaṇṇetabbānīti.

6. Ānandasuttavaṇṇanā

37. Chaṭṭhe **sambādheti** pañcakāmaguṇasambādhe. **Okāsādhigamoti** okāsassa adhigamo. **Sattānaṃ visuddhiyāti** sattānaṃ visuddhiṃ pāpanatthāya. **Samatikkamāyāti** samatikkamanatthāya. **Atthaṅgamāyāti** atthaṃ gamanatthāya. **Ñāyassa adhigamāyāti** sahavipassanakassa maggassa adhigamanatthāya. **Nibbānassa sacchikiriyāyāti** apaccayanibbānassa paccakkhakarānatthāya. **Tadeva nāma cakkhū bhavissatīti** taññeva pasādacakkhu asambhinnaṃ bhavissati. **Te rūpāti** tadeva rūpārammaṇaṃ āpāthaṃ āgamissati. **Tañcāyatanaṃ no paṭisaṃvedissatīti** tañca rūpāyatanaṃ na jānissati. Sesesupi eseva nayo.

Udāyīti kāludāyitthero. **Saññīmeva nu khoti** sacittakoyeva nu kho. Makāro padasandhimattaṃ. **Kimsaññīti** katarasaññāya saññī hutvā. **Sabbaso rūpasaññānanti** idaṃ kasmā gaṇhi, kiṃ paṭhamajjhānādisamaṅgino rūpādiṭṭhapaṭisaṃvedanā hotīti? Na hoti, yāva pana kasiṇarūpaṃ ārammaṇaṃ hoti, tāva rūpaṃ samatikkantaṃ nāma na hoti. Asamatikkantattā paccayo bhavitum sakkhissati. Samatikkantattā pana taṃ natthi nāma hoti, natthitāya paccayo bhavitum na sakkotīti dassetuṃ idameva gaṇhi.

Jaṭilavāsikāti jaṭilanagaravāsini. **Na cābhinatoti**ādīsu rāgavasena na **abhinato**, dosavasena na **apanato**. Sasañkhārena sappayogena kilese niggaṇhitvā vāretvā ṭhito, kilesānaṃ pana chinnante uppannoti **na sasañkhāraniggayhavāritagato**. **Vimuttattā ṭhitoti** kilesehi vimuttattāyeva ṭhito. **Ṭhitattā santusitoti** ṭhitattāyeva santuṭṭho nāma jāto. **Santusitattā no paritassatīti** santuṭṭhattāyeva paritāsaṃ nāpajjati. **Ayaṃ, bhante ānanda, samādhi kiṃ phaloti** iminā ayaṃ therī tālaphalaññeva gahetvā “idaṃ phalaṃ kiṃ phalaṃ nāmā”ti pucchamānā viya arahattaphalasaṃvādhim gahetvā “ayaṃ, bhante ānanda, samādhi kiṃ phalo vutto bhagavatā”ti pucchati. **Aññāphalo vuttoti** aññā vuccati arahattam, arahattaphalasaṃvādhī nāmeso vutto bhagavatāti attho. **Evamsaññīpīti** imāya arahattaphalasaññāya saññīpi tadāyatanaṃ no paṭisaṃvedetīti evaṃ imasmiṃ sutte arahattaphalasaṃvādhī kathitoti.

7. Lokāyatikasuttavaṇṇanā

38. Sattame **lokāyatikāti** lokāyatavādakā. **Satatanti** sadā. **Samitanti** nirantaram. **Tiṭṭhatetanti** tiṭṭhatu etaṃ, mā etaṃ paṭṭhapetha, ko vo etena attho. **Dhammaṃ vo brāhmaṇā desessāmīti** ahaṃ vo catusaccadhammaṃ desessāmi.

Daḷhadhammoti daḷhadhanaṃ gahetvā ṭhito. **Dhanuggahoti** issāso. Daḷhadhanu nāma dvisahassathāmaṃ vuccati. Dvisahassathāmaṃ nāma yassa āropitassa jiyābaddho lohasīsādīnaṃ bhāro

daṇḍe gaḥetvā yāva kaṇḍappamāṇā ukkhittassa pathavito muccati. **Sikkhitoti** dasa dvādasa vassāni ācariyakule uggahitasippo. **Katahatthoti** eko sippameva uggaṇhāti, katahattho na hoti ayaṃ pana katahattho ciṇṇavasibhāvo. **Katūpāsanoti** rājakulādīsu dassitasippo. **Lahukena asanenāti** anto susiraṃ katvā tūlādīhi pūretvā katalakkhaparikkammaṃ sallahukakaṇḍena. Evaṃ katañhi ekausabhagāmī dve usabhānīpi gacchati...pe... aṭṭhusabhagāmī soḷasa usabhānīpi gacchati. **Appakasirenāti** niddukkheṇa. **Atipāteyyāti** atikkameyya. Idam vuttaṃ hoti – yathā so dhanuggaho taṃ vidatthacaturaṅgulaṃ chāyaṃ sīghameva atikkāmeti, evaṃ sakalacakkavāḷaṃ sīghaṃ sīghaṃ atikkamanasamatthena javena samannāgato. **Sandhāvanikāyāti** padasā dhāvanena. **Evamāhamsūti** evaṃ vadanti.

8. Devāsurasāṅgāmasuttavaṇṇanā

39. Aṭṭhame **samupabyūḷho ahoṣīti** paccupaṭṭhito ahoṣi. **Saṅgāmeyyāmāti** saṅgāmaṃ kareyyāma yujjheyyāma. **Apayimsuevāti** palāyimsueva. **Uttarenābhimukhāti** uttarāmukhā hutvā. **Abhiyante vāti** anubandhantiyeva. **Bhīruttānagatenāti** bhīruttānaṃ bhayanivāraṇaṃ paṭiṭṭhānaṃ gatena. **Akaraṇīyāti** yuddhena kiñci akattabbā. Kasmā pana nesam saṅgāmo hotīti? Asurā hi pubbe tāvatimsavāsino, te cittaṭṭhāliyaṃ pupphanakāle dibbapāricchattakapupphaṃ anussaranti. Tato uppannakodhā “gaṇhatha deve” ti sammukhasammukhaṭṭhāneneva sīneruṃ abhiruhanti, devāpi nikkhamanti. Tesam gopālakadārakānaṃ aññamaññaṃ daṇḍakehi paharaṇasadiṣaṃ yuddhaṃ hoti. Sakko devarājā heṭṭhā pañcasu ṭhānesu ārakkhaṃ ṭhapetvā upari devapuraṃ parivāretvā attasadiṣā vajirahatthā paṭimā ṭhapāpesi. Asurā heṭṭhā pañca ṭhānāni paṭibāhitvā abhiruḷhā indapaṭimāyo disvā nivattitvā asurapurameva gacchanti.

Dakkhiṇenābhimukhāti dakkhiṇāmukhā hutvā. **Apadaṃ vadhitvāti** nippadaṃ niravasesaṃ vadhitvā. **Adassanaṃ gatoti** māropi vaṭṭapādakaṃ katvā rūpāvacaracattatthajjhānaṃ samāpannassa cittaṃ jānāti, tadeva vipassanāpādakaṃ katvā samāpannassa cittaṃ jānāti. Arūpāvacarasamāpattiṃ pana vaṭṭapādā vā hotu vipassanāpādā vā, taṃ samāpannassa māro cittaṃ na jānāti. Tena vuttaṃ – “adassanaṃ gato pāpimato” ti.

9. Nāgasuttavaṇṇanā

40. Navame **āraññakassāti** araññavāsino. **Gocarapasutassāti** gocaraggahaṇatthāya gacchantassa. **Hatthikalabhāti** mahantā mahantā nāgā. **Hatthicchāpāti** taruṇapotakā. **Obhaggobhagganti** nāmetvā nāmetvā ṭhapitaṃ. **Ogāhaṃ otiṇṇassāti** ogāhitabbattā ogāhanti laddhanāmaṃ udakatitthaṃ otiṇṇassa. **Ogāhā uttiṇṇassāti** udakatitthato uttiṇṇassa. **Vūpakaṭṭhoti** vūpakaṭṭho hutvā. Idāni yasmā dasabalassa hatthināgena kiccaṃ natthi, sāsane pana taṃsarikkhakaṃ puggalaṃ dassetuṃ idamāhaṭaṃ, tasmā taṃ puggalaṃ dassento **evameva khotiādimāha**.

10. Tapussasuttavaṇṇanā

41. Dasame **mallesūti** mallaraṭṭhe. **Idheva tāva tvam, ānanda, hotīti** idha bhagavā “tapussagahapatino idha ṭhitena ānandena saddhiṃ kathāsallāpo bhavissati, tatonidānaṃ ahaṃ mahantaṃ dhammapariyāyaṃ desessāmī” ti ṇatvā āha. **Upasaṅkamīti** so kira bhuttaṭṭhāraṣo “dasabalassa upaṭṭhānaṃ gamissāmī” ti nikkhamanto dūratova theram disvā yenāyasmā ānando tenupasaṅkami. **Papāto viya khāyati, yadidaṃ nekkhamanti** yamidaṃ pabbajjāsāṅkhātaṃ nekkhammaṃ, taṃ amhākaṃ mahāpapāto viya ogāhitvā upaṭṭhāti. **Nekkhamme cittaṃ pakkhandatīti** pabbajjāya cittaṃ ārammaṇavasena pakkhandati, tadeva ārammaṇaṃ katvā **pasidati**, tadeva **paṭiṭṭhāti**, paccanīkadhammehi ca **vimuccati**. **‘Etaṃ santa’nti passatoti** etaṃ nekkhammaṃ santaṃ vigatadarathaparilāhanti evaṃ passantānaṃ bhikkhūnaṃ. **Bahunā janena visabhāgoti** tayidaṃ bahunā mahājanena saddhiṃ bhikkhūnaṃ visabhāgaṃ, asadisanti attho.

Kathāpābhatanti kathāmūlaṃ. **Tassa mayhaṃ, ānanda, nekkhamme cittaṃ na pakkhandatīti**

tassa evaṃ vitakkentassāpi mayhaṃ pabbajjāya cittaṃ na otarati. “**Etam santa**”nti passatoti “sādhu nekkhamma”nti parivittakavasesena “**etam nekkhammam santa**”nti passantassapi. **Anāsevito** na āsevito na phassito na sacchikato. **Adhigammāti** adhigantvā patvā sacchikatvā. **Tamāseveyyanti** taṃ ānisaṃsaṃ seveyyaṃ bhajeyyaṃ. **Yaṃ meti** yena kāraṇena mayhaṃ. **Adhigammāti** adhigantvā. **Svāssa me hoti ābādhoti** so mayhaṃ ābādhanatthena ābādho hoti. **Avitakke cittaṃ na pakkhandatī** avitakkavicāre dutiyajjhāne ārammaṇavasena cittaṃ na pakkhandati. **Vitakkesu**ti vitakkavicāresu. Sesam sabbattha uttānatthamevāti.

Mahāvaggo catuttho.

5. Sāmaññavaggo

1. Sambādhasuttavaṇṇanā

42. Pañcamassa paṭhame **udāyīti** kāludāyitthero. **Avidvāti** aññāsi. **Bhūrimedhasoti** mahāpañño. **Yo jhānamabujjhīti** yo jhānaṃ abujjhi. **Paṭilīnanisabhoti** ekībhāvavasena paṭilīno ceva uttamattthena ca nisabho. **Munīti** buddhamuni. **Pariyāyenāti** ekena kāraṇena. Kāmasambādhasa hi abhāvamatteneva paṭhamajjhānaṃ okāsādhigamo nāma, na sabbathā sabbam. **Tatrāpatthi sambādhoti** tasmimpi paṭhamajjhāne sambādho paṭipīḷanaṃ atthiyeva. Tatrāpitthītipi pāṭho. **Kiñca tattha sambādhoti** tasmimṃ pana jhāne kiṃ sambādho nāma. **Ayamettha sambādhoti** ayaṃ vitakkavicārānaṃ aniruddhabhāvo sambādho saṃpīḷā nāma. Iminā upāyena sabbavāresu attho veditabbo. **Nippariyāyenāti** na ekena kāraṇena, atha kho āsavakkhaya nāma sabbasambādhanāṃ pahīnatā sabbena sabbam okāsādhigamo nāmāti.

2. Kāyasakkhisuttavaṇṇanā

43. Dutīye **yathā yathā ca tadāyatananti** yena yena kāraṇena yena yenākārena taṃ paṭhamajjhānasaṅkhātaṃ āyatanam hoti. **Tathā tathā naṃ kāyena phusitvā viharatīti** tena tena kāraṇena tena tenākārena taṃ samāpattim sahaḷātanāmakāyena phusitvā viharatī, samāpajjatīti attho. **Kāyasakkhi vutto bhagavatā pariyāyenāti** yasmā tena nāmākāyena paṭhamajjhānaṃ sacchikataṃ, tasmā iminā pariyāyena kāyasakkhi vutto. **Nippariyāyenāti** yattakaṃ kāyena sacchikātabbam, sabbassa katattā ayaṃ nippariyāyena kāyasakkhi nāma.

3. Paññāvimuttasuttavaṇṇanā

44. Tatiye **paññāya ca naṃ pajānātīti** taṃ paṭhamajjhānavipassanāpaññāya jānāti. Idhāpi pariyāyanippariyāyā purimanayeneva veditabbā. Yathā ca idha, evaṃ ito paresupi.

4. Ubhatobhāgavimuttasuttavaṇṇanā

45. Catuttham ubhayena veditabbam. Ettha ca **ubhatobhāgavimuttoti** ubhatobhāgehi samathavipassanānaṃ paccanīkakilesehi vimutto. Pariyosāne pana samāpattiyā rūpakāyato, ariyamaggena nāmākāyato vimuttoyeva ubhatobhāgavimuttoti veditabbo.

5-10. Sandiṭṭhikadhammasuttādivaṇṇanā

46-51. Pañcamādīsū **sandiṭṭhikoti** sayam passitabbako. **Nibbānanti** kilesanibbānaṃ. **Parinibbānanti** tasseva vevacanaṃ. **Tadaṅganibbānanti** paṭhamajjhānādinā tena tena aṅgena nibbānaṃ. **Diṭṭhadhammanibbānanti** ismiṃyeva attabhāve nibbānaṃ. Sesam sabbattha uttānatthamevāti.

Sāmaññavaggo pañcama.

Paṭhamapaṇṇāsakaṃ niṭṭhitaṃ.

2. Dutiyapaṇṇāsakavaṇṇanā

52. Ito paresu **khemanti** nirupaddavaṃ. **Khemappattoti** khemabhāvaṃ patto. **Sikkhādubbalyānīti** sikkhāya dubbalabhāvakaraṇāni. Sesamaṃ sabbattha uttānatthamevāti.

Manorathapūraṇiyā aṅuttaranikāya-aṭṭhakathāya

Navakanipātassa saṃvaṇṇanā niṭṭhitā.

Namo tassa bhagavato arahato sammāsambuddhassa

Aṅuttaranikāye

Dasakanipāta-aṭṭhakathā

1. Paṭhamapaṇṇāsakaṃ

1. Ānisaṃsavaggo

1. Kimatthiyasuttavaṇṇanā

1. Dasakanipātassa paṭhame **kusalāni sīlānīti** anavajjasīlāni. Amaṅkubhāvassa avipparisāraṣṣa atthāya saṃvattantīti **avipparisāratthāni**. So nesamaṃ ānisaṃsoti **avipparisāranisaṃsāni**. **Yathābhūtañāṇadassanatthoti**ādisu **yathābhūtañāṇadassanaṃ** nāma taruṇavipassanā, **nibbidā** nāma balavavipassanā, **virāgo** nāma maggo, **vimutti** nāma arahattaphalaṃ, **ñāṇadassanaṃ** nāma paccavekkhaṇaṇāṇaṃ. **Aggāya parentīti** arahattatthāya gacchanti.

2. Cetanākaraṇīyasuttavaṇṇanā

2. Dutīye **na cetanāya karaṇīyanti** na cetetvā kappetvā pakappetvā kātabbaṃ. **Dhammatā esāti** dhammasabhāvo eso karaṇaniyamo ayaṃ. **Abhisandentīti** pavattenti. **Paripūrentīti** paripuṇṇaṃ karonti. **Apārā pāraṃ gamanāyāti** orimatīrabhūtā tebhūmakavaṭṭā nibbānapāraṃ gamanatthāya.

3-5. Upanisasuttattayavaṇṇanā

3-5. Tatiye **hatūpanisoti** hatakāraṇo. Catutthapañcomesu dvīhi therehi kathitabhāvova viseso.

6. Samādhisuttavaṇṇanā

6. Chaṭṭhe **neva pathaviyaṃ pathaviṣaṇṇī assāti** pathaviṃ ārammaṇaṃ katvā pathavīti evaṃ uppannāya saññāya saññī na bhavēyya. **Āpādisupi** eseva nayo. **Na idhaloketi** idhaloke uppajjanakacatukkapañcakajjhānasaññāya na saññī bhavēyya. **Na paraloketi** paraloke uppajjanakacatukkapañcakajjhānasaññāya na saññī bhavēyya. **Saññī ca pana assāti** atha ca panassa samāpatti savitakkasamāpattīyeva assāti vuccati. **Etamaṃ santamaṃ etamaṃ paṇītanti** santamaṃ santanti appetvā

kusaladhammānaṃ kārāpakaappamādo aggoti daṭṭhabbo. Nanu cesa lokiyova, kusaladhammā pana lokuttarāpi. Ayañca kāmāvacarova, kusaladhammā pana catubhūmakā. Kathamesa tesam aggoti? Paṭilābhakattena. Appamādena hi te paṭilābhanti, tasmā so tesam aggo. Teneva vuttaṃ – **sabbe te appamādamūlakāti**.

Jaṅgalānanti pathavitalacārīnaṃ. **Pāṇānanti** sapādakapāṇānaṃ. **Padajātānīti** padāni. **Samodhānaṃ gacchantīti** odhānaṃ pakkhepaṃ gacchanti. **Aggamakkhāyati** seṭṭhamakkhāyati. **Yadidaṃ mahantattenāti** mahantabhāvena aggamakkhāyati, na guṇaggenāti attho. **Vassikanti** sumanapupphaṃ. Idaṃ kira suttaṃ sutvā bhātiyamahārājā vīmaṃsitukāmatāya ekasmiṃ gabbhe catujātīgandhehi paribhaṇḍaṃ katvā sugandhapupphāni āharāpetvā ekassa samuggassa majjhe sumanapupphamuṭṭhiṃ ṭhapetvā sesāni tassa samantato muṭṭhiṃ katvā ṭhapetvā dvāraṃ pidhāya bahi nikkhanto. Athassa muhuttaṃ bahi vītināmetvā dvāraṃ vivaritvā pavisantassa sabbapaṭhamam sumanapupphagandho ghānaṃ pahari. So mahātalasmiṃyeva mahācetiyaḥhimukho nipajjitvā “vassikaṃ tesam aggantī kathentena sukathitaṃ sammāsambuddhenā”ti cetiyaṃ vandi. **Khuddarājānoti** khuddakarājāno. Kūṭarājānotipi pāṭho.

6. Āhuneyyasuttavaṇṇanā

16. Chaṭṭhe **gotrabhūti** sikhāpattavipassanābhūtena nibbānārammaṇena gotrabhuñāṇena samannāgato.

7. Paṭhamanāthasuttavaṇṇanā

17. Sattame **sanāthāti** sañātakā bahuñātivaggā hutvā viharatha. Nāthaṃ karontīti **nāthakaraṇā**, attano sanāthabhāvakarā paṭiṭṭhākarāti attho. **Kalyāṇamittoti**ādīsu sīlādiguṇasampannā kalyāṇā mittā assāti **kalyāṇamitto**. Tevassa ṭhānanisajjādīsu saha ayanato sahāyāti **kalyāṇasahāyo**. Cittena ceva kāyena ca kalyāṇamittesuyeva sampavaṅko oṇatoti **kalyāṇasampavaṅko**. **Suvaco hotīti** sukkena vattabbo hoti, sukkena anusāsitaḥbo. **Khamoti** gāḷhena pharusena kakkhaḷena vutto khamati na kuppati. **Padakkhiṇaggāhī anusāsaninti** yathā ekacco ovadiyamāno vāmato gaṇhāti, paṭippharati vā, assuṇanto vā gacchati, evaṃ akatvā “ovadatha, bhante, anusāsatha, tumhesu anovadantesu ko añño ovadissatī”ti padakkhiṇaṃ gaṇhāti.

Uccāvacānīti uccānīcāni. **Kimkaraṇīyānīti** “kim karomī”ti evaṃ vatvā kattabbakammāni. Tattha uccakammaṃ nāma cīvarassa karaṇaṃ rajanaṃ, cetiye sudhākammaṃ, uposathāgāracetiyaḥharabodhiḥgharesu kattabbakammanti evamādi. Avacakammaṃ nāma pādadhovanamakkaṇādikhuddakakammaṃ. **Tatrūpāyāyāti** tatrūpagamaniyāya. **Alaṃ kātunti** kātuṃ samattho hoti. **Alaṃ saṃvidhātunti** vicāretuṃ samattho hoti.

Dhamme assa kāmo sinehoti **dhammakāmo**, tepiṭakaṃ buddhavacanaṃ piyāyatīti attho. **Piyasamudāhāroti** parasmim kathente sakkaccaṃ suṇāti, sayañca paresaṃ desetukāmo hotīti attho. **Abhidhamme abhivinayeti** ettha dhammo abhidhammo, vinayo abhivinayoti catukkaṃ veditabbaṃ. Tattha **dhammoti** suttantapiṭakaṃ. **Abhidhammoti** satta pakaraṇāni. **Vinayoti** ubhatovibhaṅgo. **Abhivinayoti** khandhakaparivārā. Atha vā suttantapiṭakampi abhidhammapiṭakampi dhammo eva, maggaphalāni abhidhammo. Sakalavinayapiṭakaṃ vinayo, kilesavūpasamakaraṇaṃ abhivinayo. Iti sabbasmimpi ettha dhamme ca abhidhamme ca vinaye ca abhivinaye ca uḷārapāmojjo hotīti attho. **Kusalesu dhammesūti** kāraṇatthe bhumbaṃ, cātubhūmakakusaladhammakāraṇā tesam adhigamatthāya anikkhattadhuro hotīti attho.

8. Dutīyanāthasuttavaṇṇanā

18. Aṭṭhame **therānukampitassāti** therehi ovādānusāsanidānasamussāhitāya hitapharaṇāya

anukampitassa.

9. Paṭhamaariyāvāsasuttavaṇṇanā

19. Navame **ariyavāsā**ti ariyānaṃ āvāso, te āvasiṃsu āvasanti āvasissantīti ariyāvāsā. **Yadariyā**ti ye vāse ariyā.

10. Dutiyaariyāvāsasuttavaṇṇanā

20. Dasamaṃ yasmā kururaṭṭhavāsino bhikkhū gambhīrapaññākārakā yuttappayuttā, tasmā yathā tesam dīghanikāyādīsu mahānidānādīni kathitāni, evamidampi gambhīraṃ sukhumaṃ tilakkhaṇāhataṃ suttaṃ tattheva avoca. Tattha **pañcaṅgavippahīnoti** pañcahi aṅgehi vippayutto hutvā khīṇāsavo avasi vasati vasissati. Tasmā ayaṃ pañcaṅgavippahīnatā ariyāvāsoti vutto. Esa nayo sabbattha. **Evam kho, bhikkhave, bhikkhu chaḷaṅgasamannāgato hotīti** chaḷaṅgupekkhāya samannāgato hoti. Chaḷaṅgupekkhā dhammā nāma keti? Nāṇādayo. “Nāṇa”nti vutte kiriyato cattāri ṇāṇasampayuttacittāni labbhanti, “satatavihāro”ti vutte aṭṭha mahācittāni, “rajjanadussanaṃ natthī”ti vutte dasa cittāni labbhanti. Somanassaṃ āsevanavasena labbhati. **Satārakkhena cetasā**ti khīṇāsavassa hi tīsu dvāresu sabbakāle sati ārakkhakkiccam sādheti. Tenevassa carato ca tiṭṭhato ca suttassa ca jāgarassa ca satatam samitam ṇāṇadassanaṃ paccupaṭṭhitam hotīti vuccati.

Puthusamaṇabrāhmaṇānanti bahūnaṃ samaṇabrāhmaṇānaṃ. Ettha **samaṇā**ti pabbajjūpagatā, **brāhmaṇā**ti bhovādino. **Puthupaccekasaccānīti** bahūni pātekkasaccāni. “Idameva dassanaṃ saccam, idameva sacca”nti evaṃ pāṭiyekkam gahitāni bahūni saccānīti attho. **Nuṇṇānīti** nīhaṭāni. **Panuṇṇānīti** suṭṭhu nīhaṭāni. **Cattānīti** vissatṭhāni. **Vantānīti** vamitāni. **Muttānīti** chinnabandhanāni katāni. **Pahīnānīti** pajahitāni. **Paṭinissatṭhānīti** yathā na puna cittaṃ ārohanti, evaṃ paṭinissajjitāni. Sabbāneva tāni gahitaggahaṇassa vissatṭhabhāvavevacanāni.

Samavayasaṭṭhesanoti ettha **avayā**ti anūnā, **saṭṭhā**ti vissatṭhā. Sammā avayā saṭṭhā esanā assāti samavayasaṭṭhesano, suṭṭhuvissatṭhasabbaesanoti attho. **Rāgā cittaṃ vimuttanti**ādīhi maggassa kiccanipphatti kathitā. **Rāgo me pahīnoti**ādīhi paccavekkhaṇaphalaṃ kathitaṃ. Sesam sabbattha uttānatthamevāti.

Nāthavaggo dutiyo.

3. Mahāvaggo

1. Sīhanādasuttavaṇṇanā

21. Tatiyassa paṭhame **visamagateti** visamaṭṭhānesu gocaresu gate. **Saṅghātaṃ āpādesinti** ghātaṃ vadhaṃ pāpesiṃ. Tassa hi ussannatejatāya khuddakesu pānesu anukampā hoti. Tasmā ye paṭisattubhāvena saṅghātaṃ sakkhissanti, ye dubbalā palāyitukāmā bhavissanti, te palāyissantīti sīhanādaṃ naditvāva gocarāya pakkamati. **Tathāgatassetam adhivacananti** yadi hi sahanatāya hananatāya ca sīho, tathāgato hi sabbāni ca iṭṭhāniṭṭhāni sahati, sabbaparappavādino ca vādānaṃ nimmathanena hanati. **Idamassa hoti sīhanādasminti** ayamassa sīhanādo.

Tathāgatabalānīti aññehi asādhāraṇāni tathāgatasseva balāni. Yathā vā pubbabuddhānaṃ balāni puññasampattiyā āgatāni, tathā āgatabalānītipi attho. Tattha duvidhaṃ tathāgatassa balaṃ kāyabalaṃ ṇāṇabalaṃ. Tesu kāyabalaṃ hatthikulānusārena veditabbaṃ. Vuttañhetam porañehi –

“Kālāvakaṇca gaṅgeyyam, paṇḍaram tambapiṅgalam;

Gandhamaṅgalaheṃaṅca, uposathachaddantime dasā’’ti.

Imāni dasa hatthikulāni. Tattha **kālāvakanti** pakatihatthikulam daṭṭhabbam. Yaṃ dasannaṃ purisānaṃ kāyabalaṃ, taṃ ekassa kālāvakassa hatthino. Yaṃ dasannaṃ kālāvakānaṃ balaṃ, taṃ ekassa gaṅgeyyassa. Yaṃ dasannaṃ gaṅgeyyānaṃ, taṃ ekassa paṇḍarassa. Yaṃ dasannaṃ paṇḍarānaṃ, taṃ ekassa tambassa. Yaṃ dasannaṃ tambānaṃ, taṃ ekassa piṅgalassa. Yaṃ dasannaṃ piṅgalānaṃ, taṃ ekassa gandhahatthino. Yaṃ dasannaṃ gandhahatthīnaṃ, taṃ ekassa maṅgalassa. Yaṃ dasannaṃ maṅgalānaṃ, taṃ ekassa hemassa. Yaṃ dasannaṃ hemānaṃ, taṃ ekassa uposathassa. Yaṃ dasannaṃ uposathānaṃ, taṃ ekassa chaddantassa. Yaṃ dasannaṃ chaddantānaṃ, taṃ ekassa tathāgatassa. Nārāyanaṅghātabalantipi idameva vuccati. Tadetam pakatihatthigaṇanāya hatthīnaṃ koṭṭisahasānaṃ, purisagaṇanāya dasannaṃ purisakoṭṭisahasānaṃ balaṃ hoti. Idam tāva tathāgatassa **kāyabalaṃ**.

Ñāṇabalaṃ pana pāliyaṃ tāva āgatameva. Dasabalañānaṃ, majjhime āgataṃ catuvesārajañānaṃ, aṭṭhasu parisāsu akampanañānaṃ, catuyoniparicchedañānaṃ, pañcagatiparicchedañānaṃ, saṃyuttake (saṃ. ni. 2.33) āgatāni tesattati ñāṇāni sattasattati ñāṇānīti, evaṃ aññānīpi anekāni **ñāṇabalaṃ** nāma. Idhāpi ñāṇabalameva adhippetam. Ñāṇāñhi akampiyatṭhena upatthambhanaṭṭhena ca balanti vuttam.

Āsabham ṭhānanti seṭṭhatṭhānaṃ uttamatṭhānaṃ. Āsabhā vā pubbabuddhā, tesam ṭhānanti attho. Apica gavasatajeṭṭhako usabho, gavasahassajeṭṭhako vasabho. Vajasatajeṭṭhako vā usabho, vajasahassajeṭṭhako vasabho. Sabbagavaseṭṭho sabbaparissayasaho seto pāsādiko mahābhāravaho asanisatasaddehipi asampakampiyo nisabho, so idha usabhoti adhippeto. Idampi hi tassa pariyaṃvacanaṃ. Usabhassa idanti **āsabham**. **Ṭhānanti** catūhi pādehi pathaviṃ uppīletvā acalaṭṭhānaṃ. Idam pana āsabham viyāti āsabham. Yatheva hi nisabhasaṅkhāto usabho usabhabalena samannāgato catūhi pādehi pathaviṃ uppīletvā acalaṭṭhānena tiṭṭhati, evaṃ tathāgatopi dasahi tathāgatabalehi samannāgato catūhi vesārajjapādehi aṭṭhaparisaṭṭhaviṃ uppīletvā sadevake loke kenaci paccatthikena paccāmittena akampiyo acalaṭṭhānena tiṭṭhati. Evaṃ tiṭṭhamāno ca tam āsabham ṭhānaṃ paṭijānāti upagacchati na paccakkhāti attani āropeti. Tena vuttam – ‘‘āsabham ṭhānaṃ paṭijānāti’’ti.

Parisāsūti aṭṭhasu parisāsu. **Sīhanādam nadatīti** seṭṭhanādam nadati, abhītanādam nadati, sīhanādasadisam vā nādam nadati. Tatrāyaṃ upamā – yathā sīho sīhabalena samannāgato sabbattha visārado vigatalomahaṃso sīhanādam nadati, evaṃ tathāgatasīhopi tathāgatabalehi samannāgato aṭṭhasu parisāsu visārado vigatalomahaṃso ‘‘iti sakkāyo’’tiadinā nayena nānāvīdhadesanāvīlāsasampannaṃ sīhanādam nadati. Tena vuttam – ‘‘parisāsu sīhanādam nadatī’’ti.

Brahmacakkaṃ pavattetīti ettha **brahmanti** seṭṭham uttamaṃ viṣiṭṭham. **Cakkanti** dhammacakkaṃ. Tam panetaṃ duvidham hoti paṭivedhañānaṅceva desanāñānaṅca. Tattha paññāpabhāvitam attano ariyaphalāvahaṃ paṭivedhañānaṃ, karuṇāpabhāvitam sāvakanānaṃ ariyaphalāvahaṃ desanāñānaṃ. Tattha paṭivedhañānaṃ uppajjamānaṃ uppannanti duvidham. Tañhi abhinikkhāmanato yāva arahattamaggā uppajjamānaṃ, phalakkhaṇe uppannaṃ nāma. Tusitabhavanato vā yāva mahābodhipallāṅke arahattamaggā uppajjamānaṃ, phalakkhaṇe uppannaṃ nāma. Dīpaṅkarato vā paṭṭhāya yāva arahattamaggā uppajjamānaṃ, phalakkhaṇe uppannaṃ nāma. Desanāñānaṃpi pavattamānaṃ pavattanti duvidham. Tañhi yāva aññāsikoṇḍaññassa sotāpattimaggā pavattamānaṃ, phalakkhaṇe pavattamānaṃ. Tesu paṭivedhañānaṃ lokuttaram, desanāñānaṃ lokiyaṃ. Ubhayampi panetaṃ aññehi asādhāraṇaṃ, buddhānaṃyeva orasañānaṃ.

Idāni yehi dasahi balehi samannāgato tathāgato āsabham ṭhānaṃ paṭijānāti, tāni vitthārato dassetuṃ **katamāni dasa? Idha, bhikkhave, tathāgato ṭhānaṅca ṭhānatoti**adinā. Tattha **ṭhānaṅca ṭhānatoti** kāraṇaṅca kāraṇato. Kāraṇaṅhi yasmā tattha phalaṃ tiṭṭhati, tadāyattavuttitāya uppajjati ceva pavattati ca, tasmā ṭhānanti vuccati. Tam bhagavā ‘‘ye ye dhammā yesam yesam dhammānaṃ hetū paccayā uppādāya, tam tam ṭhānaṃ. Ye ye dhammā yesam yesam dhammānaṃ na hetū na paccayā uppādāya, tam tam aṭṭhāna’’nti pajānanto ṭhānaṅca ṭhānato aṭṭhānaṅca aṭṭhānato yathābhūtam pajānāti.

Abhidhamme panetaṃ ‘‘tatha katamaṃ tathāgatassa ṭhānañca ṭhānato aṭṭhānañca aṭṭhānato yathābhūtaṃ ñāṇa’’ntiādinā (vibha. 809) nayena vitthāritameva. **Yampīti** yena ñāṇena. **Idampi, bhikkhave, tathāgatassāti** idampi ṭhānāṭṭhānañāṇaṃ tathāgatassa tathāgatabalaṃ nāma hotīti attho. Evaṃ sabbapadesu yojanā veditabbā.

Kammasamādānānanti samādiyitvā katānaṃ kusalākusalakammānaṃ, kammameva vā kammasamādānaṃ. **Ṭhānaso hetusoti** paccayato ceva hetuto ca. Tattha gatiupadhikālapayogā vipākassa ṭhānaṃ, kammaṃ hetu. Imassa pana ñāṇassa vitthārakathā ‘‘atthekaccāni pāpakāni kammasamādānāni gatisampattiṭṭhāni na vipaccanti’’tiādinā (vibha. 810) nayena abhidhamme āgatāyeva.

Sabbatthagāmininti sabbagatigāminiñca agatigāminiñca. **Paṭipadanti** maggaṃ. **Yathābhūtaṃ pajānātīti** bahūsupi manussesu ekameva pāṇaṃ ghātentesu ‘‘imassa cetanā nirayagāminī bhavissati, imassa tiracchānayanigāminī’’ti iminā nayena ekavatthusmimpi kusalākusalacetanāsankhātānaṃ paṭipattīnaṃ aviparītato sabhāvaṃ jānāti. Imassapi ca ñāṇassa vitthārakathā ‘‘tatha katamaṃ tathāgatassa sabbatthagāminim paṭipadaṃ yathābhūtaṃ ñāṇaṃ? Idha tathāgato ayaṃ maggo ayaṃ paṭipadā nirayagāminīti pajānātī’’tiādinā (vibha. 811) nayena abhidhamme āgatāyeva.

Anekadhātunti cakkhudhātuādīhi kāmādhātuādīhi vā dhātūhi bahudhātuṃ. **Nānādhātunti** tāsamyeva dhātūnaṃ vilakkhaṇatāya nānappakāradhātuṃ. **Lokanti** khandhāyatanadhātulokaṃ. **Yathābhūtaṃ pajānātīti** tāsāṃ dhātūnaṃ aviparītato sabhāvaṃ paṭivijjhati. Idampi ñāṇaṃ ‘‘tatha katamaṃ tathāgatassa anekadhātunānādhātulokaṃ yathābhūtaṃ ñāṇaṃ? Idha tathāgato khandhanānattaṃ pajānātī’’tiādinā nayena abhidhamme vitthāritameva.

Nānādhimuttikatanti hīnādīhi adhimuttīhi nānādhimuttikabhāvaṃ. Idampi ñāṇaṃ ‘‘tatha katamaṃ tathāgatassa sattānaṃ nānādhimuttikataṃ yathābhūtaṃ ñāṇaṃ? Idha tathāgato pajānāti santi sattā hīnādhimuttikā’’tiādinā nayena abhidhamme vitthāritameva.

Parasattānanti padhānasattānaṃ. **Parapuggalānanti** tato aññesaṃ hīnasattānaṃ. Ekattameva vā etaṃ padadvayaṃ, veneyyavasena dvidhā vuttaṃ. **Indriyaparopariyattanti** saddhādīnaṃ indriyānaṃ parabhāvañca aparabhāvañca, vuddhiñca hāniñcāti attho. Imassāpi ñāṇassa vitthārakathā ‘‘tatha katamaṃ tathāgatassa parasattānaṃ parapuggalānaṃ indriyaparopariyattaṃ yathābhūtaṃ ñāṇaṃ? Idha tathāgato sattānaṃ āsayāṃ pajānātī’’ti (vibha. 814) ādinā nayena abhidhamme āgatāyeva.

Jhānavimokkhasamādhisamāpattīnanti paṭhamādīnaṃ catunnaṃ jhānānaṃ, ‘‘rūpī rūpāni passatī’’tiādināṃ aṭṭhannaṃ vimokkhānaṃ, savitakkasavicārādīnaṃ tiṇṇaṃ samādhīnaṃ, paṭhamajjhānasamāpattīādīnañca navannaṃ anupubbasaṃpattīnaṃ. **Samkilesanti** hānabhāgiyadhammaṃ. **Vodānanti** visesabhāgiyadhammaṃ. **Vuṭṭhānanti** ‘‘vodānampi vuṭṭhānaṃ, tamhā tamhā samādhimhā vuṭṭhānampi vuṭṭhāna’’nti (vibha. 828) evaṃ vuttaṃ paguṇajjhānañceva bhavaṅgaphalasaṃpattīyo ca. Heṭṭhimaṃ heṭṭhimañhi paguṇajjhānaṃ uparimassa uparimassa padaṭṭhānaṃ hoti, tasmā ‘‘vodānampi vuṭṭhāna’’nti vuttaṃ. Bhavaṅgena pana sabbajjhānehi vuṭṭhānaṃ hoti, phalasaṃpattīyā nirodhasamāpattīto vuṭṭhānaṃ hoti. Taṃ sandhāya ca ‘‘tamhā tamhā samādhimhā vuṭṭhānampi vuṭṭhāna’’nti vuttaṃ. Idampi ñāṇaṃ ‘‘tatha katamaṃ tathāgatassa jhānavimokkhasamādhisamāpattīnaṃ samkilesaṃ vodānaṃ vuṭṭhānaṃ yathābhūtaṃ ñāṇaṃ? **Jhāyīti** cattāro jhāyī, atthekacco jhāyī sampattīmyeva samānaṃ vipattīti paccetī’’tiādinā (vibha. 828) nayena abhidhamme vitthāritameva. Sabbaññānaṃ vitthārakathāya vinicchayo sammohavinodaniyā vibhaṅgaṭṭhakathāya vutto, pubbenivāsānussatidibbacakkuññakathā visuddhimagge vitthāritā, āsavakkhayakathā heṭṭhā vuttāyevāti.

Tattha paravādīkathā hoti ‘‘dasabalañāṇaṃ nāma pāṭiyekkaṃ ñāṇaṃ natthi, sabbaññūtaññāṇassevāyaṃ pabhedo’’ti. Taṃ na tathā daṭṭhabbaṃ. Aññaṃ hi dasabalañāṇaṃ, aññaṃ sabbaññūtaññāṇaṃ. Dasabalañāṇaṃhi sakasakakiccomeva jānāti, sabbaññūtaññāṇaṃ tampi tato

avasesampi jānāti. Dasabalaññesu hi paṭhamam kāraṇākāraṇameva jānāti, dutiyam kammavipākantarameva, tatiyam kammaparicchedameva, catuttham dhātunānattakāraṇameva, pañcamam sattānam ajjhāsayaḍhimuttimeva, chaṭṭham indriyānam tikkhamudubhāvameva, sattamam jhānādīhi saddhim tesam saṃkilesādimeva, aṭṭhamam pubbenivutthakkhandhasantatimeva, navamam sattānam cutipaṭisandhimeva, dasamam saccaparicchedameva. Sabbaññutaññānam pana etehi jānitabbañca tato uttariñca pajānāti, etesam pana kiccaṃ na sabbam karoti. Tañhi jhānam hutvā appetuṃ na sakkoti, iddhi hutvā vikubbituṃ na sakkoti, maggo hutvā kilese khetuṃ na sakkoti.

Apica paravādī evaṃ pucchitabbo “dasabalaññānam nāmetam savitakkasavicāram avitakkavicāramattam avitakkaavicāram, kāmāvacaram rūpāvacaram arūpāvacaram, lokiyam lokuttara”nti. Jānanto “paṭipāṭiyā satta ñāṇāni savitakkasavicārāni”ti vakkhati, “tato parāni dve avitakkaavicārāni”ti vakkhati. “Āsavakkhayaññānam siyā savitakkasavicāram siyā avitakkavicāramattam, siyā avitakkaavicāra”nti vakkhati. Tathā “paṭipāṭiyā satta kāmāvacārāni, tato dve rūpāvacārāni, avasāne ekaṃ lokuttara”nti vakkhati. “Sabbaññutaññānam pana savitakkasavicārameva lokiyamevā”ti vakkhati.

Evamettha anupadavaññanam ñatvā idāni yasmā tathāgato paṭhamameva thānāṭṭhānaññena veneyyasattānam āsavakkhayaḍhigamassa ceva anadhigamassa ca thānāṭṭhānabhūtam kilesāvaraṇābhāvam passati lokiyasammādiṭṭhiṭṭhānādidassanato niyatamicchādiṭṭhiṭṭhānābhāvadassanato ca. Atha nesam kammavipākaññena vipākāvaraṇābhāvam passati tihetukappaṭisandhidassanato, sabbatthagāminipaṭipadāññena kammāvaraṇābhāvam passati ānantariyakammābhāvadassanato. Evamanāvaraṇānam anekadhātunānādhātuññena anukūladhammadesanattham cariyāvisesam passati dhātuvemattadassanato. Atha nesam nānādhimuttikataññena adhimuttiṃ passati payogaṃ anādiyitvāpi adhimuttivasena dhammadesanattham. Athevaṃ diṭṭhādhimuttiṃ yathāsatti yathābalaṃ dhammaṃ desetum indriyaparopariyattiññena indriyaparopariyattam passati saddhādīnam tikkhamudubhāvadassanato. Evaṃ pariññātindriyaparopariyattā pana te sace dūre honti, atha jhānādīññena jhānādīsu vasībhūtattā iddhivisesena te khippam upagacchati. Upagantvā ca nesam pubbenivāsānussatiññena pubbajātibhavam, dibbacakkhānubhāvato pattabbena cetopariyaññena sampati cittavisesam passanto āsavakkhayaññānubhāvena āsavakkhayaḍgāminiyā paṭipadāya vigatasammohattā āsavakkhaya dhammaṃ deseti. Tasmā iminānukkamena imāni balāni vuttānīti veditabbāni.

2. Adhivuttipadasuttavaññanā

22. Dutīye **ye te dhammāti** ye te dasabalaññānam sabbaññutaññānadhammā. **Adhivuttipadānanti** adhivacanapadānam, khandhāyatanadhātudhammānanti attho. Adhivuttiyoti hi adhivacanāni vuccanti, tesam ye padabhūtā desanāya padaṭṭhānattā. Atītā buddhāpi hi ete dhamme kathayimṣu, anāgatāpi eteva kathayissanti. Tasmā khandhādayo adhivuttipadāni nāma. Tesam adhivuttipadānam. Atha vā bhūtamattam abhibhavitvā yathāsabhāvato aggahetvā vattanato adhivuttiyoti diṭṭhiyo vuccanti, adhivuttīnam padāni adhivuttipadāni, diṭṭhidīpakāni vacanānīti attho. Tesam adhivuttipadānam diṭṭhivohārānam. **Abhiññā sacchikiriyāyāti** jānitvā paccakkhakarānattāya. **Visāradoti** ñāṇasomanassappatto. **Tatthāti** tesu dhammesu **tesam tesam tathā tathā dhammaṃ desetunti** tesam tesam diṭṭhigatikānam vā itaresam vā āsayam ñatvā tathā tathā dhammaṃ desetum. **Hīnam vā hīnanti ñassatīti** hīnam vā dhammaṃ “hīno dhammo”ti jānissati. **Nāteyyanti** ñātabbam. **Daṭṭheyyanti** daṭṭhabbam. **Sacchikareyyanti** sacchikātabbam. **Tattha tattha yathābhūtaññanti** tesu tesu dhammesu yathāsabhāvaññānam. Iminā sabbaññutaññānam dasseti. Evaṃ sabbaññutaññānam dassetvā puna dasabalaññānam dassento **dasayimānīti**ādimāha. Dasabalaññāmpi hi tattha tattha yathābhūtaññānamevāti.

3. Kāyasuttavaññanā

23. Tatiye **āpanno hoti kañcīdeva desanti** kañci āpattikoṭṭhāsam āpanno hoti. **Anuviccāti**

anupavisitvā pariyogāhetvā. **Kāyaduccaritanti** tividham kāyaduccaritaṃ. **Vacīduccaritanti** catubbidham vacīduccaritaṃ. **Pāpikā issāti** lāmikā usūyā. **Paññāya disvāti** sahavipassanāya maggapaññāya passitvā passitvā pahātabbā. **Ijjhatīti** samijjhati. **Upavāsassāti** nissāya upasāṅkamitvā vasantassa. **Abhibhuyyāti** ajjhottharivā madditvā. **Iriyatīti** vattati. Imasmiṃ sutte sahavipassanāya maggo kathito.

4. Mahācundasuttavaṇṇanā

24. Catutthe **jānāmimaṃ dhammanti** iminā ñāṇavādassa vadanākāro vutto. **Bhāvītakāyomhīti**ādīhi bhāvanāvādassa. Tatiyavāre dvepi vādā ekato vuttā, tayopi cete arahattameva paṭijānanti. **Aḍḍhavādaṃ vadeyyāti** aḍḍhohamasmīti vādaṃ vadeyya. **Upanihātunti** nīharitvā dātuṃ.

5. Kasīnasuttavaṇṇanā

25. Pañcame sakalaṭṭhena kasīnāni, tadārammaṇānaṃ dhammānaṃ khettaṭṭhena adhiṭṭhānaṭṭhena vā āyatanānīti **kasīnāyatanāni**. **Uddhanti** upari gaganatalābhimukhaṃ. **Adhoti** heṭṭhā bhūmitalābhimukhaṃ. **Tiriyanti** khettaṃḍalaṃ viya samantā paricchinditvā. Ekacco hi uddhameva kasīnaṃ vaḍḍheti, ekacco adho, ekacco samantato. Tena tena vā kāraṇena evaṃ pasāreti ālokamiva rūpadassanakāmo. Tena vuttaṃ – “pathavīkasīnameko sañjānāti uddhaṃ adho tiriya”nti. **Advayanti** idaṃ pana ekassa aññabhāvānupagamanatthaṃ vuttaṃ. Yathā hi udakaṃ pavīṭṭhassa sabbadisāsu udakameva hoti na aññaṃ, evameva pathavīkasīnaṃ pathavīkasīnameva hoti. Natthi tassa aññakasīnasambhedoti. Eseva nayo sabbattha. **Appamāṇanti** idaṃ tassa tassa pharaṇaappamāṇavasena vuttaṃ. Tañhi cetasā pharanto sakalameva pharati, “ayamassa ādi, idaṃ majjha”nti pamāṇaṃ na gaṇhāti. **Viññānakasīnanti** cettha kasīnugghāṭimākāse pavattaviññānaṃ. Tattha kasīnavasena kasīnugghāṭimākāse, kasīnugghāṭimākāsavasena tattha pavattaviññāṇe uddhaṃadhotiriyatā veditabbā. Ayamettha saṅkhepo, kammaṭṭhānabhāvanānāyena panetāni pathavīkasīnādīni vitthārato visuddhimagge (visuddhi. 1.51 ādayo) vuttāneva.

6. Kālīsuttavaṇṇanā

26. Chaṭṭhe **kumārīpañhesūti** kumārīnaṃ māradhītānaṃ pucchāsu. **Atthassa pattim hadayassa santinti** dvīhipi padehi arahattameva kathitaṃ. **Senanti** rāgādīkilesasenaṃ. **Piyasātarūpanti** piyajātikesu ca sātājātikesu ca vatthūsu uppajjanato evaṃladdhanāmaṃ. **Ekohaṃ jhāyaṃ sukhamanubodhinti** evaṃ kilesasenaṃ jinitvā ahaṃ ekakova jhāyanto sukhaṃ anubujjhiṃ sacchiakāsiṃ. **Sakkhinti** sakkhibhāvappattaṃ dhammasakkhiṃ. **Na sampajjati kenaci meti** mayhaṃ kenaci saddhiṃ mittadhammo nāma natthi. **Pathavīkasīnasamāpattiparamā kho, bhagini, eke samaṇabrāhmaṇā atthoti abhinibbattesunti** pathavīkasīnasamāpattiparamo uttamo atthoti gahetvā abhinibbattesuṃ. **Yāvatā kho, bhagini, pathavīkasīnasamāpattiparamatāti** yattakā pathavīkasīnasamāpattiyā uttamakoṭi. **Tadabhiññāsi bhagavāti** taṃ bhagavā abhiññāpaññāya abhiññāsi. **Assādamaddasāti** samudayasaccaṃ addasa. **Ādīnavamaddasāti** dukkhasaccaṃ addasa. **Nissaraṇamaddasāti** nirodhasaccaṃ addasa. **Maggāmaggañāḍassanamaddasāti** maggasaccaṃ addasa. **Atthassa pattīti** etesaṃ catunnaṃ saccānaṃ dīṭṭhattā arahattasaṅkhātassa atthassa patti, sabbadarathapariḷāhavūpasantatāya **hadayassa santīti**.

7. Paṭhamamahāpañhasuttavaṇṇanā

27. Sattame **abhijānāthāti** abhijānitvā paccakkhaṃ katvā viharatha. **Abhiññāyāti** abhijānitvā. **Idhāti** imāya. **Dhammadesanāya vā dhammadesananti** yadidaṃ samaṇassa gotamassa dhammadesanāya saddhiṃ amhākaṃ dhammadesanaṃ, amhākaṃ vā dhammadesanāya saddhiṃ samaṇassa gotamassa dhammadesanaṃ ārabha nānākaraṇaṃ vuccetha, taṃ kiṃ nāmāti vadanti. Dutiyapadepi eseva nayo. Iti te majjhe bhinnasuvannaṃ viya sāsanaena saddhiṃ attano laddhiṃ

vacanamattena samadhuraṃ ṭhapayimsu. **Neva abhinandiṃsūti** “evameta”nti na sampañcchimsu. **Nappaṭikkosimsūti** “na idaṃ eva”nti nappaṭisedhesuṃ. Kasmā? Te kira “titthiyā nāma andhasadisā jānitvā vā ajānitvā vā kattheyyu”nti nābhinandimsu.

Na sampāyissantīti sampādetvā kathetuṃ na sakkhissanti. **Uttari ca vighātanti** asampādanato uttarimpi dukkhaṃ āpajjissanti. Sampādetvā kathetuṃ asakkontānañhi dukkhaṃ uppajjati. **Yathā taṃ, bhikkhave, avisayasminti** ettha ca tanti nipātamattaṃ. **Yathāti** kāraṇavacanaṃ, yasmā avisaye pañhaṃ pucchitā hontīti attho. **Ito vā pana sutvāti** ito vā pana mama sāsanato sutvā. Itoti tathāgatatopi tathāgatasāvakatopi. **Ārādheyāti** paritoseyya, aññathā ārādhanā nāma natthīti dasseti.

Ekadhammeti ekasmiṃ dhamme. Iminā uddeso dassito. Parato **katamasmim ekadhammeti** iminā pañho dassito. **Sabbe sattā āhāraṭṭhitikāti** idaṃ panettha veyyākaraṇaṃ. Sesesupī eseva nayo. **Sammā nibbindamānoti**ādīsu pana sammā hetunā nayena nibbidānupassanāya nibbindanto ukkaṅṭhanto, virāgānupassanāya virajjanto, paṭisankhānupassanāya mucanassa upāyaṃ katvā vimuccamāno, adhimokkhavasena vā vimuccamāno sannitṭhānaṃ kurumānoti attho. Udayabbayehi paricchinditvā pubbantāparantadassanena **sammā pariyaṭṭadassāvī. Sammadatthaṃ abhisameccāti** sammā sabhāgatthaṃ nāṇena abhisamāgantvā. **Dukkassantakaro hotīti** sakalavaṭṭadukkassa pariyaṭṭaṃ parivaṭṭamaṃ karo hoti.

Sabbe sattāti kāmabhavādīsu ekavokārabhavādīsu ca sabbabhavesu sabbe sattā. **Āhāraṭṭhitikāti** āhāro ṭṭhiti etesanti āhāraṭṭhitikā. Iti sabbasattānampi ṭṭhitihetu āhāro nāma eko dhammo, tasmim ekadhamme. Nanu ca evaṃ sante yaṃ vuttaṃ – “asaññasattā devā ahetukā anāhārā aphaṣṣakā”tiādi (vibha. 1017), taṃ virujjhatīti. Na virujjhati. Tesañhi jhānaṃ āhāro hoti. Evaṃ santepi “cattārome, bhikkhave, āhārā”ti (saṃ. ni. 2.11) idaṃ virujjhatīti. Idampi na virujjhati. Etasmiñhi sutte nipariyāyena āhāralakkaṇā dhammā āhārāti vuttā, idha pana pariyaṭṭena paccayo āhāroti vutto. Sabbadhammānañhi paccayo laddhuṃ vaṭṭati. So ca yaṃ yaṃ phalaṃ janeti, taṃ taṃ āharati nāma. Tasmā āhāroti vuccati. Tenevāha – “avijjampāhaṃ, bhikkhave, sāhāraṃ vadāmi, no anāhāraṃ. Ko ca, bhikkhave, avijjāya āhāro? Pañca nīvaraṇātissa vacanīya”nti (a. ni. 10.61). Ayaṃ idha adhippeto. Etasmiñhi paccayāhāre gahite pariyaṭṭāhāropi nipariyaṭṭāhāropi sabbo gahitova hoti.

Tattha asaññībhava paccayāhāro labbhati. Anuppanne hi buddhe titthāyatane pabbajitā vāyokasiṇe parikkammaṃ katvā catutthajjhānaṃ nibbattetvā tato vuṭṭhāya “dhi cittaṃ, dhi vatetaṃ cittaṃ, cittassa nāma abhāvoyeva sādhu. Cittañhi nissāya vadhabandhādipaccayaṃ dukkhaṃ uppajjati. Citte asati nattheta”nti khantiṃ ruciṃ uppādetvā aparihīnājjhānā kālaṃ katvā asaññībhava nibbattanti. Yo yassa iriyāpatho manussaloke pañihito ahoṣi, so tena iriyāpathena nibbattitvā cittarūpasadiso hutvā pañca kappasatāni tiṭṭhati. Ettakaṃ addhānaṃ sayito viya hoti. Evarūpānampi sattānaṃ paccayāhāro labbhati. Te hi yaṃ jhānaṃ bhāvetvā nibbattā, tadeva nesam paccayo hoti. Yathā jiyāvegena khittasaro yāva jiyāvego atthi, tāva gacchati. Evaṃ yāva jhānapaccayo atthi, tāva tiṭṭhanti. Tasmim niṭṭhite khīṇavego viya saro patanti. Cavanakāle ca tesam so rūpakāyo antaradhāyati, kāmāvacarasaññā uppajjati, tena saññuppādena te devā tamhā kāyā cutāti paññāyanti.

Ye pana te nerayikā neva vuṭṭhānaphalūpajīvī, na puññaphalūpajīvīti vuttā, tesam ko āhāroti? Tesam kammameva āhāro. Kiṃ pañca āhārā atthīti? Pañca, na pañcāti idaṃ na vattabbaṃ, nanu “paccayo āhāro”ti vuttametaṃ. Tasmā yena kammena niraye nibbattanti, tadeva tesam ṭṭhitipaccayattā āhāro hoti. Yaṃ sandhāya idaṃ vuttaṃ – “na ca tāva kālaṃ karoti, yāva na taṃ pāpakammaṃ byantī hotī”ti (ma. ni. 3.250, 268; a. ni. 3.36).

Kabalīkārāhāraṃ ārabbhāpi cettha vivādo na kātabbo. Mukhe uppajjanakheḷopi hi tesam āhārakiccaṃ sādheti. Kheḷo hi niraye dukkhavedaniyo hutvā paccayo hoti, sagge sukhavedaniyo. Iti kāmabhava nipariyāyena cattāro āhārā, rūpārūpabhavesu ṭhapetvā asaññe sesānaṃ tayo, asaññānañceva avasesānañca paccayāhāroti iminā ākārena sabbe sattā āhāraṭṭhitikāti veditabbā. Tattha cattāro āhāro yo

vā pana koci paccayāhāro dukkhasaccaṃ, āhārasamuṭṭhāpikā purimataṅhā samudayasaccaṃ, ubhinnaṃ appavatti nirodhasaccaṃ, nirodhappajānanā paññā maggasaccanti evaṃ catusaccavasena sabbavāresu yojanā kātābbā.

8. Dutiyamahāpañhasuttavaṇṇanā

28. Aṭṭhame **kajaṅgalāyanti** evaṃnāmake nagare. **Kajaṅgalāti** kajaṅgalāvāsino. **Mahāpañhesūti** mahantaatthapariggāhakesu pañhesu. **Yathā mettha khāyatīti** yathā me ettha upaṭṭhāti. **Sammā subhāvitacittoti** hetunā nayena suṭṭhu bhāvitacitto. **Eso ceva tassa atthoti** kiñcāpi bhagavatā “cattāro dhammā” tiādayo pañhā “cattāro āhārā” tiādinā nayena vissajjitā, yasmā pana catūsu āhāresu pariññātesu cattāro satipaṭṭhānā bhāvitā honti, tesu ca bhāvitesu cattāro āhārā pariññātāva honti. Tasmā desanāvīlāsena byañjanamevettha nānaṃ, attho pana ekoyeva. Indriyādīsupi eseva nayo. Tena vuttaṃ – “eso ceva tassa attho” ti. Atthato hi ubhayampetaṃ majjhe bhinnasuvaṇṇamiva hoti.

9. Paṭhamakosalasuttavaṇṇanā

29. Navame **yāvatāti** yattakā. **Kāsikosalāti** kāsikosalajanapadā. **Attheva aññathattanti** ṭhitassa aññathattaṃ atthiyeva. **Atthi vipariñāmoti** maraṇampi atthiyeva. **Tasmimpi nibbindatīti** tasmimpi sampattijāte ukkaṅṭhati. **Agge virajjatīti** sampattiyā agge kosalarājabhāve virajjati. **Pageva hīnasminti** paṭhamataraṃyeva hīne ittaramanussānaṃ pañca kāmagaṇajāte.

Manomayāti jhānāmanena nibbattā. **Bārāṇaseyyakanti** bārāṇasiyaṃ uppannaṃ. Tattha kira kappāsopi mudu, suttakantikāyopi tantavāyāpi chekā, udakampi suci siniddhaṃ. **Ubhatobhāgavimaṭṭhanti** dvīsipi passesu maṭṭhaṃ mudu siniddhaṃ khāyati. Catasso paṭipadā lokiyalokuttaramissikā kathitā. Saññāsu paṭhamā kāmāvacarasaññā, dutiyā rūpāvacarasaññā, tatiyā lokuttarasaññā, catutthā ākiñcaññāyatanaññā. Yasmā pana sā saññā aggāti āgatā, tato paraṃ saññāpaññanti nāma natthi, tasmā agganti vuttā.

Bāhirakānanti sāsanato bahiddhā pavattānaṃ. **No cassaṃ no ca me siyāti** sace ahaṃ atīte na bhavissaṃ, etarahipi me ayaṃ attabhāvo na siyā. **Na bhavissāmi na me bhavissatīti** sacepi anāgate na bhavissāmi, na ca me kiñci palibodhajātaṃ bhavissati. **Agge virajjatīti** ucchedadiṭṭhiyaṃ virajjati. Uchedadiṭṭhi hi idha nibbānassa santatāya agganti jātā.

Paramatthavisuddhinti uttamatthavisuddhiṃ. Nevasaññānāsaññāyatanaśamāpattiyā etaṃ adhivacanaṃ. Ākiñcaññāyatanañhi vipassanāpadaṭṭhānattā aggaṃ nāma jātaṃ, nevasaññānāsaññāyatanaṃ dīghāyukattā. **Paramadiṭṭhadhammanibbānanti** imasmiññeva attabhāve paramanibbānaṃ. **Anupādā vimokkhoti** catūhi upādānehi aggahetvā cittassa vimokkho. Arahattassetāṃ nāmaṃ. **Pariññanti** samatikkamaṃ. Tattha bhagavā paṭhamajjhānena kāmānaṃ pariññaṃ paññāpeti, arūpāvacarehi rūpānaṃ pariññaṃ paññāpeti, anupādānibbānena vedanānaṃ pariññaṃ paññāpeti. Nibbānañhi sabbavedayitappahānattā vedanānaṃ pariññā nāma. **Anupādāparinibbānanti** apaccayaparinibbānaṃ. Idaṃ pana suttaṃ kathento bhagavā anabhiratipīlītāni pañca bhikkhusatāni disvā tesāṃ anabhirativinodanattaṃ kathesi. Tepi anabhiratiṃ vinodetvā desanānusārena ñānaṃ pesetvā sotāpannā hutvā aparabhāge vipassanaṃ vaḍḍhetvā arahattaṃ pāpuṇimsūti.

10. Dutiyakosalasuttavaṇṇanā

30. Dasame **uyyodhikā nivatto hotīti** yuddhato nivatto hoti. **Laddhādhippāyoti** mahākosalaraññā kira bimbisārassa dhītaraṃ dentena dvinnaṃ rajjanaṃ antare satasahassuṭṭhāno kāsīgāmo nāma dhītu dinno. Ajātasattunā pitari mārīte mātāpissa rañño viyogasokena nacirasseva matā. Tato rājā pasenadikosalo “ajātasattunā mātāpitaro mārītā, mama pitu santako gāmo” ti tassatthāya aṭṭaṃ karoti, ajātasattupi “mama mātu santako” ti tassa gāmassatthāya. Dvepi mātulabhāgineyyā caturaṅginim senaṃ

sannayhitvā yujjhiṃsu. Tattha pasenadikosalo dve vāre ajātasattunā parājito nagarameva pāvisi. Tatiyavāre “kathaṃ nu kho me jayo bhavēyyā”ti upassutivasena yujjhitabbākāraṃ ñatvā byūhaṃ racayitvā ubhohi passehi parikkhipitvā ajātasattum gaṇhi. Tāvadeva jayādhippāyassa laddhattā laddhādhippāyo nāma ahoṣi.

Yena ārāmo tena pāyāsīti bahinagare jayakhandhāvāraṃ niveṣetvā “yāva nagaraṃ alaṅkaronti, tāva dasabalaṃ vandissāmi. Nagaraṃ pavitṭhakālato paṭṭhāya hi papañco hoti”ti amaccagaṇaparivuto yenārāmo tena pāyāsī, ārāmaṃ pāvisi. Kasmim kāle pāvisīti? Piṇḍapātappaṭikkantānaṃ bhikkhūnaṃ ovādaṃ datvā sammāsambuddhe gandhakuṭim pavitṭhe bhikkhusaṅghe ca ovādaṃ sampaṭicchitvā attano attano rattiṭṭhānadivātṭhānāni gate. **Caṅkamantīti** kasmim samaye caṅkamanti? Paṇitabhojanapaccayassa thinamiddhassa vinodanattamaṃ, divā padhānikā vā te. Tādisānañhi pacchābhattaṃ caṅkamitvā nhatvā sarīraṃ utuṃ gāhāpetvā nisajja samaṇadhammaṃ karontānaṃ cittaṃ ekaggaṃ hoti. **Ye te bhikkhūti** so kira “kahaṃ sathā kahaṃ sugatoti pariveṇena pariveṇaṃ āgantvā pucchitvāva pavississāmi”ti vilokento araṇṇahatthī viya mahācaṅkame caṅkamamāne paṃsukūlike bhikkhū disvā tesam santikaṃ agamāsi. Taṃ sandhāyetaṃ vuttaṃ. **Dassanakāmāti** passitukāmā. **Vihāroti** gandhakuṭim sandhāya āhaṃsu. **Ataramānoti** aturito, saṅikaṃ padapamāṇaṭṭhāne padaṃ nikkhipanto vattaṃ katvā susammaṭṭhaṃ muttajālasinduvārasadisam vālukaṃ avināsentoti attho. **Ālindanti** pamukhaṃ. **Aggaḷanti** kavāṭaṃ. **Ukkāsivāti** ukkāsitāsaddaṃ katvā. **Ākoṭehīti** agganakhena īsakaṃ kuṅcikaḷchiddasamīpe koṭehīti vuttaṃ hoti. Dvāraṃ kira atīpari amanussā, atīheṭṭhā dīghajātikā koṭenti. Tathā akoṭetvā majjhe chiddasamīpe koṭetabbanti idaṃ dvārakoṭanavattanti vadanti. **Vivari bhagavā dvāranti** na bhagavā utṭhāya dvāraṃ vivarati, vivarātūti pana hatthaṃ pasāreti. Tato “bhagavā tumhehi anekakappaṭṭisū dānaṃ dadamānehi na sahatthā dvāravivaraṇakammaṃ kata”nti sayameva dvāraṃ vivaṭaṃ. Taṃ pana yasmā bhagavato manena vivaṭaṃ, tasmā “vivari bhagavā dvāra”nti vattuṃ vaṭṭati.

Mettūpahāranti mettāsampayuttaṃ kāyikavācasikaupahāraṃ. **Kataññutanti** ayañhi rājā pubbe thūlasarīro ahoṣi, doṇapākaṃ bhuñjati. Athassa bhagavā divase divase thokaṃ thokaṃ hāpanatthāya –

“Manujassa sadā satīmato,
Mattam jānato laddhabhojane;
Tanukassa bhavanti vedanā,
Saṅikaṃ jīrati āyupālaya”nti. (saṃ. ni. 1.124) –

Imaṃ ovādaṃ adāsi. So imasmim ovāde ṭhatvā divase divase thokaṃ thokaṃ hāpetvā anukkamena nāḷikodanaparamatāya saṅṭhāsi, gattānipissa tanūni thirāni jātāni. Taṃ bhagavatā kataṃ upakāraṃ sandhāya “kataññutaṃ kho ahaṃ, bhante, kataveditaṃ sampassamāno”ti āha. **Ariye nāyēti** sahavipassanake magge. **Vuddhasīloti** vaḍḍhitasīlo. **Ariyasīloti** apothujjanikehi sīlehi samannāgato. **Kusalasīloti** anavajjehi sīlehi samannāgato. **Ārañṇakoti** jāyamānopi araṇṇe jāto, abhisambujjhamānopi araṇṇe abhisambuddho, devavimānakappāya gandhakuṭiyā vasantopi araṇṇeyeva vasīti dassento evamāha. Sesam sabbattha uttānatthamevāti.

Mahāvaggo tatiyo.

4. Upālivaggo

1. Upālisuttavaṇṇanā

31. Catutthassa paṭhame **saṅghasutṭhutāyāti**ādīsū saṅghasutṭhutā nāma saṅghassa sutṭhubhāvo, “sutṭhu devā”ti āgataṭṭhāne viya “sutṭhu, bhante”ti vacanasampannicchanabhāvo. Yo ca tathāgatassa vacanaṃ sampannicchati, tassa taṃ dīgharattaṃ hitāya sukhāya samvattati. Tasmā saṅghassa “sutṭhu,

bhante’’ti vacanasampañcchanattham paññattam, asampañcchane ādīnavam, sampañcchane ānisamsam dassetvā, na balakkārena abhibhavitvāti etamattham āvikaronto āha – **saṅghasutthutāyāti**. **Saṅghaphāsutāyāti** saṅghassa phāsubhāvāya, sahajīvitāya sukhavihāratthāyāti attho.

Dummaṅkūnaṃ puggalānaṃ niggahāyāti dummaṅkūnāma dussīlapuggalā, ye maṅkutaṃ āpādiyamānāpi dukkhena āpajjanti, vītikkamaṃ karontā vā katvā vā na lajjanti, tesam niggahatthāya. Te hi sikkhāpade asati ‘‘kiṃ tumhehi diṭṭham, kiṃ sutam, kiṃ amhehi katam, katamasmiṃ vatthusmiṃ katamaṃ āpattiṃ ropetvā amhe niggaṇhathā’’ti saṅgham vihettheyuṃ. Sikkhāpade pana sati te saṅgho sikkhāpadaṃ dassetvā saha dhammena niggahessati. Tena vuttam – ‘‘dummaṅkūnaṃ puggalānaṃ niggahāyā’’ti.

Pesalānanti piyasīlānaṃ bhikkhūnaṃ phāsuvihāratthāya. Piyasīlā hi bhikkhū kattabbākattabbaṃ sāvajjānavajjam velaṃ mariyādañca ajānantā sikkhāttayapāripūriyā ghaṭamānā kilamanti, te pana sāvajjānavajjam velaṃ mariyādañca ñatvā sikkhāpāripūriyā ghaṭamānā na kilamanti. Tena tesam sikkhāpadapaññāpanam phāsuvihārāya samvattatiyeva. Yo vā dummaṅkūnaṃ puggalānaṃ niggaho, sveva tesam phāsuvihāro. Dussīlapuggale nissāya hi uposathappavāraṇā na tiṭṭhanti, saṅghakammāni nappavattanti, sāmaggī na hoti, bhikkhū anekaggā uddesādīsu anuyuñjituṃ na sakkonti. Dussīlesu pana niggahitesu sabbopi ayaṃ upaddavo na hoti, tato pesalā bhikkhū phāsu viharanti. Evaṃ ‘‘pesalānaṃ bhikkhūnaṃ phāsuvihārāyā’’ti ettha dvidhā attho veditabbo.

Diṭṭhadhammikānaṃ āsavānaṃ samvarāyāti diṭṭhadhammikā āsavā nāma asaṃvare ṭhitena tasmīmyeva attabhāve pattaḃbā pañippahāraḃḃappahārasatthappahāraḃḃatthacchedapādacchedaakittiyasavippaṭṭisārādayo dukkhaviseso, tesam samvarāya pidahanāya āgamanamaggathakanāyāti attho. **Samparāyikānanti** samparāyikā āsavā nāma asaṃvare ṭhitena katapāpakammamūlakā samparāye narakādīsu pattaḃbā dukkhavisesā, tesam paṭighātathāya vūpasamatthāya.

Appasannānanti sikkhāpadapaññattiyā hi sati sikkhāpadapaññattiṃ ñatvā vā, yathāpaññattam paṭipajjamāne bhikkhū disvā vā, yepi appasannā paṇḃditamanussā, te ‘‘yāni vata loke mahājanassa rajjanadussanamuyhanaṭṭhānāni, tehi ime samaṇā ārakā viratā viharanti, dukkaram vata karontī’’ti pasādam āpajjanti vinayapaṭakapotthakam disvā micchādiṭṭhikatavedibrāhmaṇā viya. Tena vuttam – ‘‘appasannānaṃ pasādāyā’’ti.

Pasannānanti yepi sāsane pasannā kulaputtā, tepi sikkhāpadapaññattiṃ vā ñatvā, yathāpaññattam paṭipajjamāne bhikkhū vā disvā ‘‘aho ayyā dukkaram karontī, ye yāvajīvam ekabhattā vinayasamvaram pārentī’’ti bhiyyo bhiyyo pasīdanti. Tena vuttam – ‘‘pasannānaṃ bhiyyobhāvāyā’’ti.

Saddhammaṭṭhitiyāti tividho saddhammo pariyattisaddhammo paṭipattisaddhammo adhigamasaddhammoti. Tattha sakalampi buddhavacanam pariyattisaddhammo nāma. Terasa dhutaguṇā cārittavārittasīlasamādhivipassanāti ayaṃ paṭipattisaddhammo nāma. Navalokuttaradhammo adhigamasaddhammo nāma. So sabbopi yasmā sikkhāpadapaññattiyā sati bhikkhū sikkhāpadañca tassa vibhaṅgañca tadatthajotanattham aññañca buddhavacanam pariyāpuṇanti, yathāpaññattañca paṭipajjamānā paṭipattiṃ pūretvā paṭipattiyā adhigantabbaṃ lokuttaradhammam adhigacchanti, tasmā sikkhāpadapaññattiyā saddhammo ciraṭṭhitiko hoti. Tena vuttam – ‘‘saddhammaṭṭhitiyā’’ti.

Vinayānuggahāyāti sikkhāpadapaññattiyā sati samvaravinayo, pahānavinayo, samathavinayo, paññattivinayoti catubbidho vinayo anuggahito hoti sūpatthambhito. Tena vuttam – ‘‘vinayānuggahāyā’’ti.

2. Pātimokkhaṭṭhapanāsuttavaṇṇanā

32. Dutiye **pārājikoti** pārājikāpattiṃ āpanno. **Pārājikakathā vippakatā hotīti** “asukapuggalo pārājikaṃ āpanno nu kho no”ti evaṃ kathā ārabhitvā anittḥāpitā hoti. Esa nayo sabbattha.

3. Ubbāhikāsuttavaṇṇanā

33. Tatiye **ubbāhikāyāti** sampattaadhikaraṇaṃ vūpasametum saṅghato ubbāhitvā uddharitvā gahaṇatthāya. **Vinaye kho pana ṭhito hotīti** vinayalakkhaṇe patiṭṭhito hoti. **Asaṃhīroti** na aññassa vacanamatteneva attano laddhiṃ vissajjeti. **Paṭibhaloti** kāyabalenapi ñāṇabalenapi samannāgato. **Saññāpetunti** jānāpetum. **Paññāpetunti** sampajānāpetum. **Nijjhāpetunti** olokāpetum. **Pekkhatunti** passāpetum. **Pasādetunti** sañjātapasādaṃ kātum. **Adhikaraṇanti** vivādādhikaraṇādicatubbidham. **Adhikaraṇasamudayanti** vivādāmūlādikaṃ adhikaraṇakāraṇaṃ. **Adhikaraṇanirodhanti** adhikaraṇānaṃ vūpasamaṃ. **Adhikaraṇanirodhagāminiṃ paṭipadanti** sattavidhaadhikaraṇasamathaṃ.

4. Upasampadāsuttavaṇṇanā

34. Catutthe **anabhiratinti** ukkaṇṭhitabhāvaṃ. **Vūpakāsetunti** vinetum. **Adhisīleti** uttamasīle. **Cittapaññāsūpi** eseva nayo.

7. Saṅghabhedasuttavaṇṇanā

37. Sattame **vatthūhīti** kāraṇehi. **Avakassantīti** pariṣaṃ ākaḍḍhanti vijaṭenti ekamantaṃ ussārenti. **Apakassantīti** ativiya ākaḍḍhanti, yathā viṣaṃsaṭṭhā honti, evaṃ karonti. **Āveni kammāni karontīti** viṣum saṅghakammāni karonti.

9-10. Ānandasuttadvayaṇṇanā

39-40. Navame **kappaṭṭhikanti** āyukappaṃ nirayamhi ṭhitikāraṇaṃ. **Kibbisam pasavatīti** pāpaṃ paṭilabhati. **Āpāyikoti** apāyagamanīyo. **Nerayikoti** niraye nibbattanako. **Vaggaratoti** bhedarato. **Yogakkhemā padhaṃsatīti** yogehi khemato arahattato dhaṃsati vigacchati. Dasame **anuggahoti** aññamaññassa saṅghānuggaho. Sesam sabbattha uttānatthamevāti.

Upālivaggo catuttho.

5. Akkosavaggo

4. Kusinārasuttavaṇṇanā

44. Pañcamassa catutthe **kusinārāyanti** evaṃnāmake nagare. Devatānaṃ atthāya balim haranti etthāti **baliharaṇo**, tasmim baliharaṇe. **Acchiddena appaṭimaṃsenāti**ādīsu yena kenacideva pahaṭo vā hoti, vejjakammādīni vā katāni, tassa kāyasamācāro upacikādīhi khāyitatālapaṇṇaṃ viya chiddo ca, paṭimasitum yattha katthaci gahetvā ākaḍḍhitum sakkuṇeyyatāya paṭimaṃso ca hoti, viparīto acchiddo appaṭimaṃso nāma. Vacīsamācāro pana musāvādaomasavādapesuññaamūlakānuddhaṃsanādīhi chiddo sappaṭimaṃso ca hoti, viparīto acchiddo appaṭimaṃso. **Mettaṃ nu kho me cittanti** palibodham chinditvā kammaṭṭhānabhāvanānuyogena adhigataṃ me mettacittaṃ. **Anāghātanti** āghātavirahitaṃ, vikkhambhanaena vihatāghātanti attho. **Kattha vuttanti** idaṃ sikkhāpadaṃ kismiṃ nagare vuttaṃ.

Kālena vakkhāmītiādīsu eko ekaṃ okāsaṃ kāretvā codento **kālena vadati** nāma. Saṅghamajjhe vā gaṇamajjhe vā salākaggayāgaggavitakkamālakabhikkhācāramaggaāsanasālādīsu vā upaṭṭhākehi parivāritakkhaṇe vā codento **akālena vadati** nāma. Tacchena vadanto **bhūtena vadati** nāma.

“Daharamahallakaparisāvacarapakāṃsukūlikadharmakathikapātirūpaṃ tava ida”nti vadanto **pharusena vadati** nāma. Kāraṇanissitaṃ pana katvā, “bhante mahallakattha, parisāvacarakattha, paṃsukūlikattha, dharmakathikapātirūpaṃ tumhākamida”nti vadanto **saṅghena vadati** nāma. Kāraṇanissitaṃ katvā vadanto **atthasaṃhitena vadati** nāma. **Mettacitto vakkhāmi no dosantaroti** mettacittaṃ paccupaṭṭhapetvā vakkhāmi, na duṭṭhacitto hutvā.

5. Rājantepurappavesanasuttavaṇṇanā

45. Pañcame **katam vā karissanti vāti** methunavītikkamaṃ kariṃsu vā karissanti vā. **Ratananti** maṇiratanādīsu yaṃkiñci. **Patthetīti** māretuṃ icchati. **Hatthisambādhanti** hatthīhi sambādham. Hatthisammaddanti vā pāṭho, tassattho – hatthīhi sammaddo etthāti hatthisammaddam. Sesesupi eseva nayo. **Rajanīyāni rūpasaddagandharasaphoṭṭhabbānīti** etāni rāgajanakāni rūpādīni tattha paripūrāni hontī.

6. Sakkasuttavaṇṇanā

46. Chaṭṭhe **sokasabhayeti** sokena sabhaye. Sokasabhayeti vā pāṭho, ayamevattho. Dutiyaṃpadeṃpi eseva nayo. **Yena kenaci kammaṭṭhānenāti** kasivaṇṇijjādikammesu yena kenaci kamma. **Anāpajja akusalanti** kiñci akusalaṃ anāpajjitvā. **Nibbiseyyāti** uppādeyya ācineyya. **Dakkhoti** cheko. **Uṭṭhānasampannoti** uṭṭhānavīriyena samannāgato. **Alaṃ vacanāyāti** yutto vacanāya. **Ekantasukhappaṭisaṃvedī vihareyyāti** ekantameva kāyikacetasikasukhaṃ ñāṇena paṭisaṃvedento vihareyya. **Aniccāti** hutvā abhāvato. **Tucchāti** sārarahitā. **Musāti** niccasubhasukhā viya khāyamānāpi tathā na hontīti musā. **Mosadhammāti** nassanasabhāvā. Tasmā te paṭicca dukkhaṃ uppajjatīti sandasseti. **Idha pana voti** ettha **vo** ti nipātamattaṃ. **Apaṇṇakaṃ vā sotāpannoti** avirādhitam ekaṃsena sotāpanno vā hoti. Sopi jhānaṃ nibbatteti, brahmalokaṃ vā gantvā chasu vā kāmasaggesu ekantasukhappaṭisaṃvedī hutvā vihareyya. Imasmiṃ sutte satthā aṭṭhaṅguposathassa guṇaṃ kathesi.

7. Mahālisuttavaṇṇanā

47. Sattame **micchāpaṇihitanti** micchā ṭhapitaṃ. **Adhammacariyāvisamacariyāti** akusalakammamāpathavasena adhammacariyasaṅkhātā visamacariyā. Kusalakammamāpathavasena itarā veditabbā. Evamidha vaṭṭameva kathitaṃ.

8. Pabbajitaabhiṇhasuttavaṇṇanā

48. Aṭṭhame **pabbajitenāti** gharāvāsaṃ pahāya sāsane pabbajjaṃ upagatena. **Abhiṇhanti** abhikkhaṇaṃ punappunaṃ, **paccavekkhitabbā** oloketabbā sallakkhetabbā. **Vevaṇṇiyanti** vivaṇṇabhāvaṃ. Taṃ panetaṃ vevaṇṇiyaṃ duvidhaṃ hoti sarīravevaṇṇiyaṃ parikkhāravevaṇṇiyaṃ. Tattha kesamassuoropanena sarīravevaṇṇiyaṃ veditabbam. Pubbe pana nānāviraṅgāni sukhumavatthāni nivāsetvāpi nānaggarasabhojanaṃ suvaṇṇarajatabhājanesu bhuñjitvāpi sirigabbhe varasayanāsanesu nipajjitvāpi nisīditvāpi sappinavanītādīhi bhesajjaṃ katvāpi pabbajitakālo paṭṭhāya chinnasaṅghaṭitakasāvarasapītāni vatthāni nivāsetabbāni, ayapatte vā mattikapatte vā missakodano bhuñjitabbo, rukkhamūlādisenāsane muñjatiṇasantharaṇādīsu nipajjitabbam, cammakhaṇḍataṭṭikādīsu nisīditabbam, pūtimuttādīhi bhesajjaṃ kattabbam hoti. Evamettha parikkhāravevaṇṇiyaṃ veditabbam. Evaṃ paccavekkhato kopo ca māno ca pahīyati.

Parapaṭibaddhā me jīvikāti mayhaṃ paresu paṭibaddhā parāyattā catupaccayajīvikāti. Evaṃ paccavekkhato hi ājīvo parisujjhati, piṇḍapāto ca apacito hoti, catūsu paccayesu apaccavekkhitaparibhogo nāma na hoti. **Añño me ākappo karaṇīyoti** yo gihīnaṃ uraṃ abhinīharitvā gīvaṃ paggaḥetvā lalitenākārena aniyatapadavītiḥārena gamanākappo hoti, tato añño va ākappo mayā karaṇīyo, santindriyena santamānasena yugamattadassinā visamaṭṭhāne udakasakaṭeneva

mandamitapadavītihārena hutvā gantabbanti paccavekkhitabbaṃ. Evaṃ paccavekkhato hi iriyāpatho sāruppo hoti, tisso sikkhā paripūrenti. **Kaccinukhoti** salakkhaṇe nipātasamudāyo. **Attāti** cittaṃ. **Sīlato na upavadatīti** aparisuddhaṃ te sīlanti sīlapaccayo na upavadatī. Evaṃ paccavekkhato hi ajjhattaṃ hirī samuṭṭhāti, sā tīsu dvāresu saṃvaram sādheti, tīsu dvāresu saṃvaro catupārisuddhisīlaṃ hoti, catupārisuddhisīle tīhito vipassanaṃ vaḍḍhetvā arahattaṃ gaṇhāti. **Anuvicca viññū sabrahmacārīti** paṇḍitā sabrahmacārino anuvicāretvā. Evaṃ paccavekkhato hi bahiddhā ottappaṃ saṇṭhāti, taṃ tīsu dvāresu saṃvaram sādhetīti anantaranayeneva veditabbaṃ.

Nānābhāvo vinābhāvoti jātiyā nānābhāvo, maraṇena vinābhāvo. Evaṃ paccavekkhato hi tīsu dvāresu asaṃvutākāro nāma na hoti, maraṇassati sūpaṭṭhitā hoti. **Kammassakombhīti**ādīsu kammaṃ mayhaṃ sakaṃ attano santakanti **kammassakā**. Kammena dātabbaṃ phalaṃ dāyaṃ, kammassa dāyaṃ kammadāyaṃ, taṃ ādīyamīti **kammadāyādo**. Kammaṃ mayhaṃ yoni kāraṇanti **kammayoni**. Kammaṃ mayhaṃ bandhu ñātakoti **kammabandhu**. Kammaṃ mayhaṃ paṭisaraṇaṃ paṭiṭṭhāti **kammaṃpaṭisaraṇo**. **Tassa dāyādo bhavissāmīti** tassa kammassa dāyādo tena dinnaphalaṃ paṭiggāhako bhavissāmi. Evaṃ kammassakataṃ pana paccavekkhato pāpakaraṇaṃ nāma na hoti. **Kathaṃbhūtassa me rattindivā vītivattantīti** kinna kho me vattappaṭipattiṃ karontassa, udāhu akarontassa, buddhavacanaṃ sajjhāyantassa, udāhu asajjhāyantassa, yonisomanasikāre kammaṃ karontassa, udāhu akarontassāti kathaṃbhūtassa me rattindivā vītivattantī, parivattantīti attho. Evaṃ paccavekkhato hi appamādo paripūratī.

Suññāgāre abhiraṃmāmiti vivittokāse sabbiriyāpathesu ekakova hutvā kacci nu kho abhiraṃmāmi attho. Evaṃ paccavekkhato kāyaviveko paripūratī. **Uttarimanussadhammoti** uttarimanussānaṃ ukkaṭṭhamaṇussabhūtānaṃ jhāyīnaṇceva ariyānaṇca jhānādidhammo, dasakusalakammaṃpathasaṅkhātamaṇussadhammato vā uttaritaro viṣiṭṭhataro dhammo me mama santāne atthi nu kho, santi nu khoti attho. **Alamariyañāṇadassanavisesoti** mahaggatalokuttarapaññā pajānanaṭṭhena ñāṇaṃ, cakkhunā diṭṭhamiva dhammaṃ paccakkhakarāṇato dassanaṭṭhena dassananti ñāṇadassanaṃ, ariyaṃ visuddhaṃ uttamaṃ ñāṇadassananti ariyañāṇadassanaṃ, alaṃ pariyattaṃ kilesaviddhaṃsanasaṃmatthaṃ ariyañāṇadassanaṃmettha, assa vāti alamariyañāṇadassano, jhānādibhedo uttarimanussadhammo alamariyañāṇadassano ca so viseso cāti **alamariyañāṇadassanaviseso**. Atha vā tameva kilesaviddhaṃsanasaṃmatthaṃ visuddhaṃ ñāṇadassanaṃeva visesoti alamariyañāṇadassanaviseso vā. **Adhigatoti** paṭiladdho me atthi nu kho. **Sohanti** paṭiladdhaviseso so ahaṃ. **Pacchime kāleti** maraṇamaṇce nipannaṃkāle. **Puṭṭhoti** sabrahmacārīhi adhigatagaṇavisesaṃ pucchito. **Na maṅku bhavissāmīti** patitakkhandho nittejo na hessāmīti. Evaṃ paccavekkhantassa hi moghakālakiriyā nāma na hoti.

9-10. Sarīraṭṭhadhammasuttādivaṇṇanā

49-50. Navame **ponobbhavikoti** punabbhavanibbattako. **Bhavasāṅkhāroti** bhavasāṅkharaṇakammaṃ. Imasmiṃ sutte vaṭṭameva kathitaṃ. Dasame sīlabāhusaccavīriyasatipaññā lokiyalokuttarāmissikā kathitā. Sesāṃ sabbattha uttānatthamevāti.

Akkosavaggo pañcamaṃ.

Paṭhamapaṇṇāsakaṃ niṭṭhitaṃ.

2. Dutiyapaṇṇāsakaṃ

(6) 1. Sacittavaggo

1-4. Sacittasuttādivaṇṇanā

51-54. Dutiyassa paṭhame **sacittapariyāyakusaloti** attano cittavāraṅkusalo. **Rajanti** āgantukaupakkilesaṃ. **Aṅgaṇanti** tathajātakaāṅgakāḷatīlakādiṃ. **Āsavānaṃ khayāyāti** arahattatthāya. Tatiye **paṭibhānenāti** vacanasaññhānena. Catutthe **adhipaññādharmavipassanāyāti** saṅkhārapariggāhakavipassanāya.

8. Mūlakasuttavaṅṅanā

58. Aṭṭhame **amatogadhāti** ettha saupādisesā nibbānadhātu kathitā, **nibbānapariyosānāti** ettha anupādisesā. Anupādisesaṃ pattassa hi sabbe dhammā pariyosānappattā nāma honti. Sesapadāni heṭṭhā vuttatthāneva.

9. Pabbajjāsuttavaṅṅanā

59. Navame **tasmāti** yasmā evaṃ aparicitacittassa sāmaññattho na sampajjati, tasmā. **Yathāpabbajjāparicitaṅca no cittaṃ bhavissatīti** yathā pabbajjānurūpena paricitaṃ. Ye hi keci pabbajanti nāma, sabbe te arahattaṃ patthetvā. Tasmā yaṃ cittaṃ arahattādhigamatthāya paricitaṃ vaḍḍhitaṃ, taṃ yathāpabbajjāparicitaṃ nāmāti veditabbaṃ. Evarūpaṃ pana cittaṃ bhavissatīti sikkhitabbaṃ. **Lokassa samaṅca visamaṅcāti** sattalokassa sucaritaduccaritāni. **Lokassa bhavaṅca vibhavaṅcāti** tassa vaḍḍhiṅca vināsaṅca, tathā sampattiṅca vipattiṅca. **Lokassa samudayaṅca atthaṅgamaṅcāti** pana saṅkhāralokaṃ sandhāya vuttaṃ, khandhānaṃ nibbattiṅca bhedaṅcāti attho.

10. Girimānandasuttavaṅṅanā

60. Dasame **anukampaṃ upādāyāti** girimānandatthere anakampaṃ paṭicca. **Cakkhurogoti**ādayo vatthuvasena veditabbā. Nibbattitappasādānañhi rogo nāma natthi. **Kaṇṇarogoti** bahikaṇṇe rogo. **Pināsoti** bahināsikāya rogo. **Nakhasāti** nakhehi vilekhitaṭṭhāne rogo. **Pittasamuṭṭhānāti** pittasamuṭṭhitā. Te kira dvattiṃsa honti. **Semhasamuṭṭhānādisupi** eseva nayo. **Utupariṇāmajāti** utupariṇāmena accuṇhātisītena uppajjanakarogā. **Visamaparihārajāti** aticiraṭṭhānanisajjādinā visamaparihārena jātā. **Opakkamikāti** vadhabandhanādinā upakkamena jātā. **Kammavipākajāti** balavakammavipākasambhūtā. **Santanti** rāgādisantaṭāya santaṃ. Atappakaṭṭhena **paṇītaṃ**. Sesam sabbattha uttānatthamevāti.

Sacittavaggo paṭhamo.

(7) 2. Yamakavaggo

1. Avijjāsuttādivaṅṅanā

61-62. Dutiyassa paṭhame **sāhāranti** sapaccayaṃ. **Vijjāvimuttinti** phalaññaṅceva sesasampayuttadhamme ca. **Bojjhaṅgāti** maggabojjhaṅgā. Dutīye **bhavataṅhāyāti** bhavapatthanāya. Evaṃ dvīsupi suttesu vaṭṭameva kathitaṃ, vaṭṭaṅcettha paṭhame sutte avijjāmūlakaṃ vaṭṭaṃ kathitaṃ, dutīye taṅhāmūlakaṃ.

3-4. Niṭṭhaṅgatasuttādivaṅṅanā

63-64. Tatiye **niṭṭhaṃ gatāti** nibbematikā. **Idha niṭṭhāti** imasmiṃyeva loke parinibbānaṃ. **Idha vihāyāti** imaṃ lokaṃ vijahitvā suddhāvāsabrahmalokaṃ. Catutthe **aveccappasannāti** acalappasādena sampannā. **Sotāpannāti** ariyamaggasotaṃ āpannā.

5-7. Paṭhamasukhasuttādivaṅṅanā

65-67. Pañcame vaṭṭamūlakam sukhadukkham pucchitam, chaṭṭhe sāsanaṃmūlakam. Sattame **naḷakapānanti** atīte bodhisattassa ovāde ṭhatvā vānarayūthena naḷehi udakassa pītaṭṭhāne māpitattā evaṃladdhanāmo nigamo. **Tuṇhībhūtam tuṇhībhūtanti** yaṃ yaṃ disaṃ anuviloketi, tattha tattha tuṇhībhūtameva. **Anuviloketvā**ti tato tato viloketvā. **Piṭṭhi me āgilāyatī**ti kasmā āgilāyati? Bhagavato hi cha vassāni mahāpadhānaṃ padahantassa mahantaṃ kāyadukkham ahosi, athassa aparabhāge mahallakakāle piṭṭhivāto uppajji. Upādinnakasarīrassa ṭhānanisajjādīhi appamattakena ābādheṇa na sakkā kenaci bhavitum. Taṃ gahetvāpi therassa okāsakaraṇattham evamāha. **Saṅghāṭim paññāpetvā** ekamante patirūpaṭṭhāne paññattassa kappiyamañcassa upari attharivā.

9-10. Kathāvattusuttadvayaṇṇanā

69-70. Navame **tiracchānakathanti** aniyyānikattā saggamokkhamaggānaṃ tiracchānabhūtam katham. Tattha rājānaṃ ārabba “mahāsammato mandhātā dhammāsoko evaṃmahānubhāvo”tiādinā nayena pavattakathā **rājakathā**. Esa nayo **corakathā**dīsu. Tesu “asuko rājā abhirūpo dassanīyo”tiādinā gehasitakathāva tiracchānakathā hoti, “sopi nāma evaṃmahānubhāvo khayam gato”ti evaṃ pavattā pana kammaṭṭhānabhāve tiṭṭhati. Coresupi “mūladevo evaṃmahānubhāvo, meghadevo evaṃmahānubhāvo”ti tesam kammaṃ paṭicca “aho sūrā”ti gehasitakathāva **tiracchānakathā**. Yuddhesupi bhāratayuddhādīsu “asukena asuko evaṃ mārito evaṃ viddho”ti kammassādasasena kathā tiracchānakathā, “tepi nāma khayam gatā”ti evaṃ pavattā pana sabbattha kammaṭṭhānameva hoti. Apica annādīsu “evaṃ vaṇṇavantaṃ rasavantaṃ phassasampannaṃ khādimha bhuñjīma pivimha paribhuñjīma”ti kāmarasassādasasena kathetum na vaṭṭati, sātthakam pana katvā “pubbe evaṃ vaṇṇādisampannaṃ annaṃ pānaṃ vatthaṃ yānaṃ mālaṃ gandhaṃ sīlavantānaṃ adama, cetiyaṃ pūjīma”ti kathetum vaṭṭati.

Ñātikathādīsupi “amhākam ñātakā sūrā samatthā”ti vā “pubbe mayam evaṃ vicitrehi yānehi vicarimhā”ti vā assādasasena vattum na vaṭṭati, sātthakam pana katvā “tepi no ñātakā khayam gatā”ti vā “pubbe mayam evarūpā upāhanā saṅghassa adama”ti vā kathetabbaṃ. **Gāmakathā**pi suniviṭṭhadunniviṭṭhasubhikkhadubbhikkhādivasena vā “asukagāmaṃvāsino sūrā samatthā”ti vā evaṃ assādasasena na vaṭṭati, sātthakam pana katvā “saddhā pasannā”ti vā “khayavayaṃ gatā”ti vā vattum vaṭṭati. **Nigamanagarajanapadakathā**supi eseva nayo.

Itthikathāpi vaṇṇasaṅghānādīni paṭicca assādasasena na vaṭṭati, “saddhā pasannā khayam gatā”ti evameva vaṭṭati. **Sūrakathā**pi “nandimitto nāma yodho sūro ahosi”ti assādasasena na vaṭṭati, “saddho ahosi khayam gato”ti evameva vaṭṭati. **Surākathanti** pāḷiyaṃ pana anekavidham majjakatham assādasasena kathetum na vaṭṭati, ādīnavavasasena vattum vaṭṭati. **Visikhākathā**pi “asukavisikhā suniviṭṭhā dunniviṭṭhā sūrā samatthā”ti assādasasena na vaṭṭati, “saddhā pasannā khayam gatā”ti vaṭṭati. **Kumbhaṭṭhānakathā** nāma kūṭṭhānakathā udakatitthakathā vuccati (dī. ni. aṭṭha. 1.17; ma. ni. aṭṭha. 2.223; sam. ni. aṭṭha. 3.5.1080). Kumbhadāsikathā vā. Sāpi “pāsādikā naccitum gāyitum chekā”ti assādasasena na vaṭṭati, “saddhā pasannā”tiādinā nayeneva vaṭṭati.

Pubbapetakathā nāma atītañātikathā. Tattha vattamānañātikathāsadisova vinicchayo. **Nānattakathā** nāma purimacchimakathāvimuttā avasesā nānāsabhāvā tiracchānakathā. **Lokakkhāyikā** nāma “ayaṃ loko kena nimmitto? Asukena nāma nimmitto. Kāko seto aṭṭhīnaṃ setattā, balākā rattā lohitassa rattattā”ti evamādikā lokāyatavitaṇḍasallāpakathā. **Samuddakkhāyikā** nāma kasmā samuddo sāgaroti. Sāgaradevena khatattā sāgaro, khato meti hatthamuddāya niveditattā samuddotievamādikā niratthakā samuddakkhāyanakathā. **Bhavoti** vuddhi, **abhavoti** hāni. Iti bhavo iti abhavoti yaṃ vā taṃ vā niratthakakāraṇaṃ vatvā pavattitakathā **itibhavābhavakathā** nāma.

Tejasā tejanti attano tejasā tesam tejam. **Pariyādiyeyyāthāti** khepetvā gahetvā abhibhaveyyātha. Tatrīdaṃ vatthu – eko piṇḍapātiko mahātheraṃ pucchi – “bhante, tejasā tejam pariyādiyamānā bhikkhū kim karontī”ti. Thero āha – āvuso, kiñcīdeva ātape ṭhapetvā yathā chāyā heṭṭhā na otarati, uddhamyeva

gacchati tathā karonti. Dasame **pāsamsāni ṭhānānī** pasamsāvahāni kāraṇāni. Sesam sabbattha uttānatthamevāti.

Yamakavaggo dutiyo.

(8) 3. Ākaṅkhavaggo

1. Ākaṅkhasuttavaṇṇanā

71. Tatiyassa paṭhame **sampannasīlā**ti paripuṇṇasīlā, sīlasamaṅgino vā hutvāti attho. Tattha dvīhi kāraṇehi sampannasīlatā hoti sīlavipattiya ca ādīnavadassanena, sīlasampattiya ca ānisaṃsadassanena. Tadubhayampi visuddhimagge (visuddhi. 1.9, 21) vitthāritam. Tattha “sampannasīlā”ti ettāvata kira bhagavā catupārisuddhisīlam uddisitvā “pātimokkhasaṃvarasaṃvutā”ti iminā tattha jeṭṭhakasīlam vitthāretvā dassesīti dīpavīhāravāsī sumanatthero āha. Antevāsiko panassa tepītakacūlanāgatthero āha – ubhayatthapi pātimokkhasaṃvarova bhagavatā vutto. Pātimokkhasaṃvaroyeva hi sīlam, itarāni pana tīhi sīlanti vuttaṭṭhānam atthīti ananujānanto vatvā āha – indriyasaṃvaro nāma chadvārarakkhāmatkameva, ājīvapārisuddhi dhammena samena paccayuppattimattakam, paccayasannissitam paṭiladdhapaccaye idamatthanti paccavekkhitvā paribhuñjanamattakam. Nippariyāyena pātimokkhasaṃvarova sīlam. Yassa so bhinno, ayam sīsacchinno viya puriso hatthapāde sesāni rakkhissatīti na vattabbo. Yassa pana so arogo, ayam acchinnasīso viya puriso jīvitam sesāni puna pākātikāni kātum sakkoti. Tasmā “sampannasīlā”ti iminā pātimokkhasaṃvaram uddisitvā “sampannapātimokkhā”ti tasseva vevacanam vatvā tam vitthāretvā dassento **pātimokkhasaṃvarasaṃvutā**tiādīmāha. Tattha **pātimokkhasaṃvarasaṃvutā**tiādīni vuttatthāneva. **Ākaṅkheyya ceti** idam kasmā āraddhanti? Sīlanisaṃsadassanattham. Sacepi acirapabbajitānam vā duppaññānam vā evamassa “bhagavā ‘sīlam pūretha sīlam pūrethā’ti vadati, ko nu kho sīlapūraṇe ānisaṃso, ko viseso, kā vaḍḍhī”ti tesam dasa ānisaṃse dassetum evamāha – “appeva nāma etam sabrahmacārīnam piyamanāpatādiāsavakkhayapariyosānam ānisaṃsam sutvāpi sīlam paripūreyyu”nti.

Tattha **ākaṅkheyya ceti** yadi iccheyya. **Piyo cassanti** piyacakkhūhi sampassitabbo, sinehuppattiya padaṭṭhānabhūto bhavyeyyam. **Manāpoti** tesam manavaḍḍhanako, tesam vā manena pattabbo, mettacittena pharitabboti attho. **Garūti** tesam garuṭṭhāniyo pāsānacchattasadiyo. **Bhāvanīyoti** “addhāyamāyasmā jānam jānāti passam passatī”ti evam sambhāvanīyo. **Silesvevassa paripūrakārīti** catupārisuddhisīlesuyeva paripūrakārī assa, anūnena ākārena samannāgato bhavyeyyāti vuttam hoti. **Ajjhattam cetosamathamanyuttoti** attano cittasamathe yutto. **Anirākatajjhānoti** bahi anīhaṭajjhāno, avināsītajjhāno vā. **Vipassanāyāti** sattavidhāya anupassanāya. **Brūhetā suññāgārānanti** vaḍḍhetā suññāgārānam. Ettha ca samathavipassanāvasena kammaṭṭhānam gahetvā rattindivam suññāgārānam pavisitvā nisīdamāno bhikkhu “brūhetā suññāgārāna”nti veditabbo. Ayamettha saṅkhepo, vitthāro pana icchantena majjhimanikāyaṭṭhakathāya (ma. ni. aṭṭha. 1.64 ādayo) ākaṅkheyyasuttavaṇṇanāya oloketabbo.

Lābhīti ettha na bhagavā lābhanimittam sīlādiparipūraṇam katheti. Bhagavā hi “ghāsesanam chinnakatho, na vācam payutam bhaṇe”ti (su. ni. 716) evam sāvake ovadati. So katham lābhanimittam sīlādiparipūraṇam katheyya. Puggalajjhāsāyavasena panetam vuttam. Yesāhi evam ajjhāsāyo bhavyeyya “sace mayam catūhi paccayehi na kilameyyāma, sīlāni paripūretum sakkuṇeyyāmā”ti, tesam ajjhāsāyavasenevamāha. Apica sarasānisaṃso esa sīlassa yadidam cattāro paccayā nāma. Tathā hi paṇḍītanamussā koṭṭhādīsu ṭhapitam nīharitvā attanāpi aparibhuñjitvā sīlavantānam dentīti sīlassa sarasānisaṃsadassanatthampetaṃ vuttam.

Tatiyavāre **yesāhanti** yesam aham. **Tesam te kārāti** tesam devānam vā manussānam vā te mayi katā paccayadānakārā. **Mahapphalā hontu mahānisaṃsāti** lokiyasukhena phalabhūtena mahapphalā,

lokuttarena mahānisamsā. Ubhayaṃ vā etaṃ ekatthameva. Sīlādiguṇayuttassa hi kaṭacchubbhikkhāpi pañcaratanaṃattāya bhūmiyā paṇṇasālāpi katvā dinnā anekāni kappasahassāni duggativinipātato rakkhati, pariyoṣāne ca amatāya dhātuyā parinibbānassa paccayo hoti. “Khīrodanaṃ ahamadāsi”ntiādīni (vi. va. 413) cettha vatthūni. Sakalameva vā petavatthu vimānavatthu ca sādhaḥkaṃ.

Catutthavāre **petāti** peccabhavaṃ gatā. **Ñātīti** sassusasurapakkhikā. **Sālohitāti** ekalohitabaddhā pitipitāmahādayo. **Kālaṅkatāti** matā. **Tesaṃ tanti** tesaṃ taṃ mayi pasannacittaṃ, taṃ vā pasannena cittena anussaraṇaṃ. Yassa hi bhikkhuno kālakato pitā vā mātā vā “amhākaṃ ñātakatthero sīlavā kalyāṇadhammo”ti pasannacitto hutvā taṃ bhikkhuṃ anussarati, tassa so cittaṃpasādopi taṃ anussaraṇamattampi mahapphalaṃ mahānisamsameva hoti.

Aratiratisahoti nekkhammapaṭipattiyā aratiyā kāmaguṇesu ratiyā ca saho abhibhavitā ajjhottharitā. **Bhayabheravasahoti** ettha bhayaṃ cittutrāsopi ārammaṇampi, bheravaṃ ārammaṇameva.

2. Kaṇṭakasuttavaṇṇanā

72. Dutīye **abhiññātehi** gaganamajjhe puṇṇacando viya sūriyo viya ñātehi pākaṭehi. **Parapurāyāti** paraṃ vuccati pacchimabhāgo, purāti purimabhāgo, purato dhāvantaṃ pacchato anubandhantaṃ ca mahāparivārenāti attho. **Kaṇṭakoti** vijjhanatṭhena kaṇṭako. **Visūkadassananti** visūkabhūtaṃ dassanaṃ. **Mātugāmūpacāroti** mātugāmaṃ samīpacāritā.

3-4. Itṭhadhammasuttādivaṇṇanā

73-74. Tatiye **vaṇṇoti** sarīravaṇṇo. **Dhammāti** nava lokuttaradhammā. Catutthe **ariyāyāti** apothujjanikāya, sīlādīhi missakattā evaṃ vuttaṃ. **Sārādāyī ca hoti varadāyīti** sārassa ca varassa ca ādāyako hoti. Yo kāyassa sāro, yañcassa vamaṃ, taṃ gaṇhātīti attho.

5. Migasālāsuttavaṇṇanā

75. Pañcamassa ādimhi tāva yaṃ vattabbaṃ, taṃ chakkanipāte vuttameva. **Dussīlo hotīti**ādīsu pana **dussīloti** nissīlo. **Cetovimuttinti** phalasaṃmadhiṃ. **Paññāvimuttinti** phalaññaṃ. **Nappajānātīti** uggahaparipucchāvasena na jānāti. **Dussīlyaṃ aparisesaṃ nirujjhatīti** ettha pañca dussīlyāni tāva sotāpattimaggena pahīyanti, dasa arahattamaggena. Phalakkhaṇe tāni pahīnāni nāma honti. Phalakkhaṇaṃ sandhāya idha “nirujjhatī”ti vuttaṃ. Puthujjanassa sīlaṃ pañcahi kāraṇehi bhijjati pārājikāpajjanena sikkhāpaccakkhānena titthiyapakhandanaṃ arahattena maraṇenāti. Tattha purimā tayo bhāvanāparihānāya saṃvattanti, catuttho vaḍḍhiyā, pañcamaṃ neva hānāya na vaḍḍhiyā. Kathaṃ panetaṃ arahattena sīlaṃ bhijjatīti? Puthujjanassa hi sīlaṃ accantakusalameva hoti, arahattamaggo ca kusalākusalakammakkhayāya saṃvattatīti evaṃ tena taṃ bhijjati. **Savanenapi akataṃ hotīti** sotabbayuttakaṃ assutaṃ hoti. **Bāhusaccenapi akataṃ hotīti** ettha **bāhusaccanti** vīriyaṃ. Vīriyena kattabbayuttakaṃ akataṃ hoti, tassa akatattā saggatopi maggatopi parihāyati. **Diṭṭhiyāpi appaṭividdhaṃ hotīti** diṭṭhiyā paṭivijjhitabbaṃ appaṭividdhaṃ hoti apaccakkhakaṃ. **Sāmayikampi vimuttiṃ na labhatīti** kālānukālaṃ dhammassavanaṃ nissāya pītipāmojjaṃ na labhati. **Hānāya pareṭīti** hānāya pavattati.

Yathābhūtaṃ pajānātīti “sotāpattiphalaṃ patvā pañcavidhaṃ dussīlyaṃ aparisesaṃ nirujjhatī”ti uggahaparipucchāvasena jānāti. **Tassa savanenapi kataṃ hotīti** sotabbayuttakaṃ sutamaṃ hoti. **Bāhusaccenapi kataṃ hotīti** vīriyena kattabbayuttakaṃ antamaso dubbalavipassanāṃmattakampi kataṃ hoti. **Diṭṭhiyāpi suppaṭividdhaṃ hotīti** antamaso lokiyapaññāyapi paccayaṃpaṭivedho kato hoti. Imassa hi puggalassa paññā sīlaṃ paridhovati, so paññāparidhotena viṣesaṃ pāpuṇāti.

Pamāṇikāti puggalesu pamāṇaggāhakā. **Pamiṇantī**ti pametuṃ tuletuṃ arahanti. **Eko hīnoti** eko guṇehi hīno. **Paṇītoti** eko guṇehi paṇīto uttamo. **Taṃ hīti** taṃ pamāṇakaraṇaṃ. **Abhikkantataroti** sundarataro. **Paṇītaroti** uttamataro. **Dhammasoto nibbahatī**ti sūraṃ hutvā pavattamānaṃ vipassanāññaṃ nibbahati, ariyabhūmiṃ pāpeti. **Tadantaraṃ ko jāneyyāti** taṃ evaṃ kāraṇaṃ ko jāneyya. **Sīlavā hotīti** lokiyasīlena sīlavā hoti. **Yatthassa taṃ sīlanti** arahattavimuttiṃ patvā sīlaṃ aparisesampi nirujjhati nāma, tattha yutti vuttāyeva. Ito paresu dvīsu aṅgesu anāgāmiphalaṃ vimutti nāma, pañcame arahattameva. Sesamettha vuttanayānusāreṇeva veditabbaṃ. Chaṭṭhaṃ uttānatthameva.

7. Kākasuttavaṇṇanā

77. Sattame **dhamsī**ti guṇadhamsako. Kassaci guṇaṃ anādiyitvā hatthenapi gahito tassa sīsepi vaccaṃ karoti. **Pagabbhoti** pāgabbhiyena samannāgato. **Tintiṇoti** tintiṇaṃ vuccati taṇhā, tāya samannāgato, āsaṅkābahulo vā. **Luddoti** dāruṇo. **Akāruṇikoti** nikkāruṇiko. **Dubbaloti** abalo appathāmo. **Oravitāti** oravayutto oravanto carati. **Necayikoti** nicayakaro.

9. Āghātavatthusuttavaṇṇanā

79. Navame **aṭṭhāneti** akāraṇe. Sacittakapavattiyañhi “anattamaṃ me acari”tiādi kāraṇaṃ bhaveyya, khāṇupahaṭṭādisu taṃ natthi. Tasmā tattha āghāto aṭṭhāne āghāto nāma. Sesamaṃ sabbattha uttānatthamevāti.

Ākaṅkhavaggo tatiyo.

(9) 4. Theravaggo

1-3. Vāhanasuttādivaṇṇanā

81-83. Catutthassa paṭhame **vimariyādīkatena**ti kilesamariyādaṃ bhinditvā vimariyādaṃ katena. Dutiyamaṃ uttānatthameva. Tatiye **no ca payirupāsītāti** na upaṭṭhāti.

4. Byākaraṇasuttavaṇṇanā

84. Catutthe **jhāyī samāpattikusalo**ti jhānehi ca sampanno samāpattiyañca cheko. **Irīṇanti** tucchabhāvaṃ. **Vicinanti** guṇavicinaṃ nigguṇabhāvaṃ. Atha vā irīṇasaṅkhātaṃ araṇṇaṃ vicinasaṅkhātaṃ mahāgahanañca āpanno viya hoti. **Anayanti** avaḍḍhiṃ. **Byasananti** vināsaṃ. **Anayabyasananti** avaḍḍhivināsaṃ. **Kim nu khoti** kena kāraṇena.

5-6. Katthīsuttādivaṇṇanā

85-86. Pañcame **katthī hoti vikatthī**ti katthanasīlo hoti vikatthanasīlo, vivaṭaṃ katvā katheti. **Na santatakārī**ti na satatakārī. Chaṭṭhe **adhimānikoti** anadhigate adhigatamānena samannāgato. **Adhimānasaccoti** adhigatamānameva saccato vadati.

7. Nappiyasuttavaṇṇanā

87. Sattame **adhikaraṇiko hotīti** adhikaraṇakārako hoti. **Na piyatāyāti** na piyabhāvāya. **Na garutāyāti** na garubhāvāya. **Na sāmāññāyāti** na samaṇadhammabhāvāya. **Na ekībhāvāyāti** na nirantarabhāvāya. **Dhammānaṃ na nisāmaka**jātikoti navannaṃ lokuttaradhammānaṃ na nisāmanasabhāvo na upadhāraṇasabhāvo. **Na paṭisallānoti** na paṭisallīno. **Saṭṭheyyānīti** saṭṭhabhāvo. **Kūṭheyyānīti** kūṭabhāvo. **Jimheyyānīti** na ujubhāvā. **Vaṅkeyyānīti** vaṅkabhāvā.

8. Akkosakasuttavaṇṇanā

88. Aṭṭhame **akkosakaparibhāsako ariyūpavādī sabrahmacārinanti** ettha sabrahmacāripadaṃ akkosakaparibhāsakapadehi yojetabbaṃ “akkosako sabrahmacārīnaṃ, paribhāsako sabrahmacārīna”nti. Ariyānaṃ pana guṇe chindissāmīti antimavatthunā upavadanto ariyūpavādī nāma hoti. **Saddhammassa na vodāyanti**ti sikkhāttayasāṅkhātā sāsanasaddhammā assa vodānaṃ na gacchanti. **Rogātaṅkanti** ettha rogova kicchājīvitabhāvakaraṇena ātaṅkoti veditabbo.

9. Kokālikasuttavaṇṇanā

89. Navame **kokāliko bhikkhu yena bhagavā tenupasaṅkamīti** koyaṃ kokāliko, kasmā ca upasaṅkami? Ayaṃ kira kokālikaraṭṭhe kokālikanagare kokālikaseṭṭhissa putto pabbajitvā pitarā kārīte vihāre vasati cūlakokālikoti nāmena, na pana devadattassa sisso. So hi brāhmaṇaputto mahākokāliko nāma. Bhagavati pana sāvatthiyaṃ viharante dve aggasāvaka pañcamatthehi bhikkhusatehi saddhiṃ janapadacārikaṃ caramānā upakaṭṭhāya vassūpanāyikāya vivekavāsaṃ vasitukāmā te bhikkhū uyyojetvā attano pattacīvaramādāya tasmīṃ janapade taṃ nagaraṃ patvā vihāraṃ agamiṃsu. Tattha nesāṃ kokāliko vattaṃ akāsi. Tepi tena saddhiṃ sammoditvā, “āvuso, mayaṃ idha temāsaṃ vasissāma, mā no kassaci ārocesi”ti paṭiññaṃ gahetvā vasiṃsu. Vasitvā pavāraṇādivase pavāretvā “gacchāma mayaṃ, āvuso”ti kokālikaṃ āpucchīṃsu. Kokāliko “ajja, āvuso, ekadivasaṃ vasitvā sve gamissathā”ti vatvā dutiyadivase nagaraṃ pavisitvā manusse āmantesi – “āvuso, tumhe dve aggasāvake idha āgantvā vasamānēpi na jānātha, na te koci paccayenapi nimantēti”ti. Nagaravāsino “kahaṃ, bhante, therā, kasmā no nārocayitthā”ti? Kiṃ, āvuso, ārocitena, kiṃ na passatha dve bhikkhū therāsane nisīdante, ete aggasāvakāti. Te khippaṃ sannipatitvā sappiphāṇitādīni ceva cīvaradussāni ca saṃhariṃsu.

Kokāliko cintesi – “paramappicchā aggasāvaka payuttavācāya uppannālābhaṃ na sādīyissanti, asādīyantā “āvāsikassa dethā”ti vakkhanti”ti taṃ lābhaṃ gāhāpetvā therānaṃ santikaṃ agamāsi. Therā disvāva “ime paccayā neva amhākaṃ, na kokālikassa kappanti”ti paṭikkhipitvā pakkamiṃsu. Kokāliko “kathāñhi nāma sayāṃ aggaṇhantā mayhampi adāpetvā pakkamiṃsanti”ti āghātaṃ uppādesi. Tepi bhagavato santikaṃ gantvā bhagavantaṃ vanditvā puna attano parisāṃ ādāya janapadacārikaṃ carantā anupubbena tasmīṃ raṭṭhe tameva nagaraṃ paccāgamiṃsu. Nāgarā there sañjānitvā saha parikkhārehi dānaṃ sajjitvā nagaramajjhe maṇḍapaṃ katvā dānaṃ adāsi, therānaṃca parikkhāre upanāmesuṃ. Therā bhikkhusaṅghassa niyyādayiṃsu. Taṃ disvā kokāliko cintesi – “ime pubbe appicchā ahesuṃ, idāni pāpicchā jātā, pubbepi appicchasantuṭṭhapavivittasadisāva maññe”ti there upasaṅkamitvā, “āvuso, tumhe pubbe appicchā viya, idāni pana pāpabhikkhū jātatthā”ti vatvā “mūlaṭṭhāneyeva nesāṃ paṭiṭṭhaṃ bhindissāmi”ti taramānarūpo nikkhamitvā yena bhagavā tenupasaṅkami. Ayamesa kokāliko, iminā ca kāraṇena upasaṅkamīti veditabbo.

Bhagavā taṃ turitaturitaṃ āgacchantāṃ disvāva āvajjento aññāsi “ayaṃ aggasāvake akkositukāmo āgato, sakkā nu kho paṭisedhetu”nti. Tato “na sakkā paṭisedhetuṃ, thesū aparajjhivā āgato, ekaṃsena pana padumaniraye nibbattissati”ti disvā “sāriputtamoggallānēpi nāma garahantaṃ sutvā na nisedhetī”ti vādamocanattaṃ ariyūpavādassa ca mahāsāvajjabhāvadassanattaṃ **mā hevanti** tikkhattuṃ paṭisedhesi. Tattha **mā hevanti** mā evaṃ abhaṇi. **Saddhāyikoti** saddhāya āgamakaro pasādāvaho, **saddhātabbavacano** vā. **Paccayikoti** pattiyāyitabbavacano.

Pakkāmīti kammānubhāvena codiyamāno pakkāmi. Okāsakatañhi kammaṃ na sakkā paṭibāhituṃ. **Acirapakkantassāti** pakkantassa sato nacireneva. **Sabbo kāyo phuṭo ahoṣīti** kesaggamattampi okāsaṃ avajjetvā sakalasarīraṃ aṭṭhīni bhinditvā uggaṭhāhi pīlakāhi ajjhotthaṃ ahoṣi. Yasmā pana buddhānubhāvena tathārūpaṃ kammaṃ buddhānaṃ sammukhībhāve vipākaṃ dātuṃ na sakkoti, dassanūpacāre vijahitamatte deti, tasmā tassa acirapakkantassa pīlakā utṭhahiṃsu. **Kalāyamattiyoti** caṇakamattiyoti. **Beluvasalāṭukamattiyoti** taruṇabeluvamattiyoti. **Pabhijjimsūti** bhijjimsūti. Tāsu bhinnāsu sakalasarīraṃ panasapakkaṃ viya ahoṣi. So pakkena gattena jetavanadvārakoṭṭhake visagilito maccho

viya kadalipattesu nipajji. Atha dhammassavanattham āgatāgatā manussā “dhi kokālika, dhi kokālika, ayuttamakāsi, attanoyeva mukham nissāya anayabyasanam pattosī”ti āhamṣu. Tesam saddam sutvā ārakkhadevatā dhikkāramakamṣu, ārakkhadevatānam ākāsadevatāti iminā upāyena yāva akaniṭṭhabhavanā ekadhikkāro udapādi.

Turūti kokālikassa upajjhāyo turutthero nāma anāgāmiphalam vatvā brahmaloke nibbato. So bhummattṭhadevatā ādim katvā “ayuttam kokālikena katam aggasāvake antimavatthunā abbhācikkhantenā”ti paramparāya brahmalokasampattam tam saddam sutvā “mā mayham passantasseva varāko nassi, ovaḍissāmi nam thesu cittappasādatthāyā”ti āgantvā tassa purato aṭṭhāsi. Tam sandhāyetam vuttam – “turū paccekabrahmā”ti. **Pesalāti** piyasīlā. **Kosi tvam, āvusoti** nisinnakova kabarakkhāni ummīletvā evamāha. **Passa yāvañca te idam aparaddhati** yattakam tayā aparaddham, attano nalāṭe mahāgaṇḍam apassanto sāsapamattāya pīlakāya mam codetabbam maññasīti āha.

Atha nam “adiṭṭhippatto ayam kokālika, gilitaviso viya na kassaci vacanam na karissatī”ti ñatvā **purisassa hīti**ādīmāha. Tattha **kuṭhārīti** kuṭhārisadisā pharusavācā. **Chindatīti** kusalamūlasaṅkhāte mūleyeva nikantati. **Nindiyanti** ninditabbam dussīlapuggalam. **Pasamsatīti** uttamatthe sambhāvetvā khīṇāsavoti vadati. **Tam vā nindati yo pasamsiyoti** yo vā pasamsitabbo khīṇāsavo, tam antimavatthunā codento “dussīlo aya”nti vadati. **Vicināti mukhena so kalinti** so tam aparādham mukhena vicināti nāma. **Kalinā tenāti** tena aparādhena sukham na vindati. Nindiyapasamsāya hi pasamsiyanindāya ca samakova vipāko.

Sabbassāpi sahāpi attanāti sabbena sakena dhanenapi attanāpi saddhim yo akkhesu dhanaparājayo nāma, ayam appamattako aparādho. **Yo sugatesūti** yo pana sammaggatesu puggalesu cittam dūseyya, ayam cittaḍosova tato kalito mahantataro kali.

Idāni tassa mahantatarabhāvam dassento **satham sahasānanti**ādīmāha. Tattha **satham sahasānanti** nirabbudagaṇāyā sataśahassañca. **Chattimsatīti** aparāni chattimsati nirabbudāni. **Pañca cāti** abbudagaṇāyā pañca abbudāni. **Yamariyagarahīti** yaṃ ariye garahanto nirayaṃ upapajjati, tattha ettakam āyuppanānti attho.

Kālamakāsīti upajjhāye pakkante kālam akāsi. **Padumanirayanti** pāṭiyekko padumanirayo nāma natthi, avīcimahānirayasmiṃyeva pana padumagaṇāyā paccitabbe ekasmiṃ ṭhāne nibbatti.

Vīsati khārikoti māgadhakena patthena cattāro patthā, kosalaratthe eko pattho hoti. Tena patthena cattāro patthā ālhakam, cattāri ālhakāni doṇam, catudoṇā mānikā, catumānikā khārī, tāya khāriyā vīsati khāriko. **Tilavāhoti** māgadhakānam sukhumatilānam tilasakaṭam. **Abbudo nirayoti** abbudo nāma pāṭiyekko nirayo natthi, avīcimhiyeva pana abbudagaṇāyā paccitabbaṭṭhānassetam nāmam. **Nirabbudādīsipi** eseva nayo.

Vassagaṇānāpi panettha evam veditabbā – yatheva hi satham sataśahassāni koṭi hoti, evam satham sataśahassakoṭiyo pakoṭi nāma hoti, satham sataśahassapakoṭiyo koṭipakoṭi nāma, satham sataśahassakoṭipakoṭiyo nahutam, satham sataśahassanahutāni ninnahutam, satham sataśahassaninnahutāni ekaṃ abbudam, tato vīsati gaṇam nirabbudam, esa nayo sabbatthāti. Dasamam heṭṭhā vuttanayeneva veditabbam. Sesam sabbattha uttānatthamevāti.

Theravaggo catuttho.

(10) 5. Upālivaggo

1-2. Kāmabhogīsuttādivaṇṇanā

91-92. Pañcamassa paṭhame **sāhasenā**ti sāhasiyakammena. Dutiye **bhayānī**ti cittutrāsabhayāni. **Verānī**ti akusalaverapuggalaverāni. **Ariyo cassa nāyoti** saha vipassanāya maggo. **Iti imasmim sati idaṃ hotī**ti evaṃ imasmim avijjādike kāraṇe sati idaṃ saṅkhārādikaṃ phalaṃ hoti. **Imassuppādā idaṃ uppajjati**ti yo yassa saha jātapaccayo hoti, tassa uppādā itaraṃ uppajjati nāma. **Imasmim asati**ti avijjādike kāraṇe asati saṅkhārādikaṃ phalaṃ na hoti. **Imassa nirodhā**ti kāraṇassa appavattiyā phalassa appavatti hoti.

3. Kiṃdiṭṭhikasuttavaṇṇanā

93. Tatiye **saṅṭhāpesunti** iriyāpathampi vacanapathampi saṅṭhāpesuṃ. **Appasaddavinī**ti appasaddena mattabhāṇinā satthārā vinīṭā. **Paratoghosa**pacca^{yā} vāti parassa vā vacanakāraṇā. **Cetayitā**ti pakappitā. **Maṅkubhūtā**ti domanassappattā nittejā. **Pattakkhandhā**ti patitakkhandhā. **Sahadhammenā**ti sahetukena kāraṇena vacanena.

4. Vajjiyamāhitasuttavaṇṇanā

94. Catutthe **vajjiyamāhitoti** evaṃnāmako. **Sabbaṃ tapanti** sabbameva dukkarakārikaṃ. **Sabbaṃ tapassinti** sabbam tapanissitakam. **Lūkhājivinti** dukkarakārikajīvikānuyogaṃ anuyuttaṃ. **Gārayhanti** garahitabbayuttakam. **Pasaṃsiyanti** pasaṃsitabbayuttakam. **Venayikoti** sayam avinīto aññehi vinetabbo. **Apaññattikoti** na kiñci paññāpetuṃ sakkoti. Atha vā **venayikoti** sattavināsako. **Apaññattikoti** apaccakkaṃ nibbānaṃ paññāpeti, sayamkatādīsu kiñci paññāpetuṃ na sakkoti. **Na so bhagavā venayikoti** so bhagavā evaṃ yāthāvato ñatvā kusalākusalaṃ paññāpento na aññena vinetabbo na aññasikkhito. Ye ca dhamme upādāya satto paññāpiyati, tesam paññāpanato na sattavināsako, suvinīto susikkhito sattavināyakoti attho. Tassa ca paññattiyō sapaññattiyoyevāti dasseti. **Vimuttiṃ vimuccato akusalā dhammā**ti micchādiṭṭhisaṅkhātāṃ cittassa adhimuttiṃ adhimuccato akusalā dhammā vaḍḍhanti nāma, taṃ sandhāyetaṃ vuttaṃ. Sāsane pana cittassa vimuttisaṅkhāto vimutti kusalānaṃyeva paccayo hoti.

5. Uttiyasuttavaṇṇanā

95. Pañcame **tunhī aho**sīti sattūpaladdhiyaṃ ṭhatvā apuccham pucchati tunhī aho. **Sabbasāmukkamsikaṃ vata meti** mayā sabbapucchānaṃ uttamapuccham pucchito samaṇo gotamo saṃsādeti no vissajjeti, nūna na visahati na sakkoti vissajjetunti evaṃ pāpikaṃ diṭṭhiṃ mā paṭilabhīti. **Tadassā**ti taṃ evaṃ uppannaṃ diṭṭhigataṃ bhavēyya. **Paccantimanti** yasmā majjhimadesa nagarassa uddhāpādīni thirāni vā hontu dubbalāni vā, sabbaso vā pana mā hontu, corāsankā na hoti. Tasmā taṃ aggahetvā “paccantimaṃ nagara”nti āha. **Daḷhuddhāpanti** thirapākārapādaṃ. **Daḷhapākāra**torananti thirapākārañceva thirapīṭṭhisaṅghāṭaṇca. **Ekadvāranti** kasmā āha? Bahudvārasmiñhi nagare bahūhi paṇḍitadovārikehi bhavitabbaṃ, ekadvāre ekova vaṭṭati. Tathāgatassa ca paññāya añño sadiso natthi. Tasmā satthu paṇḍitabhāvassa opammatthaṃ ekamēva dovārikaṃ dassetuṃ “ekadvāra”nti āha. **Paṇḍitoti** paṇḍiccena samannāgato. **Byattoti** veyyattiyena samannāgato. **Medhāvī**ti ṭhānuppattiyapaññāsaṅkhātāya medhāya samannāgato. **Anupariyāyapathanti** anupariyāyanāmakaṃ maggaṃ. **Pākārasandhinti** dvinnaṃ iṭṭhakānaṃ apagataṭṭhānaṃ. **Pākāravivaranti** pākārassa chinnaṭṭhānaṃ. **Tadevetam pañhanti** taṃyeva “sassato loko”tiādīnā nayena puṭṭhaṃ ṭhapanīyapañhaṃ punapi pucchi. **Sabbo ca tena lokoti** sattūpaladdhiyaṃyeva ṭhatvā aññenākārena pucchati dasseti.

6. Kokanudasuttavaṇṇanā

96. Chaṭṭhe **pubbāpayamānoti** pubbasadisāni nirudakāni kurumāno. **Kvettha, āvusoti** ko ettha, āvuso. **Yāvatā, āvuso, diṭṭhī**ti yattikā dvāsaṭṭhividhāpi diṭṭhi nāma atthi. **Yāvatā diṭṭhiṭṭhānanti** “khandhāpi diṭṭhiṭṭhānaṃ, avijjāpi, phassopi, saññāpi, vitakkopi ayonisomanasikāropi, pāpamittopi, paratoghosopi diṭṭhiṭṭhāna”nti evaṃ yattakam aṭṭhavidhampi diṭṭhiṭṭhānaṃ diṭṭhikāraṇaṃ nāma atthi.

Diṭṭhādhiṭṭhānanti diṭṭhīnaṃ adhiṭṭhānaṃ, adhiṭṭhatvā adhibhavitvā pavattāya diṭṭhiyā etaṃ nāmaṃ. **Diṭṭhipariyuṭṭhānanti** “katamāni aṭṭhārasa diṭṭhipariyuṭṭhānāni? Yā diṭṭhi diṭṭhigataṃ diṭṭhigahanaṃ diṭṭhikantāraṃ diṭṭhivisūkaṃ diṭṭhivipphanditaṃ diṭṭhisamyojanaṃ diṭṭhisallaṃ diṭṭhisambādho diṭṭhipalibodho diṭṭhibandhanaṃ diṭṭhipapāto diṭṭhānusayo diṭṭhisantāpo diṭṭhipariḷāho diṭṭhigantho diṭṭhupādānaṃ diṭṭhābhiniveso diṭṭhiparāmāso. Imāni aṭṭhārasa diṭṭhipariyuṭṭhānāni”ti evaṃ vuttaṃ diṭṭhipariyuṭṭhānaṃ. **Samuṭṭhānanti** diṭṭhiṭṭhānasseva vevacanaṃ. Vuttañhettaṃ – “khandhā paccayo diṭṭhīnaṃ upādāya samuṭṭhānaṭṭhenā”ti (paṭi. ma. 1.124) sabbhaṃ vitthāretabbaṃ. Sotāpattimaggo pana **diṭṭhisamugghāto** nāma sabbadiṭṭhīnaṃ samugghātakattā. **Tamahanti** taṃ sabbhaṃ ahaṃ jānāmi. **Kyāhaṃ vakkhāmi**ti kiṃkāraṇā ahaṃ vakkhāmi.

7-8. Āhuneyyasuttādivaṇṇanā

97-98. Sattame **sammādiṭṭhikoti** yāthāvadiṭṭhiko. Aṭṭhame **adhikaraṇasamuppādavūpasamakusaloti** catunnaṃ adhikaraṇānaṃ mūlaṃ gahetvā vūpasamena samuppādavūpasamakusalo hoti.

9. Upālisuttavaṇṇanā

99. Navame **durabhisambhavānīti** sambhavituṃ dukkhāni dussahāni, na sakkā appesakkhehi ajjhogāhitunti vuttaṃ hoti. **Araññavanapatthānīti** araññāni ca vanapatthāni ca. Araññakaṅganipphādanena araññāni, gāmantāṃ atikkamitvā manussānaṃ anupacāraṭṭhānabhāvena vanapatthāni. **Pantānīti** pariyantāni atidūrāni. **Dukkaraṃ pavivekanti** kāyaviveko dukkaro. **Durabhiramanti** abhiramituṃ na sukaraṃ. **Ekatteti** ekābhāve. Kiṃ dasseti? Kāyaviveke katepi tattha cittaṃ abhiramāpetuṃ dukkaraṃ. Dvayaṃdvayārāmo hi ayaṃ lokoti. **Haranti maññeti** haranti viya ghasanti viya. **Manoti** cittaṃ. **Samādhim alabhamānassāti** upacārasamādhim vā appanāsamādhim vā alabhantassa. Kiṃ dasseti? Īdisassa bhikkhuno tiṇapaṇṇamigādisaddehi vividhehi ca bhīsanakehi vanāni cittaṃ vikkhipanti maññeti. **Saṃsīdissatīti** kāmavitakkena saṃsīdissati. **Uplavissatīti** byāpādavihiṃsāvītakkehi uddhaṃ plavissati.

Kaṇṇasaṃdhovikanti kaṇṇe dhovantena kīḷitabbaṃ. **Piṭṭhisamdhovikanti** piṭṭhiṃ dhovantena kīḷitabbaṃ. Tattha udakaṃ soṇḍāya gahetvā dvīsu kaṇṇesu āsiñcanaṃ kaṇṇasaṃdhovikā nāma, piṭṭhiyaṃ āsiñcanaṃ piṭṭhisamdhovikā nāma. **Gādhaṃ vindatīti** patiṭṭhaṃ labhati. **Ko cāhaṃ ko ca hatthināgoti** ahaṃ ko, hatthināgo ko, ahampi tiracchānagato, ayampi, mayhampi cattāro pādā, imassapi, nanu ubhopi mayāṃ samasamāti.

Vaṅkanti kumārakānaṃ kīḷanakaṃ khuddakanaṅgalaṃ. **Ghaṭikanti** dīghadaṇḍakena rassadaṇḍakaṃ paharaṇakīḷaṃ. **Mokkhacikanti** saṃparivattakakīḷaṃ, ākāse daṇḍakaṃ gahetvā bhūmiyaṃ vā sīsaṃ ṭhapetvā heṭṭhupariyabhāvena parivattanakīḷanti vuttaṃ hoti. **Ciṅgulakanti** tālapaṇṇādīhi kataṃ vātappahārena paribbhamanacakkaṃ. **Pattālhakaṃ** vuccati paṇṇanāḷi, tāya vālukādīni minantā kīḷanti. **Rathakanti** khuddakarathaṃ. **Dhanukanti** khuddakadhanumeva.

Idha kho pana voti ettha voti nipātamattaṃ, idha kho panāti attho. **Īngha tvaṃ, upāli, saṅghe viharāhīti** ettha **īnghāti** codanatthe nipāto. Tena therāṃ saṅghamajjhe viharatthāya codeti, nāssa araññāvāsaṃ anujānāti. Kasmā? Araññāsenāsane vasato kirassa vāsadhurameva pūrissati, na ganthadhuraṃ. Saṅghamajjhe vasanto pana dve dhurāni pūretvā arahattaṃ pāpuṇissati, vinayapītake ca pāmokkho bhavissati. Athassāhaṃ parisamajjhe pubbapatthanaṃ pubbābhiniḷhāraṇca kathetvā imaṃ bhikkhuṃ vinayadharānaṃ aggaṭṭhāne ṭhapessāmīti imamatthaṃ passamāno sathā therassa araññāvāsaṃ nānujānāti. Dasamaṃ uttānatthamevāti.

Upālivaggo pañcamaṃ.

Dutiyapaṇṇāsakaṃ niṭṭhitam.

3. Tatiyapaṇṇāsakaṃ

(11) 1. Samaṇasaññāvaggo

1. Samaṇasaññāsuttavaṇṇanā

101. Tatiyassa paṭhame **samaṇasaññā**ti samaṇānaṃ uppajjanakasaññā. **Santatakārī**ti nirantarakārī. **Abyāpajjhoti** niddukkho. **Idamatthaṃtissa hotī**ti idamatthaṃ ime paccayāti evamassa jīvitaparikkhāresu hoti, paccavekkhitaparibhogam paribhuñjatīti attho. Dutiyam uttānatthameva.

3. Micchattasuttavaṇṇanā

103. Tatiye **virāadhanā hotī**ti saggato maggato ca virajjhanam hoti. **No ārāadhanā**ti na sampādanā na paripūrakārītā hoti. **Pahotī**ti pavattati.

4-5. Bijasuttādivaṇṇanā

104-105. Catutthe **yathādiṭṭhi samattam samādinanti** diṭṭhānurūpena paripuṇṇam samādinam sakalam gahitam. **Cetanā**ti tīsu dvāresu nibbattitacetanāva gahitā. **Patthanā**ti “evarūpo siya”nti evam patthanā. **Paṇidhī**ti “devo vā bhavissāmi devaññataro vā”ti cittaṭṭhapanā. **Saṅkhārā**ti sampayuttakasaṅkhārā. Pañcame purecārikatṭhena **pubbaṅgamā**. **Anvadevā**ti tam anubandhamānameva.

6. Nijjarasuttavaṇṇanā

106. Chaṭṭhe **nijjaravatthūnī**ti nijjarakāraṇāni. **Micchādiṭṭhi nijjiṇṇā hotī**ti ayam hetthā vipassanāyapi nijjiṇṇā eva pahīnā. Kasmā puna gahitāti? Asamucchinnatā. Vipassanāya hi kiñcāpi nijjiṇṇā, na pana samucchinnā. Maggo pana uppajjitvā tam samucchindati, na puna vuṭṭhātuṃ deti. Tasmā puna gahitā. Evam sabbapadesu yojetabbo. Ettha ca sammāvimuttipaccayā catusaṭṭhi dhammā bhāvanāpāripūriṃ gacchanti. Katame catusaṭṭhi? Sotāpattimaggakkhaṇe adhimokkhatṭhena saddhindriyam paripūrati, paggahatṭhena vīriyindriyam, upaṭṭhānatṭhena satindriyam, avikkhepatṭhena samādhindriyam, dassanatṭhena paññindriyam paripūreti, vijānanatṭhena manindriyam, abhinandanatṭhena somanassindriyam, pavattasantatiādhipateyyatṭhena jīvitindriyam paripūrati...pe... arahattaphalakkhaṇe adhimokkhatṭhena saddhindriyam...pe... pavattasantatiādhipateyyatṭhena jīvitindriyam paripūrati evam catūsu ca maggesu catūsu ca phalesu aṭṭhatṭha hutvā catusaṭṭhi dhammā pāripūriṃ gacchanti.

7. Dhovanāsuttavaṇṇanā

107. Sattame **dhovananti** aṭṭhidhovanam. Tasmīhi janapade manussā ñātake mate na jhāpenti, āvātam pana khaṇitvā bhūmiyam nidahanti. Atha nesam pūtibhūtānam aṭṭhīni nīharitvā dhovitvā paṭipāṭiyā ussāpetvā gandhamālehi pūjetvā ṭhapenti. Nakkhatte patte tāni aṭṭhīni gahetvā rodanti paridevanti, tato nakkhattam kīlanti.

8-10. Tikicchakasuttādivaṇṇanā

108-110. Aṭṭhame **virecananti** dosanīharaṇabhesajjam. **Virittā hotī**ti nīhaṭā hoti panuditā. Navame **vamananti** vamanakaraṇabhesajjam. Dasame **niddhamanīyā**ti niddhamitabbā. **Niddhantā**ti

niddhamitā.

11. Paṭhamaasekhasuttavaṇṇanā

111. Ekādasame aṅgaparipūraṇattham sammādiṭṭhiyeva **sammāñāṇanti** vuttā. Evamete sabbepi arahattaphaladhammā asekhā, asekhassa pavattattā paccavekkhaṇañāṇampi asekhanti vuttaṃ.

12. Dutyaasekhasuttavaṇṇanā

112. Dvādasame **asekhiyāti** asekhāyeva, asekhasantakā vā. Iminā suttana khīṇāsavova kathitoti.

Samaṇasaññāvaggo paṭhamo.

(12) 2. Paccorohaṇivaggo

1-2. Adhammasuttadvayaṇṇanā

113-114. Dutiyassa paṭhame pāṭiyekkaṃ pucchā ca vissajjanā ca katā. Dutiye ekatova.

3. Tatiyaadhammasuttavaṇṇanā

115. Tatiye **uddesaṃ uddisitvāti** mātikaṃ nikkhipitvā. **Satthu ceva saṃvaṇṇitoti** pañcasu ṭhānesu etadagge ṭhapentena sathhārā saṃvaṇṇito. **Sambhāvitoti** guṇasambhāvanāya sambhāvito. **Pahotīti** sakkoti. **Atisitivāti** atikkamitvā. **Jānaṃ jānāti** jānitabbakaṃ jānāti. **Passaṃ passatīti** passitabbakaṃ passati. **Cakkhubhūtoti** cakkhu viya bhūto jāto nibbatta. **Ñāṇabhūtoti** ñāṇasabhāvo. **Dhammabhūtoti** dhammasabhāvo. **Brahmabhūtoti** seṭṭhasabhāvo. **Vattāti** vattum samattho. **Pavattāti** pavattetum samattho. **Atthassa ninnetāti** attham nīharitvā dassetā. **Yathā no bhagavāti** yathā amhākaṃ bhagavā byākareyya.

4. Ajitasuttavaṇṇanā

116. Catutthe **ajitoti** evaṃnāmako. **Cittaṭṭhānasatānīti** cittuppādasatāni. **Yehīti** yehi cittaṭṭhānasatehi anuyuñjīyamānā. **Upāraddhāva jānanti upāraddhasmāti** viraddhā niggahitā evaṃ jānanti “viraddhā mayam, niggahitā mayam, āropito no doso”’ti. **Paṇḍitavatthūnīti** paṇḍitabhāvatthāya kāraṇāni.

5-6. Saṅgārasuttādivaṇṇanā

117-118. Pañcame **orimaṃ tīranti** lokiyaṃ orimatīraṃ. **Pārimaṃ tīranti** lokuttaraṃ pārimatīraṃ. **Pāragāminoti** nibbānagāmino. **Tīramevānudhāvātīti** sakkāyadiṭṭhitīraṃyeva anudhāvati. **Dhamme dhammānuvattinoti** sammā akkhāte navavidhe lokuttaradhamme anudhammavattino, tassa dhammassānucchavikāya sahasīlāya pubbabhāgapaṭipattiyā pavattamānā. **Maccudheyyaṃ suduttaranti** maccuno ṭhānabhūtaṃ tebhūmakavaṭṭaṃ suduttaraṃ taritvā. **Pāramessantīti** nibbānaṃ pāpuṇissanti.

Okā anokamāgammāti vaṭṭato vivaṭṭaṃ āgamma. **Viveke yattha dūramanti** yasmim kāyacittaupadhiviveke durabhiraṃmaṃ, tatrābhīratimiccheyya. **Hitvā kāmeti** duvidhepi kāme pahāya. **Akiñcanoti** nippalibodho. **Ādānapaṭinissageti** gahaṇapaṭinissaggasaṅkhāte nibbāne. **Anupādāya ye ratāti** catūhi upādānehi kiñcīpi anupādiyitvā ye abhiratā. **Parinibbutāti** te apaccayaparinibbānena parinibbutā nāmāti veditabbā. Chaṭṭhaṃ bhikkhūnaṃ desitaṃ.

7-8. Paccorohaṇīsuttadvayaṇṇanā

119-120. Sattame **paccorohaṇī**ti pāpassa paccorohaṇaṃ. **Pattharivā**ti santharivā. **Antarā ca velaṃ antarā ca agyāgāranti** vālikārāsissa ca aggiagārassa ca antare. Aṭṭhamaṃ bhikkhusaṅghassa desitaṃ. Sesamaṃ sabbattha uttānatthamevāti.

Paccorohaṇivaggo dutiyo.

(13) 3. Parisuddhavaggavaṇṇanā

123. Tatiyassa paṭhame **parisuddhā**ti nimmalā. **Pariyodātā**ti pabhassarā. Dutiyādīni uttānatthānevāti.

Parisuddhavaggo tatiyo.

(14) 4. Sādhuvaggavaṇṇanā

134. Catutthassa paṭhame **sādh**unti bhaddakaṃ siliṭṭhakaṃ. Dutiyādīni uttānatthānevāti. Ariyamaggavaggo uttānatthoyevāti.

Sādhuvaggo catuttho.

Tatiyapaṇṇāsakaṃ niṭṭhitaṃ.

4. Catutthapaṇṇāsakaṃ

155. Catutthassa paṭhamādīni uttānatthānevāti.

8. Kammanidānasuttavaṇṇanā

174. Aṭṭhame **lobhahetukampī**ti pāṇātipātassa lobho upanissayakoṭiyā hetu hoti dosamohasampayuttoṃ. Iminā upāyena sabbattha attho veditaḃo.

9. Parikkamanasuttavaṇṇanā

175. Navame **parikkamaṃ hotī**ti parivajjanaṃ hoti.

10. Cundasuttavaṇṇanā

176. Dasame **kammāraputtassā**ti suvaṇṇakāraputtassa. **Kassa no tvanti** kassa nu tvamaṃ. **Pacchābhūmakā**ti pacchābhūmivāsikā. **Kamaṇḍalukā**ti kamaṇḍaludhārino. **Sevālamālikā**ti sevālamālā viya dhārenti. Sevālapaṇānīvāsītātipi vuttameva. **Udakorohakā**ti sāyatatiyakaṃ udakorohanānuyogamanuyuttā. **Āmaseyyāsī**ti hatthena parimajjeyyāsi.

11. Jāṇussoṇisuttavaṇṇanā

177. Ekādasame **upakappatū**ti pāpuṇātu. **Ṭhā**neti okāse. **No aṭṭhā**neti no anokāse. **Nerayikānaṃ āhāro** nāma tattha nibbattanakammameva. Teneva hi te tattha yāpenti. **Tiracchānayanikānaṃ** pana tiṇapaṇṇādivasena āhāro veditaḃo. **Manussānaṃ** odanakummāsādivasena, **devānaṃ**

sudhābhojanādivasena, **pettivesayikānaṃ** kheḷasiṅghāṇikādivasena. **Yaṃ vā panassa ito anuppaveccantīti** yaṃ tassa mittādayo ito dadantā anupavesenti. Pettivesayikā eva hi paradattūpajīvino honti, na aññesaṃ parehi dinnāṃ upakappati. **Dāyakopi anipphaloti** yaṃ sandhāya taṃ dānaṃ dinnāṃ, tassa upakappatu vā mā vā, dāyakena pana na sakkā nipphalena bhavituṃ, dāyako tassa dānassa vipākaṃ labhatīyeva.

Aṭṭhānepi bhavaṃ gotamo parikappaṃ vadatīti anokāse uppannepi tasmim̐ ñātake bhavaṃ gotamo dānassa phalaṃ parikappetiyeva paññāpetīyevāti pucchati. Brāhmaṇassa hi “evaṃ dinnassa dānassa phalaṃ dāyako na labhatī”ti laddhi. Athassa bhagavā pañhaṃ paṭijānitvā “dāyako nāma yattha katthaci puññaphalūpajīvitṭhāne nibbato dānassa phalaṃ labhatīyevā”ti dassetuṃ **idha brāhmaṇāti**ādīmāha. **So tattha lābhī hotīti** so tattha hatthiyoniyāṃ nibbatoṃ maṅgalahatthiṭṭhānaṃ patvā lābhī hoti. Assādīsupi eseva nayo. Sādhuvaggo uttānatthoyevāti.

Jānussonivaggo dutiyo.

Catutthapaṇṇāsakaṃ niṭṭhitāṃ.

(21) 1. Karajakāyavaggo

211. Pañcamassa paṭhamādīni uttānatthāneva.

6. Saṃsappanīyasuttavaṇṇanā

216. Chaṭṭhe **saṃsappanīyapariyāyaṃ vo, bhikkhave, dhammapariyāyanti** saṃsappanassa kāraṇaṃ desanāsaṅkhātāṃ dhammadesanaṃ. **Saṃsappatīti** taṃ kammaṃ karonto āsappati parisappati vipphandati. **Jimhā gatīti** tena kammena yaṃ gatiṃ gamissati, sā jimhā hoti. **Jimhupapattīti** tassa yaṃ gatiṃ upapajjissati, sāpi jimhāva hoti. **Saṃsappajātikāti** saṃsappanasabhāvā. **Bhūtā bhūtassa upapatti hotīti** bhūtasmaṃ sabhāvato vijjamaṇakammā sattassa nibbatti hoti. **Phassā phusantīti** vipākaphassā phusanti.

7-8. Sañcetanikasuttadvayaṇṇanā

217-218. Sattame **sañcetanikānanti** cetetvā pakappetvā katānaṃ. **Upacitānanti** citānaṃ vaḍḍhitānaṃ. **Appaṭisaṃveditvāti** tesāṃ kammānaṃ vipākaṃ avēdiyitvā. **Byantībhāvanti** vigatantabhāvāṃ tesāṃ kammānaṃ paricchedaparivaṭumatakāraṇaṃ. **Taṅca kho diṭṭheva dhammeti** taṅca kho vipākaṃ diṭṭhadhammavedanīyaṃ diṭṭheva dhamme. **Upapajjanti** upapajjavedanīyaṃ anantare attabhāve. **Apāre vā pariyāyenti** aparapariyāyavedanīyaṃ pana saṃsārappavatte sati saḥassimepi attabhāveti. Iminā idaṃ dasseti “saṃsārappavatte paṭiladdhaviṭṭhārahakamme na vijjati so jagatippadeso, yattha ṭhito mucceyya pāpakammā”ti. **Tividhāti** tippakārā. **Kāyakammantasandosaḥāpattīti** kāyakammantasāṅkhātā vipatti. Iminā nayena sabbapadāni veditabbāni. Aṭṭhame **apaṇṇako maṇīti** samantato caturasso pāsako.

9. Karajakāyasuttavaṇṇanā

219. Navame **dukkhassāti** vipākadukkhassa, vaṭṭadukkhasseva vā. Imasmim̐ sutte maṇiopammaṃ natthi. **Evaṃ vigatābhijjhōti evanti** nipātamattaṃ. Yathā vā mettaṃ bhāventā vigatābhijjhā bhavanti, evaṃ vigatābhijjhō. Evamassa vigatābhijjhātādīhi nīvaraṇavikkhambhanaṃ dassetvā idāni akusalanissaraṇāni kathento **mettāsahagatenāti**ādīmāha. **Appamaṇanti** appamaṇasattārammaṇatāya ciṅṇavasitāya vā appamaṇaṃ. **Pamaṇakatāṃ kammaṃ** nāma kāmāvacarakammaṃ. **Na taṃ tatrāvatiṭṭhatīti** taṃ mahogho parittaṃ udakaṃ viya attano okāsaṃ gahetvā ṭhātuṃ na sakkoti, atha kho

naṃ oghe parittaṃ udakaṃ viya idameva appamaṇaṃ kammaṃ ajjhottharivā attano vipākaṃ nibbatteti. **Daharataggeti** daharakālato paṭṭhāya.

Nāyaṃ kāyo ādāyagamaniyoti imaṃ kāyaṃ gahetvā paralokaṃ gantuṃ nāma na sakkāti attho. **Cittantaroti** citta-kāraṇo, atha vā citteneva antariko. Ekasseva hi cuticittassa anantarā dutiye paṭisandhicitte devo nāma hoti, nerayiko nāma hoti, tiracchānagato nāma hoti. Purimanayepi cittena kāraṇabhūtena devo nerayiko vā hotīti attho. **Sabbaṃ taṃ idha vedanīyanti** diṭṭhadhammavedanīyakoṭṭhāsavanetaṃ vuttaṃ. **Na taṃ anugaṃ bhavissatīti** mettāya upapajjavedanīyabhāvassa upacchinnatā upapajjavedanīyavasena na anugataṃ bhavissati. Idaṃ sotāpannasakadāgāmiariyapuggalānaṃ paccavekkhaṇaṃ veditabbaṃ. **Anāgāmitāyāti** jhānānāgāmitāya. **Idhapaññassāti** imasmiṃ sāsane paññā idhapaññā nāma, sāsana-caritāya ariyapaññāya ṭhitassa ariyasāvakaṃ sātīti attho. **Uttarivimuttinti** arahattaṃ. Dasamaṃ uttānatthamevāti.

Karajakāyavaggo paṭhamo.

(22) 2. Sāmaññavaggaṇṇanā

221. Dutiyassa paṭhamam ādiṃ katvā sabbā peyyālatanti uttānatthāyevāti.

Manorathapūraṇiyā aṅguttaranikāya-aṭṭhakathāya

Dasakanipātassa saṃvaṇṇanā niṭṭhitā.

Namo tassa bhagavato arahato sammāsambuddhassa

Aṅguttaranikāye

Ekādasakanipāta-aṭṭhakathā

1. Nissayavaggo

1-6. Kimatthiyasuttādivaṇṇanā

1-6. Ekādasakanipātassa paṭhamādīni heṭṭhā vuttanayāneva. Kevalañcettha ādito pañcasu nibbidāviraṅgaṃ dvidhā bhindivā ekādasāṅgāni katāni. Chaṭṭhe sikkhāpaccakkhānaṃ adhikaṃ.

7-8. Paṭhamasaññāsuttādivaṇṇanā

7-8. Sattame **atthena atthoti** atthena saddhimattho. **Byañjanena byañjananti** byañjanena saddhiṃ byañjanaṃ. **Saṃsandissatīti** sampavattissati. **Samessatīti** samānaṃ bhavissati. **Na viggayhissatīti** na virajjhissati. **Aggapadasminti** nibbāne. Aṭṭhame paccavekkhaṇā kathitā.

9. Saddhasuttavaṇṇanā

9. Navame **doṇiyā baddhoti** yavasassadoṇiyā samīpe baddho. **Antaraṃ karitvāti** abbhantare katvā. **Jhāyatīti** cinteti. **Pajjhāyatīti** ito cito ca nānappakāraṃ jhāyati. **Nijjhāyatīti** nirantaravasena nibaddhaṃ jhāyati. **Pathavimpi nissāya jhāyatīti** samāpattiyam sanikantikavasenetam vuttaṃ.

Samāpattiyañhi sanikantikattā esa khaḷunke nāma kato. **Āpādīsipi** ese va nayo.

Kathañca saddha ājānīyabhāyitaṃ hotīti kathaṃ kāraṇākāraṇaṃ jānantassa sindhavassa jhāyitaṃ hoti. **Yathā iṇantiādīsū iṇasadisaṃ bandhanasadisaṃ dhanajānisadisaṃ** kalisaṅkhātamaḥāparādhasadisañca katvā attano abhimukhassa patodassa ajjhoharaṇasaṅkhātamaṃ patanaṃ vipassatīti attho. **Neva pathaviṃ nissāya jhāyati**ti samāpattisukhanikantiyā abhāvena pathaviārammaṇāya catukkapañcakajjhānasaññāya na jhāyati, niyantiyā abhāveneva so ājānīyo nāma hotīti. **Jhāyati ca panāti** nibbānārammaṇāya phalasaṃpattiyā jhāyati. **Pathaviyaṃ pathavisaññā vibhūtā hotīti** pathavārammaṇe uppannā catukkapañcakajjhānasaññā vibhūtā pākaṭā hoti. “Vibhūtā, bhante, rūpasaññā avibhūtā aṭṭhikasāññā”ti imasmiñhi sutte samatikkamaṃ atthitāya vibhūtā vuttā, idha pana vipassanāvasena aniccadukkhaṇattato diṭṭhattā vibhūtā nāma jātā. **Āposaññādīsipi** ese va nayo. Evamettha heṭṭhā viya samāpattivasena samatikkamaṃ avatvā vipassanācāravasena samatikkamaṃ vutto. **Evam jhāyati**ti evaṃ vipassanāpaṭipāṭiyā āgantvā uppādītāya phalasaṃpattiyā jhāyanto.

10. Moranivāpasuttavaṇṇanā

10. Dasame **accantaniṭṭho**ti antaṃ atītattā accantaṅkhātamaṃ avināsadhammaṃ nibbānaṃ niṭṭhā assāti accantaniṭṭho. Iminā nayena sesapadāni veditabbāni. **Janetasminti** janitasmim, pajāyāti attho. **Ye gottapaṭisārīnoti** ye janā tasmim gotte paṭisaranti “ahaṃ gotamo, ahaṃ kassapo”ti, tesu loke gottapaṭisārīsū khattiyō seṭṭho. **Anumatā mayāti**ti mama sabbaññūtaññāṇena saddhim saṃsandetvā desitā mayā anuññātā. Sesam sabbattha uttānatthamevāti.

Nissayavaggo paṭhamo.

2. Anussativaggo

1-2. Mahānāmasuttadvayaṇṇanā

11-12. Dutiyaṃ paṭhame **nānāvihārehi viharatanti** gihīnaṃ nibaddho eko vihāro nāma natthi, tasmā ambhākaṃ anibaddhavihārena viharantānaṃ kena vihārena katarena nibaddhavihārena vihātābanti pucchati. **Ārādhakoti** sampādako paripūrako. **Dhammasotasamāpanno buddhānussatiṃ bhāvetīti** dhammasotasamāpanno hutvā buddhānussatiṃ bhāveti. Dutiye **gilānā vuṭṭhitoti** gilāno hutvā vuṭṭhito.

3. Nandiyasuttavaṇṇanā

13. Tatiye **kalyāṇamitteti** sumitte. Evamettha kalyāṇamittavasena saṅghānussati kathitā. **Kabālikārāhārabhakkhānanti** kāmāvacaradevānaṃ. **Asamayavimuttoti** asamayavimuttiyā vimutto khīṇāsavo.

4. Subhūtisuttavaṇṇanā

14. Catutthe **ko nāmāyaṃ subhūtī bhikkhūti** jānantopi sathā kathāsamuṭṭhāpanatthaṃ pucchati. **Sudattassa upāsakassa puttoti** anāthapiṇḍikaṃ sandhāyāha. Anāthapiṇḍikassa hi putto attano cūlapitu santike pabbajito, atha naṃ subhūtithero ādāya sathu santikaṃ agamāsī. **Saddhāpadānesūti** saddhānaṃ puggalānaṃ apadānesu lakkhaṇesu.

5. Mettasuttavaṇṇanā

15. Pañcame **sukhaṃ supatīti** yathā sesajānā samparivattamānā kākacchamānā dukkhaṃ supanti, evaṃ asupitvā sukhaṃ supati. Niddaṃ okkamantopi samāpattiṃ samāpanno viya hoti. **Sukhaṃ**

paṭibujjhatīti yathā aññe nitthunantā vijambhamānā samparivattantā dukkhaṃ paṭibujjhanti, evaṃ appaṭibujjhivā vīkasamānaṃ viya padumaṃ sukhaṃ nibbikāro paṭibujjhanti. **Na pāpakaṃ supinaṃ passatī**ti supinaṃ passantopi bhaddakameva supinaṃ passati, cetiyaṃ vandanto viya pūjaṃ karonto viya ca dhammaṃ suṇanto viya ca hoti. Yathā panaññe attānaṃ corehi samparivāritaṃ viya vāḷehi upaddutaṃ viya papāte patantaṃ viya ca passanti, na evaṃ pāpakaṃ supinaṃ passati.

Manussānaṃ piyo hotīti ure āmukkamuttāhāro viya sīse piḷandhitamālā viya ca manussānaṃ piyo hoti manāpo. **Amanussānaṃ piyo hotī**ti yatheva manussānaṃ, amanussānampi piyo hoti visākhathero viya. Vatthu visuddhimagge (visuddhi. 1.258) mettākammaṭṭhānaniddese vitthāritameva. **Devatā rakkhantī**ti puttamiva mātāpitaro devatā rakkhanti. **Nāssa aggi vā visaṃ vā satthaṃ vā kamatī**ti mettāvihāriṣṣa kāye uttarāya upāsikāya viya aggi vā, saṃyuttabhāṇakacūlasāvatttherasseva visaṃ vā, saṃkiccasāmaṇerasseva satthaṃ vā na kamati nappavisati, nāssa kāyaṃ vikopetīti vuttaṃ hoti. Dhenuvatthumpi cettha kathayanti. Ekā kira dhenu vacchakassa khīradhāraṃ muñcamānā aṭṭhāsī. Eko luddako “taṃ vijjhissāmī”ti hatthena samparivattetvā dīghadaṇḍaṃ sattimū muñci. Sā tassā sarīraṃ āhacca tālapaṇṇaṃ viya vaṭṭamānā gatā, neva upacārabalena na appanābalena, kevalaṃ vacchake balavahitacittatāya. Evaṃ mahānubhāvā mettā.

Tuvaṭṭaṃ cittaṃ samādhiyātīti mettāvihārino khippameva cittaṃ samādhiyati, natthi tassa dandhāyitattaṃ. **Mukhavaṇṇo vippasīdatī**ti bandhanā pavuttatālapakkaṃ viya cassa vippasannaṃ mukhaṃ hoti. **Asammūḷho kālaṃ karotī**ti mettāvihārino sammohamaṇaṃ nāma natthi, asammūḷho pana niddaṃ okkamanto viya kālaṃ karoti. **Uttari appaṭivijjhantoti**ti mettāsamāpattito uttari arahattaṃ adhigantaṃ asakkonto ito cavitvā suttappabuddho viya brahmalokaṃ upapajjatīti.

6. Aṭṭhakanāgarasuttavaṇṇanā

16. Chaṭṭhe **dasamoti** jātigottavasena ceva sārappattakulagaṇanāya ca dasame ṭhāne gaṇiyati, tenassa dasamotveva nāmaṃ jātaṃ. **Aṭṭhakanāgaroti** aṭṭhakanagaravāsī. **Kukkuṭārāmeti** kukkuṭasetṭhinā kārite ārame.

Tena bhagavatā...pe... sammadakkhātoti ettha ayaṃ saṅkhepattho – yo so bhagavā samatiṃsa pāramiyo pūretvā sabbakilese bhañjitvā anuttaraṃ sammāsambodhiṃ abhisambuddho, tena bhagavatā tesam tesam sattānaṃ āsayānusayaṃ jānatā, hatthatale ṭhapitaṃ āmalakaṃ viya sabbañeyyadhamme passatā, apica pubbenivāsādīhi jānatā, dibbena cakkhunā passatā, tīhi vā vijjāhi chahi vā pana abhiññāhi jānatā, sabbattha appaṭihatena samantacakkhunā passatā, sabbadhammajānanasamatthāya paññāya jānatā, sabbasattānaṃ cakkhuvīsāyātītāni tirokuṭṭādīgatāni cāpi rūpāni ativīsuddhena maṃsacakkhunā vā passatā, attahitasādhikāya samādhipadaṭṭhānāya paṭivedhapaññāya jānatā, parahitasādhikāya karuṇāpadaṭṭhānāya desanāpaññāya passatā, antarāyikadhamme vā jānatā, niyyānikadhamme passatā, arīnaṃ hatatā arahatā, sammā sāmaṃ sabbadhammānaṃ buddhattā sammāsambuddhenāti evaṃ catuvesārajjavasena catūhi kāraṇehi thomitena atthi nu kho eko dhammo akkhātoti.

Abhisāṅkhatanti kataṃ uppāditaṃ. **Abhisāñcetayitanti** cetayitaṃ kappayitaṃ. **So tattha ṭhitoti** so tasmim samathavipassanādhamme ṭhito. **Dhammarāgena dhammanandiyāti**ti padadvayenapi samathavipassanāsu chandarāgo vutto. Samathavipassanāsu hi sabbena sabbaṃ chandarāgaṃ pariyaḍiyitūṃ sakkonto arahā hoti, asakkonto anāgāmī hoti. So samathavipassanāsu chandarāgassa appahīnatā catutthajjhānacetanāya suddhāvāse nibbattati. Ayaṃ ācariyānaṃ samānatthakathā.

Vitaṇḍavādī panāha – “teneva dhammarāgenāti vacanato akusalena suddhāvāse nibbattati”ti. So “suttaṃ āharāhi”ti vattabbo. Addhā aññaṃ apassanto idameva āharissati. Tato vattabbo “kimpanidaṃ suttaṃ nītatthaṃ, udāhu neyyattha”nti. Addhā “nītattha”nti vakkhati. Tato vattabbo – evaṃ sante anāgāmiṃphalattthikena samathavipassanāsu chandarāgo kattabbo bhavissati, chandarāge uppādite

anāgāmiṃ phalaṃ paṭiladdhaṃ bhavissati, mā “suttaṃ me laddha”nti yaṃ vā taṃ vā dīpehi. Pañhaṃ kathentena hi ācariyassa santike uggahetvā attharasam paṭivijjhivā kathetuṃ vaṭṭati. Akusalena hi sagge, kusalena ca apāye paṭisandhi nāma natthi. Vuttañcetam bhagavatā –

“Na, bhikkhave, lobhajena kammena, dosajena kammena, mohajena kammena devā paññāyanti, manussā paññāyanti, yā vā panaññāpi kāci sugatiyo. Atha kho, bhikkhave, lobhajena kammena, dosajena kammena, mohajena kammena nirayo paññāyati, tiracchānayo paññāyati, pettivisayo paññāyati, yā vā panaññāpi kāci duggatiyo”ti (a. ni. 6.39) –

Evam saññāpetabbo. Sace saññānāti, saññānātu. No ce saññānāti, “gaccha pātova vihāram pavisitvā yāguṃ pivā”ti uyyojetabbo.

Ayam kho, gahapati, ekadhammo akkhātō ekaṃ dhammaṃ pucchitena “ayampi ekadhammo akkhātō, ayampi ekadhammo akkhātō”ti evam pucchāvasena kathitattā ekādasapi dhammā ekadhammo nāma kato. Amatuppattiatthena vā sabbepi ekadhammoti vattum vaṭṭati.

Nidhimukhaṃ gavesantoti nidhiṃ pariyesanto. **Sakidevāti** ekappayogeneva. Kathaṃ pana ekappayogeneva ekādasannaṃ nidhīnaṃ adhigamo hotīti? Idhekacco araññe jīvitavuttiṃ gavesamāno carati. Tamenam aññataro atthacarako disvā “kiṃ, bho, carasī”ti pucchati. So “jīvitavuttiṃ pariyesāmi”ti āha. Itaro “tena hi samma āgaccha, etaṃ pāsānaṃ pavaṭṭehī”ti āha. So taṃ pavaṭṭetvā uparūpariṭṭhitā vā kucchiyā kucchiṃ āhacca ṭhitā vā ekādasā kumbhiyo passati. Evam ekappayogena ekādasannaṃ adhigamo hoti.

Ācariyadhaṇaṃ pariyesissanti aññatitthiyā hi yassa santike sippaṃ uggaṇhanti, tassa sippuggaṇato pure vā pacchā vā antarantarā vā gehato nīharitvā dhaṇaṃ denti. Yesam gehe natthi, te ñāṭisabhāgato pariyesanti. Yesam tampi natthi, te sabhāgato pariyesanti. Tathā alabhamānā bhikkhampi caritvā dentiyeva. Tam sandhāyetaṃ vuttaṃ.

Kim panāhanti bāhirakā tāva aniyyānikēpi sāsane sippamattadāyakassa dhaṇaṃ pariyesanti, aham pana evamvidhe niyyānikasāsane ekādasavidhaṃ amatuppattiṭṭipadaṃ desentassa ācariyassa pūjāṃ kiṃ na karissāmi, karissāmiyevāti vadati. **Paccekaṃ dussayugena acchādesīti** ekamekassa bhikkhuno ekekaṃ dussayugaṃ adāsīti attho. Samudācāravacanaṃ panettha evarūpaṃ hoti, tasmā acchādesīti vuttaṃ. **Pañcasatam vihāranti** pañcasataggaṇikaṃ pañṇasālaṃ kāresīti attho.

7. Gopālasuttavaṇṇanā

17. Sattame tisso kathā ekanāḷikā caturassā nisinnavattikāti. Tattha pāḷiṃ vatvā ekekassa padassa atthakathanam **ekanāḷikā** nāma. Apaṇḍitagopālakaṃ dassetvā, apaṇḍitabhikkhum dassetvā, paṇḍitagopālakaṃ dassetvā, paṇḍitabhikkhum dassetvāti catukkaṃ bandhitvā kathanam **caturassā** nāma. Apaṇḍitagopālakaṃ dassetvā pariyosānagamaṇam, apaṇḍitabhikkhum dassetvā pariyosānagamaṇam, paṇḍitagopālakaṃ dassetvā pariyosānagamaṇam, paṇḍitabhikkhum dassetvā pariyosānagamaṇanti ayam **nisinnavattikā** nāma. Ayam idha sabbācariyānaṃ āciṇṇā.

Ekādasahi, bhikkhave, aṅgehīti ekādasahi aṅgaṇakotṭhāsehi. **Gogaṇanti** gomaṇḍalaṃ. **Pariharitunti** pariggahetvā vicarituṃ. **Phātim kātunti** vaḍḍhiṃ āpādetuṃ. **Idhāti** imasmim loke. **Na rūpaññū hotīti** gaṇanato vā vaṇṇato vā rūpaṃ na jānāti. Gaṇanato na jānāti nāma attano gunnaṃ satam vā sahasaṃ vāti saṅkhyam na jānāti, so gāvīsu haṭṭasu vā palātāsu vā gogaṇam gaṇetvā “ajja ettakā na dissanti”ti dve tīṇi gāmantarāni vā aṭṭaviṃ vā vicaranto na pariyesati. Aññesaṃ gāvīsu attano gogaṇam paviṭṭhāsūpi gogaṇam gaṇetvā “imā ettikā gāvo na amhāka”nti yaṭṭhiyā pothetvā na nīharati. Tassa natṭhā gāvīyo natṭhāva honti. Paragāvīyo gahetvā carati. Gosāmikā disvā “ayam ettakaṃ kalam amhākaṃ dhenū duhi”ti tajjetvā attano gāvīyo gahetvā gacchanti. Tassa gogaṇopi parihāyati, pañca

gorasaparibhogatopi paribāhiro hoti. Vaṇṇato na jānāti nāma “ettikā gāvī setā, ettikā rattā, ettikā kālā, ettikā odātā, ettikā kabarā, ettikā nīlā”ti na jānāti. So gāvīsu haṭṭāsu vā palātāsu vā...pe... pañcagorasaparibhogatopi paribāhiro hoti.

Na lakkhaṇakusaloti gāvīnaṃ sarīre kataṃ dhanusattisūlādibhedam lakkhaṇam na jānāti. So gāvīsu haṭṭāsu vā palātāsu vā “ajja asukalakkhaṇā asukalakkhaṇā ca gāvo na dissanti”ti...pe... pañcagorasaparibhogatopi paribāhiro hoti.

Na āsāṭikam hāretāti gunnaṃ khāṇukaṇṭakādīhi pahaṭṭaṭṭhānesu vaṇo hoti. Tattha nīlamakkhikā aṇḍakāni ṭhapenti, tesam āsāṭikāti nāmaṃ. Tāni daṇḍakena apantvā bhesajjam dātabbam hoti, bālo gopālako tathā na karoti. Tena vuttaṃ – “na āsāṭikam hāretā hoti”ti. Tassa gunnaṃ vaṇā vaḍḍhanti, gambhīrā honti, pāṇakā kucchim pavisanti, gāvo gelaññābhībūtā neva yāvadattham tiṇam khādītum na pānīyam pātum sakkonti. Tattha gunnaṃ khīram chijjati, goṇānam javo hāyati, ubhayesampi jīvitantarāyo hoti. Evamassa gogaṇopi parihāyati...pe... pañcagorasatopi paribāhiro hoti.

Na vaṇam paṭicchādetā hotīti gunnaṃ vuttanayeneva sañjāto vaṇo bhesajjam datvā vākena vā cīrakena vā bandhitvā paṭicchādetabbo hoti. Bālagopālako tam na karoti. Athassa gunnaṃ vaṇehi yūsā paggharanti, tā aññamaññaṃ nighamsanti. Tena aññesampi vaṇā jāyanti. Evaṃ gāvo gelaññābhībūtā neva yāvadattham tiṇāni khādītum...pe... paribāhiro hoti.

Na dhūmam kattā hotīti antovasse ḍamsamakasādīnaṃ ussannakāle gogaṇe vajam pavitṭhe tattha tattha dhūmo kātabbo hoti. Apaṇḍitagopālako tam na karoti, gogaṇo sabbarattim ḍamsādīhi upadduto niddam alabhitvā punadivase araññe tattha tattha rukkhāmūlādīsu nipajjitvā niddāyati. Neva yāvadattham tiṇāni khādītum...pe... paribāhiro hoti.

Na tittham jānātīti titthampi samanti vā visamanti vā sagāhanti vā niggāhanti vā na jānāti. So atitthena gāvīyo otāreti. Tāsam visamatitthe pāsāṇādīni akkamantīnaṃ pādā bhijjanti. Sagāham gambhīram tittham otiṇṇe kumbhīlādayo gāvo gaṇhanti, “ajja ettikā gāvo naṭṭhā, ajja ettikā”ti vattabbatam āpajjanti. Evamassa go gaṇopi parihāyati...pe... pañcagorasatopi paribāhiro hoti.

Na pītam jānātīti pītampi apītampi na jānāti. Gopālakena hi “imāya gāvīyā pītam, imāya na pītam, imāya pānīyatitthe okāso laddho, imāya na laddho”ti evam pītāpītam jānitabbam hoti. Ayam pana divasabhāge araññe gogaṇam rakkhitvā “pānīyam pāyessāmi”ti nadiṃ vā taḷakam vā ogāhetvā gacchati. Tattha mahāusabhā ca anusabhā ca balavagāvīyo ca dubbalāni ceva mahallakāni ca gorūpāni siṅgehi vā phāsukāhi vā paharivā attano okāsam katvā ūruppamāṇam udakam pavisitvā yathākāmaṃ pivanti. Avasesā okāsam alabhamānā tīre ṭhatvā kalalamissakam udakam pivanti vā apītā eva vā honti. Atha so gopālako piṭṭhiyam paharivā puna araññaṃ paveseti. Tattha apītā gāvīyo pipāsāya sussamānā yāvadattham tiṇāni khādītum na sakkonti. Tattha gunnaṃ khīram chijjati. Goṇānam javo hāyati...pe... paribāhiro hoti.

Na vīthim jānātīti “ayam maggo samo khemo, ayam visamo sāsaṅko sappāṭibhayo”ti na jānāti. So samam khemam maggam vajjetvā gogaṇam itaramaggaṃ paṭipādeti. Tattha gāvo sīhabyagghādīnam gandhena coraparissayena ca abhībūtā bhantamigasappaṭibhāgā gīvam ukkhipitvā tiṭṭhanti, neva yāvadattham tiṇāni khādanti, na pānīyam pivanti. Tattha gunnaṃ khīram chijjati...pe... paribāhiro hoti.

Na gocarakusalo hotīti gopālakena hi gocarakusalena bhavitabbam, pañcāhikacāro vā sattāhikacāro vā jānitabbo. Ekadisāya gogaṇam cāretvā punadivase tattha na cāretabbo. Mahatā hi gogaṇena ciṇṇaṭṭhānam bheritalam viya suddham hoti nittiṇam, udakampi āluliyati. Tasmā pañcame vā sattame vā divase puna tattha cāretum vaṭṭati. Ettakena hi tiṇampi paṭiviruhati, udakampi pasīdati, ayam pana imam pañcāhikacāram vā sattāhikacāram vā na jānāti, divase divase rakkhitaṭṭhāneyeva rakkhati. Athassa gogaṇo harititiṇam na labhati, sukkhatiṇam khādanto kalalamissakam udakam pivati. Tattha

gunnaṃ khīraṃ chijjati...pe... paribāhiro hoti.

Anavasesadohī ca hotīti paṇḍitagopālakena hi yāva vacchakassa maṃsalohitaṃ saṅṭhāti, tāva ekaṃ dve thane ṭhapetvā sāvasesadohinā bhavitabbaṃ. Ayaṃ vacchakassa kiñci anavasesetvā duhati. Khīrapako vaccho khīrapipāsāya sussati, saṅṭhātuṃ asakkonto kampamāno mātu purato pativā kālaṃ karonti. Mātā puttakaṃ disvā, “mayhaṃ puttako attano mātukhīraṃ pātuṃ na labhati”’ti puttasaṅketa neva yāvadatthaṃ tiṇāni khāditaṃ na pānīyaṃ pātuṃ sakkoti, thanesu khīraṃ chijjati. Evamassa gogaṇopi parihāyati...pe... pañcagorasatopi paribāhiro hoti.

Gunnaṃ pitiṭṭhānaṃ karontīti **gopitaro**. Gāvo pariṇāyanti yathārucaṃ gahetvā gacchantīti **gopariṇāyaka**. **Te na atirekapūjāyāti** paṇḍito hi gopālako evarūpe usabhe atirekapūjāya pūjeti, paṇītaṃ gobhattaṃ deti, gandhapañcaṅgulikehi maṇḍeti, mālaṃ piḷandheti, siṅgesu suvaṇṇarajatakosake ca dhāreti, rattiṃ dīpaṃ jāletvā celavitānassa heṭṭhā sayāpeti. Ayaṃ pana tato ekasakkāraṃpi na karoti. Usabhā atirekapūjaṃ alabhamānā gogaṇaṃ na rakkhanti, parissayaṃ na vārenti. Evamassa gogaṇopi parihāyati...pe... pañcagorasatopi paribāhiro hoti.

Idhāti imasmim sāsane. **Na rūpaññū hotīti** “cattāri mahābhūtāni catunnañca mahābhūtānaṃ upādāyarūpa”’nti evaṃ vuttaṃ rūpaṃ dvihākārehi na jānāti gaṇanato vā samuṭṭhānato vā. **Gaṇanato na jānāti** nāma – “cakkhāyatanaṃ sotāyatanaṃ ghāṇāyatanaṃ jivhākāyārūpasaddagandharasaphoṭṭhabbāyatanaṃ, itthindriyaṃ purisindriyaṃ jīvitindriyaṃ kāyaviññatti vacīviññatti ākāśadhātu āpodhātu rūpassa lahutā, mudutā, kammaññatā, upacayo, santati, jaratā, rūpassa aniccatā, kabalīkāro āhāro”’ti (dha. sa. 657-665) evaṃ pāḷiyā āgatā pañcavīsati rūpakoṭṭhāsāti na jānāti. Seyyathāpi so gopālako gaṇanato gunnaṃ rūpaṃ na jānāti, tathūpamo ayaṃ bhikkhu. So gaṇanato rūpaṃ ajānanto rūpaṃ pariggahetvā arūpaṃ vavatthapetvā rūpārūpaṃ pariggahetvā paccayaṃ sallakkhetvā lakkhaṇaṃ āropetvā kammaṭṭhānaṃ matthakaṃ pāpetuṃ na sakkoti. So yathā tassa gopālakassa gogaṇo na vaḍḍhati, evaṃ imasmim sāsane sīlasamādhivipassanāmaggaḥalanibbānehi na vaḍḍhati. Yathā ca so gopālako pañcahi gorasehi paribāhiro hoti, evamevāyaṃ asekhena sīlakkhandhena asekhena samādhipaññāvimutti vimuttiñānadassanakkhandhenāti pañcahi dhammakkhandhehi paribāhiro hoti.

Samuṭṭhānato na jānāti nāma – “ettakaṃ rūpaṃ ekasamuṭṭhānaṃ, ettakaṃ dvisamuṭṭhānaṃ, ettakaṃ tisamuṭṭhānaṃ, ettakaṃ catusamuṭṭhānaṃ, ettakaṃ nakutoci samuṭṭhātī”’ti na jānāti. Seyyathāpi so gopālako vaṇṇato gunnaṃ rūpaṃ na jānāti, tathūpamo ayaṃ bhikkhu. So samuṭṭhānato rūpaṃ ajānanto rūpaṃ pariggahetvā...pe... paribāhiro hoti.

Na lakkhaṇakusalo hotīti “kammalakkhaṇo bālo, kammalakkhaṇo paṇḍito”’ti evaṃ vuttaṃ kusalākusalakammaṃ paṇḍitabālalakkhaṇanti na jānāti. So evaṃ ajānanto bāle vajjetvā paṇḍite na sevati. Bāle vajjetvā paṇḍite asevanto kappiyākappiyaṃ kusalākusalaṃ sāvajjānavajjaṃ garukalahukaṃ satekicchātekkicchaṃ kāraṇākāraṇaṃ na jānāti. Taṃ ajānanto kammaṭṭhānaṃ gahetvā vaḍḍhetuṃ na sakkoti. So yathā tassa gopālakassa gogaṇo na vaḍḍhati, evaṃ imasmim sāsane yathāvuttehi sīlādīhi na vaḍḍhati. So gopālako viya ca pañcahi gorasehi, pañcahi dhammakkhandhehi paribāhiro hoti.

Na āsāṭikaṃ hāretā hotīti “uppannaṃ kāmavitakka”’nti evaṃ vutte kāmavitakkādayo na vinodeti. So imaṃ akusalavitakkaṃ āsāṭikaṃ ahāretvā vitakkavasiko hutvā vicaranto kammaṭṭhānaṃ gahetvā vaḍḍhetuṃ na sakkoti. So yathā tassa gopālakassa...pe... paribāhiro hoti.

Na vaṇaṃ paṭicchādetā hotīti “cakkhunā rūpaṃ disvā nimittaggāhī hotī”’tiādīnā nayena sabbārammaṇesu nimittaṃ gaṇhanto yathā so gopālako vaṇaṃ na paṭicchādeti, evaṃ saṃvaramaṃ na sampādeti. So vivaṭadvāro vicaranto kammaṭṭhānaṃ gahetvā vaḍḍhetuṃ na sakkoti...pe... paribāhiro hoti.

Na dhūmaṃ kattā hotīti so gopālako dhūmaṃ viya dhammadesanādhūmaṃ na karoti, dhammakathaṃ vā sarabhaññaṃ vā upanisinnakakathaṃ vā anumodanaṃ vā na karoti, tato naṃ manussā “bahussuto guṇavā”ti na jānanti. Te guṇaguṇaṃ ajānanto catūhi paccayehi saṅghaṃ na karonti. So paccayehi kilamamāno buddhavacanaṃ sajjhāyaṃ kātuṃ vattapaṭivattaṃ pūretuṃ kammaṭṭhānaṃ gahetvā vaḍḍhetuṃ na sakkoti...pe... paribāhiro hoti.

Na titthaṃ jānātīti titthabhūte bahussutabhikkhū na upasaṅkamati. Anupasaṅkamanto “idaṃ, bhante, byañjanaṃ kathaṃ ropetabbaṃ? Imassa bhāsitaṃ ko attho? Imasmiṃ ṭhāne pāli kiṃ vadati? Imasmiṃ ṭhāne attho kiṃ dīpetī”ti evaṃ na paripucchati na paripaṇhāti, na jānāpetīti attho. Tassa te evaṃ aparipucchitā avivaṭaṅgeva na vivaranti, bhājetvā na dassenti, anuttānīkakaṅkaṇa na uttāniṃ karonti, apākaṭaṃ na pākaṭaṃ karonti. **Anekavihitesu ca kaṅkhāṭṭhāniyesu dhammesūti** anekavidhāsu kaṅkhāsu ekakaṅkhampi na paṭivinodenti. Kaṅkhāyeva hi kaṅkhāṭṭhāniyā dhammā nāma. Tattha ekaṃ kaṅkhampi na nīharantīti attho. So evaṃ bahussutatitthaṃ anupasaṅkamitvā sakaṅkho kammaṭṭhānaṃ gahetvā vaḍḍhetuṃ na sakkoti. Yathā vā so gopālako titthaṃ na jānāti, evaṃ ayampi bhikkhu dhammatitthaṃ na jānāti. Ajānanto avisaye paṇhaṃ pucchati, ābhidhammikaṃ upasaṅkamitvā kappiyākappiyaṃ pucchati, vinayadharaṃ upasaṅkamitvā rūpārūpaparicchedaṃ pucchati. Te avisaye puṭṭhā kathetuṃ na sakkonti. So attanā sakaṅkho kammaṭṭhānaṃ gahetvā vaḍḍhetuṃ na sakkoti...pe... paribāhiro hoti.

Na pītaṃ jānātīti yathā so gopālako pītāpītaṃ na jānāti, evaṃ dhammūpasaṅghitaṃ pāmojjaṃ na jānāti na labhati. Savanamayaṃ puññakiriyaṃ gantvā nissāya ānisaṃsaṃ na vindati, dhammassavanaggaṃ gantvā sakkaccaṃ na suṇāti, nisinna niddāyati, kathaṃ katheti, aññavihitako hoti. So sakkaccaṃ dhammaṃ assuṇanto kammaṭṭhānaṃ gahetvā vaḍḍhetuṃ na sakkoti...pe... paribāhiro hoti.

Na vīthiṃ jānātīti so gopālako maggāmaggaṃ viya “ayaṃ lokiyo, ayaṃ lokuttaro”ti ariyaṃ aṭṭhaṅgikaṃ maggaṃ yathābhūtaṃ nappajānāti. Ajānanto lokiyamagge abhinivisitvā lokuttaraṃ nibbattetuṃ na sakkoti...pe... paribāhiro hoti.

Na gocarakusalo hotīti so gopālako pañcāhikasattāhikacāre viya cattāro satipaṭṭhāne “ime lokiya, ime lokuttara”ti yathābhūtaṃ nappajānāti. Ajānanto sukhumāṭṭhānesu attano ñāṇaṃ carāpetvā lokiyasatipaṭṭhāne abhinivisitvā lokuttaraṃ nibbattetuṃ na sakkoti...pe... paribāhiro hoti.

Anavasesadohī hotīti paṭiggahaṇe mattaṃ ajānanto anavasesaṃ duhati. Niddesavāre panassa **abhihaṭṭhuṃ pavārentīti** abhiharitvā pavārenti. Ettha dve abhihārā vācābhihāro ca, paccayābhihāro ca. **Vācābhihāro** nāma manussā bhikkhussa santikaṃ gantvā “vadeyyātha, bhante, yenattho”ti pavārenti. **Paccayābhihāro** nāma vatthādīni vā sappinavanītapahānitādīni vā gahetvā bhikkhussa santikaṃ gantvā “gaṇhatha, bhante, yāvatakena attho”ti vadanti. **Tatra bhikkhu mattaṃ na jānātīti** bhikkhu tesu paccayesu pamāṇaṃ na jānāti. “Dāyakassa vaso veditabbo, deyyadhammassa vaso veditabbo, attano thāmo veditabbo”ti iminā nayena pamāṇayuttakaṃ aggahetvā yaṃ āharanti, taṃ sabbaṃ gaṇhātīti attho. Manussā vippaṭisārino na puna abhiharitvā pavārenti. So paccayehi kilamanto kammaṭṭhānaṃ gahetvā vaḍḍhetuṃ na sakkoti...pe... paribāhiro hoti.

Te na atirekapūjāya pūjetā hotīti so gopālako mahāusabhe viya there bhikkhū imāya āvi ceva raho ca mettākāyakkammādikāya atirekapūjāya na pūjeti. Tato therā “ime amhesu garucittikāraṃ na karontī”ti navake bhikkhū dvīhi saṅgahehi na saṅgaṇhanti, neva dhammasaṅghaṇa saṅgaṇhanti, na āmisasaṅghaṇa, cīvarena vā pattena vā pattapariyāpannena vā vasanaṭṭhānena vā kilamantepi nappaṭijagganti, pāliṃ vā aṭṭhakathaṃ vā dhammakathābandhaṃ vā guḷhaganthaṃ vā na sikkhāpentī. Navakā therānaṃ santikā sabbaso ime dve saṅgahe alabhamānā imasmiṃ sāsane patiṭṭhātuṃ na sakkonti. Yathā tassa gopālakassa gogaṇo na vaḍḍhati, evaṃ sīlādīhi na vaḍḍhanti. Yathā ca so gopālako pañcahi gorasehi, evaṃ pañcahi dhammakhandhehi paribāhirā honti. Sukkapakkho kaṇhapakkhe

vuttavipallāsavasena yojetvā vedītabbo.

Anussativaggo dutiyo.

Manorathapūraṇiyā aṅguttaranikāya-aṭṭhakathāya

Ekādasakanipātassa saṃvaṇṇanā niṭṭhitā.

Nigamanakathā

Ettāvatā ca –

Āyācito sumatinā therena **bhadantajotipālena**;
Kañcīpurādīsu mayā pubbe saddhiṃ vasantena.

Varatambapaṇṇidīpe mahāvihāramhi vasanakālepi;
Pākaṃ gate viya dume valañjamānamhi saddhamme.

Pāraṃ piṭakattayasāgarassa gantvā tḥitena sumatinā;
Parisuddhājīvenābhīyācito jīvakenāpi.

Dhammakathāya nipuṇaparamanikāyassaṭṭhakathaṃ āraddho;
Yamaṃ cīrakālaṭṭhitimicchanto sāsānavarassa.

Sā hi mahāaṭṭhakathāya sāramādāya niṭṭhitā esā;
Catunavuttiparimāṇāya pāḷiyā bhāṇavārehi.

Sabbāgamasāṃvaṇṇanamanoratho pūrito ca me yasmā;
Etāya **manorathapūraṇī**ti nāmaṃ tato assā.

Ekūnasatṭhimatto visuddhimaggopi bhāṇavārehi;
Atthappakāsānatthāya āgamānaṃ kato yasmā.

Tasmā tena sahāyaṃ gāthāgaṇanāyena aṭṭhakathā;
Tīhādhikadiyaḍḍhasataṃ viññeyyā bhāṇavārānaṃ.

Tīhādhikadiyaḍḍhasatappamāṇamīti bhāṇavārato esā;
Samayaṃ pakāsāyantī mahāvihārādhivāsīnaṃ.

Mūlaṭṭhakathāsāraṃ ādāya mayā imaṃ karontena;
Yaṃ puññamupacitaṃ tena hotu loko sadā sukhītoti.

Paramavisuddhasaddhābuddhivīriyappaṭimaṇḍitena
sīlācārajjavamaddavādiguṇasamudayasamudītena sakasamayāsamayantaragahanajjhogāhanasamatthena
paññāveyyattiyasamannāgatena tipītakapariyattippabhede sātṭhakathe satthu sāsane
appaṭihatañāṇappabhāvena mahāveyyākaraṇena
karaṇasampattijanitasukhavinigatamadhurodāravacanalāvaṇṇayuttana yuttamuttavādīnā vādīvarena
mahākavīnā pabhinnapaṭisambhidāparivāre chaḷabhiññādīppabhedaguṇappaṭimaṇḍite
uttarimanussadhamme suppaṭiṭṭhitabuddhīnaṃ therānaṃ theravaṃsappadīpānaṃ mahāvihāravāsīnaṃ
vaṃsālaṅkārabhūtena suvipulavisuddhabuddhīnā **buddhaghosoti** garūhi gahitanāmadheyena therena

katā ayaṃ **manorathapūraṇī** nāma aṅguttaranikāyaṭṭhakathā –

Tāva tiṭṭhatu lokasmiṃ, lokanittaraṇesinaṃ;
Dassenti kulaputtānaṃ, nayaṃ cittavisuddhiyā.

Yāva buddhoti nāmampi, suddhacittassa tādino;
Lokamhi lokajeṭṭhassa, pavattati mahesinoti.

Manorathapūraṇī nāma

Aṅguttaranikāya-aṭṭhakathā sabbākārena niṭṭhitā.